





Presented to
The Library
of the
University of Toronto
by

The Estate of the late
G. Percival Best, Esq.







OEUVRES MORALES

DE PLUTARQUE, TRANSLATEES de Grec en François, reueuës & corrigees en ceste seconde Edition en plusieurs passages par le Traducteur.

Le II. Volume du I. Tome, qui contient XII. Traictez.

- | | | |
|-------|-----------------------------------------------------------------------|-----|
| I. | Qu'il faut qu'un Philosophe conuerse avec les Princes. | 337 |
| II. | Qu'il est requis qu'un Prince soit sçauant. | 342 |
| III. | Que le vice est suffisant pour rendre l'homme malheureux. | 347 |
| IIII. | Comment on se peult louer soy mesme sans reprehension. | 351 |
| V. | Quelles passions sont les pires, celles de l'ame, ou celles du corps. | 365 |
| VI. | Les Preceptes de Mariage. | 368 |
| VII. | Le Banquet des sept Sages. | 381 |
| VIII. | Instruction pour ceulx qui maniēt affaires d'estat. | 409 |
| IX. | Si l'homme d'aage se doit encore mesler des affaires publiques. | 455 |
| X. | Les dicts notables des anciens Roys, Princes & grands Capitaines. | 479 |
| XI. | Les dicts notables des Lacedemoniens. | 537 |
| XII. | Les vertueux faicts des femmes. | 590 |

A PARIS.

De l'Imprimerie de Michel de Vascosan.

M. D. LXXIIII.

AVEC PRIVILEGE DV ROY.

OEUVRES MORALES
DE PLUTARQUE TRADUITES

par M. de Goussier, Professeur de Littérature
Grecque au Collège de France, et de la Faculté
de Théologie de Paris.

Le 11 Volonté de l'Esprit
de l'Esprit de l'Esprit

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre

On a fait de ce livre
un livre



QV'IL FAVLT QV'VN
PHILOSOPHE CONVER-
SE PRINCIPALEMENT AVEC
LES PRINCES ET
grands Seigneurs.



MBRASSER vn amour commun, & rechercher ou accepter & entretenir vne amitié qui peult estre vtile & fructueuse à plusieurs en particulier, & encore plus en commun, c'est le faict d'hommes sages, honestes, & affectionnez au bien public, non pas, comme quelques vns estiment, ambitieux & conuoiteux d'honneur: mais au contraire, celuy là doit estre reputé ambitieux, ou bien pusillanime, qui fuit & a peur que lon ne l'appelle courtisan, poursuyuant & caressant les Princes & grands seigneurs. Car que dira le seigneur qui sera guerissable desirieux d'apprendre, & ne demandera que d'accointer quelque philosophe? Quoy, fauldra il doncques que ie deuiéne vn Simon le fauetier, ou vn Dionysius maistre d'Eschole, au lieu d'un Peri-

cles ou d'un Caton, à fin que ce philosophe deuise
 avec moy, & qu'il s'approche de moy, comme So-
 crates faisoit iadis avec ceux là: au cōtraire, Ariston
 de Chio estant repris & blasimé par les sophistes de
 son temps, de ce qu'il deuisoit à tous ceulx qui le
 » vouloient ouir: A la mienne volonté, dit il, que les
 » bestes mesmes peussent entendre les propos qui
 » excitent les cœurs à aimer la vertu. Et nous fuirons
 les moiens & occasions de hanter & deuiser avec
 les grands personnages & puissans seigneurs, com-
 me si c'estoient hommes farouches & sauuages: La
 parole & doctrine de la philosophie n'est point vn **E**
 tailleur d'images pour faire des statues mornes &
 muettes, sans sentiment quelconque, à poser des-
 sus vn soubbaisement, comme dit Pindare, ains
 veut rendre les cœurs des hommes qu'elle touche
 actifs & vifs: elle leur imprime des esclans de bonne
 volonté qui les incitent, des iugemens qui les ti-
 rent à toutes choses profitables au public, des in-
 tentions desireuses de toute honnesteté, vn coura-
 ge grand & hault avec assurance & bonté: toutes
 lesquelles parties font que les hommes entédus au
 faict de gouuernement sont plus aises de deuiser, **F**
 conuerfer & hanter avec les personnes de grande
 puissance & autorité, & non sans cause, car le me-
 decin excellent & gentil prendra tousiours plus de
 plaisir à medeciner vn œil qui voit pour plusieurs,
 & qui en garde plusieurs: aussi le philosophe sera
 plus affectionné à prendre soing de cultiuer vn
 esprit & vne ame qui doit estre vigilante, qui doit
 estre sage, prudente & iuste pour plusieurs. Et fil
 est

A est entendu en la science de trouuer, assembler & conduire les eaux, ainsi comme lon dit que Hercules l'estoit, & plusieurs autres anciens, il ne prendra ia plaisir d'aller en quelque coing de desert, loing de la frequēce des hommes, pres le rocher du corbeau, cōme dit le poëte, creuser celle mare des porchers Arethuse, ains s'estudiera de descouuir les sources vifues de quelque ruisseau ou riuiera pour abbreuuer vne grosse ville, ou vn camp, ou pour arroser les iardins & vergers de quelque Roy : suyuant quoy nous oions qu'Homere appelle Minos

B Oaristes de Iupiter, c'est à dire, ainsi que Platō misme l'interprete, familier & disciple: Car il n'entendoit pas que les disciples des Dieux fussent personnes priuées, casaniers, viuans en oysifueté en leur maison sans riē faire, ains Princes & Roys, lesquels estans sages, prudents, iustes, debōnaires & magnanimes, tous ceulx qui auroient à viure soubs eux & à estre commandez par eux, en seroient beneicts & bienheureux. Il y a vne herbe que lon appelle Eryngium, le chardon à cent testes, laquelle a ceste propriēté, que depuis qu'vne chéure la prent en sa

C bouche, elle s'arreste tout court, & tout le troupeau aussi semblablement, iusques à ce que le cheurier la luy viēne oster: les defluxions aussi qui procedent des hommes de grande puissance & grande authorité, cōme sont les Roys, ont pareille vitesse & celerité, laquelle se dilate en vn momēt, & comme vn feu saisit & gaigne ce qui est voisin à l'environ. Et puis si la parole & remonstrance d'un Philosophe s'adresse à vn hōme priué, qui aime à vi-

ure en repos, & se borne luy mesme comme d'un centre & d'une circonferéce geometrique, d'avoir ce qui luy est nécessaire pour l'entretienement de sa personne, elle ne se distribue point à d'autres, ains aiant composé en luy seul une grande tranquillité, & grand calme de toutes perturbations, elle se fene, vieillit & se termine incontinent : mais au contraire, si elle remonstre à un magistrat, un homme de gouvernement, un homme d'affaires, & qu'elle le remplisse de vertu & de bonté, par le moien d'un seul elle fait du bien à infinis : comme Anaxagoras qui se teint avec Pericles, Platon avec Dion, Pythagoras avec les Princes & Seigneurs de l'Italie, & Caton luy mesme partant du camp nauigua en Asie pour voir Athenodorus : Scipion enuoya querir Panætius, quand le Senat le com-
meit & deputa pour aller visiter & syndiquer quelle iustice ou iniustice regnoit par le monde, ainsi que dit Possidonius. Que devoit doncques alors dire Panætius ? Si tu estois un Castor ou un Pollux, ou quelque autre tel homme priué, voulant fuir la frequéce des villes, & te retirer en quelque coing d'eschole apart, pour illec à loisir & en
plein repos coudre & descoudre, plier & desplier les syllogismes des Philosophes, i'eusse volontiers accepté l'offre que tu me fais, & fusse allé demourer avec toy : mais pource que tu es le fils de Paulus Æmylius, qui a esté par deux fois Consul, & arriere fils de Scipion l'Affricain, celui qui deffait Hannibal de Carthage, ie ne deuiferay point avec toy. Et de dire maintenant qu'il y a double raison

A & parole, l'une interieure ou mentale, que lon dit estre don de Mercure, surnommé Hegemon, c'est à dire, guide : & l'autre proferee, qui est messagere & instrumentale pour donner à entendre ses conceptions, cela est tout rāce & moisy de vieillesse, & doit estre compris dessoubs cest ancien prouerbe,
 20 Le sçauois cela deuant que Theognis fust né : mais toutesfois encore ceste distinction-là ne fait rien cōtre ce que nous disons : Car de l'une & de l'autre parole, tant de celle qui demeure en la pensee, que de celle qui se prononce & se profere dehors, la fin
 B est amitie de l'une enuers soy-mesme, & de l'autre enuers autrui, car celle-là tendāt au but de la vertu par les enseignements de la philosophie, rend l'hōme accordāt tousiours avec soy-mesme, ne se plaignant iamais, ny se repentāt de rien, plein de paix, plein d'amour & de contentement de soy-mesme,

Ses mēbres n'ont nulle sedition,

Estrange entre eulx, nulle dissention,

nulle passion rebelle & desobeissante à la raison, nul combat de volonté contre volonté, nulle repugnāce de discours à discours. Il n'y a point d'amertume turbulente, meslee avec ioye, comme sur les confins de desir, de repentāce & regret, ains y sont toutes choses vniement doulces, paisibles & amiables, & font que chascun iouissant de tant & tant de biens se contente & s'esjouist de soy-mesme. Et quant à l'autre sorte de raison & de parole proferee, Pindarus dit que la Muse n'estoit point anciennement auaricieuse, aimant le gain, ny mercenaire, & croy qu'encore ne l'est elle pas mainte-

nant, mais par l'ignorāce & nonchalance des hom- **D**
mes ne se souciās de bien ny d'honneur, Mercure,
qui parauant estoit gratuit & commun, est deuenü
traffiqueur, ne voulāt rien faire sans estre payé : car
il n'est pas vraysemblable que Venus se soit iadis
mortellement courroucée à l'encontre des filles de

Aucuns li Prospolus, pource que ce furent elles qui les pre-
sēt μύσα, mieres machinerent de semer haines & inimitiez
les autres entre les ieunes hōmes, & que Vrania, Clio & Cal-
lisent en liopé se contentent ou prennent plaisir à ceux qui
ce lieu μi- corrompent la dignité des lettres pour de l'argent,
σα, & ains m'est aduis que les œuures & les dons des **E**
fauldroit Muses doiuent estre encore plus amiables & plus
le rendre, gracieux, que non pas ceulx de Venus, car l'hon-
semer des neur que d'aucuns se proposent pour la fin & le
haines & but du sçauoir & des lettres, a esté tenu cher, pour
inimitiez ce que c'est vn principe & vn seminaire d'amitié:
entre les mais qui plus est, le commun des hommes mesure
ieunes l'honneur à la bienueillance, estimans que nous
hōmes. ne louons seulemēt que ceux là que nous aimons.
Mais ceulx là font comme Ixion, qui poursuuant
d'amour la deesse Iuno tomba en vne nuee : aussi
au lieu d'amitié ils ambrassent hōneur image vai- **F**
ne, tromperesse, poimpeuse, vagabonde & incer-
taine : mais l'homme de bon sens & de bon iuge-
ment, si l'entremet d'affaires & du gouuernemēt
de la chose publique, il ne conuoitera d'honneur
sinon autant qu'il en aura de besoing pour entre-
tenir son autorité & son credit, à fin que lon se
fie en luy au maniemēt des affaires : car il n'est ny
plaisant ny facile de profiter à ceulx qui ne le veu-
lent

A lent pas, & la disposition de le vouloir procede de se fier: ne plus ne moins que la lumiere est plus le bien de ceux qui voyét, que de ceux qui sont veuz: aussi est l'honneur plus vtile à ceulx qui sentent qui en est digne, qu'à ceulx qui ne sont pas mesprizez. Mais celuy qui ne se mesle point d'affaires, qui vit avec soy-mesme, & constitue son bien à viure à part en loisir & en repos, saluë de loing la vaine gloire & populaire, dont iouissent les autres qui versent en la veuë des peuples, & en pleins theatres: tout ainfi qu'Hippolytus, qui estoit chaste, saluoit de loing la deesse Venus: mais celle qui procede des gens de bien & d'honneur, il ne la refuse ny ne la mesprise pas. Quand il est question d'amitié, il ne faut pas chercher à l'auoir & contracter seulement avec ceux qui ont les biens, la gloire, le credit & l'autorité de grâds seigneurs, mais aussi ne faut il pas fuir ces qualitez là, quand elles sont conioinctes avec vne nature doulce & des mœurs moderees. Le philosophe ne cherche pas les beaux & bien formez ieunes hommes, ains ceux qui sont dociles, bien conditionnez & conuoiteux de sçauoir:

C mais aussi fils ont & beauté de visage, & bonne grace, & fleur de ieunesse, cela ne luy fera pas peur de s'en approcher, ny les beaux traicts de visages ne le chasseront pas d'aupres de ceux qu'il sentira dignes que lon en prêne soing & que lon y employe sa peine: aussi quâd la puissance, la richesse, & l'autorité de prince se trouuera en vn hōme de bōne nature, gracieux & honeste, il ne laissera pas de l'aimer & de le caresser pour cela, ny ne craindra pas

qu'on l'appelle courtifan ny careffant les grands. D

Ceux qui par trop fuyant Venus eſtrient,

Faillent autant que ceux qui trop la ſuiuent:
ainſi en eſt il de l'amitié des Princes & des grands
ſeigneurs : parquoy le philoſophe qui ne ſe meſle-
ra point d'affaires, ne les fuira point, mais le ciuil
qui ſ'empeschera du maniement de la choſe publi-
que, les recherchera, non les faſchant pour ſe faire
ouyr, ny leur chargeant les oreilles de contes, mais
ſ'accommodant volontiers à les hanter, paſſer le
temps, & deuifer avec eux quand ils le veulent.

-de Berecynthe

Les plaines ont de long douze iournees,

Qui tous les ans par moy ſont engrenees.

celuy qui dit cela, ſ'il euſt autant aimé les hom-
mes, comme il aimoit le labourage, euſt plus vo-
lontiers cultiué & enſemencé celle terre qui pou-
uoit nourrir ſi grande multitude d'hommes, que la
petite meſtairie d'Antifthenes, qui à peine pouuoit
ſuffire à le nourrir luy ſeul * * Et touteſois Epi-
curus, qui mettoit le ſouuerain bien de l'homme
en vn tref-profond repos, comme en vn port cou-
uert de tous les vents & de toutes les vagues du
monde, dit, que le faire bien à autrui eſt non ſeule-
ment plus honeſte que le receuoir bien d'autrui,
mais encore plus plaſant, car il n'y a rien qui en-
gendre tant de ioye que fait la Grace, c'eſt à dire, la
beneficéce : & auoit bõ iugemēt celuy qui impoſa
les noms aux trois Graces, Aglaïa, Euphroſyné, &
Thalia, car certainemēt la ioye & le contentement
eſt bien plus grand & plus net en celuy qui donne

- A la grace, qu'en celuy qui la reçoit. Voyla pour-
 quoy plusieurs souuent rougissent de honte quād
 on leur fait du bien, là où lon est tousiours bien ai-
 se quand on en fait. Or font bien à tout vn peuple
 ceux qui rendent gens de bien, ceux dont le peu-
 ple ne se peut passer: comme au contraire ceux qui
 gastent & corrompent les Princes, les Roys, & les
 seigneurs, comme font les flatteurs, les calomnia-
 teurs & faux accusateurs, sont en abominations de
 tous, & punits par tous, comme ceux qui iettent
 vn poison mortel, non en vne coupe, ains en vne
 B fontaine qui coule en public, de laquelle ils voyent
 que tout le monde boit. Tout ainsi dōcques com-
 me Eupolis dit, en se mocquant des flatteurs pour-
 suiuians de repeuë franche, du riche Callias, qu'il
 n'y auoit ny feu, ny fer, ny cuiure qui les peust en-
 garder d'aller soupper chez luy: mais les mignons
 & fauoris d'un tyran Apollodorus, ou d'un Phala-
 ris, ou d'un Dionysius, apres le deces de leurs mai-
 stres on les gehenna, on les escorcha, on les brusta,
 & les meit on au reng des hommes maudits &
 damnez, pour ce que ceux la ne faisoient tort qu'à
 C vn seul, & ceux cy en outrageoient plusieurs, en en
 deprauiant vn tout seul, qui estoit le Seigneur: aus-
 si ceux qui demeurent ou hantent avec des hom-
 mes priuez, ils les rendent bien contents, innocets,
 doux & gracieux en eux mesmes, mais celuy qui à
 vn seigneur & magistrat oste vne mauuaise con-
 dition, ou luy dresse sa volonté & son intention là
 où il faut, celuy là philosophe pour le public, &
 corrige le moule & le patron auquel tous les sub-

iects sont formez & gouuernez. Les citez & repu-
bliques bien policees decernent & deferent hon-
neur & reueréce aux presbtres, pource qu'ils priét
& demandent aux Dieux des biens, non pour eux
seuls, ny pour leurs parents & amis seulement, mais
vniuersellement pour tous les citoiens: & toutefois
les presbtres ne rendent pas les Dieux bons, ny
donneurs de biens, mais estants tels d'eux mesmes,
ils les prient & reclament: mais les Philosophes qui
viuent & conuersent avec les princes & seigneurs,
les rendent plus iustes, plus moderez & plus affe-
ctionnez à bien faire: au moien dequoy il est vray-
semblable, qu'ils en reçoient aussi plus d'aïse &
plus de contentement. Et m'est aduis, quât à moy,
que vn ouurier qui fait les luts & lyres, prendra
plus de plaisir à faire vne lyre, quand il sçaura que
celuy qui la possedera en edificera les murailles de
la ville de Thebes, comme iadis feit Amphion: ou
en appaisera vne grande sedition, comme fut celle
des Lacedemoniens que Thaletas le Candiot pa-
cifia, en chantant sur sa lyre & les addoulcissant. Et
semblablement aussi vn charpentier, faisant le gou-
uernal & timon d'une galere, sera plus resiouy,
quand il entendra que ce timon seruira à gouuer-
ner la galere capitanesse, dedans laquelle Themis-
tocles combattra contre les Perses pour la defen-
se de la liberté de la Grece, ou bien celle de Pom-
peius, avec laquelle il deffit en bataille nauale
l'armee des Pirates. Que cuydez vous doncques
que le philosophe pensera de sa parole & de sa do-
ctrine, quand il viendra discourir en luy mesme,
que

A que celuy qui la receura, estant homme d'autorité, prince ou grand seigneur, fera vn bien public, par ce qu'il rendra le droit iustement à vn chascun, il fera de bonnes loix & ordonnances, il punira les meschants, & auancera les gens de bien & d'honneur. Il m'est aduis certainemēt qu'un gentil charpentier & faiseur de nauires fera plus volontiers vn timon, quand il sçaura qu'il seruira à regir la grande naue d'Argo renommee par tout: & semblablement qu'un charron ne mettra pas si volontiers la main à faire vne charrue ou vn charriot, qu'il fera les aixieux sur lesquels il sçaura que Solon deura engrauer ses loix. Or les discours & raisons des Philosophes, si vne fois elles sont bien & fermement imprimees es ames des grands personnages, qui ont le gouuernement des estats en main, & qu'elles y prennent pied, elles ont force & efficace de viues loix. Ce fut pourquoy Platon nauigua en Sicile, esperant que les sentences de sa philosophie vaudroient loix, & produiroient de bons & profitables effectz es affaires de Dionysius, mais il trouua que Dionysius estoit comme vne de ces tablettes ia toute pleine de ratures & de fouillures, qui ne pouuoit plus laisser la taincture de la tyrannie, pource qu'elle auoit desia percé & penetré iusques au fond, & ne se pouuoit plus effacer: là où il faut que ceux qui sont pour faire leur profit de bons aduertissemens, soient encore en mouuement.

QV'IL EST REQVIS QV'VN

PRINCE SOIT

ſçauant.



Es habitans de la ville de Cyrene prierēt vne fois Platon de leur donner par escript les bonnes loix, & de leur dresser & ordonner le gouuernement de leur estar: ce qu'il refusa de faire, disant **E** qu'il estoit bien malaisé de donner loix aux Cyreniens, qui estoient si riches & si opulents: car il n'est rien si haut à la main, si fa-rouche, ne si malaisé à domter & manier, qu'un personnage qui s'est persuadé d'estre heureux. Voyla pourquoy il est bien difficile de conseiller les Princes & seigneurs, comment ils se doiuent gouuerner, car ils craignent de receuoir & admettre la raison, comme vn maistre qui leur commande, de peur qu'elle ne leur oste ou retrenche ce qu'ils estiment le bien de leur grandeur & puissance, en les assubietissant à leur deuoir: c'est pour-**F**ce qu'ils n'entendent pas le discours de Theopompus le Roy de Sparte, qui fut le premier, qui introduisit à Sparte les Ephores, & les mesla au gouuernement avec les Roys: car comme sa femme luy reprochast, qu'il laisseroit à ses enfans l'autorité & puissance royale moindre qu'il ne l'auoit eüe de ses predecesseurs: mais plus grande, luy respon-
dit

A dit il, d'autant qu'elle sera plus asseuree : car relas-
 chant vn peu ce qui estoit en la royauté trop roide
 & trop vehement, il euita par vn mesme moien &
 l'enuie & le peril : & toutefois ce Theopompus la
 deriuant de son autorité comme d'vne grande
 riuiera vn petit ruisseau, autant comme il en don-
 na aux Ephores, autant s'en osta il à soy-mesmes :
 mais la raison & remonstrance de philosophie
 estant logee avec le Prince pour luy assister & le
 conseruer, luy ostant de sa puissance comme de
 l'embonpoint ce qu'il y a de trop, luy laisse ce qui
B est sain. Mais la plus part des Princes & grâds Sei-
 gneurs qui ne sont pas sages, ressemblét aux igno-
 rans tailleurs d'images, lesquels ont opinion que
 les statues enormes & excessiues qu'ils taillent,
 que lon appelle Colosses, sembleront vastes &
 grandes, s'ils les font bien esquarquillees de iam-
 bes, & bien estendues de bras, avec vne bouche
 qui bâille bien grand : car semblablement aussi
 ceux cy avec vne voix grosse, vn visage réfrongné,
 vn regard fier, vne fascheuse conuersation, & vn
 viure à part sans cōmuniquer avec personne, cui-
C dent contrefaire la grauité, grandeur & dignité
 qui est requise en vn Seigneur, mais ils ne different
 en rien de ces colosses-là, qui par le dehors ont la
 representation de quelque Dieu ou demy-dieu,
 mais par le dedans sont pleins de terre, de pierre
 & de plomb : il n'y a difference, sinon que la pesan-
 teur de ces enormes statues-la les maintient aucu-
 nement droittes, sans pancher ne çà ne là, mais ces
 ignorants princes & seigneurs-cy, pource qu'ils ne

font pas bien au dedans dressez à plomb, souuen-
 tefois sont esbranlez, & quelquefois du tout ren-
 uersez: car venans à bastir leur puissance & licence
 haute sur vne base qui n'est pas bié dressée à plôb,
 ne mise au niueau, ils panchent & versent en leur
 ruine avec elle. Mais il faut que comme la reigle,
 estant elle mesme droite, & non gauche ny tor-
 tue, dresse & rend droittes toutes autres choses, les
 faisant à soy semblables, en s'approchant & appli-
 quant à elles: semblablement aussi, que le Prince
 aiant estably & dressé premierement en soy-mes-
 me sa principauté, c'est à dire, apres auoir bien cō-
 posé sa vie & ses meurs, alors il accommode & ap-
 plique à soy ses subiects, pour les rēdre aussi droīts.
 Car ce n'est pas affaire à celuy qui tombe, de re-
 dresser: ny à celuy qui ne sçait rien, d'enseigner: ny
 à celuy qui est desordonné, d'ordonner: ny à celuy
 qui est dereiglé, de ranger: ny à celuy qui ne sçait
 obeir, de commander: mais la plus part des hom-
 mes se trompans en cela, estimēt que le premier &
 principal bien qu'il y ait à cōmander, soit de n'estre
 point commandé: comme faisoit le Roy de Perse,
 qui estimoit que tous ses subiects luy estoient es-
 claues, excepté sa femme seule, de laquelle plus
 que d'autre il deuoit estre seigneur. Mais qui sera-
 ce doncques qui commandera au Roy & au prin-
 ce? Ce sera la loy, qui est royne de tous, & mortels
 & immortels, comme dit Pindare, non pas vne
 loy escriitte dehors en quelques liures, ou dessus
 quelque boys: mais la raison viue imprimée en son
 cœur, tousiours demourant avec luy, tousiours le

A conseruant, & iamais ne l'abandonnant sans conduitte: car le Roy de Perse auoit vn de ses chābel-
lans ordonné à cest office, pour luy venir dire tous
„ les matins, entrant en sa chambre, Leue toy Sire, &
„ prouuooy aux affaires, aufquels Mesoromasdes, c'est
„ à dire le grand Dieu, t'a ordonné pour prouueoir:
mais à l'endroit d'vn sage prince & bien appris,
c'est la raison qu'il a au dedans qui luy sonne tous-
iours cela à l'aureille. Polemon disoit, que l'amour
estoit vne entre-mise des Dieux à l'endroit des
ieunes gens, dont ils auoient soing, & qu'ils vou-
loient sauuer: mais plus veritablement pourroit
on dire, que les princes sont ministres des Dieux,
pour prouueoir aux affaires & au salut des hom-
mes, à fin que des biēs qu'ils leur donnēt, ils soient
distributeurs des vns, & conseruateurs des autres.

Voy tu ce haut infiny firmament,

Qui dans son sein liquide fermement

De tous costez la terre ronde embrasse?

C'est luy qui influe les principes des semēces con-
uēnables, & puis la terre les produit en estre, &
font les vnes accreuës par les pluyes, les autres par
c les vents, les autres eschauffées par les astres & par
la lune: mais c'est le Soleil qui regit & gouuerne
tout, & leur inspire le gracieux attraiēt d'amour,
aussi de tous tāt de grands biēs, dons & presens que
les Dieux font aux hōmes, il n'y a moien d'en iouir
ny vser droittement sans loy, sans iustice, ny sans
prince & magistrat. La iustice est la fin de la loy, la
loy œuvre du prince, & le prince image de Dieu,
qui tout regit & gouuerne, n'ayant besoing ny de

Phidias qui le taille, ny de Polycletus, ny de My^Dron, ains luy-mesme se formant au moule & patron de Dieu, par le moiën de la vertu, statue la plus plaïsante & la plus excellëte que lon sçauroit iamaïs veoir. Et comme Dieu a colloqué au ciel pour vn bel image de sa diuinité le Soleil & la Lune, telle representation & telle lumiere est en vne cité & en vn royaume, le Prince, tant qu'il a au cœur la crainte de Dieu, & l'obseruation de la iustice empreinte, c'est à dire, qu'il a la raison diuine en son entendement, non pas le tonnerre en la main, ny la foudre, ny le trident, comme il y a de^E fols princes, qui se font mouler & peindre, rédans leur folie odieuse d'affecter ce à quoy ils ne peuuët attaindre: car Dieu hait & punit ceux qui veulent imiter le tonnerre, la foudre, les rays du Soleil, & choses semblables: & au contraire, ceux qui sont zelateurs de sa vertu, & qui taschent à se conformer à sa clemence & bonté, il les aime & auance, & leur donne part de sa verité, de sa iustice, clemence & legalité. Lesquelles qualitez sont telles, qu'il n'y a rien plus diuin au monde, non le feu, ny la lumiere, ny le cours du Soleil, non le leuer &^F coucher des estoilles, non pas mesme l'eternité, ny l'immortalité, car Dieu n'est pas benist ny heureux pour la longueur & duree de sa vie, mais pource qu'il est prince de toute vertu, c'est cela qui est la diuinité, & la beauté ce qui est regy par elle. Anaxarchus pour reconforter & consoler Alexandre, lequel se desespéroit pour le meurtre qu'il auoit commis en la personne de Clitus, luy dit, que Dicé

A & Themis, c'est à dire iustice, equité & droitture sont les asseffeurs de Iupiter, pour monstrier, disoit-il, que tout ce qui est fait par le Prince est iuste, equitable & droitturier, péchant en cela griefue-ment, lourdement & pernicieusement, de vouloir remedier au regret que ce prince sentoit pour le peché qu'il auoit commis, en luy donnant asseurance d'en faire encore d'autres semblables. Et s'il est en cela loisible d'amener sa coniecture, Iupiter n'a point iustice & equité pour ses asseffeurs, mais luy mesme est la iustice & l'equité, & la plus ancienne & plus parfaite loy qui soit: ainsi parlent, escriuent & enseignent tous les anciens, que Iupiter mesme ne sçauroit bien commander sans iustice: laquelle est vierge, selon que dit Hesiodé, non violee ny contaminée, ains tousiours logée avec honte, pudicité & simplicité. Voyla pourquoy les anciens appellent les Roys reuerés & venerables. Car il est conuenable que ceux qui moins ont de crainte, aient plus de honte & d'honneur. Or faut il que le prince craigne plus tost de mal faire que de mal receuoir, comme estant l'un cause de l'autre: & est celle crainte benigne & genereuse, propre & peculièr à vn bon prince; craindre que ses subiects, sans qu'il le sçache, ne soient offensez & foulez;

Ne plus ne moins que les chiens genereux
Veillent aupres des brebis, non pour eux,
Sentans venir quelque beste sauuage
Autour du parc, pour y faire carnage.
Et n'est pas pour eux qu'ils craignent, mais pour

ceux qu'ils gardent, comme Epaminondas, s'estans **D**
 les Thebains laissez aller à boire dissoluëment &
 faire grand chere en vne feste, luy seul alloit reuisi-
 tant les armes & les murailles, disant qu'il ieunoit
 & veilloit, à fin que les autres peussent à seureté
 boire & dormir. Et Caton en la ville d'Vrique feit
 cryer à son de trompe, que à tous ceux qui festoiët
 sauuez de la deffaitte, il donneroit moien de s'en
 aller par la mer: & les aiant tous embarquez, apres
 auoir fait priere aux Dieux de leur donner bon
 voyage, luy retournant en son logis se tua soy mes-
 me, monstrant en cest exemple ce que le prince **E**
 doit craindre, & ce qu'il doit mespriser. Au con-
 traire, Clearchus le tyran de Pont s'enfermoit de-
 dans vn coffre pour dormir, comme vn serpent
 dedans son creux: & Aristodemus le tyran d'Argos
 montoit en vne petite châbrette suspendue, dont
 l'huys estoit vne trappe, sur laquelle il mettoit son
 liët, là où il se couchoit avec sa cōcubine: & la mere
 d'elle quand il estoit monté venoit oster l'eschelle
 d'abas, & puis le matin la rapportoit. Comment
 pensez vous que ce tyran là deuoit trembler de
 frayeur quand il estoit dedans vn plein theatre, ou **F**
 dedans le palais, où lon exerçoit la iustice, ou de-
 dans le conseil, ou en vn festin, veu qu'il faisoit de
 sa châbre vne prison? A la verité aussi les bōs prin-
 ces craignent pour leurs subiects, & les tyrans crai-
 gnent leurs subiects, & pource d'autāt que plus ils
 augmentent leur puissance, autant augmentent ils
 aussi leur crainte: car de tant qu'ils commandent à
 plus grand nombre d'hommes, de tant en craignēt
 ils

A ils aussi plus grand nombre. Car il n'est pas vraisemblable ne bien seât avec à la maiesté diuine, ce que aucuns philosophes ont voulu dire, que Dieu est inuisiblement meslé parmy la matiere premiere qui seuffre toutes choses, & qui reçoit mille contraintes & mille cas fortuits, & des changements innumerables, ains reside la haut assis & colloqué en la nature, qui est tousiours vne & tousiours en mesme estat sur des saints fondements, comme dit Platon, fait & parfait ce qui est droit selon nature, se promenant par tout. Et comme le Soleil au ciel,

B qui est son tresbel image, se laisse veoir dedans vn mirouer à ceux qui ne le peuuent regarder, luy mesme aussi a il laissé és villes, & parmy les hommes, vne autre image, c'est la lumiere de iustice & de droite raison qui l'accompagne, laquelle les hommes sages & heureux descriuent & paignent des sentences de la philosophie, en se conformant à ce qui est le plus beau en ce monde, & n'y a rien qui imprime és âmes & esprits des hommes vne telle disposition, que la raison tiree & apprise de la philosophie, à fin qu'il ne nous aduiëne comme il feit

C à Alexandre le grād, lequel aiant veu & considéré Diogenes en la ville de Corinthe, cōme il estoit genereux, estima beaucoup & admira la grandeur de courage & magnanimité de ce personnage, iusques à dire, Si ie n'estois Alexādre, ie serois Diogenes: quasi par maniere de dire se faschant de sa richesse, de sa splendeur & de sa puissance, comme estant empeschemés & destourbiers de sa vertu, & portāt enuie à sa capette, & à sa besace, d'autāt que

par icelles Diogenes estoit inuincible & imprenable, non pas comme luy qui ne l'estoit que par le moien des armes, des cheuaux, & des picques : car il pouuoit en se gouuernant par vraye raison philosophique estre de disposition & affection Diogenes, & demourer d'estat & de fortune Alexandre, voire tant plus estre Diogenes, d'autant qu'il estoit Alexandre: comme aiant contre vne grosse tourmente agitee de forts vents, & de vagues impetueuses, besoing de chable & d'ancre plus forte, & de gouuerneur & pilote plus grand, car és hommes petits qui ont peu ou point de puissance, cōme sont les princez, la folie est innocète, & ne font point de mal quand ils sont fols, pource qu'ils ne peuuent: comme és mauuais songes il y a ie ne sçay quoy de douleur qui fasche l'ame quand elle ne peut pas venir à bout de mettre à execution ses cupiditez: mais où la puissance est conioincte avec la mauuaistié, elle adiousté aussi douleur à ses passios & affections, & est bien veritable ce que souloit dire le tyran Dionysius, car il disoit, que le plus grand plaisir & contentement qu'il sentist de sa domination tyrannique, estoit, que ce qu'il vouloit, soudainement estoit fait:

Comme il fut dit, il fut aussi tost fait. ainsi la mauuaistié & le vice prenant sa course legere par la carriere de la puissance poulse & presse toute violente passion, faisant que vne cholere deuiet aussi tost meurtre, vn amour adultere, vne auarice confiscation: la parole n'est pas plus tost acheuee, que celuy qui est tombé en suspicion pe-
rit,

A rit, & celuy qui est calomnié est perdu: mais comme les naturels tiennent, que l'esclair sort de la nue apres le tonnerre, encore qu'il apparaisse deuant, comme le sang sort de la playe, par ce que l'oreille recoit le son, & la veüe va au deuant de l'esclair: aussi alendroit de tels seigneurs les punitions precedent les accusations, & les condamnations vont deuant les probations,

Car le courroux ne peut là plus durer,
Non plus que l'ancre en tourmente asseurer
La naue estant fichee dans le sable,

B Qui ne tient coup, & ne demeure stable.

Sile pois de la raison ne reprime & n'arreste la puissance faisant le prince & seigneur ainsi comme fait le Soleil, lequel alors qu'il est plus haut eleué en la partie Septentrionale, c'est lors que plus lentement il chemine & moins il se remue, rendant son cours plus asseuré par la tardité: car il n'est possible que les vices demeurent couuerts & cachez és homes qui ont grande puissance, ains comme ceux qui sont suiects au mal caduque, soudain que quelque froid les prend, ou qu'ils tournent vn peu, il vient incontinct vn esblouissement & vn chancellemēt qui descouure & fait veoir leur mal: aussi les ignorans & mal appris, soudain que la fortune les a vn petit esleuez en biens, en richesses, en estats & authoritez, incontinct elle fait veoir leur cheute, & ruine: ou, pour mieux le donner à entendre, comme lon ne cognoist pas le vice & la faute des vaisseaux quand ils sont vuides, mais quand vous y versez quelque liqueur, alors vous voyez

VN PRINCE DOIT ESTRE SCAVANT.

par où ils coulent & s'en vont: aussi les ames pour-
ries & gastées ne peuuent contenir leur autorité
& puissance, ains coulent dehors par leurs cupidi-
tez, leurs choleres, leurs vanitez, & leurs imperti-
nences. Et qu'est-il besoing de s'estendre à discou-
rir cela plus amplement, veu que lon calomnie és
grands & illustres personages iusques aux moin-
dres fautes qu'ils ont eues: on reprochoit à Cimon
qu'il aimoit le bon vin, à Scipion qu'il aimoit à
dormir, & accusoit on Lucullus de ce qu'il tenoit
table trop sumptueuse & trop friande.

QUE LE VICE SEVL EST

SUFFISANT POUR REN-

DRE L'HOMME

malheureux.

*Le commencement de ce traitté est si defectueux & si
corrompu, mesme és liures escripts à la main, que lon
ne sçait quelle coniecture y assseoir.*



IANT vendu le sien corps
pour vn doire. **

cōme dit Euripides, bien peu
de bien, & encore mal assseuré
& incertain: mais à celuy qui
ne passe pas par dessus de la
cendre, ains à trauers vn feu,
par maniere de dire, royal, &
qui

A qui est brulé tout à l'entour, qui est continuellement à la grosse & courte aleine, en peur & en crainte, plein de sueur, s'en court iusques dela la mer pour gagner, elle luy dōne à la fin vne richesse de Tantalus, de laquelle il ne iouïra iamais, pour les continuelles occupations, esquelles il s'enveloppe. Or feit iadis sagement ce grand riche hōme Sicyonien qui nourrissoit des haras de cheuaux, quand il donna à Agamemnon roy des Acheïens vne belle iument coursiere fort viste, pour estre dispensé

De n'aller point à Troye la venteuse,

B Ains demourer loing de guerre doubteuse,

Chez soy en paix & toute volupté,

Car il auoit de tous biens à planté.

à fin que demourant en sa maison, il se veautrast à son aise en profonde richesse, & se donnast du bon temps à loisir, sans aucune fascherie. Mais noz courtisans d'auourd'huy, & ceux qui se veulent faire estimer gēs d'affaires, n'attendēt pas qu'on les appelle, ains se vont d'eux mesmes ietter la teste baissée és cours des princes & és grosses maisons, là où il faut qu'ils veillent & facent le guet en grād **c** trauail, pour gagner ou vn cheual, ou vne chaine, ou quelque tel present:

Et ce pendant la face deschiree

En sa maison sa femme est demeuree,

Et la maison acheuee à demy,

pendant que son mary est trainné cà & là errant, vagabond par le monde, tiré de quelques esperances, qui à la fin bien souuēt le trompent, & luy font honte. Et si d'adventure il obtient quelque chose

de ce qu'il desire, apres auoir esté bien tournebou-
lé sans dessus dessous, iusques à en auoir la teste
toute eslourdie de virer ainsi au rouët de la fortune,
il demande à s'en eschapper, & appelle bien-
heureux ceux qui demeurent en vie priuee, sans
s'exposer aux perils: & ceux cy au cōtraire le repu-
tent luy bien-heureux, d'autāt qu'ils le voient pre-
feré à eux. Voyla cōment le vice dispose tous hom-
mes à toutes sortes de malheurs, étant vn parfait
ouurier de malheureté: de maniere qu'il n'a besoin
ne d'instrumens ny de ministres. Les autres tyrans
qui s'estudiēt à rendre miserables ceux qu'ils tour-
mentēt, ils nourrissent des bourreaux & des gehen-
neurs, ils inuentent des fers chauds à brusler, des
grillons. Mais le vice sans aucun appareil d'vtils,
aussi tost qu'il s'attache à l'ame, il la brise & l'acca-
ble & ruine, il remplit de douleur, de lamétations,
de rancune, de regrets & repentance l'homme.
Qu'il soit ainsi, on voit plusieurs qui endurent
qu'on leur coupe la chair & les mēbres, sans qu'ils
dient mot, & endurent patiemment quand on les
fouëtte, & quand leurs maistres, ou bien des tyrans
leur donnent les grillons, vous ne leur entendrez
pas ietter vn seul cry, d'autāt que l'ame avec la rai-
son, cōme avec la main, reprimant la voix, la garde
de sortir: là où, au contraire, vous ne sçauriez ia-
mais faire demourer quoy vn courroux, ny com-
mander à vn deuil, qu'il se taise: ny arrester vn qui
est surpris de peur, ny vn qui se repent de regret,
qu'il ne crie, qu'il ne se tire par les cheueux, & qu'il
ne frappe sa cuisse, tellemēt que le vice est plus vio-
lent

A l'ént que n'est ny le feu, ny le fer. Or les villes & citez, quand elles font à sçauoir par affiches, qu'elles veulent faire edifier quelques nauires ou quelques statues de grandeur excessiue que lon appelle Colosses, elles escoutent les ouuriers disputans les vns contre les autres de la manufacture, & entendent leurs raisons, & voient leurs modelles, puis elles elisent celuy d'entre eux qui fera le faict à moins de coust, mieux & plus promptement. Or posons le cas donques que nous publions par affiches à faire & rédre vn hōme & vne vie malheureuse, & qu'il

B se presente pour entreprendre le marché, d'un costé la Fortune, & le Vice de l'autre : l'une, à sçauoir la fortune, pleine d'utiles de toute sorte, & d'un appareil de grands frais, pour construire vne vie miserable & malheureuse : comme pourroient estre voleries de brigands, des guerres, des inhumanitez de tyrās, des tempestes de mer, des fouldres de l'air, qu'elle trainneroit apres elle, de la cigüe qu'elle broyeroit, des espees qu'elle apporteroit, des calomniateurs qu'elle foudoyeroit, des fièvres qu'elle allumeroit, des fers & manotes qu'elle feroit

C sonner, & des prisons qu'elle bastiroit à l'entour, encore que la plus part de tout cela procede plus tost du vice que de la fortune : mais pourtāt supposons que tout cela procede de la fortune, & que la malice, & le vice estant aupres tout nud, & n'ayant besoing de chose quelconque hors de soy alécontre de l'homme, interrogue la fortune comment elle entend de rendre l'homme malheureux, failly de cœur, Menasses tu l'homme de le rédre pauvre,

Fortune? Merrocles se mocquera de roy, qui l'hy-
 uer dormoit parmy les moutons, & l'esté dedans
 les cloistres & portiques des temples: & par ainsi
 estriuoit de la felicité alencontre du grand Roy de
 Perse, lequel passoit son hyuer en Perse, & son esté
 en la Medie. Ameneras-tu la seruitude, les fers &
 manotes, & l'estre vendu comme esclau? Dioge-
 nes le mesprisera, lequel estant exposé en vente par
 les brigands qui l'auoient pris, cryoit luy-mesme à
 l'encan, Qui veult acheter vn maistre? Broyes-tu
 vne couppe de poison? n'en baillas tu pas autant à
 boire à Socrates, & luy tout doucement & facile-
 ment sans restiuer de peur, ne rien changer de con-
 tenance ny de couleur l'aualla, & quand il fut mort
 les suruiuans le iugerent bien-heureux, comme ce-
 luy qui en l'autre monde s'en alloit viure d'une vie
 diuine. Me presenteras tu le feu? voire mais Decius
 le capitaine des Romains t'a pieça preuenue, quand
 au milieu des deux armées il feit dresser vn grand
 feu, où il se brusta luy-mesme en holocauste à Sa-
 turne, comme il auoit voué pour le salut & la pro-
 sperité de l'Empire Romain. Et les honestes fem-
 mes des Indiens, qui aiment mieux leurs marys,
 combattent & estriuent ensemble pour le feu, &
 celle qui gaigne la victoire est bruslee avec le corps
 de son defunct mary, laquelle toutes les autres iu-
 gent & estimēt bien-heureuse. Et quant aux sages
 de pardela, il n'y en a pas vn qui soit reputé hōme
 sainct, ne bien-heureux, si estant encore viuant, en
 son bon sens & sain entendement, il ne separe son
 ame de son corps avec le feu, & qu'il ne sorte tout
 pur

A pur & net de la chair, en aiant cōsumé tout ce qu'il y auoit de mortel. Ouy mais d'une maison plantureuse & d'une richesse grāde, d'une table friande & sumptueuse, tu me reduiras à la besace, à la petite cappette, & à demāder mon pain ordinaire: toutes ces choses-là furēt les principes & causes de la felicité de Diogenes, & de liberté & de gloire à Crates. Mais tu me feras clouer en croix, ou bien empaler au bout d'un pieu. Et que peult il chaloir à Theodorus fil pourrira dessus ou dessous la terre? Ce sont les plus heureuses sepultures des Tartares,

B & des Hyrcaniens, l'estre mágé des chiens: & entre les Bactrianiēs, par les loix du pais, ceux-là sont estimez auoir plus heureuse fin, quand les oiseaux les māgent apres qu'ils sont morts. Qui sont dōcques ceux que tels accidēts rendēt malheureux? Ce sont les lasches de cœur, delicats, eceruelles, non exercez és affaires du mōde, & qui tousiours ont retenu les opinions qui leur ont esté imprimees dès leur enfance. La fortune dōcques seule n'est pas ouuriere parfaite de malheur & infelicité, si elle n'a la malice & le vice qui luy aide. Car tout ainsi comme vn

C filet sie l'os qui a esté longuemēt trempé dedās du vinaigre & de la cendre, & cōme les ouuriers courbent & formēt en telle facon qu'ils veulēt l'yuoire, apres qu'ils l'ont mollifié & detrempé avec de la biere, autrement ils n'en peuuent venir à bout: aussi la fortune blece & caue ce qui est desia gasté * Voyez & amolly de soy-mesme, quand la malice y suruiēt Dioscori- d'auātage: & tout ainsi que le poison appellé Phade, lib. 6. ricum, * autremēt Napel ou Aconit, ne nuit à per- chap. 19.

sonne des autres, & ne fait point de mal à ceux qui D
le touchét, & qui le portent quand & eux: mais s'il
touche tât soit peu à vn qui soit nauré, il le fait in-
continét mourir par la playe & bleceure qui reçoit
son influxion: aussi celuy duquel la fortune sera
pour ruiner & gaster l'ame, deura auoir au dedans
de sa propre chair quelque vlcere, quelque apostu-
me, & quelque mal pour rendre les accidents, qui
luy suruiendrôt de dehors, miserables & lamenta-
bles. Le vice donc est-il point tel, qu'il ait besoing
de la fortune pour produire malheureté? De quel
costé cela? la fortune ne fait elle pas soubleuer la E
tempeste & tourmente en la mer? ne ceinct elle
pas les pieds des montaignes, des aguets & em-
busches des larrons? ne iette-elle pas par grande
impetuosité la gresse dedans les champs fertiles &
fructueux? mais la malice ne suscite elle pas vn
Melitus, vn Anytus, vn Calixenus, calomniateurs?
n'oste elle pas les biens? n'empesche elle pas les hō-
mes d'estre chefs d'armees pour les rédre malheu-
reux? Mais elle les fait lasches, elle leur amasse de
grâdes successiōs en terre, elle les accompagne par
mer, elle est tousiours apres, les desechant de cupi-
ditez, les enflammant de cholere, les accablant de
superstitions, les attirāt par les cupiditez des yeux.

Il n'y a ny commencement ny fin.

ACOMMENT ON SE PEVLT
LOVER SOYMESME, SANS ENCOV-
RIR ENVIE NY REPRES-
HENSION.



L n'y a celuy qui ne die de
bouche, que parler de soy-
mesme en se donnant la
louage d'estre ou de valoir
quelque chose, amy Hercu-
lanus. ne soit fort odieux, &
mal seant à toute personne
bien apprise: mais de faict il

y en a bien peu qui se gardent de tomber en ceste
impertinence & importunité là, non pas de ceulx
mesmes qui la reprennent. Car Euripides disant,

Si la parole il falloit acheter,
Nul ne voudroit ses louanges compter,
Mais à raison qu'on en peult de l'air prendre
Tant que lon veult sans aucun pris en rendre,
Chascun disant de soy-mesme se plaist
Ce qui est vray & ce qui pas ne l'est,

c Pour ce que rien le parler ne luy couste.

Il vse d'une tres-odieuse & importune vanterie, en
cela mesmement qu'il va entrelasser parmy des ac-
cidents & affaires tragiques, vn propos de soy-
mesme, qui n'appartient rien à la matiere subiecte.
Semblablement Pindarus aiant dit en vn lieu,

Qui se vante importunément
Est fouruoyé d'entendement,
ne cesse iamais toutcfois de magnifier sa suffisance.

en la poësie, qui est grande certainement, & bien digne de louange; il n'y a personne qui le nie: mais ceux qui sont courōnez és ieux & combats sacrez, sont declarez victorieux par la voix d'autrui, pour oster la fascherie que porte avec soy le parler de soy-mesme: & à bon droict auons nous à contre-cœur la vaine gloire de Timotheus, en ce qu'il escrit luy-mesme touchant la victoire qu'il obtient alencontre de Phrynis, Tant tu fus heureux Timothee lors que le herault proclama à haulte voix, Timothee le Milesien a vaincu le fils de Carbon le plieur de voix: Car cela n'a point de grace & est contre toute façon honeste de trompeter ainsi soy-mesme sa victoire, par ce qu'il est bien vray ce que disoit Xenophon, que la plus plaisante audition que l'homme sçauroit entendre est, d'ouir reciter ses louāges par vn autre: mais la plus fascheuse aussi aux autres est d'ouir que luy mesme les recite: car premierement nous estimons effrontez & impudens ceulx qui se louent eux mesmes, attēdu qu'ils deuroient estre honteux quand d'autres les loueroient en leur presence. Secondement, nous les reputons iniustes en ce qu'ils se donnent à eulx mesmes ce qu'ils deuroient receuoir des mains des autres. Tiercement, si nous nous taisons quand nous entendons vn qui se louē soy-mesme, il semble ou que nous en soions marries, ou que nous luy portions enuie: ou si nous craignons cela, nous sommes contraincts de confirmer nous mesmes ces louāges, & porter tesmoignage à la chose dont il est question, contre ce que nous en pensons,

A ce qui est plus conuenable à vne vile flatterie, qu'à vray honneur, d'auoir le cœur de louer aucun en sa présence. Mais encore que cela soit veritable, & que la chose aille ainsi: si peult il aduenir des occurrences qu'un homme d'honneur s'entre-mettant des affaires de la chose publique pourra se hasarder à parler de soy-mesme à son aduantage: non pour aucun honneur ou plaisir qu'il en pretende, mais pource que l'occasion ou l'action qui se presente, requiert qu'il parle de soy-mesme, comme il feroit de quelque autre chose veritable: mesme-
ment quand les choses faictes ou aduenues sont bonnes & honestes, il ne faut point qu'il faigne de dire hardiment, qu'il en a fait autrefois de semblables: car ceste louange là apporte vn beau & bon fruit, c'est que d'icelle, comme d'une graine & semence, plusieurs autres & plus grandes louanges en procedent: car l'homme de bien ne demande & n'aime pas l'honneur comme vn salaire, ou vn confort & recompense de ses vertueuses actions, mais pource que l'estre creu & auoir reputation d'homme de bien, & qu'on se fie en luy, luy done les moiens
e de faire plusieurs autres plus grandes & plus belles actions: car il est & plaisant & facile de faire bien à ceux qui vous aimēt & se fient en vous, & au contraire il est impossible ou bien mal-aisé, se seruir de la vertu & l'employer enuers ceulx qui vous calomnient ou vous ont pour suspect, en forçant ceulx qui fuyent les occasions de receuoir aucun bien ne plaisir de vous. Il nous fault doncques cōsiderer, si l'y auroit point d'autres occasiōs pour les-

quelles l'homme de bien & d'honneur se pourroit
 louer soy-mesme, à fin que ne le redoutant pas par
 trop, comme chose vaine & odieuse, nous ne fail-
 lions à nous seruir de quelque vtilité & commo-
 dité qu'il y pourroit auoir. Or est bien vaine la
 louange de ceux qui se louent eux mesmes, à fin
 qu'ils soient louez des autres: & la mesprise lon
 plus que nulle autre, pource qu'il semble qu'elle
 procede d'une ambition & d'un appetit importun
 de vaine gloire seulement. Car ainsi comme ceulx
 qui n'ont de quoy manger, sont contraincts de
 manger de leur propre corps contre la nature, &
 cela est l'extremité de famine: aussi ceulx qui sont
 affamez d'honneur & de louanges, s'ils ne treuuent
 des autres qui les louent, ils se louent eux mesmes:
 ce qui de tant plus est laid, qu'il semble que par un
 amour de vaine gloire, ils y adioustent encore & y
 contribuent du leur. Mais encore quand ils ne le
 font pas simplement & ne cherchent pas à estre
 louez à par eux, ains par une emulation & ialousie
 de la louange d'autrui, ils vont comparant leurs
 faicts & actions comme pour offusquer & obscur-
 cir celles des autres, alors oultre la vanité il y a de
 l'enuie & de la malignité: car on dit en commun
 prouerbe, que Celuy est curieux & importun, qui
 met le pied en la danse d'autrui: mais de s'aller iet-
 ter à trauers les louages des autres par une ialousie
 & enuie, en rompant le propos pour parler de soy-
 mesme, c'est chose dont il se fault non seulement
 bien garder, mais aussi ne souffrir pas que d'autres
 nous louent à l'enuy, ains gracieusement ceder
 l'honneur

A l'honneur à ceux qui seront dignes d'estre louez & honorez:& si d'aduétude ils en sont indignes & ne le meritēt pas,encore ne fault il point que nous les priuions des louanges qu'on leur dōne en y interposant les nostres, ains plus tost ouuertement les conuaincre,& monstrier par viues raisons que c'est à tort que lon leur fait tant d'honneur. Et quant à cela,il n'y a point de doubte qu'il ne faille ainsi faire. Mais on se peult louer soy-mesme sans reprehension, Premièrement si on le fait en respondant à vne calomnie & imputation qui auroit esté mise
B sus,comme fait Pericles en Thucydide, là où il dit,
 » Et neantmoins, Seigneurs Atheniens, vous vous
 » courroucez à moy, qui me puis bien vanter d'estre
 » tel,que ie ne cede à autre homme qui qu'il soit, ny
 » quant à preuoir & cognoistre ce qui est vtile pour
 » la chose publique, ny quant à le bien dire & donner à entendre, ny quant à aimer le bien public,&
 » ne se laisser point gaigner à l'auarice. Car nō seulement il euita le blasme de vanité, d'arrogāce & de presumptueuse ambition, en parlant ainsi magnifiquement de soy-mesme en tel endroit: ains, qui
C plus est,il monstra parmy la grandeur & magnanimité de la vertu, laquelle pour ne s'abbaïsser point rabaisse & tient soubs sa main l'enuie:tellemēt que les hommes qui l'oyent ainsi parler, ne veulēt plus s'amuser à peser & iuger si son dire est veritable, ains sont emportez & ravis d'aïse & de ioye,d'ouïr telles magnanimes vanteries,quand elles sont veritables & certaines, comme le tesmoignent les effects que lon en voit aduenir. Car les Thebains,

estans leurs capitaines accusez de ce que le temps d
de leur office expiré, ils ne s'en estoient pas incon-
tinent retournez, selon les loix du pais, ains estoiet
entrez en armes dedans la Laconie, auoient repeu-
plé la ville de Messene, à peine absolurent Pelo-
pidas, qui plioit à telles obiections, & les supplioit:
Et au contraire, Epaminondas qui vint à raconter
magnifiquement les braues choses qu'il auoit fait-
tes en ce voiage, & en ce temps-là, iusques à dire fi-
nablement qu'il estoit prest & content de mourir,
prouueu qu'ils voulussent confesser, que malgré
eux, & contre leur volonté, il auoit pillé & saccagé E
la Laconie, auoit repeuplé la ville de Messene, &
remis en vne ligue toutes les villes de l'Arcadie: ils
n'eurent pas le cœur de prendre seulement les bal-
lotes en main pour donner sentence contre luy,
ains se departirent de l'assemblée, en louant gran-
dement sa haultesse de courage, & s'esioiussant &
riant d'auoir ainsi ouy parler ce personnage: pour-
tant ne fault il pas du tout reprendre Stenelaus, de
ce qu'il dit en Homere,

Nous nous vantons de valoir beaucoup mieulx
Que iamais n'ont valu noz peres vieux: F
si nous nous souuenons de ce qui precede vn peu
auparauant,

O fils du preux Tydeus & vaillant,

Comment de peur est ainsi tressaillant

Ton foible cœur, que ton œil par tout quiere

A te tirer de la bataille arriere?

car ce n'estoit pas luy à qui ceste parole picquante
s'adressoit, ains repliquoit pour son amy, qu'il
sentoit

A sentoit iniurié : & pourtant la iuste cause luy donnoit liberté de parler ainsi brauement de soy-mesme. Les Romains se fascherét d'ouir tant souuent repeter à Ciceron les louanges des choses qu'il auoit faictes à l'encontre de Catilina : & au contraire, quand Scipion leur dit en publique assemblée, qu'il ne leur estoit pas bien seant vouloir iuger de Scipion, veu que par son moien ils estoient paruenus à ceste grandeur de iuger de tout le monde, ils meirent des chappeaux de fleurs sur leurs testes, & monterent avec luy au Capitole pour sacrifier &

B rendre graces à Iupiter : l'un & l'autre avec raison, car l'un repetoit ainsi souuent ses louanges sans aucun besoing qu'il en fust, pour se glorifier : & à l'autre le peril luy ostoit la haine, & l'enuie de s'en magnifier. Si ne conuient pas ceste vanterie & ceste gloire de se magnifier, seulement à ceulx qui sont accusez & appelez en iustice de leur vie ou de leur honneur, ains à tous ceulx qui sont en aduersité plus tost qu'en prosperité, pource qu'il semble que ceux-cy embrassent, par maniere de dire, la gloire, & prennent plaisir à la iouir, gratifiâs en cela à leur

C ambitieux desir : & ceux-là pour la qualité de leur temps sont bien esloignez de toute suspicion d'ambition, & se roidissent encôtre la fortune, estayans le mieulx qu'ils peuuent la generosité de leur courage, en euitant totalement la bassesse de sembler médier compassion, ny d'estre rauallé de courage, & se lamenter en leur mesaduenture. Tout ainsi donques cōme nous estimōs fols & glorieux ceulx qui en se promenāt se rehaussent & dressent le col,

& au contraire nous louons ceux qui se redressent
 & releuent le plus qu'ils peuuent en escrimant des
 poings, ou en combattât : aussi vn hōme qui estant
 renuersé par la fortune se releue sur ses pieds , & se
 redresse pour luy faire teste , & au lieu de se mon-
 strer pitoyable suppliant & lamentable , par vne
 parole auantageuse se monstre braue & hault en
 courage, en est trouué non superbe ne presumptu-
 eux, ains au contraire, grand & inuincible : comme
 le poëte Homere depeint Patroclus , modeste &
 gracieux en paroles, quand il a fait vaillamment &
 heureusement : & au cōtraire, à sa mort il le décrit
 parlant brauement & haultainement,

Si tels esté comme ie suis ils eussent,

Encontre moy presentez ils se fussent.

Et Phocion , qui au demourât auoit tousiours esté
 fort gracieux & modeste , apres qu'il se veit con-
 damné , il donna à cognoistre sa magnanimité en
 plusieurs autres choses , & mesmement en ce qu'il
 dit à l'vn de ceux qui estoient condamnez à mou-
 rir quand & luy , qui se tourmentoit & complai-
 gnoit , Que dis-tu pauvre homme , ne te tiens tu
 pas bienheureux de mourir avec Phocion ? Autant
 doncques, voire plus encore , est il permis à l'hom-
 me d'estat, à qui lon fait tort, de dire quelque chose
 auantageusement de soy, à ceulx qui se monstrent
 ingrats enuers luy , comme Achilles ailleurs ren-
 doit bien à Dieu la gloire du succes des affaires , &
 parloit modestement quand il disoit,

Si Iupiter la grace nous ottroye

Que ruiner puissions la grande Troye.

A mais ailleurs, là où on luy fait tort & iniure, il deploye sa langue à parler haultainement en courroux,

Avec mes gens, & mes vaisseaux, i'ay pris

Douze citez.

& en vn autre lieu,

Ils ne pourront supporter la lueur

De mon armet approchant pres du leur.

Car là où la brauerie est partie de la iustification, alors il est loysible & permis d'en vsfer : suyuant laquelle doctrine, nous voions que Themistocles, pendant qu'il feist les grands seruices à son pais, iamaïs ne dit ny ne feist rien de superbe, mais lors qu'il veit que les Atheniens estoient saouls de luy, & qu'ils n'en faisoient plus de compte, il ne faignit pas de leur dire, O pauures gens, pourquoy vous laissez vous de receuoir souuent des bienfaits de mesmes personnes? Et vne autre-fois, En temps de pluye & d'orage vous recourez à moy, comme à l'abry d'un arbre : & puis quand le beau temps est reuenu, vous en arrachez chascun vne branche en passant. Ceulx-là doncques se sentans d'ailleurs c'oustragez rememoroient ainsi leurs bons seruices & beaux faits à ceulx qui en estoient mescognoissans : mais celuy qui se sent repris & blasmé des meilleures choses qu'il ait faittes, est bien à excuser, & ne luy peult on attacher aucun blasme, si luy mesme se met à louër ce qu'il a fait : d'autant qu'il semble qu'il ne le die pas par reproche, mais pour respōdre à ce dont on le calomnie. Qu'il soit ainsi, cela donna vne honeste liberté à Demosthene de

parler à son auantage, & si empesche qu'on ne se
 lasse, & ne se saoule des louanges que luy-mesme
 se dōne par toute l'oraison qu'il escriuit de la cou-
 ronne, là où il se glorifie de ce qu'on luy imputoit,
 à sçauoir des ambassades qu'il auoit faittes, & des
 decrets qu'il auoit mis en auant pour la guerre.
 Aussi n'est pas logé loing de là, & a bonne grace le
 renuersement de l'obiection, quand on monstre,
 que le contraire de ce dont on est chargé & impu-
 té, est meschant & deshonneſte, comme fait l'ora-
 teur Lycurgus à Athenes, respondāt à ceux qui luy
 reprochoiēt, qu'il auoit donné argent à vn calom- E
 niateur pour se rachetter de la vexation de sa ca-
 lomnie: Et bien, dit-il, Quel citoien vous semble il
 » que ie sois, veu qu'en si long temps qu'il y a que ie
 » m'entremets du gouuernement des affaires de la
 » chose publique, ie suis conuaincu deuant vous, d'a-
 » uoir plus tost donné que pris de l'argent iniuste-
 » ment? Et Ciceron, comme Metellus luy repro-
 chaſt, qu'il auoit plus affligé & perdu d'hommes
 par son tesmoignage, qu'il n'en auoit sauué par son
 » eloquence: Et qui est celuy, dit il, qui ne die, qu'il
 » y a plus en moy de foy & de preud'homme, qu'il F
 » n'y a d'eloquēce, & de force de biē dire? Et ces pas-
 » sages de Demosthene, Qui est celuy qui ne m'eust
 » iustemēt condamné à mourir, si ie me fusse efforcé
 » de contaminer seulemēt de parole les honneurs &
 » tiltres glorieux que ceste cité a? Et que pensez vous
 » qu'eussent dit ces meschants hōmes icy, si lors que
 » ie discourois ces choses par le menu, les villes s'en
 » fussent allees? brief toute la harengue pour la cou-
 ronne

A ronne coust fort dextrement ses louanges, & les adiousté aux oppositions, & solutions des objections qu'on luy mettoit sus, toutefois il est bien à remarquer en ceste mesme oraison-là, comme artifice tres vtile, qu'en mēlāt parmy les propos qu'il tient de soy les louanges aussi des escoutans, il rend tout son parler exempt d'enuie, & de la haine qui accompagne ordinairement ceulx qui monstrent de s'aimer trop soymesme: quels se monstrent alors les Atheniens enuers ceulx d'Eubœe, quels enuers ceulx de Thebes, combien de biens firent ils aux habitans de la Cherronese, combien à ceux de Byzance, en disant que luy n'en estoit que le ministre: Car l'auditeur secrettement ainsi gagné par ses propres louanges, en reçoit plus volontiers, & avec plaisir, le dire de l'orateur, & est bien aisé d'ouir reciter & referer à vn autre ce que luy-mesme a bien fait, & à ceste aise-là suit incontinent conioinct l'auoir en admiration & amour ceulx, par le moyen desquels il a bien fait. Suyuant lequel propos, Epaminondas dit vn iour publiquement, comme vn sien enuieux Meneclidas en se mocquant luy reprochaist, qu'il se magnifioit plus que n'auoit oncques fait le Roy „ Agamemnon: Mercy à vous, Seigneurs The- „ bains, avec lesquels seuls i'ay en vn iour subuertiy „ & ruiné la domination des Lacedemoniens. Et pourtant que la plus part des hommes repugnent ordinairement en leurs cœurs, & se faschent fort contre celuy qui se louë soy-mesme, & ne font pas de mesme contre celuy qui louë vn autre,

ains en sont bien souuent aises, & confirment tel-
 les louanges par leur tesmoignage, aucuns ont ac-
 coustumé en louant dextrement & opportuné-
 ment ceux qui aiment, & qui font de mesmes cho-
 ses, & qui bref sont de mesmes conditions & mes-
 me humeur que eux, de s'insinuer en la bõne grace
 des auditeurs, & les attirer à eulx, pource qu'ils re-
 cognoissent incontinct au disant, encore qu'il par-
 le de quelque autre, vne semblance de vertus, qui
 merite toute pareille louëge: Car ainsi comme ce-
 luy qui reproche à vn autre les vices, desquels il est
 luy mesme taré, se fait plus d'iniure à soy mesme,
 qu'à l'autre auquel il les reproche: aussi les gens de
 bien honorans les gens de bien, remettent ceulx
 qui les cognoissent en memoire, tellemēt que tout
 aussi tost ils leur vont criant, Et vous n'estes vous
 pas tout de mesme? Voyla pourquoy Alexandre
 honorant Hercules, & Androcopus Alexandre,
 ont fait qu'eux-mesmes ont esté honorez par leurs
 semblables: & à l'opposite, Dionysius se mocquāt
 de Gelon, en disant qu'il auoit esté Gelos, c'est à
 dire, la risée & la mocquerie de la Sicile, ne s'apper-
 ceuoit pas, que par enuie qu'il se suscitoit, il ruinoit
 & demolissoit la grandeur & la dignité de sa sei-
 gneurie. Il fault donc que l'homme d'estat, encore
 ailleurs entende & pratique bien ces regles-là:
 mais si quelquefois il est contrainct de se louer soy
 mesme, il rendra ceste sienne louange beaucoup
 plus supportable, quand il ne se l'attribuera pas
 toute, ains comme si la gloire luy estoit charge pe-
 sante, il s'en deschargera d'une partie sur la Fortu-
 ne,

A ne, & d'une autre sur Dieu : & pourtant fait Homere sagement parler Achilles,

Puis que les Dieux m'ont donné ceste grace
D'avoir occis l'ennemy sur la place.

& sagement fait aussi Timoleon à Syracuse, qui apres ses beaux faicts dedia vn autel à l'heureuse aduventure, & consacra sa maison à la bonne fortune : & tressagement fait aussi Python Ænien, lequel estant venu à Athenes apres auoir tué le Roy Cotys, comme les orateurs feissent à l'enuy les vns des autres, à qui plus haultemēt loueroit sa prouesse deuant le peuple Athenien, & que luy se fust apperceu que quelques vns luy en portoiēt enuie, & en estoient marris : il dit en passant, Seigneurs Atheniens, ce a esté quelque Dieu qui l'a fait, & ie luy ay presté mes mains. Aussi osta Sylla l'enuie à ses faicts, en louant souuent sa bonne fortune : & finablement en se surnommāt Faustus, c'est à dire, le bien fortuné : car les hommes aiment mieulx sembler estre vaincus par la fortune, que par la vertu, pource qu'ils reputent l'un estre bien non appartenant au vainqueur, & l'autre default propre à eulx, & qui procede d'eulx. C'est pourquoy lon dit que les loix de Zaleucus pleurent infiniment aux Locriens, d'autant qu'il leur donnoit à entendre, que la deesse Minerue s'apparoissoit à chascun coup à luy, & luy enseignoit & dictoit les loix qu'il leur donnoit, & qu'il n'y en auoit pas vne qui fust de son conseil ny de son inuention. Or est il à l'aduventure necessaire d'inuenter ces remedes & ces addoucissements là à l'encontre de ceux qui

font de nature fascheux ou enuieux: mais encore **D**
 enuers ceux qui font de bonne sorte & modestes il
 ne sera pas impertinent d'yfer de corrections des
 louanges, si d'aduenture quelqu'un en nostre pre-
 sence nous louë d'estre ou sçauans, ou riches, ou
 de grand credit, en le priant de ne dire point cela
 de nous: mais bien si nous sommes bons, à nully
 malfaisans, & profitables à plusieurs: car qui fait
 ainsi n'accumule pas louange sur louange, ains la
 transfere d'une chose à vne autre: & ne semble pas
 qu'il prêne plaisir à s'ouïr louer, ains plus tost estre
 marry de ce qu'on ne le louë pas ainsi qu'il faut, **E**
 ny pour ce qu'il faut: & cacher & obscurcir les
 qualitez môindres sous les plus grandes & meil-
 leures, non tant pour vouloir estre loué, que pour
 enseigner comment il faut louer: car ceste maniere
 de dire, Ce n'est pas de pierres que j'ay fortifié ce-
 ste ville, ny de murailles de brique: mais si vous
 voulez considerer dequoy & comment ie l'ay for-
 tifiée, vous trouuerez que c'est d'armes, de che-
 uaux, & de confederez & alliez: cela tire sur ceste
 regle là, & encore plus ce que dit Pericles sur la fin
 de ses iours, car ainsi comme il acheuoit sa vie, & **F**
 se portoit fort mal, ses parents, amis & familiers se
 prirent à rememoror les charges qu'il auoit eües,
 les expeditiōs qu'il auoit faittes, la puissance gran-
 de qu'il auoit eüie, les victoires, les trophées, les
 villes & citez qu'il auoit conquises aux Atheniens,
 & luy se soubleuant vn petit en son seant, les reprit
 & blasma grandement de ce qu'ils alleguoient des
 louanges qui estoient communes à plusieurs, &

A aucunes qui estoient plus tost deuës à la fortune, que non pas à la vertu, & ce pendant ils omettoient ce qui estoit le plus grand & le plus beau, & qui estoit plus propre à luy : c'est que par luy nul citoien n'auoit iamais porté le deuil, ne pris robe noire. Cest exemple donne le moien & à vn orateur si il est bon, & qu'on le louë de la force de son eloquence, de transferer la louange à sa vie, & à ses meurs : & à vn capitaine que lon estimera pour sa grande experience & son heur au faict des armes, de parler franchement de sa iustice & de sa clemence : ou au contraire, si d'aduenture il y en a qui luy dōnent des louanges excessiues, comme bien souuent il s'en trouue qui disent en flattant, des propos qui ne seruent qu'à exciter enuie,

Le ne suis point du nombre des haults Dieux,

Pourquoy vas tu me comparant à eux?

mais si tu me cognois à la verité pour tel que ie suis, louë ce que ie suis incorrompable, que ie suis temperant, que ie suis raisonnable & humain : car l'enuie concede volontiers à qui refuse les plus grandes louanges, celles qui sont moindres & plus modestes, & ne priue pas de veritable louange ceux qui ne reçoient pas les faulces & vaines. Et pourtant ne se faschoient point les hommes d'honorer les princes & les Roys, qui ne cherchoient pas à se faire appeller Dieux, ou enfans des Dieux, ains Philadelphes, c'est à dire aimãs leurs freres & sœurs, ou Philometores aimans leurs meres, ou Euergetes bienfaicteurs, ou Theophiles, c'est à dire aimans les Dieux, qui sont belles & honestes appellatiōs, pro-

pres aux hommes, & aux bons princes: comme au **D**
cas pareil, on ne peut endurer patiemment ceux
qui en escriuant ou en lisant se donnent le tiltre de
sages, & est on bien aise d'ouïr ceux qui se nom-
ment amateurs de sagesse, ou qui disent qu'ils pro-
fitent en l'estude de sapiëce, ou telle chose sembla-
ble, qui est modeste & non subiecte à aucune en-
uie. Là où ces ambitieux & Sophistes, qui reçoïuēt
& feuffrent qu'on leur die ces paroles, qu'ils ont
harengué diuinement, celestement, & magnifi-
quement, perdent outre cela, le modestement, &
humainement: & toutefois, ainsi comme ceux qui **E**
ne veulent pas fâcher ny donner peine à ceux qui
ont mal aux yeux, parmy des couleurs fort brillan-
tes & fort visues entremeslent quelque peu d'om-
brage: aussi aucuns recitans leurs louanges non to-
talement reluisantes & claires sans aucune mes-
lange, ains y entremeslans quelques imperfections
ou defectuositez & fautes, lesquelles deschargent
par ce moien de ce qui cause haine & enuie: cōme
Epeus aiant parlé fort auantageusement, & s'e-
stant vanté brauement de sa vaillance en l'escrime
des poings;

A coups de poing son corps ie creueray,
Et tous ses os ie luy debriseray.

Il va dire apres,

Car de combat autre ie ne demande.

Mais à l'aduenture est celuy là digne de mocque-
rie, qui pour excuser vne brauerie d'escrimeur &
champion de luiçte, aduouë & confesse qu'il est
lasche & couard: & au contraire est adroit, de bon
iuge-

A iugement, & de bonne grace celuy, qui allegue contre foy-mefme quelque oubliance, quelque ignorance, ou quelque defir d'ouir & d'apprédre, comme Vlyffes quand il dit,

Mais le mien cœur defiroit efcoutter,
Et commandois de me degarroter,
En leur guignant des yeux & de la teſte.

Et en vn autre lieu,
Mais point de foy ie ne leur adiouſté,
Comme beaucoup meilleur il euſt eſté,
Pour le geant voir dedans ſon repaire,

B Penſant qu'il deuſt quelque preſent me faire.
Et brief toutes ſortes de fautes, prouueu qu'elles ne ſoiét pas par trop deſhoneſtes, ny par trop laſches, eſtans adiouſtees à des louanges, leur oſtent la haine & l'enuie. Et y en a pluſieurs qui en entre-iettāt vne confeſſion & adueu de pauvreté ou de faute d'experience, ou de nobleſſe, parmy des louanges, les rendent moins enuiees & moins odieuſes: ne plus ne moins qu'Agathocles buuant aux ieunes hommes qui eſtoient de ſa compagnie en vaſes d'or & d'argent ingenieuſement ouurez, en faiſoit
C apporter ſur ſa table d'autres de terre, leur diſant, Voyla que c'eſt de perſeuerer à trauailler, prendre peine & ſe hazarder à faire vaillamment: car par cy deuant nous faiſions de ces pots là, monſtrāt ceux de terre: & maintenant nous en faiſons de ceux cy, monſtrant ceux d'or & d'argent: car il auoit eſté nourry en la bouttique d'un potier de terre, tant il eſtoit pauvre & de bas lieu yſſu: mais depuis il ſe fit Roy de toute la Sicile preſque. Voyla d'ócques

les remedes que lon peult appliquer de dehors, **D**
quād on est cōtrainct de parler de soy-mesme: mais
il y en a d'autres qui sont dedans ceux mesmes qui
se louent, comme Caton disoit qu'on luy portoit
enuie de ce qu'il ne faisoit cōpte de ses propres af-
faires, & qu'il veilleoit toutes les nuiçts pour le salut
de la patrie: à quoy ressemblent aussi ces passages,

Quelle sagesse y a il en moy, veu
Que ie pourrois de charge desprouueu,
Comme vn soldat simple de l'exercite,
De tout trauail & de tout soucy quitte,
Participer à la fortune, autant
Que le plus sage & plus s'entremettant?

Et cest autre,

Je crains d'auoir ietté la grace au vent
De mes trauaux endurez cy deuant,
Et toute fois ie ne repoulse encores
Arriere ceux qui se presentent ores.

car les hōmes communément portēt enuie à ceulx
qui ont la gloire & la vertu gratis, ou sans qu'il
leur couste gueres: ne plus ne moins que si c'e-
stoit vne maison ou vn heritage, mais non pas à
ceux qui l'ont achetee bien cherement avec grāds
labeurs & grands perils. Et pour autant qu'il ne
faut pas seulement ne fascher point les escoutās, ny
se faire enuier en se louant, ains faut tascher à seruir
& profiter en ce faisant, à fin qu'il ne semble pas
que nous faciōs cela, mais autre effect par cela: con-
siderez premierement quand quelqu'un s'est loué
soy-mesme, s'il l'a point fait pour vne exhortation,
& pour exciter vne ialousie & vne emulation,
comme

A comme feit Nestor, lequel en racôtant ses prouesses & vaillances encouragea Patroclus, & les autres neuf cheualiers à entreprendre le combat d'homme à homme contre Hector: car l'exhortation, qui a la parole de l'œuvre quant & quāt, & l'exemple avec la pointure d'emulation est viue, & aiguillonne merueilleusement: & avec le courage & l'affection apporte l'esperance de pouuoir venir à bout, comme de chose qui n'est pas impossible, & pource des trois danses qui estoient en Lacedemone, celle des vieillards disoit

B Nous auons esté iadis

Jeunes, vaillans, & hardis.

celle des enfans,

Et nous vn iour le ferons,

Et tous vous surpasserons.

& celle des ieunes hommes,

Nous le sommes à l'espreuue,

Qui vouldra vienne, & l'espreuue.

En quoy feit sagement & en homme bien entendu au faict de gouuernement le legislateur qui les institua, de proposer aux ieunes gens des exemples familiers, & pres d'eux par ceux mesmes qui les auoient executez: ce neantmoins encore n'est il pas mauuais aucunefois de se vanter, & hautainement & magnifiquement parler de soy-mesme, pour estonner & reprimer vn petit, ou bien pour rauler & tenir bas vn braue audacieux, comme fait le mesme Nestor en vn autre endroit:

I'ay en mes iours hanté des personages,

Qui valoient mieux en faicts & en langages

Que vous, desquels estimé mal appris

Je ne fus oncq, ny tenu en mespris.

Ainsi parla aussi Aristote à Alexandre, disant qu'il estoit loisible & bien feant d'auoir le cœur haut, non seulement à ceux qui tenoient beaucoup d'hommes subiects à leur puissance: mais aussi à ceux qui auoient opinions veritables des Dieux. Et sont ces façons là de parler vtils quelquefois à l'encontre des ennemis & des mal-veuillans.

Ceux que mon bras en bataille rencontre,

Sont arriuez à mal-heureuse encontre.

& Agesilaus parlât du Roy de Perse que lon nom-
 „ moit le grand Roy, En quoy, dit il, est il plus grand
 „ que moy, fil n'est plus iuste? Et Epaminondas re-
 „ pliqua aux Lacedemoniens, qui accusoient avec
 „ beaucoup de paroles les Thebains: Au moins, dit
 „ il, vous auons nous guaris du peu parler. Mais quât
 à ces façons là de dire, elles s'adressent à des enne-
 mis publiques, ou particuliers malveuillans: &
 quant aux amis & à ceux qui sont des nostres, on
 peut bien aussi, en vsant à propos, en réps & lieu,
 de hautain langage non seulement applatir & ab-
 baisser ceux qui sont trop superbes & trop braues: F
 mais aussi au contraire eleuer & exciter ceux qui
 sont estonnez, effroyez & espouuentez. Car Cyrus
 au milieu des armes & des dangers de la guerre,
 parloit hautainement, & ailleurs non: & Antigo-
 nus, qui au demourant estoit sobre en paroles, &
 modeste, en la bataille naualle qu'il donna pres
 l'Isle de Co, comme l'un de ceux qui estoient au-
 tour de luy, vn peu auant la meslee, luy dist, Sire

A ne vois tu pas que les vaisseaux des ennemis sont
 » en beaucoup plus grand nōbre que les tiens? Mais
 » moy, dit il, pour combien de vaisseaux me cōptes
 » tu? Et semble qu'Homere ait bien entendu cela, car
 il fait qu'Vlyses voiant ses gens effroyez du bruit
 & de la tourmente qui sortoit du gouffre de Cha-
 rybdis, leur ramene en memoire la subtilité de son
 engin & sa vaillance, en leur disant,

Ce mal icy n'est point si dangereux
 Qu'estoit celuy, quand le Cyclops hereux
 Nous tournoioit de force merueilleuse

Tout alentour de sa cauerne creuse,
 Et toutefois ie vous en ay mis hors

Par ma prouësse & mes conseils accorts:

car ceste façon de louange n'est point d'un aduo-
 cat flattant, ny d'un sophiste se vantant, ne qui de-
 mande un applaudissement ny battemēt de mains,
 mais d'un personnage qui baille à ses amis pour
 gage de s'asseurer sur luy, sa vertu & sa suffisance:
 car c'est chose de grande importance pour le salut,
 en temps dangereux, que la reputation & la fiance
 que lon a d'un homme qui a l'autorité & la suffi-
 c sance de bon capitaine. Or auons nous desia par
 cy deuant deduit, que ce n'est point chose conue-
 nable ne bien seante à homme d'estat & d'hon-
 neur, que de s'opposer à la gloire & la louāge d'au-
 truy: toutefois là où vne faulse & peruerse louan-
 ge porteroit nuyssance & dommage, en apportant
 emulation de mal faire, & vne mauuaise volonté
 & intention en choses de grande consequence, il
 ne seroit pas inutile de repoulsier arriere, ou plus-

tost de diuertir l'auditeur à choses meilleures, en
 luy faisant veoir la difference. Car on se contente-
 roit bien à mon aduis de veoir que les hommes
 s'absteinsent volontairement du vice, quand ils le
 verroient blasmé & vituperé: mais si au lieu de le
 vituperer on le voioit louer, & si outre le plaisir &
 le profit qu'il apporte cōmunément quād & soy,
 on y adioustoit encore le tenir en honneur & en
 reputation, il n'y auroit si forte ne si heureuse natu-
 re, de laquelle il ne vint au dessus. Et pourtant faut
 il que l'homme de bien & de gouuernement face
 la guerre non aux louanges des hommes, mais aux
 louanges des choses, si ainsi est qu'elles soient mau-
 uaises: car ce sont celles qui corrompent les meurs,
 pour ce que avec telles louanges entre la volonté
 de imiter & ensuyure telles actions deshonestes,
 comme si elles estoient belles & honestes: mais on
 les aduere pour telles qu'elles sont, quand on les
 met au parangon vis à vis des honestes & verita-
 bles louanges. On dit que Theodorus le ioueur
 de Tragedies dit vn iour à Satyrus ioueur de Co-
 medies, que ce n'estoit pas grande merueille de
 faire rire les spectateurs, mais bien de les faire pleu-
 rer & cryer: aussi pourroit vn sage philosophe dire
 à ce mesme Theodorus, mais au contraire ce n'est
 pas chose grāde ne digne de faire pleurer ny cryer
 les spectateurs, mais bien de leur oster toute occa-
 sion de se douloir & de pleurer: car celuy qui se
 louë en ceste sorte profite à l'auditeur, & luy chan-
 ge son iugement, ainsi comme feit Zenon parlant
 du grand nōbre des auditeurs de Theophraste, Sa-
 danse,

A danſe, dit il, eſt plus grande que la mienne, mais la mienne eſt mieux accordee. Et Phocion, comme Leofthenes euſt encore la vogue, eſtant interrogué par les harengueurs, Quel bien il auoit iamais fait à la Republique: il leur reſpondit, Non autre, dit il, ſinon que ce pendant que i'ay eſté gouuerneur & capitaine, iamais vous autres meſſieurs n'auiez fait aucune oraïſon funebre, ains auez enterré tous voz citoïens qui ſont morts, és ſepultures de leurs anceſtres: & Crates eſcriuit & oppoſa fort gentilmente à ces vers de la ſepulture de Sardanapalus,

B Demouré m'eſt ſeulement ce que i'ay
Paillardé, beu, yurongné & mangé:
Demouré m'eſt ſeulement ce que i'ay
En mon viuant appris, ſçeu, & iugé
Des beaux ſecrets des Muſes que i'aimoye.

Car ceſte maniere de louanges eſt belle, honeſte & vtile, enſeignant à aimer & eſtimer les choſes qui ſont vtils & profitables, non pas celles qui ſont vaines & ſuperflues: parquoy ceſt aduertiffement ſoit ioinct aux autres, ſur le ſubiect de la queſtion propoſee. Mais il reſte maintenant à dire, ainſi que la ſuite du propos le requiert & nous en admo-neſte, Comment chaſcun pourra euites la faſcherie de ſelouër importunément ſoy-meſme: car le parler de ſoy ſortant d'une forte garniſon, que l'amour de ſoy-meſme, aduiens bien ſouuent à ceux meſmes qui ſont les plus modeſtes & plus eſloignez de vaine gloire. Et tout ainſi que l'un des preceptes de ſanté eſt, fuir & euites totalement les lieux mal ſalubres & maladiſs, ou pour le moins pren-

dre plus soigneusement garde à soy quand on y
 est: aussi y a il certains tēps, & certains propos fort
 glissants, esquels on se laisse facilement couler à
 parler de soy, à la moindre occasion du monde.
 Premièrement ceux qui de nature sont ambitieux
 quand ils oyent louer autrui, communément s'a-
 uancent à parler d'eux-mesmes, & leur prend vn
 appetit de gloire, & vn eslancement qu'ils ne peu-
 uent retenir, leur chattouillant & grattant vne de-
 mangeaison qu'ils ont de se louer, mesmement si
 celuy que lon louë deuant eux se rencōtre, ou egal
 en merite, ou inferieur à eux: car ainsi comme ceux
 qui ont faim sont encore plus irritez, & leur appe-
 tit d'auantage prouqué, quand ils en voient d'au-
 tres manger deuant eux: aussi la louange d'autrui
 enflamme de ialousie ceux qui sont subiects à la
 conuoitise d'honneur & de gloire. Secondemēt, le
 recit des choses que lon a heureusement & à sou-
 hait executees, poulse ordinairement ceux qui les
 racontēt en des vanteries & braueries pour la ioye
 qu'ils en ont: car depuis qu'ils sont vne fois tombez
 en propos des victoires qu'ils ont euës à la guerre,
 ou des entreprises qu'ils ont heureusement con-
 duittes à chef en matiere de gouuernement, ou des
 discours qui leur ont bien succedé, ils ne se peuuent
 contenir ny moderer: à laquelle maniere de parler
 de soy-mesme on voit principalement estre sub-
 iects les gēs de guerre & gēs de marine, plus qu'au-
 tres: & aduiēt aussi cela coustumieremēt à ceux qui
 reuiennent de la court des grands Princes, ou des
 lieux où il s'est fait quelques grands exploits & af-
 faires.

A faïres. Car en faïfant mention des Princes & grâds Seigneurs, ils y entrelaissent ordinairement quelques paroles qu'ils auront dittes à leur auantage, & ne cuydent pas se louer eux-mesmes, en disant cela, ains seulement reciter les louanges que d'autres auront dittes d'eux : & y en a qui pensent que les escoutans ne s'en apparçoiuent point, quand ils racontent les ambrassemens, recueils, & les caresses que les Roys, les Empereurs, & tels grands personages leur ont faïcts, comme s'ils ne recitoient pas leurs propres louāges d'eux, mais les courtoisies & **B** demonstrations de la bonté & humanité des autres : & pourtant faut il bien attentifvement prendre garde à soy, quand on louë quelqu'un, que les louanges qu'on luy donne soient pures & nettes, sans aucune suspicion, de s'aimer obliquement, & parler de soy-mesme, à fin qu'il ne semble point que nous louons, comme dit Homere,

Patroclus sous couleur & couuerture,
mais que nous entendons nous louer nous mesmes à trauers luy. Qui plus est, les blasmes mesmes & les reprehensions sont quelques fois bien dangereuses à faire chopper & deuoyer ceux qui se deulent vn petit de la vaine gloire : en laquelle maladie encourent souuent les vieilles gens, quand ils se mettent à reprendre les autres, & à blasmer les mauuaises façons de faire, & les fautes d'autrui, en se magnifiant eux-mesmes, comme aians esté admirables en l'opposité de ce dont ils accusent les autres : mais à ceux-là le faut il conceder, mesmement s'ils ont avec l'aage la reputation de lon-

gue main acquise de gés de bien & d'honneur: car **D**
 ce n'est pas chose inutile, ains qui donne grande
 emulation & enuie d'acquérir pareils honneurs
 à ceux qui sont ainsi chastiez par eux: mais tous au-
 tres se doiuent bien garder, & craindre ce destour-
 nement-là: car estant de soy-mesme autrement
 fascheux & presque intolerable le blasmer autrui,
 & où lon doit estre bien reserué & retenu, celuy
 qui mesle sa louange propre avec le blâme d'au-
 trui, & qui va cherchant gloire en l'infamie d'au-
 trui, est odieux infinimēt, & totalemēt importun
 & insupportable, voulant estre honoré de ce qu'il **E**
 deshonne les autres. D'auātage comme ceux qui
 sont de nature prompts & enclins à rire, doiuent
 fort euitier & fuir les chattouillemens & frottemēs
 legers par dessus les aixelles, & autres telles par-
 ties du corps, où il y a moins de poil, lesquelles se
 laissant aller, & se fondant à tels attouchemens,
 émeuent & excitent quant-&-quant la passion
 risible: aussi peult on donner cest aduertissement à
 ceux qui se laissent trop passionneemēt emporter
 à la conuoitise de gloire, de s'abstenir de se louer
 eux-mesmes, quand autres les loueront. Car il faut **F**
 que celuy qui se sent louer, rougisse de honte, non
 pas effronteemēt l'escouter, & qu'il reprenne ceux
 qui disent quelque grande chose d'eux, non pas
 qu'il le reprenne d'en auoir trop peu dit: ce que
 plusieurs font, qui suggerent eux-mesmes & en-
 taissent d'autres faicts magnanimes & prouësses
 qu'ils auront faittes, iusques à ce qu'ils gastent & la
 louange qu'ils se dōnent eux-mesmes, & celle que
 leur

A leur donnent les autres. Or y en a-il qui se flattans eux-mesmes se chattouillent & s'emplissent de vent, les autres malignement leur proposant quelque petite louange, comme vn appast pour les amorser, les attirent à les faire parler d'eux-mesmes, les autres les interroguent & leur font des demandes pour plus auant les faire entrer és filets, & auoir plus de matiere de rire: comme le soldat glorieux en vne comédie de Menander,

Seigneur comment eustes vous ce coup là?

Le Soldat,

B D'vn iaelot. Pour Dieu comment cela?

Sur vne eschelle en montant à mont contre

Vne muraille. Or le coup ie leur monstre

Quant est de moy à mon meilleur esciant:

Mais eux de moy se mocquoient en riant.

En toutes ces sortes-là d'ocques se faut il bien donner garde le plus que lon peut, & de sortir hors des bornes avec les louanges, & de se laisser aller aux interrogatoires, & pour s'en mieux retenir & donner de garde, le meilleur moien est d'observer de pres ceux qui se louent eux-mesmes, en se representant & ramenant en memoire, cōme c'est chose fascheuse & desplaisante à tout le monde: & cōme il n'y a propos qui soit plus odieux, ne plus moleste à ouir, car sans que nous puissions dire quel autre mal nous fait celuy qui se louë soy-mesme, nous faisons tout ce que nous pouuons pour nous en despestrer & respirer arriere à nostre aise, cōme estant vn fardeau, qui de soy & de sa nature charge par trop: tellement qu'il est intolerable &

insupportable mesme à vn flatteur, & vn pour-
 suiuant de repeuës franches; voire aiant necessité:
 & disent qu'ils payent bien cherement leur escot,
 quand il leur faut auoir la patience d'ouir vn riche
 ou prince, ou gouuerneur, ou Roy, qui qu'il soit,
 qui se louë luy-mesme: comme le bouffon qui dit
 en Menander,

Il m'emmaigrit à la table, il m'affomme,
 Quand il me faut endurer d'ouir comme
 A la soldate il rencontre aigüment
 Le franc archer malheureux garniment.

Car veu que cela ne se dit pas seulement contre les
 soldats, & contre les glorieux de nouueaux enri-
 chis, qui ont accoustumé de faire de beaux contes
 bien dorez, mais aussi contre les philosophes, les
 sophistes & rhetoriciens, & les capitaines enfléz
 de presumption, & parlant d'eux mesmes hautai-
 nement: si nous nous voulons souuenir, que les
 propres louanges que l'hōme se donne, sont touf-
 iours accompagnées du blasme & vitupere que
 les autres luy en donnēt, & que la fin de ceste vai-
 ne gloire est communément honte & infamie, &
 que fascher ceux qui les escoutent, comme dit De-
 mosthene, leur en demeure, & non pas estre tenus
 ny reputez pour tels qu'ils se disent, nous nous gar-
 derons bien de parler de nous mesmes, si ce n'est
 qu'un grand profit en doïue aduenir, ou à nous, ou
 à ceux qui nous escoutent.

Quelles

A QUELLES PASSIONS ET MAL-
LADIES SONT LES PIRES, CEL-
LES DE L'AME OV CELLES
DV CORPS.

*C'est vn commencement de Declamation
toute imparfaite.*



HOMERE aiant consideré les diuers genres des animaux mortels, & les aiât comparez les vns aux autres, tant en la duree qu'en l'entretienement de leurs vies, a exlamé, qu'il n'y en auoit pas vn si miserable que l'homme, de tous ceulx.

Qui sur la terre ou marchent ou respirent, adigeant vne malheureuse principaulté à l'homme, qu'il n'y en a point qui le passe en superiorité de tous maulx. Mais nous supposans que l'homme ait desia emporté la victoire de misere, & soit déclaré le plus calamiteux de tous les autres animaux, le voulons comparer à soy-mesme en collation de ses propres maulx, les diuisans en ame & en corps, non point en vain, sans aucun fruiet, ains fort pertinemmēt, à fin que nous sçachions, si c'est par nostre ame ou par nostre corps que nous vi-
Euons plus miserablemēt: car la maladie s'engendre en nostre corps par la nature, & le vice & la meschanceté en l'ame est premieremēt action, & puis apres deuient passion: si n'est pas petite consola-

tion de ſçauoir, que ce qui eſt le pire eſt curable, & **D**
 plus leger ce que lon ne peult fuir. Or le regnard
 d'Æſope plaidant à l'encontre du leopard rou-
 chant la varieté de leur peau, apres que le leopard
 eut monſtré la ſienne, qui à l'œil eſtoit bien mou-
 chetee & taellee de belles marques, là où celle du
 regnard auoit vn roux ſalle & mal-plaiſant à voir,
 Voire-mais, dit il, Sire iuge, ſi tu regardes le dedans,
 tu me trouueras mieulx taelé & mieulx mouche-
 té que ce leopard icy. voulant entendre ſa ruze &
 fineſſe de ſe tourner en diuerſes ſortes ſelon le be-
 ſoing. Diſons doncques auſſi en nous meſmes : **E**
 hōme, ton corps produit bien pluſieurs maladies
 & pluſieurs paſſions par nature de ſoy-meſme, &
 pluſieurs en reçoit auſſi qui luy aduiennent de de-
 hors, mais ſi tu ouures le dedans de toy, tu y trou-
 ueras vn amas & vne conſerue, comme dit Demo-
 critus, de pluſieurs bien diuers & differents mau-
 lxs, leſquels n'y ſont point coulez de dehors, ains y ont
 leurs ſources originaires ſaillantes de la meſme ter-
 re, leſquelles le vice, qui eſt abondant & riche de
 paſſions, pouſſe en auant. Et d'autant que les ma-
 ladies qui ſont au corps & en la chair ſe cognoiſ- **P**
 ſent par les inflammations, & par la couleur, quād
 le viſage rougit ou pallit plus que de couſtume, vne
 chaleur extraordinaire, vne laſſitude ſans cauſe ap-
 parente les deſcouure : mais celles de l'ame trom-
 pent bien ſouuēt ceux meſmes qui les ont, leſquels
 ne penſent pas que ce ſoient maladies : & d'autant
 ſont elles pires, qu'elles oſtent aux patients le ſenti-
 ment de leur mal : car le diſcours de la raiſon quand
 il eſt

A il est sain, sent les maladies du corps : mais és maladies de l'ame, luy mesme estant malade n'y a point de iugement de ce qu'il souffre: car cela mesme qui doit iuger souffre, & faut estimer que la premiere & principale maladie de l'ame c'est la folie, pour raison de laquelle le vice est irremediable & incurable en plusieurs, avec lesquels il habite, il vit & meurt: car le commencement de la guarison d'une maladie c'est le sentiment qui conduit le patient à chercher ce qui le peult secourir, mais celuy qui pour ne croire point qu'il soit malade ne cognoist pas ce dont il a besoing, encore que ce qui le peult guarir se presente à luy, il le refuse: car mesme entre les maladies corporelles, celles là sont les pires qui prennent avec priuation de sentiment, comme un subet ou lethargie, une frenaisie, une epilepsie ou hault mal, une apoplexie, les fièvres ardentes qui augmentent l'inflammation, iusques à mettre l'homme en resuerie & luy faire perdre l'entendement, en luy troublant le sens, comme d'un instrument de musique,

Touchant du cœur les cordes plus cachees,

C Qui ne deuroient pour rien estre touchees.

Voilà pourquoy les medecins veulent & souhaitent en premier lieu, que l'homme ne soit iamais malade, ou s'il l'est, au moins qu'il n'ignore pas qu'il soit malade, ains le sente bien: ce qui aduient presque ordinairement à toutes les maladies de l'ame, car ny ceulx qui sont fols & esuentez, ne ceulx qui sont dissolus & desordonnez, ne ceulx qui sont iniustes, ne pensent pas pecher ny faillir, ains y en a

quelques vns mesmes qui pensent bien faire. Il n'y eut iamais homme qui estimast que la fièvre fust santé, ny l'estre phthistique fust estre bien dispos, ny que la goutte aux pieds fust estre bien eniambé, ny que pallir fust rougir: là où ils appellent la cholere vaillâce, l'amour amitié, l'enuie emulation, courdisse prudence. Et puis ceux là appellent les medecins quād ils se sentent malades, car ils sentent bien de quoy ils ont besoing, mais ceux-cy fuient les sages & sçauans, pource qu'ils cuident bien faire en ce qu'ils font mal: par ceste mesme raison là nous disons que l'Ophthalmie, c'est à dire, le mal des yeux, est moindre maladie, que la Manie, qui est la rage & fureur: & la Podragre, qui est la goutte aux pieds, que la Phrenesie, qui est vne apostume dedans le cerueau: car celuy-là sent son mal, & criant enuoye querir le medecin: venu qu'il est, il luy mōstre son œil, il luy baille sa vene à ouurir, sa teste à entamer: là où nous oyons Agauée des Tragedies, si transportee hors de son bon sens par sa rage & manie qui la tient, qu'elle descognoist les personnes qui luy sont les plus cheres, en disant,

Ce ieune fan que nous venons
De massacrer, nous amenons
De la montagne en ceste place,
Heureuse en a esté la chasse.

Car celuy qui est malade de corps se rend incontinent, se couche dedās le liēt, & endure patiemmet que lon le medecine, & que lon le pense: & si d'adventure il s'est tourmēté & demené en son liēt, de maniere qu'un peu d'emotion luy en soit venue, le

A premier des assistans qui l'aduertira & luy dira doucement,

Demeure quoy dedås ton liët pauvre homme, il l'arreste & le retient : mais à l'opposite ceulx qui sont surpris des passiõs de l'ame, c'est lors que plus ils trauaillent, c'est lors que moins ils reposent, car les esclans & emotions sont les causes mouuâtes & principes des actions, & les passions sont vehemêces de telles motiõs. Voyla pourquoy elles ne laissent point reposer l'ame, ains lors que plus l'homme auroit besoing de patience, de silence, de re-
 B traitte en soy-mesme, c'est lors que plus elles le tirent en lumiere, c'est lors que plus se descouurent les choleres, les opiniaistretes, les amours, & les ennuys, le contraignans de faire plusieurs choses contre les loix, & d'en dire plusieurs mal conuenables au temps. Tout ainsi donc cõme plus dangereuse est la tourmête qui empesche la nauire de surgir & prendre port, que celle qui ne permet pas sortir du port, & faire voile: aussi les tourmentes de l'ame sont les pires, qui ne permettent point à
 C l'homme de se recueillir, ny de rasseoir le discours de sa raison, qui est troublé, & renuersé sans dessus dessous, sans pilote & sans chable, ny amare en tourmente, errant sans guide çà & là, & qui est emporté mal-gré luy, en courses temeraïres & mortelles, tant qu'à la fin il s'en va tomber en quelque effroyable naufrage, là où il brise sa vie : tellement que pour ces raisons & autres semblables ie conclus, qu'il est pire d'estre malade de l'ame, que non pas du corps, car les corps malades ne font que

souffrir seulement, mais les ames souffrent mal & D
en font tout ensemble. Quel besoing doncques est
il d'alleguer pour exemple les autres passions, veu
que l'occasion du temps qui se presente mainte-
nant nous en refreschit la memoire? Voyez vous
toute ceste foule de peuple, qui se poulse & se pres-
se à l'entour de la tribune & par toute la place? ne
sont ils pas tous venus en ce lieu pour sacrifier en-
semble aux dieux tutelaires, protecteurs de ce pais,
& pour participer en cōmun à mesmes religions &
mesmes saintes cerimonies? ne sont ils pas venus
pour faire ensemble offrāde à Iupiter Ascreien des E
primices des fruiċts de la Lydie, & pour solēniser à
l'hōneur de Bacchus, durant les saintes nuits sa fe-
ste eniouee en danſes & mōmeries accoustumees?
Et neantmoins cōme par accés & retours anniuier-
saires, la force de la maladie venant à aigrir & à irri-
ter l'Asie, ils viennent icy à s'entre-chocquer en des
plaids & procés ordinaires: & y a vn mōde d'affai-
res, cōme plusieurs torrēts, qui cōfluent ensemble
tout à vn coup sur vne mesme place, qui est enflée
& grouillāte d'une multitude infinie de gēs, se per-
dans eux mesmes & les autres. De quelles fiebures F
ou frissons procedēt tels effectz? de quelles tensions
ou remissions, augmentations ou diminutions, ou
intemperature de chaleur, de quelles superfusions
d'humeur viennent ils? Si vous interrogez chacune
cause, cōme si c'estoient des hōmes, d'où elles pro-
cedēt, dont elles viennent, vous trouuerez que l'une
est engendree par vne cholere superbe, l'autre par
vne furieuse opiniaſtreté, l'autre par vne iniuste cu-
pidité.

LES PRECEPTES DE MARIAGE.

PLVTARQVE A POLLIANVS
ET A EVRYDICE S.



B

PRES la cerimonie de mariage vſitee en ce païs, quela preſbtrefſe de Ceres vous a appliquee, en vous enfermant enſemble, il m'eſt aduiſ que le diſcours qui viendrait à ſe-

C

conder & fauoriſer ceſte voſtre conionction, en vous inſtruifant de bons enſeignements & ſages aduertiffements nuptiaux, ne vous ſeroit point inutile, & ſe trouueroit bien conforme à la couſtume & cerimonie que lon obſerue aux nopces en ce païs. Les Muſiciés entre leurs chanſons qu'ils chantent avec les haultbois, en ont vne ſorte qu'ils appellent Hippothoros, qui vault autāt à dire comme, Sailleiuments, aians opinion que cela eſt vn aiguillō qui incite les cheuaux à ſaillir les iuments. Mais la philoſophie aiant pluſieurs beaux & bons diſcours, en a vn qui fait autāt à eſtimer que nul autre, par lequel inſtruifant & enchantant ceux qui conuiennent en vn lien pour vſer tous les iours de leur vie enſemble, elle les red plus ſouples, plus gracieux & plus traittables l'un à l'autre. Parquoy ie vous ay fait vn recueil de preceptes & aduertiffements que vous auez ſouuēt-fois ouïs, ayās tous deux eſté nourris en l'eſtude de la philoſophie & les ay réduits à certains articles en

peu de paroles, à fin qu'ils en soient plus aisez à re-^D
 tenir, dont ie vous fais vn present à tous deux : en
 priant aux Muses, qu'elles veuillent assister & ac-
 cōpagner en vostre endroit la deesse Venus, pour-
 ce que ce n'est pas moins leur office de mettre bon
 accord & bonne consonance en vn mariage, par
 le moyen du discours de la raison & l'armonie de
 la philosophie, que de bien accorder vne cithre ou
 vne lyre. C'est pourquoy les anciés ont voulu que
 l'image de Venus fust colloquee ioignant celle de
 Mercure, comme voulans par là donner à enten-
 dre, que le plaisir de mariage auoit besoing de l'en-^E
 tre-tien d'une bonne & sage parole : encore met-
 toient ils avec ces deux images là, celles des Graces
 & de la deesse d'eloquence Suadele, à fin que les
 conioincts par mariage eussent gracieusement ce
 qu'ils voudroient l'un de l'autre, non pas en har-
 gnant & noisant l'un contre l'autre.

Solon vouloit que la nouuelle mariee mangeast
 de la chair de coing premier que de se coucher
 aupres de son mary : signifiant, à mon aduis, par
 ceste cerimonie, qu'il faut premierement que la
 grace de la bouche, c'est à dire l'haleine, & la paro-^F
 le, soit doulce, plaissante & agreable.

Au païs de la Bœoce la coustume est, que le iour
 des nopces, quand on met le voile nuptial à l'es-
 pousee, on luy met aussi sur la teste vn chapeau
 du ramage d'asperge sauuage, pource que celle
 plante d'une tref-poignante espine produit vn
 tref-doux fruiet : aussi la mariee, prouueu que le
 mary ne s'ennuye, & ne se rebute point pour la

A premiere difficulté & fascherie qu'il y a en mariage, luy apportera puis apres vne tresdoulce & tres-amiable compagnie: mais ceulx qui ne peuent supporter les premieres hargnes & riottes des filles, ressemblét proprement à ceux qui quitteroiét la grappe de raisin à vn autre, pour autāt qu'ils l'auroient veüe qu'elle n'estoit que verius. Et plusieurs nouvelles mariees qui prennent à dédaing leurs marits, à cause des premieres rencontres, font tout ne plus ne moins que celuy, qui aiant ia receu la picqueure de l'abeille, en iette par despit la goffre du miel qu'il tenoit en sa main. Parquoy il fault que ceulx qui sont conioincts ensemble par mariage, aient soigneusement l'œil à euer du commencement toutes occasions de discord & de dissension, considerant que les pieces de bois qui sont assemblees & collees freschemēt ensemble, se desioignent & desvniissent facilement & pour la moindre occasion du monde: mais au contraire, quand les iointures sont bien soudees & asseurees par long traict de temps, à peine les peut on plus desioindre ne separer avec le feu ny avec le fer.

c Tout ainsi comme le feu se prend aisemēt à de la balle & au poil de lieure, mais aussi s'estaint-il encore plus tost, si l'on n'y met soudainemēt quelque matiere propre à le nourrir & entretenir: aussi fault il estimer que l'amour des nouveaux mariez qui n'est allumé que de la chaleur de ieunesse & de la beauté du corps seulement, n'est pas ferme ne durable, si l'on n'est fondé en conformité de bones & honestes meurs, & qu'il ne tiene de la prudence engendrant

vne viue affectiō reciproque de l'vn enuers l'autre. D

La pescherie que lon fait de poisson avec des appasts empoisonnez est bien soudaine à prendre & prompte à arrester le poisson, mais elle le rend mauuais & dangereux à manger : aussi les femmes qui cōposent certains bruuages d'amour, ou quelques autres charmes & forcelleries pour donner à leurs marits, & qui les attrayent ainsi par allechements de volupté, il est force qu'elles viuent puis apres avec eulx insensez, estourdis, & transportez hors de leur bon sens. Ceulx que l'enchanteresse Circé auoit enforcelez, estans deuenus pourceaux E & asnes, ne luy pouuoient plus donner de plaisir ny de rien seruir, là où elle aimoit extremement Vlysses qui estoit sage, & se portoit en homme de bon entendement enuers elle. Mais celles qui aiment mieulx estre maistresses de leurs marits insensez, que leur obeir estans sages, ressemblēt proprement à ceulx qui aiment mieulx conduire & mener des aueugles, que suyure des voians & cognoissans. Elles ne veulent pas croire que iamais la Royne Pasiphaé ait aimé vn taureau, aiāt vn Roy pour mary, & neantmoins elles en voient aucunes F qui se faschent de leurs marits, lesquels sont personnes honestes & graues, & s'abandonent à d'autres qui sont tous composez de luxure, de dissolution & d'ordure, comme chiens ou boucs.

Il y a des hommes si foibles ou si mal adroits, qu'ils ne peuuent pas monter dessus leurs cheuaux estans debout, & pource leur enseignent ils à se mettre à genoux & à se baisser: aussi se treuue il des marits

A marits qui aians espousé des femmes riches & de nobles maisons, n'estudient pas à se rēdre eulx plus honestes & meilleurs, ains à rabaisser leurs femmes, se persuadās qu'ils en viendrōt mieulx à bout, quand ils les auront abbaissees & rauallees: là où il faut entretenir comme la iuste haulteur du cheual, aussi la dignité de la femme, & en l'une & l'autre sçauoir bien vser de la bride comme il appartient.

Nous voions que la Lune plus elle est esloignee du Soleil, plus elle est claire & plus elle se monstre, & que au contraire elle a moins de lumiere & se cache tant plus elle s'en approche: mais il fault que la femme sage face tout le contraire, qu'elle se face voir aupres de son mary, & qu'elle se tiene close, & garde la maison, quand son mary n'y est pas.

Herodote n'a pas bien dit, que la femme despouille la honte avec la chemise, car au contraire celle qui est honeste, en despouillant sa chemise se vest de honte: & est le plus certain signe que lon sçauroit auoir, que les conioincts par mariage s'entraiment bien reciproquement, quand plus ils se portent de reuerence l'un à l'autre.

C Ainsi comme si lon prent deux sons qui soient d'accord, lon entend tousiours plus celuy du bas: aussi en vne maison bien reglee & bien ordonnee tout se fait bien du consentement des deux parties, mais il apparroist tousiours que c'est de la conduite, du conseil, & de l'inuention du mary.

Le Soleil, ce disent les fables, sur monta le vent de bise, car tāt plus qu'il s'efforçoit d'oster par force la robbe à l'hōme, & que pour ce faire il souffloit plus

violentement, d'autant plus l'homme se ferroit, & D
 reſtraignoit ſon habillement : mais quand le Soleil
 vint à eſtre chaud apres le vent, l'homme ſe ſentât
 eſchauffé, deſpouilla ſa robbe, & puis apres bruſ-
 lant de chaud, il oſta ſon ſaye & tout : la plus part
 des femmes en fait tout de meſme, car quand elles
 voient que leurs marits leur veulent oſter d'autho-
 rité & par force les delices & la ſuperfluité, elles
 combattent alencontre, & en ſont marriés : & au
 contraire ſils leur remonſtrent avec la raiſon, elles
 l'oſtent d'elles meſmes tout paiſiblement, & le ſup-
 portent patiemment. E

Caton priua vn Sénateur Romain de la dignité
 Senatoriale, d'autant qu'en preſence de ſa fille il a-
 uoit baiſé ſa femme: cela fut bien vn peu trop vio-
 lent: mais ſil eſt laid, comme il eſt, de ſ'entre-baiſer,
 ambrasser & accoller en preſence d'autres, com-
 ment n'eſt-il encore plus laid & plus deſhonneſte,
 ſ'entre-iniurier & ſ'entretâſer l'un l'autre? ſe iouer
 à part en ſecret avec ſa femme, & la caſſer, & puis
 en public la tanſer, la blaſmer & picquer de rudes
 & aigres paroles deuant le monde?

Comme vn mirouër pour eſtre bien doré & en- F
 richi de pierres precieufes, ne ſert de rien ſil ne re-
 preſente bien au viſ la face de celuy qui ſe mire de-
 dans : auſſi ne plaïſt point vne femme pour auoir
 beaucoup de biens, ſi elle ne rend ſa vie ſemblable,
 ſes meurs & conditions conformes à celles de ſon
 mary. Si le mirouër fait vn viſage triſte & morne à
 vn qui eſt ioyeux & gay, ou au contraire riant &
 enioué à vne perſonne qui eſt melancholique ou
 marrie,

A marrie, il est faulx, & ne vault rié: aussi est vne femme mauuaise & importune, qui fait de la renfrongnee quand son mary a enuie de se iouer à elle, & de la caresser: ou à l'opposite qui veult rire & iouer alors qu'elle voit son mary en affaire, & bien empesché: car l'un est signe qu'elle est fascheuse, l'autre qu'elle mesprise les affections de son mary: là où il faut, ainsi que disent les geometriens que les lignes & les superficies ne se meuuēt point par elles, mais au mouuement des corps: aussi que la femme n'ait nulle propre & peculiere passion ou affection **B** à elle, ains qu'elle participe aux ieux, aux affaires, aux pensements, & aux ris de son mary.

Ceux qui ne prennent pas plaisir de voir leurs femmes boire & manger librement en leur presence, leur enseignent à se saouler gouluiement à part, quand elles sont seules: aussi ceux qui ne s'esjouissent pas gayement avec leurs femmes, & ne se iouēt & ne riēt pas priueemēt avec elles, leur enseignent de chercher leurs plaisirs & voluptez à part.

Les Roys de Perse quand ils souppent ou mangent à leur ordinaire, ont leurs femmes espousees **C** assises aupres d'eux à la table: mais quand ils veulent iouer & boire d'autant iusques à s'enyurer, ils renuoyēt leurs femmes en leurs chambres, & font venir leurs concubines, & leurs chanteresses & baladines: & font bien en cela, qu'ils ne veulent point que leurs femmes legitimes voient ne participent en rien de leurs yurongneries, & de leurs dissolutions. S'il aduient doncques qu'un homme priué subiect à son plaisir, & mal conditionné commette

quelque faute avec vne siene amie ou avec vne chambriere, il ne faut pas que sa femme pour cela se courrouce, ne qu'elle s'en tourmente: mais plus tost qu'elle estime, que c'est pour la reuerence qu'il luy porte, qu'il ne veult pas qu'elle soit participante de son yurongnerie, de son orde luxure & intemperance.

Quand les Roys aimēt la musique, ils sont cause que de leur regne il se fait plusieurs bons Musiciens: semblablement ceulx qui aiment les lettres font plusieurs hommes lettrez, ceulx qui aiment les exercices de la personne rendent plusieurs de leurs subiects bien adroits & dispos: aussi vn mary qui n'aime que le corps, fait que sa femme n'a autre soing que de se farder: qui aime la volupté, fait qu'elle tient de la courtisane, & deuient lubrique & lasciuue; & quand il aime l'honneur & la vertu, il la rend sage, vertueuse & honeste.

Vne ieune garçe Laconiene respondit à quelqu'un qui luy demandoit, si elle auoit ia esté au mary: nō pas moy à luy, mais bien luy à moy. C'est, à mon aduis, la maniere comme se doit comporter vne femme honeste enuers son mary, de ne reietter ny ne desdaigner point les ieux & caresses d'amour, quand son mary les commance, ny aussi ne les commancer point: pource que l'un tient de la courtisane effrōtee, l'autre sent sa femme superbe, & qui n'a point de grace ny d'amour.

Il ne faut point que la femme face d'amis particuliers, mais bien qu'elle estime communs ceux de son mary. Or les dieux sont les premiers & les plus
grands

A grands amis que puisse auoir l'hōme, pource fault il qu'elle serue & adore ceux que son mary reputé Dieux seulement, sans en recognoistre d'autres : & au demourant qu'elle ferme sa porte à toutes curieuses inuentions nouuelles de religions, & toutes estrāgeres superstitiōs : car à nul des Dieux ne peuvent estre agreables les seruices & sacrifices que la femme fait à la derobbee, au desceu de son mary.

Platon escrit que la cité est bienheureuse, & bien ordonnee, là où lon n'entend point dire, Cela est mien, cela n'est pas mien : pour ce que les habitans y ont toutes choses, mesmement celles qui sont de quelque importance, communes entre eux, autant comme il est possible : mais ces paroles là doiuent bien encore plus estre bannies hors du mariage, sinon en tant que comme les medecins tiennent que les coups qui se donnent en la partie gauche se sentent en la droite, aussi la femme doit ressentir par compassion les maux de son mary, & le mary encore plus ceux de sa femme, à fin que comme les nœuds prēnent leur force de ce que les bouts s'entrelassent l'un dedans l'autre, aussi la societé de mariage s'entretiene & se fortifie quand l'une & l'autre des parties y apportera affection de bienveillance mutuelle : car la nature mesme nous mesle par noz corps, à fin que prenant partie de l'un & partie de l'autre, & meslant le tout ensemble, elle rende ce qui en prouient commun à tous deux : de maniere que ny l'une ny l'autre des parties n'y puisse discerner ne distinguer ce qui est propre à elle, ne ce qui est à autrui. Ceste communauté

de biens mesmement, doit estre principalement entre ceulx qui sont conioincts par mariage, qui doiuent auoir mis en commun & incorporé tout leur auoir en vne substance : de sorte qu'ils n'en reputent point vne partie estre propre à eulx, & vne autre à autrui, ains le tout propre à eulx & rien à autrui. Comme en vne couppe où il y aura plus d'eau que de vin, nous l'appellōs vin neantmoins, aussi le bien doit tousiours, & la maison estre nommee du nom du mary, encore que la femme en ait apporté la plus grande partie.

Helene estoit auaricieuse, & Paris luxurieux: au contraire, Vlysses estoit prudent, & Penelopé chaste: pourtant le mariage de ceulx-cy fut heureux, & celuy de ceulx-là remplit les Grecs & les Barbares d'une Iliade, c'est à dire, d'une infinité, de maulx & de calamitez.

Vn gentilhomme Romain aiant espousé vne belle, riche, & honeste ieune Dame, la repudia: de quoy tous ses amis le reprirēt & tanferent bien asprement : & luy, tendant le pied, leur monstra son soulier, leur demandant, Que luy faut-il? n'est il pas beau? n'est il pas tout neuf? & toutefois il n'y a ce-
luy de vous qui sçache l'endroit où il me presse, & me bleçe. Voyla pourquoy il ne fault point qu'une femme se confie, ny en ses biens, ny en la noblesse de sa race, ny en sa beauté, mais en ce qui touche de plus pres au cœur de son mary, c'est à dire, en son entretien, en ses meurs, & en sa conuersation, donnant ordre que toutes ces choses ne soient point dures, fascheuses ny ennuyeuses par
chascun

A chascun iour à son mary, ains plaisantes, agreables & accordantes à ses conditions. Car tout ainsi que les medecins craignent d'auantage les fièvres qui s'engendrēt de causes occultes, assemblees de longue main petit à petit, que celles qui viennent de causes toutes apparentes & manifestes : aussi y a il quelquefois de petites hargnes, & querelles quotidiannes & continuelles, entre le mary & la femme, que ceux de dehors ne voient ny ne cognoissent pas, qui les separent plus l'un de l'autre, & gastent plus le plaisir de leur cohabitation, que nulle autre cause.

Le Roy Philippe aimoit vne femme de Thessalie, que lon mescroyoit de l'auoir charmé & enforcé : parquoy la Royne Olympias sa femme fait tant qu'elle l'eut entre ses mains : mais quand elle l'eut bien regardee, & bien considéré comme elle estoit belle, de bonne grace, & comme sa parole sentoit bien sa femme de bonne maison, & bien apprise : Arriere, dit elle, toutes calomnies : car ie voy bien que les charmes dont vous usez sont en vous mesmes. C'est doncques vne force inexpugnable qu'une femme espousee & legitime, qui metrant en elle mesme toutes choses, son auoir, sa noblesse, ses charmes, voire tout le tissu mesme de Venus, s'estudie par douceur, bonne grace & vertu, d'acquérir l'amour de son mary.

Vne autrefois la mesme Royne Olympias entendant qu'un ieune gentilhomme espousoit vne Dame de la court, qui estoit bien belle, mais elle n'auoit pas trop bon bruit : Cestui-cy, dit elle, n'a

point de ceruelle, car autremét il ne se fust pas marié au rapport ny à l'appetit de ses yeux. Or ne se faut-il pas marier au gré de ses yeux seulement, ny au rapport de ses doigts non plus, comme font aucuns qui comptent sur leurs doigts, combien leur femme leur apporte en mariage, & ne considerent pas premierement, si elle est conditionnee de sorte qu'ils puissent viure avec elle. •

Socrates auoit accoustumé de conseiller aux ieunes hommes qui se regardoient dedans des miroiers, fils estoient laids de visage, de corriger leur laideur par la vertu, en se rendant vertueux: & fils estoient beaux, de ne souiller point leur beauté par vice: aussi seroit il bien honeste que la Dame mariee, quand elle tient son miroier en sa main parlast ainsi en elle mesme, si elle est laide: Que sera ce donc que de moy, si ie deuens encore meschante: Et si elle est belle, Que sera-ce au pris, si ie demeure honeste & sage: car si la laide est aimée pour sa bõne grace, & pour ses honestes meurs, ce luy est plus d'hõneur, que si c'estoit pour beauté.

Le tyran de Sicile Dionysius enuoyoit des robes & des bagues precieuses aux filles de Lysander, mais Lysander ne les voulut oncques receuoir, disant, Ces presens feroient plus de hôte que d'honneur à mes filles. Le poëte Sophocles deuant Lysander auoit dit vne semblable sentence,

Cela chetif ne te fait point d'honneur,
Mais bien plus tost & honte & deshonneur,
Monstrant ton cœur lascif & impudique.

Car comme disoit le philosophe Crates, cela est

A ornement qui orne, & cela orne la Dame qui la rend plus honorable: ce que ne font pas les ioyaux d'or, les esmeraudes, ny les pierres precieuses, ny les accoustrements de pourpre, mais tout ce qui la fait estimer honeste, sage, humble & pudique.

Ceux qui sacrifient à l'uno coniugale ou nuptiale, n'offrent pas le fiel avec le demourât de la beste immolee, ains le tirent dehors, & le iettent aupres de l'autel: par laquelle cerimonie, celuy qui l'a premierement instituee a voulu donner à entendre, qu'en mariage il n'y doit point auoir de fiel, c'est à dire amertume de cholere, ny de courroux quelconque: non qu'elle ne doie estre graue & vn peu austere, mais ceste austerité doit estre comme celle du vin, vtile & plaisante, non pas amere comme celle du chicotin, ou de quelque autre drogue de medecine.

Platon voiant le Philosophe Xenocrates, qui estoit au demourant bien vertueux & homme de bien, mais vn peu de meurs trop seueres, l'admonestoit de sacrifier aux Graces: aussi estimé-ie que vne Dame honeste a encore besoing de graces enuers son mary, à celle fin que, cōme disoit Metrodorus, elle viue ioyeusement avec luy, & qu'elle ne se fasche, ny ne se repente point d'estre femme de bien: car il ne faut pas, ny que pour estre bōne mesnagere elle mette en nonchalloit d'estre propre & nette, ny que pour bien aimer son mary elle laisse de le caresser courtoisement, pource que la cōuersation fascheuse d'vne femme rend son honesteté odieuse, cōme la fallerité fait aussi hair son espargne

& bon mesnage: tellement que celle qui craint de rire deuant son mary, ou de faire quelque autre gayeté, de peur d'estre estimee affectee & effrontee, fait ne plus ne moins que si elle laissoit de s'oin- dre de tout poinct, de peur que lon ne l'estimast parfumee: ou de se lauer le visage, de peur qu'on ne la soupçonast fardee. Nous voions mesmes que les poëtes & les orateurs qui veulent euitier la fascherie qu'il y a à lire vn langage bas, vulgaire & de mauuaise grace, s'estudient ingenieusement à retenir & esmouuoir le lecteur & l'auditeur par la force de l'inuention, de la disposition, & naïfue representation des meurs des personnes: aussi faut il que l'honneste mere de famille, en bien faisant euitte toute affecterie, toute curiosité, & brief toute façon de faire qui sente sa courtisane, ou sa femme qui se veuille monstrier, mais bien qu'en ses ieux, ses caresses & ses graces, dont elle vsera en sa conuersation ordinaire avec son mary, elle l'accoustume à l'honnesteté avec plaisir. Toutefois si d'ad- uenture il s'en treuve quelqu'un si austere, & si se- uere de sa nature, qu'il n'y ait ordre quelconque de la pouuoir esgayer ny resiouir, en ce cas-là il faut que le mary soit equitable: & tout ainsi cōme Phocion respondit à Antipater qui luy commandoit

» vne chose deshoneste & mal-seante à son estat, Tu
 » ne me sçauois auoir pour amy, & pour flatteur
 » ensemble: aussi faudra il qu'il die en soy-mesme de sa femme qui sera pudique & seuerie, Il n'est pas raisonnable que ie face d'elle comme d'une femme, & comme d'une amie ensemble.

A Les femmes d'Ægypte par la coustume du país ne portoient point de souliers en leurs pieds, à fin que cela les accoustumast à demourer en la maison: mais au contraire la plus part de noz femmes, si vous leur ostez les patins dorez, les carcans, les bracelets, les calleçons, les perles & les robes de pourpre, elles ne partiront iamais du logis.

Theano vn iour en vestant sa robe monstra d'adventure vne partie du bras: & quelqu'un des assistans qui l'apperceut, se prit à dire, ô le beau bras que voyla! Il est vray, respondit elle, mais il n'est pas commun: aussi ne faut il pas que le bras seulement de la dame pudique & honeste ne soit pas commun, mais ny sa parole mesme: ains faut qu'elle se garde, & qu'elle ait honte, autant presque de desployer sa parole, que de descouvrir son corps deuant des estrangers, pour autant que ses meurs, ses affections & ses conditions se voient & se descouurent en icelle, quand elle parle.

Phidias feit l'image de Venus aux Eliens, aiant le pied dessus la coque d'une tortue, qui signifioit, que la femme ne se doit partir de la maison, ains y demourer en silence: car il faut qu'elle parle ou à son mary, ou par son mary, ne se faschât point pour cela, si elle sonne par la lāgue d'autrui, comme fait le haubois.

Les hommes riches, les Princes & les Roys en honorant les philosophes & gens de lettres se font honneur à eux mesmes: mais les philosophes qui font la court & s'asseruent aux riches, ne les rendent pas honorez pour cela, ains se rendent eux-

mesmes deshonorez. Il en prend tout de mesme ^D aux femmes : car quand elles se soubmettent à leurs marits, elles en sont louees : mais quand elles en veulent estre maistresses, cela leur est plus mal-seant, que non pas à ceux qu'elles maistrisent. Mais il faut que le mary domine la femme, non comme le seigneur fait son esclau & ce qu'il possede, mais comme l'ame fait le corps, par vne mutuelle dilection & reciproque affection, dont il est lié avec elle : & comme l'ame peut bien auoir soing du corps, sans s'asservir aux voluptez, ny aux appetits desordonnez d'iceluy: aussi peut bien le mary dominer à sa femme, en luy complaisant & la gratifiant.

Les Philosophes tiennent, que des corps composez de plusieurs pieces, les vns sont composez de parties distinctes & separees les vnes des autres, comme vne flotte de vaisseaux, ou vne armee navale : les autres de parties conioinctes & qui touchent les vnes aux autres, comme vne maison ou vne nauire : les autres de parties vnies dès la naissance, croissantes & viuantes naturellemēt ensemble, cōme sont tous les corps des animaux. Le mariage se rapporte presque & ressemble à tout cela; car le mariage de ceux qui s'entre-aiment, ressemble proprement aux corps dont les parties sont naturellement vnies ensemble : celuy de ceux qui se marient pour les grands douaires, ou pour auoir des enfans, ressemble aux corps dōt les parties s'entretouchent : & celuy de ceux qui couchent seulement ensemble, se conforme au corps duquel les

par-

A parties sont separees & distinctes l'une de l'autre, desquels on pourroit veritablement dire, qu'ils habitent, mais qu'ils ne vivent pas ensemble. Or faut il, que comme les Physiciens disent que les corps liquides sont ceux qui se meslent du tout en tout l'un avec l'autre, aussi que de ceux qui sont mariez ensemble, & les corps & les biens, & les amis, & les parents soient tous vns & communs, meslez l'un parmy l'autre : c'est pourquoy les loix Romaines defendent aux conioincts par mariage de s'entrefaire donations mutuelles, non
 B à fin qu'ils n'aient rien l'un de l'autre, mais à celle fin qu'ils estiment toutes choses communes entre-eux.

Il y auoit vne coustume en la ville de Leptis, qui est située en la Barbarie, que la nouuelle mariee le lendemain de ses nopces enuoyoit deuers la mere de son mary luy demander à emprunter vn pot à mettre au feu : sa belle mere le luy refusoit, & respondoit qu'elle n'en auoit point, à fin que dès le commencement la nouuelle espousee apprist, que la belle mere tient vn peu de la marastre, & que si
 C apres il aduenoit qu'elle luy teint quelque autre plus aspre rudesse, elle ne le trouuast point estrange, & qu'elle ne s'en courrouceast point : aussi faut il que la femme de bõne heure remedie à l'occasion de ceste ordinaire rudesse, qui n'est autre chose que la ialousie de la mere, pour l'amitié que son fils luy porte : & le remede vnique de ceste passion est, que la femme s'estudie tellemēt de gaigner la bõne grace de son mary, que pour cela elle ne diminue

point, ny ne tire point à elle l'affection que le fils D
doit porter à sa mere.

Il semble que les merès entre leurs enfans aimēt plus coustumierement les fils que les filles, comme ceux de qui elles esperent plus de secours:& les peres au contraire,aiment plus les filles, comme celles qui ont plus de befoing de leur secours:& peut estre que par l'honneur qu'ils s'entre-portent, l'un veut sembler auoir plus d'affection & plus d'amour enuers ce qui est plus propre à l'autre : toutefois cela à l'aduenture est different, mais bien est il seant & honeste à la femme , de monstrier auoir E plus d'inclination à honorer & caresser les parents de son mary, que les siens propres:& si elle a quelque ennuy,le communiquer plus tost à ceux-là, & le celer aux siens:car ce qu'elle monstre auoir plus de fiance en eux,fait qu'ils se fient plus en elle : & & ce qu'il semble qu'elle les aime plus , fait qu'elle est aussi plus aimee d'eux.

Les capitaines de Cyrus commanderent à leurs souldards , si les ennemis leur venoient courir sus avec grands cris,qu'ils les receussent sans mot dire: & au contraire,s'ils venoient les assaillir en silence, F qu'eux leur courussent avec grands cris à l'encontre:aussi les femmes de bon entendement, quand elles voient que leurs marits estans en cholere crient,elles se taisent: & au contraire, s'ils ne disent mot,en parlant à eux & les reconfortant, elles les appaisent & addoucissent.Et fait sagemēt le poëte Euripides , quand il reprent ceux qui vsent de la Lyre,& autres instruments de musique durant vn festin:

A festin: Car il falloit, dit-il, plus tost appeller la musique quand on est en cholere, ou bien en deuil, que non pas quãd on est en feste & en ioye, pour se lasser encore plus en toute volupté: Aussi faut il estimer que vous cõmettez vne faute, quãd vous allez coucher ensemble pour vous donner plaisir l'un à l'autre, & quand vous estes en courroux, ou en quelque different l'un contre l'autre, vous faites deux liets, & couchez à part l'un de l'autre, & n'appellez pas lors à vostre aide la Deesse Venus, qui sçauroit mieux que nulle autre donner la medecine propre à telles maladies, ainsi comme le poëte mesme Homere le nous enseigne au passage où il fait dire à Iuno,

Je finiray voz querelleux debats

Dedans vn lict par amoureux esbats.

Or faut-il que la femme fuye toutes occasions de quereller avec son mary, & le mary semblablement avec sa femme: mais principalement faut il bien qu'ils s'en donnent de garde lors qu'ils sont couchez ensemble dedans le lict: car comme disoit la femme grosse prestee d'accoucher, & ia sentant les douleurs de son trauail, à ceux qui la vouloiẽt coucher dessus son lict: cõment est-ce que le lict pourroit guarir ce mal, veu que ç'a esté sur le lict qu'il m'est aduenu: aussi les querelles, iniures, courroux, & choleres qui s'engendrent dedans le lict, il est mal-aisé de trouuer autre temps ny autre lieu qui les peust iamais appaiser ny guarir.

Il semble que Hermione dit vray en vne Tragedie d'Euripide quand elle parle ainsi,

Entrans chez moy femmes de mauuais nom D
 Ont ruiné mon los & bon renom.

mais cela n'est pas simplement quand de mauuais-
 ses femmes entrent en vne maison, ains quãd elles
 y hantent lors que quelque noise contre le mary
 ou quelque ialousie leur ouurent non seulement
 les portes de la maison, mais aussi les oreilles, c'est
 alors que la femme sage doit fermer les oreilles &
 se donner bien garde de leur babil, de peur que ce
 ne soit adiouster feu sur feu, & qu'elle doit bien
 auoir deuant ses yeux le dire du Roy Philippus de
 Macedoine: car on lit qu'il respondit vn iour à
 quelquesvns de ses familiers qui l'irritoient à l'en-
 contre des Grecs, d'autant qu'ils detractoiẽt &
 mesdisoient de luy, apres en auoir receu beaucoup
 de bien: Or aduisez donc qu'ils feroient, dit-il, si ie
 leur faisois du mal. Quand doncques telles fem-
 mes viendront à luy dire: Comment, vostre mary
 vous fait iniure à vous qui l'aimez tant, & qui luy
 gardez si bien loyauté de mariage: elle leur respon-
 dra, Que me fera il doncques si ie commence à le
 haïr, & à luy faire tort?

Vn maistre aiant apperceu son esclauẽ fugitif, E
 qui s'en estoit fuy long temps y auoit, se meit à
 courir apres pour le reprendre: l'esclauẽ fuyant, se
 ietta dedans vn moulin: & le maistre dit en luy-
 mesme, en quel lieu eusse-ie mieux aimé le trou-
 uer: aussi la femme qui par ialousie est sur le poinct
 de faire diuorse avec son mary, qu'elle die à par
 soy en elle mesme: en quel estat aimeroit mieux
 me veoir celle qui me rend ialouse, que faisant ce
 que

A que ie fais, me voiant despité, en mauuais ménage avec mon mary, abandonnant ma maison, & le liēt mesme nuptial:

Les Atheniens font en l'année trois labourages sacrez, le premier est en l'isle de Sciros, en memoire de la premiere inuention de labourer la terre & de semer, dont ils ont esté inuenteurs: le second est celuy qui se fait au lieu appellé Raria: le troisieme celuy qui se fait tout ioignant la ville, & l'appelle lon Buzygion, en remembrāce de l'inuention d'atteller les bœufs sous le ioug au timon de la charue: mais le labourage nuptial est plus sacré, & se doit plus saintement obseruer que tous ceux là, en intétion d'auoir lignee. C'est pourquoy Sophocles a bien & sagement appellé Venus fructueuse: pourtāt faut il que l'hōme & la femme conioincts par mariage en vsent fort religieusemēt & saintement, en s'abstenant entierement de toute autre illi-cite & defendue cōiunction, & de labourer ou semer en lieu dont ils ne voudroiet pas recueillir aucun fruit, & dont si d'aduenture il en vient, ils ont honte, & font ce qu'ils peuuent pour le cacher.

c L'orateur Gorgias en pleine assemblee des ieux Olympiques fait vne harangue aux Grecs qui y estoient assemblez de toutes parts, pour les enhorter de viure tous en bonne paix, vnion & cōcorde les vns avec les autres: mais il y eut vn Melanthius qui luy dit tout haut: Cestuy cy fingere de nous conseiller & prescher la concorde en public, qui ne peut pas persuader en son priuē à sa femme & à sa chambriere qu'elles viuēt en paix ensemble, &

si ne sont qu'eux trois en la maison: car ce Gorgias ^D portoit quelque affection à sa chambriere, & sa femme en estoit ialouse: aussi faut il que la famille & maison soit bien ordonnee de celuy qui se veut mesler de donner ordre aux affaires publiques, & à ceux de ses amis, car communément il aduient que les fautes que lon commet contre les femmes, sont plus diuulguees parmy le peuple, que celles des femmes.

On escrit que les chats se troublent de l'odeur des parfums & des senteurs iusques à en entrer en fureur: sil aduenoit aussi que la femme s'offenceast ^E iusques à auoir le cerueau troublé des parfums de son mary, il seroit bien d'estrange nature sil ne s'en abstenoit: ains pour vn bien peu de plaisir, la laissoit tomber en vn si grand inconuenient. Or puis qu'il est ainsi que tels accidents leur aduienēt, non pas quand leurs marits se parfument, mais quand ils s'addonnent à aimer des putains, c'est vne grande iniustice à eux, que pour vn bien peu de volupté cōtrister, offenser, & troubler si fort leurs femmes, & ne faire pas au moins comme ceux qui ont à s'approcher des abeilles, lesquels s'abstiennent de ^F toucher mesmes à leurs propres femmes, pour ce que lon dit que les abeilles les haïssent, & leur font plus la guerre qu'aux autres, aians le cœur si lasche, que de se venir coucher aupres de leurs femmes estans souillees & pollues de la compagnie d'autres quelconques.

Ceux qui gouernent des Elephans ne vestent iamais de robes blanches, ny ceux qui approchēt
des

A des taureaux ne prennent iamais robbes rouges, pour autant que ces animaux là s'effarouchent & s'effroient de telles couleurs: & dit-on que les Tigres quand elles entendent sonner des tabourins alentour d'elles, en enragent, & se deschirent elles mesmes par fureur. Puis qu'il y a donc des hommes qui ne trouuent pas bon, & se courroucent quand leurs femmes portent des robbes d'escarlatta & de pourpre, & d'autres qui sont marris d'ouïr sonner des cymbales ou des tabourins, quel mal y aura il quand les femmes s'en abstiendront,

B pour ne fascher ny ne prouoquer point à ire leurs marits, & qu'elles viuront avec eux sans bruit, en repos & en patience?

Vne ieune femme dit vn iour au Roy Philippus qui la tiroit par force maugré elle: Laissez moy, Sire, toutes femmes sont vne quand la chandelle est esteincte: cela est bon à dire aux hommes aduultes & dissolus en luxure: mais il faut pourtant que l'honeste Dame mariee, principalement quand la clarté est ostee, ne soit pas toute vne que les autres cōmunes femmes: ains faut que lors que son corps

C ne se voit point, elle face plus paroistre sa pudicité, son honesteté, son amour enuers son mary, & que elle soit propre à luy seul.

Platon admoneste les vieilles gens de se mōstrer plus vergongneux deuât les ieunes que deuât nuls autres, à celle fin qu'ils leur enseignent par leur exemple à estre aussi reuerends & respectueux en leur endroit: pource que là où les vieux sont effrontez, il n'est pas possible d'imprimer aucune

hôte ny aucune reueréce aux ieunes. Or faut il que D
 le mary se souuenant de ce precepte, reuere sa femme plus que toutes les autres personnes du mode: car la châtre nuptiale luy sera vne eschole d'honneur & de chasteté, ou bié d'intéperance & de lubricité: car celuy qui prent les plaisirs qu'il defend à sa femme, fait ne plus ne moins que s'il luy commandoit de combattre contre des ennemis, auxquels il se fust desia luy mesme rendu.

Au reste quand à aimer d'estre paree & bien en point, toy Eurydicé qui as leu ce que Timoxenus en a escrit à Aristilla, tasche à l'imprimer en ta E
 memoire: mais toy Pollianus, n'estime pas que iamais ta femme s'abstienne de curiosité, delices & superfluité, si elle apparçoit que tu ne la mesprises pas és autres choses, ains que tu prènes plaisir à veoir & auoir de la vaisselle bien doree, ou des cabinets bien diaprez, des mulets sumptueusement enharnachez, & des cheuaux richement equippez, car il est bien mal-aisé de chasser les delices & la superfluité d'entre les femmes quand on la voit regner entre les hommes.

Au demourant estant ià de l'aage pour estudier F
 aux sciences, qui se preuent par raison & par demonstration, orne desormais tes meurs en hantant & frequentant avec les personnes qui te peuuent seruir à cela: & quant à ta femme, amasse luy de tous costez, comme font les abeilles, tout ce que tu penseras luy pouuoir profiter, le luy apportât toy-mesme, & en toy-mesme, fais luy en part, & en deuise avec elle, en luy rendant amis & familiers les
 mil-

A meilleurs liures & les meilleurs propos que tu pourras trouuer,

Car tu luy es au lieu de pere & mere,

Et deormais tu luy es comme frere.

& ne seroit pas moins honorable d'ouir vne femme qui diroit à son mary, Mon mary tu es mon precepteur, mon regent, & mon maistre en philosophie, & la cognoissance de tres-belles & tres-di-
uines sciences. Car ces sciences-là & ces arts liberaux premierement retirent & destournēt les femmes d'autres exercices indignes: car vne Dame qui

B estudiera en la geometrie, aura honte de faire profession de baller: & celle qui fera ia enchantee des beaux discours de Platon & de Xenophon, n'approuuera iamais les charmes ny enchantemens des forciers. Et fil y a quelque enchanteresse qui luy promette d'arracher la lune du ciel, elle se mocquera de l'ignorance & bestise des femmes qui se laissent persuader cela, aiant appris quelque chose de l'Astrologie, & entendu comme Aganice fille de Hegetor grand Seigneur en la Theffalie, sachant la raison des eclipses qui se font lors que la
C lune est au plein, & le temps auquel elle entre dedās l'ombre de la terre, abusoit les femmes du pais, en leur faisant à croire, que c'estoit elle qui ostoit la lune du ciel.

Il n'y eut iamais femme qui feist enfant toute seule sans auoir la compagnie de l'homme, mais bien y en a il qui font des amas sans forme de creature raisonnable, ressemblans à vne piece de chair, qui prérent consistance de corruption: il faut bien

auoir l'œil à ce, que le mesme n'aduene en l'ame **D**
& en l'entendement des femmes. Car si elles ne
reçoient d'ailleurs les semences de bons propos,
& que leurs marits ne leur fassent part de quelque
saine doctrine, elles seules à par elles engédrent &
enfantent plusieurs conseils estranges, & plusieurs
passions extrauagantes. Mais toy Eurydice estude
toufiours aux dicts notables & sentences morales
des sages hōmes & gens de bien, & aies toufiours
en la bouche les bonnes paroles que tu as par cy
deuant estant fille ouyes, & apprises de nous, à cel-
le fin que tu en resiouïsses ton mary, & que tu en **E**
sois louee & prisee par les autres femmes, quand
elles te verront si hōnorablement & si singuliere-
ment parée, sans qu'il te couste rien en bagues &
ioyaux. Car tu ne sçauois auoir les perles de ceste
riche & opulente femme la, ny les robbes de soye
de ceste estrāgere cy, pour t'en parer & accoustrer,
que tu ne les achettes bien chèrement: mais les or-
nements de Theano, ou de Cleobuline, ou de Gor-
go femme du Roy Leonidas, ou de Timoclia sœur
de Theagenes, ou de l'ancienne Claudia Romaine,
ou de Cornelia de Scipion, & de toutes ces autres **F**
Dames qui iadis ont esté pour leurs vertus tant
celebres & renommées, tu les peux auoir gratui-
tement sans qu'il te couste rien, & t'en parer & or-
ner, de maniere que tu en viuras heureusement
ensemble & glorieusement. Car si Sapho pour sa
suffisance de mettre bien par escript en vers, a bien
eu le cœur d'escrire à vne Dame riche & opulente
de son temps,

A Toute au tumbeau morte gerras,
 Pour ce que cueilly tu n'auras
 Iamais des roses dont fleurie
 Est la montaigne Pierie:
 pourquoy ne te fera il plus loisible de te glorifier
 & te contenter de toy-mesme, attendu que tu ne
 participeras pas seulement aux fleurs ny aux chan-
 sons, mais aussi aux fruiçts que les Muses produi-
 sent & donnent à ceux qui aiment les lettres, & la
 philosophie?

B LE BANQUET DES
 SEPT SAGES.

*Diocles raconte à Nicarchus tout ce qui
 y fut fait & dit.*



CERTAINEMENT le long
 cours du temps, amy Nicar-
 chus, deura apporter grande
 obscurité & incertitude aux
 affaires, puis que maintenāt
 en choses si nouuelles & si
 recentes on t'a inuenté &
 controuué des propos faux,
 qui toutefois sont creus & receus pour véritables:
 car ny il n'y auoit pas seulement sept conuiez à ta-
 ble en ce festin, comme vous auez ouy dire, ains y
 en auoit deux fois plus, entre lesquels moy mesme
 en estois l'un, estant familier de Periander à cause
 de mon art, & hôte de Thales, car il logeoit chez

moy par le commandemēt de Periander: ny celuy
 qui vous les a comptez n'auoit pas bien retenu les
 propos qui y furent tenus, qui me fait penser que
 ce ne doit point auoir esté aucun de ceulx qui fu-
 rent au bancquet: mais puis que nous sommes à
 present de grand loysir, & que la vieillesse n'est pas
 bien asseuré guarant pour remettre & differer le
 compte à vn autre temps, puis que vous en auez si
 grāde enuie, ie vous reciteray le tout par ordre des
 le commencement. Le festin premierement ne fut
 pas preparé dedans la ville, mais au port de Le-
 cheon, en vne grande salle à faire festes, qui là est
 ioignant le tēple de Venus, à laquelle le sacrifice se
 faisoit: car depuis le malheureux amour de sa me-
 re, laquelle se fait elle mesme volontairemēt mou-
 rir, il n'auoit iamais sacrifié à Venus, iusques alors
 qu'il fut premierement incité par quelques songes
 de Melissa à honorer & venerer ceste deesse. Or a-
 uoit on amené à chascun des conuiez vn coche
 fort bien en point pour les cōduire iusques au lieu
 pource que c'estoit en la saison d'esté, & estoit tout
 le grand chemin, depuis la ville iusques sur le bord
 de la mer, plein de pouciere & de bruit des chariots
 & du monde qui alloit & venoit. Thales donques
 voiant à la porte de mon logis le coche que lon
 luy auoit amené, s'en prit à rire, & le renuoya. Ainsi
 nous nous meismes en chemin tout bellemēt à tra-
 uers les champs luy & moy, & pour le troisieme
 Niloxenus natif de Naucratie, homme d'honneur,
 & qui auoit autrefois cogneu familièrement Tha-
 les & Solon en Ægypte: & lors estoit pour la se-
 conde

A conde fois renuoyé deuers Bias, mais pourquoy c'estoit, luy mesmes ne le sçauoit pas, sinon qu'il se doutoit que c'estoit vne seconde question qu'il luy apportoit close & sceellée dedās vn paquet, pource qu'il luy estoit commandé, si Bias ne pouuoit venir à bout de soudre la ditte demande, qu'il la mōstrast alors au plus sage des Grecs. Si dit adonc Niloxenus, Ce banquet icy, Seigneurs, m'est vn grand heur, là où ie vous trouueray tous ensemble: car ie porte quand & moy à ce festin le paquet, comme tu voys, & le nous monstra sur l'heure. Et lors Thales en se soubriant: Si c'est quelque question difficile à soudre, il te fault de-rechef aller en la ville de Priene, car Bias luy mesme te la soudra, comme il a fait la premiere. Et quel fut la premiere, dis-ie? Il luy enuoya, me respondit il, vn mouton, luy mandant qu'il luy en renuoyast la pire & la meilleure partie de la chair, la mettant à part: & luy en tirant à part bien & sagement la langue, la luy enuoya, dont il est à bon droit bié prisé & bien estimé. Ce n'est pas pour cela seulement, ce dit Niloxenus, mais aussi pource qu'il ne refuit pas l'amitié des princes & des Roys, comme tu fais, car Amasis admire plusieurs choses en toy, & entre autres, la maniere comme tu pris la mesure de la haulteur de la Pyramide, il en feit fort grand compte, que sans autre manufacture quelconque, & sans aucun instrument, dressant seulement à plomb vn baston au bout de l'ombre de la Pyramide, & se faisant deux triangles avec la ligne que fait le rayon du Soleil touchant aux deux extremittez,

tu monstras qu'il y auoit telle proportion de la
 haulteur de la Pyramide à celle du baston, comme
 il y auoit de la longueur de l'ombre de l'vn à l'om-
 bre de l'autre: mais, comme i'ay dit, tu es accusé en-
 uers luy, de porter mauuaise volonté aux Roys: &
 si y a d'auantage, qu'on luy a rapporté plusieurs
 sentences & responses de toy contumelieuses aux
 tyrans, comme qu'estant vn iour enquis par Mol-
 pagoras seigneur d'Ionie, quelle chose tu auois ia-
 mais veuë qui te semblaist la plus estrange: Tu res-
 pondis, vn tyran vieil. Et de rechef, en vn banc-
 quet s'estant meu propos, touchant les bestes fieres
 qu'elle estoit la pire: Tu respondis, qu'entre les
 sauuages c'estoit le tyran, entre les priuees le flat-
 teur. Car les Roys, encore qui'ils se disent estre bien
 differents des tyrans, ne prennent pas plaisir à ouir
 tels propos. Ceste respõse là, dit Thales, ne fut onc-
 ques miene, ains fut Pittacus qui la feit vn iour en
 se riant à Myrsilus. Mais quant à moy, ie ne m'es-
 bayrois pas tant de voir vn vieil tyran, comme vn
 vieil pilote: toutefois quāt à ceste transposition du
 tyran au pilote, ie dirois volontiers comme ce ieu-
 ne homme là lequel iettant vne pierre à vn chien, &
 ayant failly le chien, en assena la marastre: encore
 ainsi ne va il pas mal, ce dit il: pourtant ay-ie touf-
 iours estimé Solon tressage, lequel refusa d'estre
 tyran de son païs. * Et ce Pittacus icy s'il n'eust esté
 ennemy de la monarchie, iamais n'eust dit, Qu'il
 est difficile d'estre homme de bien. Et Periander
 me semble, par maniere de dire, cōme s'estāt trou-
 ué saisy d'une maladie hereditaire de ceste tyrann-
 nie,

Pittacus
 n sa vieil
 esse estāt
 otrainct
 le prēdre
 a charge
 vne ar-
 nec, pro-
 oncea ce
 te sentē-
 e.

A nie, s'en reuenir le mieulx qu'il peut, en vſant de la cōuerſation ſalubre des gens de bien, aumoins iuſques aujourdhuy, & attirant aupres de ſoy compagnie de ſages hommes, ſans approuuer ny admettre les accourciſſements des ſommets que luy ſuade & met en auant Thraſybulus mon concitoien: car vn tyran qui aime mieulx commander à des eſclaues qu'à des hommes entiers, me ſemble proprement faire cōme le laboureur qui aimeroit mieulx recueillir des ſauterelles, & des oyſeaux, que non pas de bon grain de formét & d'orge: car

B ces dominations & principautez tyranniques icy ont vn ſeul bien au lieu de pluſieurs mauſx, qui eſt l'honneur & la gloire. S'ils commandent à de bons hōmes, c'eſt ſigne qu'ils ſont eux encore meilleurs: & ſils commandent à de grands hōmes, cela monſtre qu'ils ſont encore plus grāds: & ſils ne viſoient qu'à leur ſeureté au lieu de l'honeſteté, ils ne deuoient ſeulement chercher qu'à commāder à pluſieurs moutons, pluſieurs bœufs, & pluſieurs cheuaux, non pas à pluſieurs hommes. Mais ce bon ſeigneur icy eſtranger nous a ie ne ſçay comment

C iettez en propos qui ne ſont point conuenables à ce qui ſe preſente, laiſſant en arriere de dire & demander ce qui ſiet beaucoup mieulx à ceulx qui ſ'en vont à vn feſtin. Car n'eſtimez vous pas que cōme celuy qui fait le feſtin a des apprests à faire, auſſi en a celuy qui y eſt conuié? Les Sybarites ce me ſemble enuoyent conuier les Dames vn an deuant, à ſin qu'elles aient tout loifiſir de ſe parer de veſtemens & de bagues & ioyaux pour venir au

festin: quant à moy ie pense que le vray preparatif
 de celuy qui doit aller au soupper, ainsi qu'il appar-
 tient, a besoing de plus long temps, d'autant qu'il
 est plus difficile de trouuer l'ornemēt conuenable
 aux meurs & à l'ame, que non pas au corps qui soit
 exquis & vtile: car l'hōme sage ne va pas au festin
 porter son corps comme vn vaisseau pour le rem-
 plir, ains y va en intention d'y passer le temps à de-
 uiser à certes & en ieu, & de parler & d'ouir selon
 que le temps en apportera les occasions à la com-
 paignie, s'ils veulent ioyeusement & plaisamment
 conuerfer ensemble: car il est en luy de reietter vne
 viande qui luy semblera mauuaise: & s'il ne treuve
 le vin bon, auoir recours aux nymphes: là où vn
 voisin fascheux, ennuyeux, & mal plaisant à la ta-
 ble, fait perdre la grace & le plaisir de toute viāde,
 de tout vin, voire & toute la douceur de la Musi-
 que: & si ne peult on pas quand on veult reuoir
 ceste fascherie-là, ains y en a, à qui elle demeure
 toute leur vie, de maniere qu'ils ne peuuent iamais
 s'entreuoir de bon œil, comme si c'estoit vne vieil-
 le crudité d'iniure & de cholere rapportee d'un fe-
 stin qu'ils n'auroiēt iamais peu digerer. C'est pour-
 quoy il me semble que Chilon feit tressagement,
 lequel estant hier conuié à ce festin ne voulut ia-
 mais promettre d'y venir, que premierement il ne
 sceust qui estoient les conuiez, l'un apres l'autre: car
 il disoit que lon est contrainct, venille lon ou non,
 de supporter vn compaignon fascheux en vne na-
 uire, quand on est sur la mer, & en vn pauillon,
 quand on est à la guerre, pource qu'il est force de
 nauir

A nauiguer & de camper avec eulx:mais de se meller indifferemment sans discretion avec toutes sortes de gens en vn banquet, c'est à faire à homme qui n'a point de iugement. Quant à la façon de faire d'Ægypte, où ils ont accoustumé d'apporter ordinairement au milieu d'un festin l'anatomie seiche d'un corps d'homme mort, & le monstrier à tous les conuiez, en les admonestât de se souuenir qu'en peu de temps ils seront tels, encore que ce soit vn fort mal plaisant & importun entremets, toutefois si a-il quelque commodité. Car sil ne conuie la
B compagnie à faire grande chere & à se donner du plaisir, aumoins les incite il de s'entreporter amour & dilection les vns aux autres, les admonestant de se souuenir que la vie estant courte de soy-mesme, ils ne cherchent pas à la faire trouuer longue par affaires fascheux & ennuyeux. En tenant tels propos par le chemin, nous feismes tant que nous arriuasmes: & quant à Thales, il ne se voulut point estuuer ny baigner: car ie me suis desia huylé, ce dit-il:mais il alla ce pendant par tout voir les belles allees, les loges à luitter, & le bocage qui estoit au
C long de la mer fort bien planté & bien accoustré: non qu'il s'esbaist de voir rien de tout cela, mais de peur qu'il ne semblast mespriser en aucune chose Periander, ou desdaigner sa magnificéce: les autres, à mesure que chascun s'estoit laué & huylé, les seruiteurs le conduisoient en la salle, par le portique, dedâs lequel estoit assis Anacharsis, aiant deuât soy vne ieune fille, qui de ses mains luy mespartissoit les cheueux, laquelle accourant fort franchemēt au

deuant de Thales, il la baïsa, & luy dit en riant, Fay D
que cest estrāger, qui est le plus doux homme du
monde, deuienne beau; à fin qu'il ne nous semble
plus hydeux ny sauua^{ge} à voir. Je demanday lors
qui estoit ceste ieune fille: Comment, dit-il, ne co-
gnoissez vous pas la sage Eumeris, qui est tant re-
nommee? Le pere luy a donné ce nom là, mais le
peuple l'appelle du nom de son pere Cleobuline.
Ne l'appellez vous pas sage, dit adonc Philoxenus,
à cause de la viuacité de son esprit, à proposer, & sa
subtilité à soudre des questions obscures, que lon
appelle ænigmes? car il y en a quelques vns inuen-
tez par elle qui ont penetré iusques en Ægypte.
Non pas moy, respondit Thales, car elle n'en vse
que comme de martres, pour iouer & passer le
temps seulement, & s'en esguaye avec ceux où elle
se rencontre: mais elle a vn courage grand à mer-
ueilles, vn entendement digne de gouuerner vn
estat, & vne douceur de meurs fort agreable, de
maniere qu'elle rend son pere plus doux & plus
humain seigneur enuers ses citoiens. Soit ainsi, dit
Philoxenus, & y a bien de l'apparēce, à voir la sim-
plicité de son accoustrement, & sa naïfueté: mais
d'où vient ceste priuauté, qu'elle accoustre si amia-
blement les cheueux à Anacharsis? Pource, dit-il,
que c'est vn hōme de bien, & qui sçait beaucoup,
qui luy a raconté bien au long & bien volontiers
la façon de viure des Tartares, & la maniere de
charmer les maladies, dont ils vsent à l'endroit des
malades: & croy que maintenant elle l'accoustre
& le caresse ainsi, en deuisant & apprenant quel-
que

A que chose de luy . Comme nous estions desia tout
aupres de la salle, nous rencontraſmes Alexidemus
Mileſien , le bastard de Thraſybulus le tyran , tout
troublé & courroucé, diſant ie ne ſçay quoy en
luy-meſme , ſans que nous peuſſions clairement
entendre ce qu'il diſoit : mais quand il apperceut
Thales, il ſe reuint vn peu, & ſ'arreſtant tout court:
Periander m'a fait, dit-il, vn grand tort, qui ne m'a
pas voulu laiſſer partir quand ie me voulois em-
barquer , ains m'a cōtrainct par ſes prieres d'atten-
dre ce beau ſoupper , & puis quand i'y ſuis venu il
B m'a donné vn lieu d'aſſiette deſhoneſte à moy , en
preferant des *Æoliens*, des *Infulaires*, & qui non, à
Thraſybulus ? par où il appert qu'il n'a cherché au-
tre choſe que le moien de luy faire receuoir vne
honte en moy qui ſuis enuoyé de par luy , & de le
mettre à bas par vn meſpris & contemnement.
Cōment, luy reſpondit Thales, tu crains donc que
cōme les *Ægyptiens* diſent, que les aſtres en faiſant
leurs reuolutions ordinaires ſont vne fois haults, &
puis vne autre fois bas, & ſelō leur hauteur ou leur
baſſeſſe, deuiennent pires ou meilleurs qu'ils n'e-
C ſtoient , auſſi que pour le lieu que lon t'a baillé tu
n'en deuiennes plus rauallé & plus rabaiſſé : tu ſe-
rois par ce moien de plus laſche cœur , que ce La-
conien, qui aiant eſté par le maiſtre des cerimonies
colloqué tout au plus bas & dernier lieu de la dāſe,
ne ſ'en courroucea point autrement, ains dit ſeule-
ment, Tu as bien ſceu trouuer le moien comme tu
rendrois ce lieu cy honorable. Quand nous ſom-
mes aſſis à la table, il ne faut pas regarder apres qui

nous sommes assis, mais plus tost comment nous D
nous accommoderōs & rendrons agreables à ceux
aupres de qui nous sommes, mōstrans dès l'arriuee
apparence d'auoir, ou plus tost aians à bon esciant
dedās nous mesmes la fourse & l'anse, par maniere
de dire, à prendre amitié avec eux, ne nous fascher
point de lieu qu'on nous baille, ains plus tost louër
nostre bōne fortune, de nous estre rencontrez avec
si bonne compaignie : car celuy qui se courrouce
pour le lieu & assiette qu'on luy baille, se courrou-
ce plus tost à celuy aupres de qui il est à table, qu'à
celuy qui l'a conuié, & se rend odieux à l'vn & à E
l'autre. Ce sont paroles que cela, dit adonc Alexi-
demus, mais en effect ie voy que iusques à vous au-
tres sages cherchez bien les moiens de vous faire
honorer:& en disant cela il passa outre, & s'en alla.
Et Thales se tournāt deuers nous, qui nous esbaif-
fions grandement de l'estrange façon de faire de
cest homme : C'est vn fol eceruellé, ce nous dit-il,
d'vne bizarre nature, cōme vous pourrez cognoi-
stre par vn tour qu'il feit estant encore sur le com-
mancement de son adolescence : on auoit apporté
à son pere Thrasybulus de l'huile de parfum fort F
excellente, il la versa toute dedās vne grande tasse,
& du vin tout pur par dessus, puis beut & aualla
l'vn & l'autre tout ensemble, engendrant inimitié
au lieu d'amitié à Thrasybulus. Cela fait, il vint vn
seruiteur à l'entour de la table, qui me dit, Periāder
vous prie que prenant Thales avec vous, & cest e-
stranger aussi, vous veniez voir quelque chose que
lon luy a apportee de nouueau, pour sçauoir s'il la
doit

A doit prendre cōme fortuitement aduenue, ou bien cōme vn presage qui prognostique quelque chose: car il s'en trouue quāt à luy tout troublé, aiant peur que ce ne soit vne pollutiō & vne macule à son sacrifice. En disant cela il nous mena en vne maison qui respondoit sur le iardin, là où nous trouuasmes vn ieune garson, qui sembloit estre quelque pastre à le voir: il n'auoit point encore de barbe, & au demourant n'estoit point laid de visage, lequel despleiant vn manteau de cuyr nous monstra vn ieune tendron qu'il disoit estre né d'une iument, duquel le hault iusques au col & aux mains auoit forme d'homme, & tout le reste de cheual: cryant au reste tout ne plus ne moins que font les petis enfans quand ils sortēt du ventre de leurs meres. Niloxenus adonc l'ayant entreueu, tourna soudain sa face de l'autre costé, en fescryāt, ô Dieu nous veuille preseruer: mais Thales regarda le ieune garson d'œil fiché bien long temps, puis en se riant, pource qu'il auoit tousiours accoustumé de se iouer à moy, touchant mon art, il me dit: Ne pensez vous pas desia, Diocles, à faire quelque expiation de ce prodige, & en empescher les dieux qui ont le soing de destourner les malheurs imminents, cōme estāt cecy vn grand prodige & vn matuuais accident? Pourquoy non, luy respond-ie: car ie vous aduise Thales, que c'est vn presage de discord & de sedition, & ay grand peur qu'elle ne passe iusques aux mariages, & iusques à l'acte de generation, auant que le premier courroux de la Deesse soit appaisé, qui le nous mōstre par ce secōd presage cōme vous

voiez. Thales ne respondant rien à cela, ains s'en d
 riant, s'osta de là: & comme Periander nous fust
 venu au deuât à la porte de la sale, & nous enquist
 touchant ce que nous venions de voir, Thales me
 laissant, & le prenant par la main luy dit: Quant à
 ce que Diocles te suade de faire, tu le feras tout à
 loisir: mais quant à moy, ie te conseille de ne te ser-
 uir plus dorenauât de si ieunes pastres à garder tes
 iuments, ou bien de leur dōner des femmes. Si me
 sembla que Periander fut bien fort aise de ceste pa-
 role, car il s'en prit à rire, & embrassant Thales le
 baisa: & si croy, dit-il, en se tournât vers moy, Dio- E
 cles, que ce prodige a desia son euenemēt, car vous
 voiez le grand mal qui nous est desia aduenu, par
 ce que Alexidemus n'a pas voulu soupper avec
 nous. Quand nous fusmes entrez dedans la sale,
 Thales commāceant à parler plus hault: & où est-
 ce, dit-il, que lon auoit logé cest hōme de bien qui
 s'est courroucé du lieu qu'on luy auoit baillé: & luy
 aiant esté la place monstree, tournant à l'entour, il
 sy en alla seoir, & nous y mena quāt & luy, disant:
 quant à moy, i'eusse achetté l'occasion de manger
 avec Ardalus: or estoit cest Ardalus Trœzenien F
 ioueur de flustes & presbtre des Muses Ardalienes,
 dont l'ancien Ardalus Trœzenien aussi auoit don-
 né & dedié les images. Mais Æsope qui depuis na-
 gueres auoit esté enuoyé par le Roy Crœsus, tant
 deuers Periander, comme deuers l'oracle d'Apollo
 en la ville de Delphes, estât assis dessus vn banc bas
 aupres de Solon, qui estoit au dessus de luy, se prit
 à dire, Vn mullet de Lydie aiant veu la forme & fi-
 gure

Agure de son corps dedans vne riuere, & s'esbahissant de la beauté & grādeur d'iceluy, se meit à courir à toute bride, en secouant la teste cōme vn cheual eschappé: mais quand il vint à penser en luy mesme qu'il estoit fils d'un asne, il cessa soudainement de courir, & meit fin à son audace & à sa brauerie. Alors Chilon en son langage Laconien luy dit, Cela s'adresse à toy mesme, qui es tardif comme vn asne, & cours comme vn mulet. Apres cela entra Melissa, qui s'alla seoir aupres de Periander, & Eumetis s'asseit aussi pour soupper. Thales adressa sa parole à moy qui estois assis au dessus de Bias, & me dit, Amy Diocles, que ne dis tu à Bias, que tō hoste Niloxenus de Naucratie est venu par deçà enuoyé par son Roy deuers luy, pour luy apporter de rechef de nouuelles questions à soudre, à fin qu'il les reçoie estant encore sobre, & en estat d'y pouoir bien penser. Et Bias prenant la parole, Il y a ia lōg temps, dit-il, que pour me cuider estonner il m'admoneste de ce faire: mais quant à moy ie sçay tresbien, que Bacchus est au reste vn sage & puissant Dieu, & que pour sa sapience on le surnomme Lysien, qui vault autāt à dire cōme, desliāt toutes difficultez: c'est pourquoy ie n'ay point de peur d'estre moins asseuré au cōbat pour estre remply de luy, quand il me conuiendra disputer. De tels ioyeux propos s'entreiouroient ils l'un avec l'autre en souppāt: & voiant l'appareil du soupper vn peu moindre que l'ordinaire, il me vint en pensee, comme pour festoyer & dōner à soupper à des hommes sages & gens de bien, on n'en entre point

en plus grãde despenſe, ains que plus toſt on la di-
 minue, pource que lon en oſte toute curioſité de
 viandes exquiſes, des parfums, confitures & mar-
 chepans apportez d'eſtrange païs, & des vins deli-
 cieux: dont Periander eſtant tous les iours ſeruy en
 ſon ordinaire pour la magnificence de ſon eſtat, de
 ſes richèſſes, & de ſes affaires, neantmoins il faiſoit
 lors gloire enuers ces ſages hommes là, de ſe paſſer
 à peu ſobremēt: car non ſeulement il ſeit oſter tou-
 te autre ſuperfluité d'ornemēts accouſtumez, mais
 encore à ſa propre femme il les ſeit laiſſer & cacher,
 & la leur mōſtra ornee de peu d'eſtat, & de mode-
 ſtie ſeulement. Apres que les tables furēt oſtees, &
 que Meliſſe eut enuoyé de rang à chaſcun des con-
 uiez ſon chapeau de fleurs, nous rendiſmes graces
 aux Dieux, en leur eſpanchant vn peu de vin: & la
 menestriere aiant vn peu chanté apres graces, ſe
 retira incontinent de la ſale. Lors Ardalus appellāt
 Anachariſis par ſon nom, luy demanda, ſil y auoit
 des menestrieres entre les Scythes: & luy ſans ſon-
 ger luy reſpondit ſur le champ, non pas ſeulement
 des vignes. Et cōme Ardalus luy repliquaſt, voire-
 mais ſi y a il des Dieux pourtāt: ouy certes, reſpon-
 dit il, il y en a voiremēt, & qui entendent la langue
 & parole des hōmes, non pas comme les Grecs qui
 ſ'eſtimēt plus elegāment parler que les Scythes, &
 neantmoins ont opinion que les Dieux oyent plus
 volōtiers le ſon des fluſtes & haubois qui ſont faits
 d'oſ & de bois, que non pas la voix & parole de
 l'hōme. Et que dirois tu dōc aupris, ce dit alors Æ-
 ſope, ſi tu ſçauois ce que ſont au iourd'huy les fai-
 ſeurs

A leurs de flustes, qui reietter les os des ieunes cerfs & biches, & choisissēt ceux des asnes, pource qu'ils disent que le son en est meilleur: & pourtāt Cleobuline en a fait vn de ses ænigmes, sur la fluste Phrygiene, D'asne braiard iambe morte a l'ouye

Du cheframé de grāds cors resiouye.

de sorte que c'est merueille comment l'asne, qui au demourāt est vne fort grosse & lourde beste, esloignee de toute douceur & armonie de musique, peult bailler vn os ainsi delié & propre à faire vn armonieux instrument de musique. Certainemēt, B dit adonc Philoxenus, c'est-ce que les habitans de Busiris nous reprochent à nous autres de Naucratie, car nous commençons aussi desia à vser des os d'asnes à faire flustes: & à eux il ne leur est pas loysible d'ouïr seulemēt le son d'une trompette, pour autant qu'elle retire vn peu au braire de l'asne: or sçauiez vous que l'asne est fort diffamé & haï enuers tous les Ægyptiens, à cause de Typhon. Apres cela chascun se taisant, Periander voiant que Niloxenus auoit bien bonne enuie de parler, mais qu'il n'osoit entamer le propos, commença à c dire, Seigneurs ie trouue bonne la coustume des villes & des magistrats qui donnent audience, & despeschent premierement les estrangers que leurs citoiens: & pourtant me sembleroit il bon, que pour vn peu de temps vous reteinsiez voz propos, qui nous sont tous familiers, & comme nez en nostre pais, & que vous donnissiez entree & audience, comme en vne assemblee de ville, à ceulx que nostre bon amy Niloxenus a apportez

d'Ægypte, mesmement de la part du Roy à Bias, & Bias en veult conferer avec vous. Et Bias suiuant son dire : Et en quel lieu, dit-il, ny avec quelle cōpagnie me pouuois-ie plus deliberément hazarder qu'en ceste cy, à faire de telles responses, si en est besoing? attendu mesmement que le Roy mande expressément, que lon commence premierement à moy à me proposer sa question, & puis que lon l'aille puis apres de rang presentant à tous vous autres. Ainsi luy bailla lors Niloxenus la lettre close du Roy, & le pria de l'ouurir, & de la lire hault & clair deuât toute la compagnie. Si estoit la substance des lettres telle :

Amasis le Roy d'Ægypte, à Bias le plus sage des Grecs, salut. Le Roy d'Æthiopie est entré en cōtestation de sapience alēcontre de moy, & s'estant trouué vaincu en toutes ses autres propositions, finalement il m'a proposé vn mandement fort estrange & merueilleusemēt difficile à accomplir, c'est qu'il m'a commandé, que ie boiue toute la mer. Et si ie puis venir à bout de soudre ceste question, ie gaigneray plusieurs villes & villages, qui sont à luy : & si aussi ie ne la puis resoudre, il fault que ie luy cede les villes de la cōtree Elephantine: Et pourtant apres que tu y auras bien pensé, renuoye moy incontinent Niloxenus: & si tu as affaire pour toy ou pour tes citoiens, ie t'aduise que rien ne te defaudra de ma part.

Ces lettres leuës, Bias n'arresta pas long temps, ains apres auoir vn peu pensé en soy-mesme, & vn peu parlé en l'oreille à Cleobulus, qui estoit assis

tout

A tout ioignant luy, se prit à dire: Cōment amy Naucratien, le Roy ton maistre Amasis, qui cōmande à si grande multitude d'hommes, & qui possede vn si beau & si bon pais, voudra il bien boire toute la mer pour gaigner ie ne sçay quels meschans villages de peu de valeur? Et Niloxenus en riant luy respondit, Je te prie de considerer diligemment ce qu'il est possible pour y respondre, comme s'il le vouloit. Or qu'il mande doncques à cest Æthiopien, qu'il arreste les riuieres qui se deschargent en la mer, iusques à ce qu'il ait acheué de boire toute l'eau de la mer qui est à present: car c'est de celle là dont est fait le mandement, & non pas de celle qui fera par cy apres. Quand il eut dit ces paroles, Niloxenus en fut si aise, qu'il ne se peut contenir qu'il ne l'ambrassast & baisast sur l'heure: & tous les autres louèrent & approuuerent aussi semblablement son dire. Mais Chilon en se riant, ô Naucratien mon amy, dit-il, Je te prie auāt que la mer toute beuë perisse, retourne t'en par mer annoncer au Roy ton maistre, qu'il ne se trauille pas à chercher comment il pourra consumer vne si grande quantité d'eau salee, mais plus tost comment il pourra rendre son regne bien dessallé & doux à boire à ses subiects: car Bias est grand ouurier, & vn fort excellent maistre de ce mestier-là, lequel quād Amasis aura bien appris de luy, il n'aura plus besoin du bassin d'or enuers les Ægyptiens pour les contenir en obeissance, ains le seruiron t'ous volontiers, & l'aimeront affectueusemēt, quand ils verront qu'il sera deuenu bon prince, voire & fust il encore de

Voyez

Herodote,

du regne

d'Amasis,

Liure 4.

plus bas & de plus petit lieu qu'il n'est. Certainement, dit adonc Periander, ce seroit chose digne que nous contribuissions tous à ce Roy de tels presens, *ἂν δ' ἐγὼς*, comme parle Homere, c'est à dire par teste: car par ce moien l'accessoire luy fera plus vtile que le principal de son voiage, & à nous mesmes il en reuiëdra vn tresgrād profit. Alors dit Chilon, Il seroit raisonnable que Solon commandeast le propos, non seulement pource qu'il est le plus ancien de nous tous, & qu'il est au premier lieu de la table, mais aussi pource qu'il tient le plus grand & le plus digne office, estant le premier qui a fait & estably les loix aux Atheniens. Nilo-xenus adonc se tournant deuers moy me dit tout bas en l'oreille, Certainement on croit, Diocles, beaucoup de choses à faulses enseignes, & y en a qui prennent plaisir à controuuer eux-mesmes de faulses nouuelles, touchant les grands & sages hommes, & à en receuoir de cōtrouuees par d'autres, comme sont celles que lon nous a apportees iusques en *Ægypte*, de Chilon, qu'il auoit renoncé à l'amitié & hospitalité de Solon, pourautant qu'il maintenoit, que les loix estoient muables. F Cela est vn propos digne de mocquerie, car il faudroit premierement chasser Lycurgus & toutes ses loix, avec lesquelles il a renuersé tout l'ancien ordre de la republique de Lacedemone. Solon doncques aiant vn peu demouré, se prit à dire: Il me semble qu'un Roy ou Prince souuerain n'a moien de se rendre plus glorieux, qu'en faisant de sa Monarchie vne Democratie, c'est à dire, en communi-
quant

A quant son autorité souueraine à ses subiects. Le second fut Bias, qui dit, En se rendant luy-mesme le premier subiect aux loix de son pais. Apres luy Thales dit, Je repute vn Seigneur bien-heureux, qui peut arriuer à la vieillesse, & mourir de mort naturelle. Le quatrième, Anacharsis, fil est seul sage. Le cinquième, Cleobulus, fil ne se fie à personne de ceux qui sont autour de luy. Le sixième, Pittacus, fil peut tant faire que ses subiects craignent non luy, mais pour luy. Apres luy Chilon dit, qu'un Prince ne doit penser à nulle chose transitoire ne mortelle, mais eternelle & immortelle.

B Apres que tous ces sages eurent ainsi dit chascun leur mot, nous requerions Periander, qu'il voulust aussi à son tour dire le sien. Et luy avec vn visage non gueres ioyeux, mais pensif & chagrin. Je vous diray ce qui me semble de toutes les sentences qui ont esté dittes par ces Seigneurs, c'est que elles degoustent, presque toutes, l'homme de bon iugement, de vouloir iamais commander aux autres. Et adonc Æsope, cōme celuy qui aimoit à reprendre: Il falloit donc, dit-il, que chascun de vous e à par soy feist cela, non pas qu'aiants pris à conseiller vn Prince, & faisant professiō de luy estre amis, se constituer comme accusateurs des Roys & des Princes. Et Solon luy ambrassant la teste, luy dit en riant, Ne te semble il pas Æsope, que celuy réde vn seigneur plus moderé, & vn tyrā plus gracieux, qui luy suade, qu'il est meilleur ne commander point, que cōmander? Et qui sera celuy, respondit Æsope, qui te croira en cela, ny au dieu Apollo

mesme qui te rendit vn tel oracle,

De celle ville est heureuse la gent

Là où ne foyt que la voix d'un fergent.

Solon luy repliqua, Aussi n'oyt on maintenant à Athenes que la voix d'un huissier, & d'un seul magistrat, qui est la Loy, estant la ville en estat populaire: Mais toy Æsope, qui as le sens d'entendre les voix des corbeaux, voire des geais, tu n'entends pas ce pendant la tienne propre, ny ta propre parole: car tu reputes, suivant l'oracle d'Apollo que tu as allegué, que la ville soit tresheureuse qui n'entend qu'une voix, & ce pendant tu estimes, que ce soit la beauté & perfection d'un conuiue, que tous les conuiez y parlent, & de toutes choses. Ouy vraiment, dit Æsope, pource que tu n'as pas encore escript la loy, d'autant que c'est tout vn, que les serfs n'ayent point à s'enyrurer, comme tu en as faict à Athenes vne, que les esclaves n'ayent point à faire l'amour, ny à s'oinde à sec. Solon se prit à rire de ceste replique: Et le medecin Cleodemus, Il me semble, quant à moy, que c'est tout vn que de se huyler à sec, & de causer apres que lon a bien beu, car l'un & l'autre est fort plaisant. Et Chilon prenant le propos, c'est pourquoy, dit-il, on s'en doit plus contregarder. Et Æsope de rechef, voire-mais il semble que Thales a voulu dire, qu'il vieillira bien tost. Periander adonc se prenât à rire, Vrayement dit-il, nous auons tous payé la peine que nous meritions, Æsope, de ce que nous nous sommes laissez transporter en autres propos deuant que d'auoir entendu tous ceux du Roy Amasis, ainsi que

A que nous auions proposé du commencement. Et pource, Seigneur Niloxenus, pourfuy le demourant de sa lettre missiue, & te fers de ces personna- ges icy, cependant que tu les as tous ensemble. Voire-mais, respondit Niloxenus, il m'est aduis que le mandement de cest Æthiopien se pourroit proprement nommer le triste buletin, ainsi que parle Archilocus : Mais le Roy Amasis ton hoste est bien plus gracieux en semblables questions & plus gentil : car il luy demanda, Quelle chose au monde estoit la plus vieille, Quelle la plus belle, B la plus grande, la plus sage, la plus commune : & par dessus encore, Quelle est la plus profitable, Quelle la plus dommageable, Quelle la plus puissante, & quelle la plus facile. Comment, l'Æthiopien respondit doncques à chascune de ces demandes, & les solut il toutes ? Voicy comment il respondit, ce dit Niloxenus : & vous iugerez, apres que vous aurez ouy ses responses, si l'y satisfait ou non : car le Roy mon maistre y procede si sincerement, qu'il ne voudroit pour rien du monde ny estre trouué calomniateur és respôses d'autrui, ny aussi faillir à estre releué & repris si l'on trouuoit qu'il eust bronché & erré és sienes. Or ie vous reciteray de poinct en poinct, comment il y respondit : Quelle chose est la plus vieille du monde ? le temps : Quelle la plus grande ? le monde : Quelle la plus sage ? verité : Quelle la plus belle ? la lumiere : Quelle la plus commune ? la mort : Quelle la plus profitable ? Dieu : quelle la plus dommageable ? le Diable : Quelle la plus puissante ? for-

tune: Quelle la plus facile, ce qui plaist. Quand ces
 responses eurent esté leuës, Seigneur Nicarchus,
 il se fait vn peu de silence: & Thales adonc demã-
 da à Niloxenus, si le Roy Amasis auoit approuué
 toutes ces solutions: Niloxenus fait response, qu'il
 en auoit approuué les vnes, & que de quelques
 autres aussi il ne s'en estoit peu contenter. Et tou-
 tefois, adiousta Thales, il n'y en a pas vne qui ne
 soit grandement reprehensible, ains y a en toutes
 de grandes erreurs & de grandes ignorances, cōme
 des le cōmancement: En quelle sorte peut on sou-
 stenir que le temps soit la plus ancienne chose du
 monde, attendu qu'une partie en est desia passée,
 l'autre presente, & l'autre encore à venir: car le tēps
 qui viendra apres nous, semble par raison deuoir
 estre estimé plus ieune que tous les hommes, &
 toutes les choses qui sont de present. Et puis d'esti-
 mer que verité soit sagesse, il me semble que c'est
 tout autant cōme qui diroit, que l'œil & la lumiere
 fussent tout vn: & puis s'il estimoit que la lumiere
 soit chose belle, cōme elle l'est aussi, comment ou-
 blioit il le Soleil? Au demourant quant à ce qu'il
 respond de Dieu & du Diable, il y a de l'arrogāce
 & du dāger beaucoup: & de la fortune, il n'y a ap-
 arence quelconque: car si elle estoit si forte & si
 puissante cōme il dit, comment se tourneroit & se
 changeroit elle si facilēmēt qu'elle fait? Ny la mort
 n'est pas la plus commune chose qui soit au mon-
 de, car elle n'est pas commune aux viuās. Mais à fin
 qu'il ne semble que nous ne sachions que corriger
 les autres, conserons vn petit noz sentences par-
 ticu-

A ticulieres avec les sienes. Quant à moy, ie me presente le premier à respōdre de poinct en poinct, si Niloxenus me veult interroguer. Ie vous exposeray doncques maintenant icy par ordre les interrogatoires & responses, selon qu'elles furent lors proposees & respondues. Quelle chose est la plus vieille qui soit au monde? C'est Dieu, respondit Thales: car il n'eut oncques commencement de naissance. Qui est la plus grande? le Lieu: car le monde contient toutes autres choses, & le lieu contient le monde. Qui est la plus belle? le Monde: car tout
B ce qui est disposé par bel ordre, est partie d'iceluy. Qui est la plus sage? le Temps: car il a ia parcydeuant trouué tout ce qui s'est inuenté, & trouuera encore cy apres tout ce qui finuentera. Qui est la plus commune? Esperance: car elle demeure encore à ceux qui n'ont nulle autre chose. Qui est la plus profitable? Vertu, d'autant qu'elle rend toutes autres choses vtils, en en vsant bié. Qui est la plus dommageable? le Vice: car là où il est, il pert & gaste tout. Qui est la plus forte? Necessité: car elle seule est inuincible. Qui est la plus facile? ce qui est
C selon nature: car les hommes se lassent des voluptez mesmes quelquefois. Et comme toute l'assistance eust grandement loué les responses de Thales, Cleodemus se prit à dire: Voyla des questions qui sont conuenables à proposer, & respondre aux Princes & aux Roys, Seigneur Niloxenus, mais ce Roy barbare d'Æthiopie, qui m'ade au Roy Amasis qu'il boiue la mer, auroit besōing d'une telle courte response, que feit Pittacus au Roy Alyates,

qui commandoit par lettres quelque chose arrogant aux Lesbians, car il ne luy respondit autre chose, sinon qu'il l'admonesta, de manger des oignons & du pain chaud. Si est ce, dit Periander, que c'estoit la façon des anciens Grecs, Seigneur Cleodemus, de se proposer ainsi les vns aux autres de telles questions: car nous auons entédu que iadis la coustume estoit, que les plus sçauās & plus excellents poètes qui fussent pour lors, s'assembloient à certain iour à l'entour de la sépulture d'Amphidamas en la ville de Chalcide. Cestuy Amphidamas estoit homme d'honneur & de valeur au gouuernement de la chose publique, & qui auoit donné beaucoup d'affaires aux Eretriens, es guerres qu'ils eurent cōtre ceux de Chalcide, touchant Lilantus, esquelles finablement il mourut: & pour autant que les vers qu'apportoient les poètes, rendoient le iugement difficile & fascheux à ceux qui estoient eleus pour iuges, & que la gloire de deux concurrents, Homere & Hesiodé, tenoit les iuges en grande perplexité, pour la honte qu'ils auoient de donner leurs sentences de deux si grāds personnages, ils se tournerent à demander les vns aux autres de telles questions ainsi comme raconte Lesches,

Muse dy moy ce qu'on confessera

Qui ne fut onc, ny iamais ne sera.

A quoy Hesiodé respondit sur le champ promptement,

Quand les cheuaux de rendon furieux,
Pour emporter le pris victorieux,

Courans

A Courans entour la tumbé & sepulture

De Iupiter, y rompront leur voitture.

& dit on que pour cela il fut tant estimé, qu'on luy en adiugea le tripié d'or. Et quelle difference y a il, dit adonc Cleodemus, entre ces demâdes là, & les obscures questions de Eumetide, lesquelles ne luy sont pas à l'aduenture mal seantes à inuenter, par maniere de ieu, & à proposer aux autres Dames, comme les autres s'amusent à tissir des cordons & à faire des coëffes de resieu: mais que des hommes d'entendement en facent aucun compte, c'est vne droite mocquerie. A quoy il sembloit que Eumetide luy eust volontiers repliqué quelque chose, mais elle se reteint de honte, qui luy feit monter la couleur au visage. Et Æsôpe, comme pour la reuenger, se prit adonc à luy respondre: & n'est ce pas encore plus grande mocquerie de ne les pouuoir pas soudre? comme est celle qu'elle nous a proposée vn peu auant soupper,

I'ay veu coller du cuyure avec le feu,

Dessus le corps d'vn homme en plus d'vn lieu.

Nous sçauois-tu declarer que c'est que cela? Nenny pas moy, respondit Cleodemus, ny ne me soucie pas de le sçauoir. Et toutefois, luy repliqua Æsôpe, il n'y a personne qui le sçache mieux, ne qui le face plus que toy: & si tu le nies, i'en croy, dit il, les cornets & ventoses: adonc Cleodemus se prit à rire, car il vsoit plus d'appliquer des ventoses que autre medecin qui fust de son temps, & estoit ce remede de medecine en vsage & en reputation autât que nul autre, pour l'amour de luy. Mais Mne-

siphilus Athenien familial & grād zelateur de So-
 lon, se prit lors à dire, Seigneur Perian-
 der, ie desirerois quant à moy que ce deuis & propos de ceste
 belle compagnie ne fust point departy aux riches
 ny aux nobles seulement, ains qu'il fust distribué
 également par teste, & communiqué à tous com-
 me le vin, ainsi qu'il se fait és citez qui sont re-
 gies par gouuernement populaire. Ce que ie dis,
 d'autant que nous autres qui viuons en estat po-
 pulaire, n'auons aucune participation à tout ce
 que vous auez n'a gueres dit, touchant la princi-
 pauté & le gouuernement d'un Roy: & pour-
 ce nous sembleroit il raisonnable que recomman-
 ceant de-rechef à discourir vous alleguissiez chas-
 cun à son rang quelque notable sentence, touchāt
 le gouuernemēt populaire, où chascun a egale au-
 thorité, & que Solon fust de rechef le premier qui
 cōmanceast à dire la sienne. Tous furent alors d'a-
 uis d'ainsi le faire. Et pourtant Solon commença
 à dire: Voire mais amy Mnesiphile, toy & tous les
 habitans d'Athenes auez ia pieça entendu, quel est
 mon iugement & aduis touchant le gouuernemēt
 de la chose publique: toutefois si tu le veux encore
 maintenant entendre, ie te dis qu'il me semble,
 Que la cité est tresbien gouuernee, & maintient
 tresbien l'estat & liberté populaire, en laquelle
 ceux qui ne sont point outragez haïssent autant, &
 poursuiuent aussi asprement celuy qui a faict vne
 oppression & outrage, que celuy qui est outragé.
 Apres luy Bias dit, que le gouuernement popu-
 laire luy sembloit estre tresbon, auquel tous les ha-
 bitans,

A bitās redoutent la loy cōme vn feure tyran. Apres lequel Thales opina, disant, que celle chose publique luy sembloit la mieux ordōnee, où il n'y auoit point d'hommes ny trop riches ny trop pauures. Suiuant celuy-là Anacharsis dit, que c'estoit à son aduis celle, en laquelle toutes autres choses estans egales entre les habitans, la precedence se mesuroit à la vertu, & le rebut au vice. Le cinquième, Cleobulus, afferma, que la cité populaire luy sembloit estre la mieux policee, en laquelle les citoiēs redoutoient plus le deshonneur que la loy. Le sixième, Pittacus, celle où les meschans n'ont point autorité de commander, & les bons si. Ioignant lequel Chilon pronōcea, que celle police luy sembloit estre la meilleure, où le peuple prestoit plus l'oreille aux loix, que non pas aux orateurs. Et apres tous Periander le dernier donnant son iugement, dit, qu'il luy sembloit que tous estimoient le gouuernement populaire estre le meilleur, qui approchoit le plus pres de celuy d'un sage Senat. Ce propos estant acheué, ie les priay qu'ils voulussent aussi nous enseigner du mesnage, comment il s'y falloit gouuerner, pource qu'il y a peu d'hommes qui soient appelez à gouuerner les villes ny les royaumes, mais du gouuernemēt de son mesnage, & de sa maison, chascun en a sa part. Non a pas, ce dit Eslope en se riant, si vous y comprenez Anacharsis: car quant à luy, il n'a point de maison, & si fait gloire de n'en auoir point, ains de demourer en vn chariot, comme lon dit que fait le Soleil qui va tournant tout à l'entour du ciel, tantost en

vne contree, & tantost en vne autre. C'est pour-
 quoy, respondit Anacharsis, le Soleil seul, ou plus
 que nul autre de tous les Dieux, est franc & libre,
 commandant à tous, & n'estant cōmandé de per-
 sonne: & pourquoy il regne & conduit luy-mes-
 me son chariot: mais il me semble que tu n'as ia-
 mais compris en ton entendement la grandeur &
 beauté d'iceluy, combien excellent & admirable
 est son chariot, car autrement tu ne l'eusses jamais
 en iouant, & par maniere de risée, cōparé aux no-
 stres: au demourant il semble que tu appelles mai-
 son ces toicts couuerts de thuile & de terre cuitte,
 ne plus ne moins que si tu disois que la tortue fust
 sa coque & non pas l'animal qui est dedans. C'est
 pourquoy ie ne m'esbahis pas, si tu te mocquas il y
 a quelque temps de Solon, pource qu'ayant veu
 le palais de Crœsus fort richement & somptueuse-
 ment orné, il ne iugea pas incontinent celuy qui
 en estoit possesseur, estre logé heureusement &
 magnifiquement, pour ce qu'il vouloit premiere-
 ment estre spectateur, & veoir à l'œil les biens qui
 estoient dedans luy plus tost qu'aupres de luy. En
 quoy il me semble que tu as oublié ton regnard, le-
 quel estant venu en contestation alencontre du
 leopard, à sçauoir lequel des deux estoit plus tae-
 lé de diuerses mouchetures, il requit à leur iuge,
 qu'il ne considerast pas tant les taelures & mou-
 chetures exterieures de la peau, que celles de l'es-
 prit au dedans, pource qu'il les trouueroit plus di-
 uerses: mais tu vas regardant seulement aux ouura-
 ges des tailleurs de pierres, & des maçons, estimant
 que

A que cela seul soit la maison, non pas ce qui est dedans chascune, & qui est domestique, comme sont les enfans, la femme, les amis, les seruiteurs, auxquels estans sages & bien conditionnez, le pere de famille communiquant & faisant part de ce qu'il a, fust-ce dedans vn nid d'oiseau, ou dedans vne formiliere, se peut dire habiter vne bonne & heureuse maison. Voyla ce que ie respond à Æsope, quant à moy, & que ie contribue pour ma quote à Diocles : au demourant, il est raisonnable qu'un chascun de vous en die son aduis. A laquelle semōce Solon respondit, Que celle maison luy sembloit tresbonne, de laquelle les biens n'estoient point acquis par moïens iniustes, ny n'auoit on point de crainte & de souspeçon à les garder, ny de regret à les despendre. Bias apres: en laquelle, dit-il, le maistre est tel au dedans par luy mesme, comme il est au dehors par la crainte de la loy. Et Thales: en laquelle, dit-il, le maistre est de grand loisir. Et Cleobulus: là où il y a plus de personnes qui aiment le maistre, que qui le craignent. Pittacus dit, que la meilleure maison est celle qui n'a faute de chose c quelconque, ny superflue, ny necessaire. Chilon opina, que la maison doit, le plus qu'il est possible, ressembler à vne cité gouvernee par le commandement d'un Roy: puis y adiousta, que Lycurgus auoit iadis respondu à vn qui luy conseilloit d'establiir en la ville de Sparte vn gouuernement populaire, Commance toy-mesme le premier à mettre en ta maison l'estat populaire, où chascun soit aussi grand maistre l'un que l'autre. Apres que ce

propos fut aussi acheué, Eumetide sortit avec Me-^D
 lisse. Et Periander prenât vne grande couppe beut
 à Chilon, & Chilon de rang à Bias. Et adonc Ar-
 dalus se leuant, & adressant sa parole à Æsope,
 Ne nous veux tu pas, dit-il, enuoyer aussi la coup-
 pe icy, veu que ceux cy se la renuoyét ainsi de main
 en main les vns aux autres, comme si ce fust le ha-
 nap de Bathycles, sans en faire part aux autres? Et
 Æsope adoncques dit, Ny ceste couppe mesme, à
 ce que ie voy, n'est point populaire, car il y a ia long
 temps qu'elle demeure deuant Solon seul. Et Pit-
 tacus appellant Mnesiphilus par son nom: Pour-^E
 quoy est-ce, dit-il, que Solon ne boit, ains cōtredit
 à ses poëmes propres, esquels il a luy mesme escrit,

Dame Venus est ores mon deduit,
 Et de Bacchus le bruuage me duit,
 Les dons aussi des Muses, car ce sont

Les poincts qui l'homme en plaisir viure font.

Anacharsis prenant la parole luy repliqua: C'est
 pourautant Pittacus, qu'il te redoute, & celle tien-
 ne rigoureuse & seuerre loy, par laquelle tu as or-
 donné, si quelqu'un pour estre yure vient à cōmet-
 tre vne faute, quelle qu'elle soit, qu'il fust puny au
 double, que s'il eust esté sobre. Et lors Pittacus:
 Mais neantmoins, dit-il, tu t'es si superbemēt moc-
 qué de mon ordonnance, que n'agueres chez mon
 frere Libys, d'elle mesme t'estant enyuré, tu en de-
 mandas le pris & la couronne. Pourquoi non res-
 pondit Anacharsis, veu que lon auoit proposé pris
 de la victoire à qui beuroit le plus, m'estant chargé
 & enyuré des premiers, n'eusse-je voirement de-
 mandé

A mandé le pris de la victoire: ou bien enseigne moy
quelle autre fin il y a de bien boire, sinon que s'en-
yurer. Pittacus s'estant pris à rire, Æsope recita vne
telle fable: Le loup aiant apperceu des bergers qui
mangeoient vn mouton dedans leur loge, s'appro-
„ chant d'eux, Quel bruit, dit-il, vous meneriez, si ie
„ faisois ce que vous faictes! Chilon adonc: Æsope,
dit-il, a eu sa reuâche bien à propos, de ce que n'a-
gueres nous luy auons fermé la bouche, voiât que
maintenant d'autres ont rompu le propos, & osté
la parole de la bouche de Mnesiphilus, auquel on
B auroit demandé qu'il respondist pour Solon. Adōc
Mnesiphilus parla ainsi, Qu'il scauoit bien que
l'opinion de Solon estoit telle, que l'œuvre de
tout art & de toute faculté, tant humaine que di-
uine estoit plus tost son effect que ce parquoy elle
le fait, & sa fin plus tost que les moiens tendans à
icelle fin: comme l'œuvre d'un tissier, à mon aduis,
est plus tost de faire vn manteau, ou vne robbe,
que non pas de disposer ses fils, & de dresser ses
pesons: & d'un ferrurier souder le fer, & donner la
trempe à vne congne, plus tost que chose aucune
C qui soit necessaire pour cest effect, comme d'em-
brazer les charbons ou preparer du chapplis de
pierres. Et d'auantage vn architecte nous repren-
droit bien à bon droit, qui luy diroit que son œu-
re fust non bastir vne maison, ou vne nauire,
mais percer des pieces de bois, ou bien destrem-
per du mortier. Et les Muses se plaindroient mer-
ueilleusement, & non sans cause, de nous, si nous
estimions que leurs ouurages fussent des cithres

ou des flustes, & autres tels instruments de Musi- D
 que, non pas instruire les meurs & addoucir les
 passions de l'ame de ceux qui se delectent des
 chansons, harmonies & accords de la musique:
 Aussi doncques faut-il que nous confessions, que
 l'œuvre de Venus n'est pas l'assemblee ny la mes-
 lâge des corps, ny de Bacchus l'yuresse ny le boire
 vin, mais bien la resjouissance, l'affection, l'amitié,
 & la familiarité qu'ils nous engendrent des vns
 enuers les autres. C'est ce que Solon appelle œu-
 res diuines, & c'est ce qu'il dit qu'il aime, & qu'il
 desire, & qu'il poursuit estant deuenue vieil: car cer- E
 tainement Venus est l'ouuriere de la concorde, &
 mutuelle bien-veillance qui est entre les hom-
 mes & les femmes, meslant & fondant ensemble,
 par le moien de la volupté, les ames avec les corps:
 & Bacchus à plusieurs qui parauant n'auoient pas
 grande familiarité ensemble, ny pas la cognoissan-
 ce seulement les vns des autres, amollissant & hu-
 mectant, en maniere de dire, la duresse de leurs
 meurs par le vin, ne plus ne moins que le fer s'a-
 mollit dedans le feu, leur donne vn cōmancement
 de commixtion & incorporation des vns avec les F
 autres. Il est bien vray que quand tels personna-
 ges, cōme sont ceux que Periander a icy conuiez,
 s'assemblent & conuiennēt ensemble, il n'est ia be-
 soing de coupe ny de verre pour les allier: car
 les Muses apportās au milieu de la cōpagnie, com-
 me vne coupe de sobriété, le deuis, où il y a non
 seulement beaucoup de plaisir, mais aussi d'eru-
 dition, de doctrine & de profit, excitent, arro-
 sent

A sent & respandent, par le moien de ce discours, la ioye & caresse parmy les cœurs des assistās, en laissant bien souuent le pot au dessus de la tasse en repos, sans en vser : au cōtraire de ce que defend Hesiodé à ceux qui sçauent mieulx boire, que discourir ne deuiser,

Sil on bailloit à boire par mesure

Aux autres Grecs à longue cheuelure,

Ta couppe estoit pleine & raise tousiours.

Car i'entend mesme que les anciens appelloient ces prouocatiōs à boire, Dætron, comme Homere les appelle, & que chascun beuuoit à certaine mesure : & puis, ainsi que fait Ajax, en departoit vne portion à celuy qui estoit plus prochain de luy à table. Apres que Mnesiphilus eut ainsi parlé, le poète Chersias, qui n'aguères auoit esté absous par Periander des crimes à luy imposez, & estoit retourné en bonne grace avec luy, à la requeste de Chilon : Le sçauois volōtiers, dit-il, si Iupiter distribuoit à boire aux Dieux par mesure, pource qu'ils beuuoient les vns aux autres quand ils māgeoient avec luy, ne plus ne moins que faisoit Agamemnō aux Princes Grecs quand ils estoient à sa table. Et lors Cleodemus : S'il est vray, dit-il, amy Chersias, comme vous autres poètes le dittes, que des coulombs volans à grande peine & grande difficulté par dessus les rochers qui s'appellent Planetes, apportent la viāde de l'Ambrosie à Iupiter, n'estimez vous pas que le bruuage du Nectar luy soit aussi bien cher, bien rare, & difficile à recouurer ? de maniere qu'il l'espargne & le dōne à chascun par me-

sure. Ouy & par esgale mesure, respondit Chersias, **D**
 Mais puis que nous sommes de rechef retombez
 sur les propos du mesnage, qui sera celuy de vous
 qui nous dira ce qui en reste à dire? car il nous reste,
 ce me semble, à definir la quãtité de biens qui sera
 suffisante, & dont l'homme se deura contenter.
 Cleobulus adonc prenant la parole, Quant aux sa-
 ges, dit-il, la loy leur en a prescript la mesure: mais
 quant aux fols, ie leur diray vn propos que i'ay au-
 trefois ouy tenir par ma mere à vn mien frere: Car
 elle disoit, que la Lune vn temps fut, pria sa mere
 de luy faire vn petit surcot, qui luy ioignist bien au **E**
 corps: Et comment est-il possible, respôdit la mere,
 que ie t'en tisse vn qui te ioigne bien, veu que ie te
 voy tantost toute pleine, puis apres en croissant, &
 vne autrefois en decours? Aussi, amy Chersias, on
 ne scauroit definir mesure aucune certaine de biẽs
 à vn fol, ny à vn vicieux: car il a besoing tantost
 d'une chose & tantost d'une autre, à cause de ses di-
 uerses cupiditez & diuerses aduëntures: comme le
 chien d'Æsope, qui l'hyuer se resserrant & se pliant
 en rond, pource qu'il geloit de froid, proposa de
 se bastir vne maison: mais au contraire, l'esté s'es- **F**
 tendant tout de son long en dormant, il se trouua
 grand, & pensa que ce n'estoit point chose neces-
 saire de bastir maison, avec ce qu'il luy sembla que
 ce ne seroit pas petite entreprise d'en bastir vne as-
 sez grande pour luy. Ne vois tu pas aussi Chersias
 que ces gens-là font tantost les petits, & se restrai-
 gnent à bien peu de chose, comme proposans de
 viure fort estroittement & laconiquement, puis
 tout

A tout à vn coup fils n'ont tout ce qu'ils voyent, & aux priuées personnes, & aux Princes & Rois, ils se plaignent, comme fils estoient prests à mourir de faim. Cela dit, Chersias se teut : & Cleodemus adonc prenant la parole, voire-mais nous voions, dit-il, que vous mesmes, messieurs les sages, auez les biens inegalemēt departis entre vous. Cleobulus respondit, c'est pourautant, homme de bien, que la loy cōme vn bon tissier, nous donne à chascun ce qui nous est bien seant, sortable & conuenant : Et toy de mesme, nourrissant, gouuernant & medicinant avec la raison tes malades, ne plus ne moins qu'avec la prescription d'une loy, ne leur bailles pas des ordonnances egales, mais bien conuenables à vn chascun. Ardalus suivant ce propos : Comment, dit-il, y a il doncques quelque loy qui commande à nostre familier Epimenides, hôte de Solon, de s'abstenir de toute autre viande, & de prendre seulement en sa bouche vn petit de la composition, qui a puissance d'empescher la faim, qu'il se compose luy-mesme, & avec cela demourer tout vn iour sans boire, ny manger, ny disner, ny soupper? Ceste parole aiant fait ouurir les oreilles à toute l'assistance, Thales en se iouant respondit que c'estoit sagement fait à Epimenides, de ne se vouloir pas trauailler à moudre ny à pestrir ses viures, comme fait Pittacus : Car j'ay moy-mesme ouy, estant en l'Isle de Lesbos, vne esclauue estrangere, qui en tournant la meule chantoit, Mouls meule mouls, car aussi bien meult Pittacus le Roy de la grande Mytilene.

Et Solon dit, qu'il s'esbahissoit d'Ardalus, s'il n'auoit pas leu dedans Hesiode la recepte du regime de viure, que gardoit ce personnage-là: car c'est celuy qui a premierement baillé les semées de telle nourriture à Epimenides, & qui luy a enseigné de chercher

Le grand profit qu'il y a en la mauue,

Et le grand bien qui est en la guymauue.

Comment estimez vous, ce dit Perianther, que iamais Hesiode ait pensé à cela, & non pas qu'il ait tousiours haultemēt loué l'espargne & la sobriété, & qu'il ne nous ait pas tousiours grandement incitez aux plus simples viandes, comme à celles qui estoient les plus plaisantes? car la mauue est bonne à manger, & l'aphrodile douce au goust: & quant à ces choses là, que les medecins appellēt Alima & Adipsa, c'est à dire, ostans la faim & la soif, i'entend que ce sont medecines, & non pas viandes, & qu'il y entre du miel & du fourmage barbaresque, & grand nombre de semences, qui sont fort aisees à recouurer: & s'il est vray que telles drogues aient besoing de si peu d'appareil, comment ne faudroit il, ainsi que dit Hesiode,

Pendre au foyer timon, soc, & charrue?

Des puiffans bœufs les trauaux periroient,

Les forts mulets labourer plus n'iroient.

Et m'esmerueille de ton hoste Solon, si aiant n'agueres fait ceste grande cerimonie de purification aux Deliens, il ne veit pas comme lon apportoit dedans le temple des enseignes & memoires de l'ancienne premiere nourriture des hommes, com-

A me entre autres choses fort communes & qui naissent d'elles mesmes sans main mettre, la mauue & l'aphrodile, desquelles herbes il est vray semblable que Hesiodé nous presente & recommande la simplicité & vilité. Ce n'est pas pour cela tant seulement, dit adonc Anacharsis, ains pource que l'une & l'autre de ces herbes là sont louees d'estre fort saines entre les autres hortulages. Et Cleodemus, Vous avez raison, dit-il, car Hesiodé estoit entendu en medecine, comme lon peult cognoistre par ce qu'il escrit, non impertinemment ny negligemment, du regime de viure, de la façon de tremper le vin, de la bonté de l'eau, de l'usage du baing, & des femmes, du temps qu'il se fault approcher d'elles, comment il fault poser les petits enfans qui viennent de naistre: mais à bien iuger, Æsopé se deuroit plus tost & à meilleure raison aduouer pour disciple d'Hesiodé, que non pas Epimenides: car le propos qu'il fait que le Rossignol tient à l'Esparuier a donné à Æsopé le commencement de ceste belle & variable sagesse, qui fait parler tant de langues: mais j'entendrois volontiers de Solon, pource qu'il me semble qu'ayant vescu & conuersé familièrement par longues annees avec Epimenides à Athenes, il est vray semblable que par plusieurs fois il luy a demandé, pour quel accident ou pour quel conseil il auoit eleu & suiuy ceste si estroitte façon de viure. Et quel besoing estoit il, respondit Solon, de luy demander? car il est tout manifeste que si le plus grand & le plus souuerain bien de l'homme est, n'auoir aucun besoing de nourriture: le second apres est, de n'en auoir besoing que de bien

peu. Je ne confesseray pas cela quant à moy, ce dit D
 Cleodemus, que le souuerain bié de l'homme soit
 de ne manger point, mesmement quand on est à
 table : car en ostant la table, sur laquelle se sert la
 viāde, on ruine l'autel des Dieux, d'amitié & d'ho-
 spitalité : & comme Thales dit, que la terre estant
 ostee de ce monde, il est force qu'il s'en ensuiue ne-
 cessairement vne confusion de toutes choses : aussi
 pouuons nous dire, que oster la table, c'est autant
 que ruiner la maison totale, car vous ostez quant
 & quāt le feu, garde domestique, la deité tutelaire
 de Vesta, l'amiable coustume de boire les vns aux E
 autres en vne mesme couppe, de festoyer ses amis,
 de receuoir les estrangers & traiter ses hostes, qui
 sont les plus doulces & plus humaines communi-
 cations & conuersations que les hommes scau-
 roient auoir les vns avec les autres: ou pour mieulx
 dire en somme, toute la douceur de la vie humai-
 ne. Et s'il y a occupation ou passetemps quelcon-
 que qui comprēne le discours des actiōs de l'hom-
 me, desquelles le besoing de nourriture, & la solli-
 citude de l'appareiller, en produit & suscite la plus
 grande partie : Aussi est-ce encore vne autre gran- F
 de pitié, que la destruction & ruine de l'Agricul-
 ture, car estant ruinee elle nous rendra & laissera
 de rechef la terre sans forme non repurgee ny es-
 farte d'arbres, & de brossailles ne portans point
 de fruct, & pleine de rauages d'eaux courantes çà
 & là sans ordre, à faulte d'estre diligemment cul-
 tiuee: oultre ce qu'elle perd tous les arts & toutes
 les manufactures qu'elle met toutes en train, &
 leur

A leur donne à toutes fondement & matiere: de maniere qu'elles reuiennent toutes à neant, si vne fois la table s'en va ostee. Aussi vont perissants les honneurs des Dieux, car les hommes ne porteront plus que bien peu d'honneur au Soleil, & encore moins à la Lune, comme de la lumiere seulement & de la chaleur: car qui sera celuy desormais qui face dresser vn autel à Iupiter pluuiieux, ou Ceres fauorisant le labourage, ou à Neptune protecteur des arbres: qui leur fera plus de sacrifices? comment sera Bacchus donneur de ioye, si nous n'auons plus besoing

B de tout ce qu'il donne? & puis que sacrifierôs nous & qu'offrirons nous plus aux Dieux? dequoy leur presenterôs nous les primices? Cela emporte quât & soy vne subuersion & cõfusion generale de toutes choses. Il est bien vray que prochasser toute sorte de voluptez, & en toutes sortes, seroit vne folie: mais aussi les refuir toutes & en toutes sortes, seroit vne sottie. L'ame iouïra bien d'autres voluptez qui seront plus nobles & meilleures, mais le corps n'en sçauroit trouuer vne à iouïr, qui soit plus honeste que celle du boire & du māger, dont

C il se nourrit, ce qu'il n'y a homme qui n'entende, & qui ne confesse: au moyen dequoy, les hommes dressent leurs tables en public à la lumiere, pour boire & manger ioyeusement ensemble: là où pour iouïr du plaisir de Venus, ils mettent au deuant la nuit & toutes les tenebres qu'ils peuuēt, estimans que ce soit aussi bestialement & impudēment fait de iouïr en public de l'vn, cōme de non iouïr de l'autre. Aiant Cleodemus en cest endroit entreromp

son propos, ie le suiuy, en disant, Ne voulez vous pas encore adiouster que nous chassons le dormir quant & la nourriture: & s'il n'y a point de dormir, aussi n'y a il point de songes, & par consequēt s'en va aussi la plus ancienne sorte d'oracle & de diuination que nous aions: & sera la vie nostre toute d'une façon, & par maniere de dire, l'ame pour neant sera reuestue du corps, veu que le plus grand nombre des parties d'iceluy & des principales ont esté faittes & preparees par la nature, pour seruir d'instruments à la nourriture, comme la langue, les dents, l'estomach, le foye: car il n'y a rien en la structure du corps humain qui soit ocieux, ne qui soit ordonné à autre vsage: tellement que celuy qui n'a point besoing de nourriture, il n'a point besoing de corps aussi: qui est autant à dire, comme il n'a point besoing de soy-mesme, car chascun de nous est composé de corps & d'ame. Voyla ce que nous contribuons quant à nous, pour la defense du ventre: au demourāt si Solon ou quelque autre le veut accuser, nous sommes prests & disposez à l'ouir. Ouy certainement, respondit lors Solon, de peur que nous ne soions de moindre entendement & iugement que les Ægyptiens, lesquels fendans le corps de l'homme quand il est mort, le monstrent au Soleil, & en iettent les boyaux & entrailles dedans la riuiera: puis quand il est ainsi nettoyé, ils se mettēt à l'embaumer au reste. Car, à dire la verité, ces parties là interieures sont toute la pollution & iniquation de nostre chair, & est proprement le vray enfer de nostre corps, comme lon dit qu'il y a

A au lieu des damnez tout plein de ie ne ſçay quelles villaines riuieres & vents meſſez enſemble avec du feu & des morts, car nulle creature viuante ne ſe nourrit d'autre choſe qui ſoit viſue : & en tuant les creatures qui ont âmes, ou deſtruifant les plantes, herbes, & fruitſ, qui participēt auſſi de vie, en tant qu'elles ſe nourriffent & qu'elles croiffent, nous pechons & faiſons mal, par ce que tout ce qui eſt tranſmué en vn autre, perd ce qu'il eſtoit au parauant, & ſe corrompt entierement de toute ſorte de corruption pour deuenir nourriture d'vn autre : car
B de ſ'abſtenir ſeulement de manger chair, comme lon dit que faiſoit l'ancien Orpheus, c'eſt plus toſt vne ſubtilité, qu'vne entiere fuitte des pechez que lon cōmet en delices & ſuperfluité : mais le moien de les fuir entieremēt, & de ſ'en tenir de tout point pur & net, ſe terminant en parfaite iuſtice, c'eſt auoir tout en ſoy, & ne deſirer riē de dehors. Mais celuy que Dieu a fait naiſtre de telle cōdition, qu'il luy eſt impoſſible de conſeruer ſon eſtre ny ſon ſalut, ſans le dommage & la perte d'vn autre, à celuy là a il baillé la nature qui le pouſſe à commettre in-
C iuſtice. Ne ſeroit ce doncques pas, mon bon amy, vne belle choſe, que de retrencher avec leur iniuſtice le ventre, l'eſtomach, le foye, & toutes autres telles parties, leſquelles ne nous donnent ſentimēt ny appetit de choſe quelconque qui ſoit honeſte, & qui reſſemblēt les vnes aux vtenſiles de cuiſine, comme ſont couſteaux & marmites, les autres à ceux de moulin, ou à vn four, ou à vn puis, ou à vne met à peſtir : car certainemēt il ſe peult avec verité

dire, que l'ame de plusieurs est cachée & affublée d
de crainte d'auoir faute dedans leur corps, comme
dedans vn moulin, tournant tousiours comme à
l'entour d'vne meule apres la poursuite de quel-
que nourriture, ainsi que nous l'auons n'agueres
veu par experience en nous mesmes: car nous ne
nous regardions, ny ne nous escoutions pas les vns
les autres, ains chascun la teste courbee contre bas
seruoit au besoing de sa nourriture: mais mainte-
nant estans les tables ostées comme tu vois, aians
chappeaux de fleurs dessus noz testes, nous prenōs
plaisir à deuiser d'honestes propos ensemble, nous **E**
iouissons de la compagnie, & passons nostre tēps
à loisir, apres que nous sommes arriuez à ce poinct
de n'auoir plus d'appetit, ny de besoing de nourri-
ture. Si doncques nous pouuions toute nostre vie
demourer en cest estat, sans auoir crainte de diset-
te, & sans sçauoir que c'est du desir de richesse,
n'aurions nous pas tousiours beau loisir de hanter
ensemble, & de iouir de la conuersation les vns des
autres? car il faut que vous sçachiez que la conuoit-
tise de superfluité est tousiours conioincte & suit
de pres le besoing de la necessité. Mais Cleodemus **F**
est d'aduis qu'il est necessaire que lon mange, &
qu'il y ait de la nourriture, à fin que les tables soiēt
où lon boit les vns aux autres, & sacrifie lon encore
à Ceres, & à sa fille Proserpine. C'est tout autant
comme si vn autre vouloit, que les guerres & les
batailles fussent, à fin que nous aions des murailles
& fortifications de ville, des arcenaux à bastir na-
uires, & des armeruries, & que nous façons des sacri-

A sacrifiés pour rendre graces de cent hōmes tuez, comme lon dit qu'il y en a vn statut en la ville des Messeniens : ou si quelque autre se courrouceoit à la santé, disant que ce seroit grand pitié, si pource qu'il n'y auroit plus de malades, aussi n'auroit on plus que faire de liēt mol, ny de linceux de lin, & ne sacrifieroit on plus à *Æsculapius*, ny aux Dieux qui diuertissent les malheurs : & puis la medecine avec tous ses vtils & toutes ses drogues seroit ietee en arriere, sans honneur ny credit : car quelle difference y a il entre cecy & cela, veu que lon prent la nourriture comme vne medecine pour guarir la faim? & disent tous ceux qui se nourrissent, qu'ils se pensent & se traictent, appliquans ce remede, non cōme plaisir agreable ou desirable, mais necessaire à la nature. Et pourroit on compter plus de douleurs que de voluptez qui viennent à l'homme de sa nourriture, ou pour mieulx dire, la volupté du manger a bien peu de lieu, & dure bien petit de temps au corps de l'homme : mais l'occupation & la fascherie qu'il y a à l'apprester, il seroit malaisé à nombrer de combien de peines honteuses, & de combien de traux penibles elle nous remplit. C'est pourquoy ie pense qu'*Homere* regardant à toutes ces vexations là, a pris son argument pour prouuer, que les Dieux ne mouroient point, par-ce qu'ils ne mangeoient point,

Ne iamais pain ils ne mangent les Dieux,
Ny iamais vin ils ne boiuent és Cieulx,
Aussi sont ils sans sang, qui est la cause
Que d'immortels le nom on leur impose.

Comme voulant donner à entendre, que le boire ^D
 & manger sont non seulement entretenement de
 la vie, mais aussi cause de la mort : car de là s'amas-
 sent les maladies dedans noz corps, qui procedent
 non moins d'estre trop pleins que d'estre trop vui-
 des, & bien souuent y a plus d'affaire à consumer
 & resouldre vne viande, que lon a mis dedans le
 corps, qu'il n'y auoit pas eu à la recouurer ny à l'a-
 masser. Et tout ainsi come si les Danaïdes estoient
 en doute de ce qu'elles feroiēt, & quelle vie elles
 meneroient, si elles estoient deliurees de la seruitu- ^E
 de de tascher à réplir vn tonneau percé: aussi doub-
 tons nous, si nous estions venus à ce poinct de ces-
 ser de plus ietter & fourrer dedans ceste nostre
 chair insatiable, & qui ne se peult iamais remplir,
 toutes sortes de viandes, & de la terre & de la mer,
 que c'est que nous ferions, nous contentās de pro-
 chasser toute nostre vie les choses necessaires, à fau-
 te de cognoistre & sçauoir celles qui sont honestes.
 Tout ainsi donques comme ceulx qui ont esté lon-
 guement serfs, quand ils viennent à estre deliurez de
 seruitude, font à eux mesmes, & pour eux mesmes,
 les mesmes seruices qu'ils souloiēt faire à leurs mai- ^F
 stres quand ils leur seruoient : aussi l'ame mainte-
 nant nourrit le corps avec grands labeurs & gran-
 des fascheries, mais si vne fois elle se peult despe-
 strer de ce ioug de seruage, quand elle se trouuera
 franche & libre, elle se nourrira elle mesme, & re-
 gardera à elle mesme & à la cognoissance de la ve-
 rité, sans auoir rien qui plus la destourne ny diuer-
 tisse. Voyla ce qui fut lors dit, amy Nicarchus, tou-
 chant

A chant la nourriture. Mais ainsi comme Solon parloit encore, Gorgias le frere de Periander entra, retournant de la ville de Ténarus, où il auoit esté enuoyé à cause de ie ne sçay quels oracles, pour y porter quelques offrandes à Neptune, & luy faire sacrifice. Nous le saluames tous, & Periander son frere l'approchant de luy le baïsa, puis le feit seoir au pres de luy sur le bord du liect, & il luy raconta quelques nouuelles à luy seul. Periander l'escoutoit, monstrant à son visage qu'il estoit bien diuersemēt passionné de ce qu'il entendoit, & sembloit à son
B visage tantost qu'il en fust desplaisant, & tantost qu'il en fust courroucé, aucunes fois qu'il n'en peust rien croire, & autrefois qu'il en fust fort esmerueillé. Finablement en se riant, il nous dit, Je voudrois bien tout presentemēt vous dire ce que mon frere me vient de rapporter, mais ie fais doubte de le vous raconter, pour autant que i'ay quelquefois
„ oy dire à Thales, Qu'il falloit raconter les choses
„ vraysemblables, mais les impossibles qu'il les fal-
„ loit taire du tout. Bias prenant la parole: Mais aussi
„ est, dit il, ceste sage parole de Thales, Qu'il ne fault
C pas croire ses ennemis des choses mesmes qui
„ sont croyables, ny descroire ses amis des choses
„ mesmes qui sont incroyables: & quant à moy ie pense qu'il estime ses ennemis les meschants & les fols, & ses amis les bons & les sages. Je suis doncques d'aduis Gorgias, que tu le recites deuāt toute ceste compagnie, ou plus tost que tu le mettes en ce nouveau genre de vers que lon appelle maintenant Dithyrambes, pour le pronôcer à haute voix,

ainsi que tu me l'as recité. Gorgias donc commanda lors à parler en ceste maniere. Apres que nous eufmes fait nostre sacrifice l'espace de trois iours durant, & le dernier y aiant eu vne assemblée de feste toute la nuict avec danses & ieux au long de la marine, la Lune reluysoit au plein sur la mer, & ne tiroit vêt du mōde, ains y auoit vn calme & vne bonace grande, sinon que de loing on apperceuoit vn peu de frizeure de la mer qui se fronçoit le long de l'escueil, & en approchant amenoit vn peu d'escume, avec vn grand bruit pour la vehemēce de la vogue, tellemēt que toute la multitude esmerueillee que ce pouuoit estre, s'en courut à l'endroit du bord, où il sembloit que cela deust arriuer, & auant que lon peust par coniecture deuiner que c'estoit, la vistesse fut telle, que lon apperçeut à l'œil que c'estoient daulphins, les vns en foule enuironnans tout à l'entour, les autres guidās la troupe au plus facile endroit & plus doux abbord du riuage: les autres venans apres à la cueuē, cōme par honneur: au milieu de toute ceste troupe apparoiſſoit au dessus de la mer ne ſçay quelle masse d'un corps flottant, que lon ne ſçauoit discerner ny deuiner F que c'estoit, iusques à ce que se ferrans tous ensemble, & arriuans avec vn elācement à bord, ils exposerent sur le riuage vn homme viuāt & mouuant, & cela fait s'en retournerēt deuers le promontoire saultans & culebutans de ioye & de feste, comme il sembloit, plus qu'au parauant. Ce qu'ayant veu la plus part de ceste troupe s'en effroia si fort, qu'ils s'enfuirēt à perte d'halcine arriere de la mer, sinon quel-

A quelque petit nombre qui s'assura d'approcher quand & moy : là où ils recogneurent que c'estoit Arion le ioueur de cithre, qui luy mesme disoit son nom, & estoit aisé à recognoistre, d'autant qu'il auoit le mesme accoustrement qu'il souloit porter quand il iouoit en public de sa cithre : si le prit on incontinent, & l'emporta lon dedans vne tente, là où lon cogneut qu'il n'auoit mal du monde, sinon que pour la roideur & impetuosité dont on l'auoit apporté, il sembloit estre tout las & rompu : & là ouysmes de luy vn propos incroyable à tout le

B mode, fors à nous qui en auõs veu la fin : car Arion nous a racoté qu'ayant de long temps resolu de s'en reuenir d'Italie, de tant plus mesmement que Periander luy auoit escript qu'il s'en reuint : à la premiere occasiõ qui se presenta d'une Carraque Corinthienne qui faisoit voile, il monta dessus incontinent, & ne fut pas plus-tost eslargy en mer, avec vn petit vent, qu'il s'apperçeut que les mariniers conspiroiēt entre eulx de le tuer, dequoy le pilote mesme de la nauire l'aduertit depuis secrettemēt, qu'ils auoiēt arresté de le faire la nuit. Se trouuāt dõques

C ainsi destitué de tout secours, & ne sçachāt qu'il deuoit faire, il luy vint vne inspiratiõ diuine, de parer son corps encore viuāt des ornements, dõt il auoit accoustumé de s'accoustrer quand il deuoit sonner de sa cithre en vn theatre, à fin qu'ils luy seruissent d'ornements funeraux à sa mort, & de chanter vne lamentation auant son trespas, pour ne se mōstrer en cest endroit moins genereux que les cygnes : parquoy s'estant reuestu de tous ses ornements, &

aiant aduertty les mariniers qu'il luy estoit pris vne
 enuie de chanter vn cantique à Apollo Pythien
 pour le salut de luy, de la nauire, & de tous ceulx
 qui estoient dedās, se dressant en pieds sur la pou-
 pe le long du bord de la nauire, & aiant premiere-
 ment sonné quelque inuocatiō des Dieux marins,
 il chanta le cantique : & comme il fut presque au
 milieu, le Soleil se coucha dedans la mer, & incon-
 tinent se commancea à descouurir le Peloponese.
 Adonc les mariniers n'aians pas la patience d'at-
 tendre la nuict toute noire, vindrent à luy pour le
 tuer : luy voiant leurs espées nues, & le pilote qui
 se couuroit la face pour n'en rien voir, se lancea &
 ietta le plus loing qu'il peut de la nauire : mais auāt
 que tout son corps plongeast dedans la mer, les
 daulphins accoururent qui le soubleuerent, plein
 de frayeur & de perturbation d'esprit : de maniere
 qu'il ne sçauoit que c'estoit du commencement,
 mais peu à peu sentant qu'il estoit porté bien à son
 aise, & voiant vne grande flotte de ces daulphins
 qui l'environnoient amiablement, & succedoient
 les vns apres les autres à ceste charge de le porter,
 comme estant vn seruice auquel ils estoient neces-
 sairement obligez, & qui appartenoit à tous : &
 d'auantage voiant que la carraque estant demou-
 ree bien loing derriere, luy donnoit argument de
 iuger qu'il alloit fort legeremēt, il n'eut, ce dit il, pas
 tant ny de crainte de mourir, ny d'enuie de viure,
 comme d'ambition de pouuoir arriuer à port de
 salut, à fin que le monde cogneust qu'il estoit en la
 grace des Dieux, & que luy en prist vne certaine
 creance

A creance & ferme fiance en eux, voyant le ciel tout plein d'estoiles, & la lune se leuant pure & nette avec vne grande clarté, toute la mer à l'entour de luy platte & calme, sinon que leur cours y traïssoit comme vne routte & vn sentier, il pensa en luy mesme, que la iustice n'auoit pas vn œil tant seulement, ains que avec autāt d'yeux, comme il y auoit d'estoiles au ciel, Dieu regardoit à l'enuiron tout ce qui s'y faisoit, tant en la terre qu'en la mer, lesquelles cogitations, dit il, luy renforceoient & sustenoient le corps, qui autrement se laissoit ia aller **B** au trauail & à la lassitude : & finablement, quand ils vindrent à rencontrer le grand promontoire de Tenare haut & droict, se donnans bien dextremēt garde d'y heurter, ains tournans tout doucement & nageans terre à terre au long de la coste, comme s'ils eussent voulu conduire vne barque entiere à sauueté, en port de salut, il s'apperçeut bien euidemment que tout ce port auoit esté fait par la conduite de la prouidēce diuine. Apres qu'Arion nous eut fait tout ce discours, ce dit Gorgias, ie luy demanday là où il pensoit que la nauire deuoit arriuer, ie pense, respondit il, qu'en toute sorte elle arriuera à Corinthe, mais qu'elle estoit encore beaucoup derriere : car s'estant ietté dedans la mer au soleil couchāt, à son aduis, il n'auoit pas fait depuis sur les dos des daulphins moins de chemin que de trente lieux, & que depuis il y auoit eu tousiours grand calme en la mer : ce-neantmoins Gorgias dit, que s'estant diligemment enquis du patron de la nauire, comment il auoit nom, & le pilote

aussi, quelle enseigne portoit la nauire, il auoit en-
 uoyé par tout des batteaux, & des soudards en tous
 les endroits où elle pouuoit aborder, & qu'il auoit
 ce pendant amené quand & luy Arion caché, de
 peur que si les mariniers estoient premier aduertis
 qu'il eust esté sauué, ils ne s'enfuissent çà & là: de
 maniere qu'on ne les peust plus recouurer: & qu'à
 la verité tout cest euenement estoit vn vray mira-
 cle de Dieu, pource qu'il n'estoit pas plus tost arri-
 ué là, qu'il auoit entendu que la nauire estoit entre
 les mains des soudards, & les mariniers & passa-
 gers qui estoient dedans, tous pris prisonniers. Pe-
 riander adonc luy commanda qu'il se leuast incō-
 tinent, & qu'il les allast faire mettre tous en bon-
 ne & seure prison, où personne n'allast parler à
 eux, ny leur declarer qu'Arion fust sauué. Æsope
 adonc se prit à dire, Et puis vous vous mocquez
 de mes geays & de mes corbeaux qui parlent, &
 vous voiez que les daulphins font de si grandes
 prouësses. Nous en contons vn autre (dis-ie) sem-
 blable, Æsope, & y a plus de mille ans, dès le tēps
 d'Ino & d'Arhamas que ce conte-là est escript &
 passé en chose iugee & certaine. Solon adōc pre-
 nant la parole: Or quant à cela, dit-il, il approche
 des Dieux, & surpasse nostre puissance, mais l'acci-
 dēt qui aduint à Hesiode est humain, & non point
 trop esloigné de nous, car ie croy que vous en auez
 ouy faire le recit: Non pas moy, respondit-il: Si
 est-il bien digne d'estre entendu, poursuiuit Solon:
 C'est qu'un certain Milesien, avec lequel il lo-
 geoit, beuuoit, & mangeoit ordinairement, en la
 ville

A ville de Locres, entretenoit secrettement la fille de leur hoste, & aiant esté surpris sur le faict avec elle, Hesiodé fut souspeçonné d'auoir bien sçeu la forfaiture dès le commencement, & d'auoir aidé à la couurir, sans que toutefois il en fust coupable en sorte du monde, ains luy en sçauoit on mauuais gré, & l'en calomnioit on à grand tort, tant que les freres de la fille luy aiant dressé embusche aupres de Nemee en Locride, le tuerent, & quād & luy son seruiteur, qui auoit nom Troilus: les corps furent lancez dedans la mer, & ce-
B luy de Troilus ietté dedans la riuere de Daphnus, qui le porta dehors sa bouche, où il rencontra vn rocher battu des ondes, lequel apparoissoit vn bien petit au dessus de la mer, & l'arresta, dont iusques au iourd'huy le rocher en est appellé Troilus: mais celuy de Hesiodé, au partir de là fut recueilly par vne flotte de daulphins, qui le porterēt iusques au chef de Rhion, pres la ville de Molycrie. Or estoit ce au temps iustement que les Locriens faisoient leur solennel sacrifice, qu'ils appellent Rhia, lequel ils obseruent encore iusques au iour-
C d'huy fort magnifiquement, & y auoit vne fort grande assemblée en cest endroit là: quand ils aperceurent le corps qui abordoit, s'en esmerueillans grandement, comme lon peut penser, ils accoururent sur le riuage, & le recognoissans, pour ce qu'il estoit tout freschement tué, ils n'eurent rien en plus grande recommandation que d'en- uoyer incontinent par tout enquerir de ce meurdre, pour le grand renom du poëte Hesiodé, &

furent si prompte diligence qu'ils trouuerent ceux **D**
 qui en estoient les meurdriers, lesquels ils ietterent
 tous viuans au fond de la mer, & raserēt leurs mai-
 sons, & fut le corps de Hesiodus enterré aupres du
 temple de Nemee, & n'y a gueres d'estrangers qui
 sçachent où est ceste sepulture, ains leur est celé, à
 cause des Orchomeniens, comme lon dit, lesquels
 par ordonnance de quelques oracles le cherchoiēt
 pour l'enleuer & l'inhumer en leur país. Si donc-
 ques les Daulphins sont ainsi amoureusement af-
 fectionnez enuers les morts, il est bien à croire qu'ils
 le sont encore d'auātage enuers les viuans, & qu'ils **E**
 cherchent à leur faire tout secours, mesmement
 quād ils y sont attirez par le son des flustes & d'au-
 tre armonie: car il n'y a celuy qui ne sache mainte-
 nant cela, que ces animaux la prenēt plaisir à ouir
 chanter, & suyuent & nagent au long des vaisseaux,
 où ils entendent de la musique, & où lon vogue au
 son des flustes, ou d'autre chant, quand le temps
 est doux, tant ils s'en delectent. Aussi prennent ils
 plaisir à veoir nager les petits enfans, & iouēt à
 plonger avec eux: & pourtant y a il vne ordōnan-
 ce non escripte, de frāchise & immunité qu'ils ont **F**
 par tout: car nul ne les prent, ny ne leur fait des-
 plaisir, sinon que quelquefois quand on les trou-
 ue pris dedans les rets, où ils mangent les autres
 poissōns, on les bat, comme lon feroit des enfans
 qui auroient failly. Et me souuient auoir ouy ra-
 conter bien à certes, aux habitans de Lesbos, qu'en
 leur país il y eut iadis vne pucelle sauuee par vn
 daulphin du peril d'estre noyee en la mer: mais
 pource

A pource que Pittacus le doit mieux sçauoir, il seroit bien raisonnable que luy mesme nous en feist le conte. Parquoy Pittacus commancea à dire: C'est vn propos qui est assez notoire, & celebré de plusieurs, car aiant esté donné vn oracle aux fondateurs, qui premier peuplerent l'Isle de Lesbos, que quand en cinglant par la mer ils seroient arriuez à vn escueil, qui s'appelleroit Mesogëon, que lors ils iettassent dedans la mer vn taureau pour Neptune, & pour Amphitrite & les Nymphes Nereïdes, vne pucelle toute viue. Or y aiant sept conducteurs, & Roys de la troupe, qui deuoit là habiter, & pour le huictième Echelaus encore à marier, expressement nommé par l'oracle d'Apollo: les autres sept qui auoient des filles à marier, tirent entre-eux au sort, lequel tomba sur la fille de Smintheus. Si l'accoustrent richement de belles robes, & de ioyaux d'or: & quand ils furent au lieu designé, apres auoir fait leurs prieres & oraisons, ainsi qu'ils estoient prests à la ietter, il y eut vn ieune homme de ceux de la nauire, homme de gentil cœur, comme il apparut, nommé Enalus, lequel estant amoureux de la fille, prit soudainement vne resolution de la secourir à ce besoing, encore qu'il veist bien qu'il estoit impossible, & l'embrassant estroittement se laissa ietter quant & elle dedans la mer. Or sur l'heure mesme il courut vn bruit, qui n'auoit pas grand fondement, mais neantmoins qui fut creu de beaucoup de gens parmy l'armee, qu'ils auoient esté portez & sauuez: mais depuis on dit que ledit Enalus fut veu en

l'Isle de Lesbos, lequel dit qu'ils auoiēt esté portez **D** sur le dos des daulphins à sauueté iusques en terre ferme. Nous pourrions bien reciter d'autres contes encore plus merueilleux, pour raurir en admiration, & entretenir vn populaire: mais il seroit difficile de les prouuer: comme qu'il se leua vne grande & haute vague en l'air, ne plus ne moins qu'un rocher à l'entour de l'Isle: tellement qu'il n'y eut homme qui en osast approcher, sinon luy seul qui alla vers la mer, & qu'une grande troupe de poulpes le suiui-rēt iusques au temple de Neptune, là où l'un de ces poulpes apporta vne pierre, que **E** Enalus prit, & la dedia en memoire de ce miracle dedans le temple: d'où vient qu'encore l'appellons nous iusques au iourd'huy Enalus: mais en somme, dit-il, si lon entendoit bien la difference qu'il y a entre l'impossible & l'invité, ou hors du commun vsage, & entre ce qui est contre l'ordre du cours de nature, & contre la commune opinion des hommes, en ne croyant pas temerairement, ny aussi ne descroyant pas facilement, on obserueroit de bout en bout ta regle de Rien trop, Seigneur Chilon, ainsi comme tu l'as commandee. **F** Apres luy, Anacharsis parla, disant, Qu'il ne se falloit pas esmerueiller, si les plus belles & plus grandes choses du monde se faisoient par la volonteé & prouidence de Dieu: attendu que selon la bonne & sage opinion de Thales, en toutes les plus grandes & principales parties du monde, il y a vne ame: car l'organe & vtil de l'ame c'est le corps, & l'ame est l'vtil de Dieu: & comme le corps a de
foy

A foy plusieurs mouuements, & la plus part mesmement les plus nobles, il les a de l'ame : aussi l'ame fait ne plus ne moins aucunes de ses operatiōs, estant meüë d'elle mesme, és autres elle se laisse manier, dresser & tourner à Dieu, comme il luy plaist, estant le plus bel organe, & le plus adroict vtil qui scauroit estre : car ce seroit chose estrange que le vent, l'eau, les nuees & les pluyes fussent instrumens de Dieu, avec lesquels il nourrit & entretient plusieurs creatures, & en pert aussi & defait plusieurs autres, & qu'il ne se seruiist nullement

B des animaux à faire pas vne de ses œuvres : ains est beaucoup plus vraysemblable, attendu qu'ils dependent totalement de la puissance de Dieu, qu'ils seruent à tous les mouuements, & secondent toutes les volonteiz de Dieu, plus tost que les arcs ne s'accōmodent aux Scythes, les lyres aux Grecs, ne les haubois. Apres ces propos le poëte Chersias fait mētion de plusieurs autres, qui auoiēt esté respitez de mort cōtre toute esperāce, & entre autres de Cypselus, pere de Periander, pour lequel tuer lors qu'il ne faisoit que naistre, aucuns meurdriers

C aiāts esté enuoyez, le rencōtrèrent, & s'en destournerent par pitié, & depuis s'en estans repentis, retournerēt pour le chercher, & ne le trouuerēt plus, pource que sa mere l'auoit caché dedans vn coffre, en memoire dequoy Cypselus depuis fit bastir vne salle dedans le tēple d'Apollo en Delphe, cōme aiant ce Dieu miraculeusement empesché, que lors il ne criast, de peur qu'il ne fust trouué. Et lors Pittacus adressant sa parole à Periander, se prit à

dire, Chersias m'a fait grand plaisir de mentionner
 ceste salle: car i'ay eu plusieurs fois enuie de te de-
 mander que veulent dire tant de grenouilles qui
 y sont grauees à l'entour du pied du palmier, &
 quelles ont à faire ou avec le Dieu, ou avec celuy
 qui a fait bastir & dedié la salle. Periander luy res-
 pondit en riant, qu'il le demandast à Chersias. Je
 n'en diray rien, respondit-il, fils ne me disent pre-
 mier que signifie, Rien trop, & Cognoy toy-mes-
 me: & cest autre mot qui a fait demourer plusieurs
 sans marier, plusieurs deffians, & quelques-vns
 mesme muets, Qui respond paye. Et quel besoing
 est-il, dit Pittacus, que nous l'exposions, veu que tu
 louës des fables qu'Æsope a composees, qui decla-
 rent la substance de chascune de ces sentences.
 C'est quād Chersias se veut iouer avec moy, qu'il
 dit cela, respondit Æsope: mais quand il parle à
 bon esciant il dit, qu'Homere en a esté le premier
 auteur, alleguant qu'Hector se cognoissoit soy-
 mesme: car allant chercher & assaillir tous les au-
 tres capitaines Grecs,

Il refuyoit le fils de Telamon:

& dit aussi qu'Vlysses approuuoit & louoit ceste
 sentence, Rien trop, quand il admonestoit Diome-
 des, en disant,

Diomedes par trop haut ne me prise,

Ny trop aussi ne me blasme & desprise.

Quant à la caution ou response, les autres tiennēt,
 qu'il la diffame & dissuade fort au lieu où il dit,

C'est bien vn cas souuent calamiteux

Que de pleger des hommes souffreteux.

Et ce

A Et ce poëte icy Chersias dit que la fee Até, c'est à dire peste, ou malheur, fut par Iupiter iettée du ciel en terre, pourautant qu'elle s'estoit trouuée présente à la caution & réponse qu'il auoit faite de la naissance d'Hercules, où il auoit esté trompé. Puis qu'ainsi est, dit adonc Solon, ie suis doncques d'aduis, que nous adiouctions foy au trellage Homere,

La nuit nous est ia venue surprendre,


Obeïssance il vaudra mieux luy rendre,

B Ainsi apres que nous aurons rendu graces, en leur offrant du vin, aux Muses, à Neptune, & à Amphitrite, mettons fin, si bon vous semble, à l'assemblée de ce festin. Voyla, amy Nicarchus, quelle fut lors la fin de ceste assemblée.

INSTRUCTION POVR

CEUX QVI MANIENT

affaires d'estat.



IL y a propos au monde, auquel on puisse proprement appliquer ces vers du poëte Homere,

Il n'y aura entre tous les Grecs, ame

Qui ton parler contre-die ny blasme

Certainement, mais cela n'est pas tout,
Car tu n'es pas allé iusques au bout:

Fff

veritablement, Seigneur Menemachus, c'est à l'en-
droit des philosophes qui exhortent assez, & disent
qu'il se faut entremettre des affaires publiques,
mais ils n'enseignent pas comment, ny n'en don-
nent pas les preceptes & aduertissements: & me
semble qu'ils font tout ainsi que ceux qui mou-
chent bien les lampes, mais ils ne versent point
d'huyle dedans. Voiant doncques que tu as avec
bien bonne raison deliberé de te mesler des affai-
res de ton pais, & que tu desires, ainsi qu'il appar-
tient à la noblesse du lieu dont tu es yssu,

Sçauoir bien dire & encore mieux faire,
& que tu n'as pas l'aage d'auoir peu contempler à
descouuert la vie d'un homme sage, comme seroit
vn vray philosophe, en matiere de gouuernemēt,
& considerer ses deportements en affaires d'estat,
ny d'auoir esté spectateur de ses beaux exemples
mis en œuvre par effect, & non pas en discours
seulement: à raison dequoy tu me requiers de te
donner des preceptes & aduertissemens, pour sça-
uoir comment tu t'y dois gouuerner: il m'a sem-
blé que ie ne pouuois honestement esconduire ta
requeste, & desire que ce que ie t'en ay recueilly,
responde dignement & au zele de ton intention,
& à la bonté de mon affection. I'ay accompagné
les preceptes de plusieurs beaux exemples, ainsi
que tu m'auois mandé. En premier lieu doncques
ie dis, Qu'il faut que tout homme qui vient à s'en-
tremettre du gouuernement de la chose publique,
y apporte pour vn assésuré & certain fondement,
la bonne intention meüe de raison & de iuge-
ment,

A ment, non point de passion ny de cupidité de vaine gloire, ny de ialousie d'un autre & d'émulation, ny de faute d'autre occupation: car ainsi comme il y en a qui demeurent le plus du temps sur la place, encore qu'ils n'y aient que faire, pource qu'ils n'ont rien de bon en leur maison: aussi y en a il qui se iettent aux affaires publiques, d'autant qu'ils n'ont que faire chez eux, prenans les affaires publiques pour autant d'amusement & de passetemps. Il y en a d'autres qui s'y estans iettez par cas d'adventure, & s'en estans bien tost saoulez, ne s'en peuvent plus, au moins pas facilement, retirer, ressemblans proprement à ceux qui mōtent dessus quelque vaisseau en mer, seulement pour se branler, & puis sont emportez par le vent en haute mer: alors commanceant la teste à leur tourner, & leur estomach à se renuerfer sans-dessus-dessous, ils regardent vers la terre au dehors, mais toutefois ils sont cōtraincts de demourer dedans, & s'accommoder à ce qui se presente,

Les beaux amours leur sont passez

D'aller sur les bancs tapissiez

c De quelque fregatte legere,

Par vne bonace bien claire,

Plaisamment sillonner le dos

De la mer aux terribles flots:

ce sont ceux là qui autant ou plus que nuls autres descrient le faict, d'autant qu'ils se repentent & se courroucent de ce qu'ils s'y sont mis, mesmement quand au lieu d'une gloire qu'ils s'estoiēt promise, ils se treuvent tombez en infamie, au lieu qu'ils

fattendoient d'estre formidables aux autres, par le **D** moien de leur credit & autorité, ils se treuuent embrouillez eux mesmes en affaires pleins de troubles & de dangers. Mais celuy qui y sera venu, & aura commencé par vray iugemēt de raison, cōme à vne treshoneste vacation, de soy-mesme, & tresconuenable à son estat & à sa qualité: celuy là ne s'estōnera point de tous ces accidēts là, ny ne changera point de resolution: car il ne faut pas venir au gouuernement de la chose publique, en intention d'y trafiquer, ny d'y faire bien ses besongnes, ainsi comme iadis à Athenes vn Stratocles & vn **E** Democrides se conuioient l'vn l'autre d'aller à leur moisson d'or, appellans ainsi par maniere de mocquerie, la chaire & tribune aux harengues, de sur laquelle ils preschoient le peuple, ny par saisissemēt d'une soudaine passion violente, ainsi comme iadis feit Caius Gracchus, lequel sur l'heure que l'inconuenient de la mort de son frere estoit encore tout chaud, se retira en vne vie solitaire & priuee, bien loing de tout maniement d'affaires, & depuis s'estant tout soudain allumé de cholere, pour des outrageuses & iniurieuses paroles que **F** quelqu'un luy dit, il s'en alla par despit ietter au gouuernemēt des affaires, dont il fut tantost saoul, & son ambition rassasiee: mais alors qu'il eust bien voulu s'en departir & se reposer, il ne peut trouuer moien de quitter son autorité & sa puissance, tant elle estoit grande, & fut tué auant que de le pouuoir faire: mais ceux qui se composent comme pour aller iouer quelque ieu sur vn eschafault,

A fault, ou à vne contention de ialousie contre quelques autres, ou à vne conuoitise de vaine gloire, il est force que ceux là se repentent de s'y estre mis quand ils voient qu'il faut qu'ils seruent à ceux à qui ils se pensoient estre dignes de commander, ou qu'ils desplaisent à ceux à qui ils deuroient complaire. Ne plus ne moins que ceux qui tombent par inconuenient dedans vn puis, auant que l'auoir preueu, il est force qu'ils se treuuent bien estonnez & faschez quand ils se voyent au fond: mais ceux qui de propos deliberé, & apres y auoir bien pensé, y deualent, ceux là s'y portent modereement en repos d'esprit, sans se fascher ny courroucer de rien, comme ceux qui dès leur entree se sont proposé le deuoir seulement, & non autre chose, pour leur but: ainsi apres que lon a bien fondé son intention en soy-mesme, & que lon l'a tellement asseuree & affermie qu'il est mal aisé de la faire plus varier ny branler, alors il se faut mettre à diligemment considerer & cognoistre le naturel des citoiens, à qui lon a affaire: au moins ce qui estant composé & meslé de tous en apparoist le plus, & a plus de force entre eulx. Car de vouloir entreprédre de changer du premier coup ou de reformer à sa mode la nature de tout vn peuple, il n'est ny facile ny seur: par ce qu'il y faut vn long temps & vne grande autorité & puissance: mais il faut faire ainsi que fait le vin en nostre corps, lequel au commencement est vaincu & maistrisé par le naturel de celuy qui le boit: mais puis apres l'eschauffant petit à petit, & se meslant de-

dans ses veines, il vient à le transmuer & transfor- D
 mer en soy-mesme. Aussi faut il que le sage gou-
 uerneur, iusques à ce qu'il ait acquis par fiance que
 lon aura en luy, & par bonne reputation, tant
 d'autorité enuers le peuple, qu'il le puisse mener à
 son plaisir, s'accommode à ses meurs, tels qu'il les
 rencontrera, & en face coniecture & iugement, en
 considerant à quoy il prent plaisir, & de quoy il se
 delecte: cōme, pour exemple, le peuple d'Athenes
 est aisé à mettre en cholere, & prompt aussi à tour-
 ner à misericorde, voulans plus tost souspeçonner
 & deuiner promptement que d'auoir patience E
 d'estre informé & enseigné à loisir longuement: &
 comme il est plus enclin à vouloir secourir les hō-
 mes bas & de petite condition, aussi aime il plus
 & treuve meilleurs les propos ioyeux, & dits par
 maniere de ieu & de risée, prent fort grand plaisir
 à ouïr ceux qui le louënt, & ne s'offense pas beau-
 coup de ceux qui se moquent de luy: il est formi-
 dable iusques à ses magistrats mesmes, & toutefois
 humain iusques à pardonner, voire aux ennemis.
 Le naturel du peuple de Carthage tout au cōtrai-
 re, aspre, seuer, & vindicatif, souple à ses supe- F
 rieurs, rude & imperieux à ses subiects, tres couard
 en sa peur, tres-cruel en son courroux, ferme en
 ce qu'il a vne fois arresté, dur à esmouuoir à ieu,
 & à adoucir d'aucune guayeté: vous n'eussiez eu
 garde de veoir qu'à la priere d'un Cleon, qui leur
 eust dit publiquement, qu'il auoit sacrifié aux
 Dieux, & qu'il deuoit festoyer quelques vns de
 ses amis estrangers qui l'estoient venus veoir, ils se
 fussent

A fussent leuez du conseil, & eussent remis l'assemblée à vn autre iour, en riant & battant des mains en signe de resiouissance, ny qu'estant eschappée vne caille à Alcibiades de dessous sa robbe, ainsi qu'il harenguoit, ils se fussent mis à courir apres pour la reprendre, & qu'ils la luy eussent rebaillee, plus tost l'eussent ils tué luy-mesme sur la place, comme les mesprisant en cela, & se moquant d'eux, attendu qu'ils chasserent en exil le capitaine Hanno, pource qu'il faisoit porter à vn lion, comme à vn sommier, partie de ses hardes à la

B guerre, disans que cela sentoit son homme qui brassoit quelque tyrānie. Et ne m'est pas aduis que celuy de Thebes se fust iamais contenu d'ouurir des lettres de son ennemy, si elles fussent tombees en ses mains, comme feirent les Atheniens, lesquels aians surpris des courriers du Roy Philip-pus, ne voulurent oncques souffrir qu'on ouurist vne missiue qui estoit suscripte, à la Royne Olympiade sa femme, ne descouurir le secret des amours d'un mary absent escriuant à sa femme: ny celuy d'Athenes aussi à l'opposite n'eust pas, à mon iuge-

Cment, supporté patiemment la hautesse de cœur, & le mespris d'Epaminondas, qui ne voulut oncques respondre à l'imputation qui fut proposée deuant le peuple de Thebes à l'encōtre de luy, ains se leua du Theatre, auquel estoit assemblé le peuple, & passant à trauers s'en alla au parc des exercices: & s'en eust aussi beaucoup fallu, que les Lacedemoniēs eussent enduré l'insolēce & la mocquerie d'un Stratocles, lequel aiāt persuadé aux Athe-

niens qu'ils sacrifiaſſent aux Dieux, pour leur rendre graces de la victoire, comme ſils euſſent vaincu:& puis apres eſtant la nouuelle certaine venue de la deſfaiſte qu'ils auoient receuë, comme ils ſ'en courrouceaſſent à luy, il leur demanda, Hé bien, quel tort vous ay-ie fait, ſi ie vous ay tenu bien aiſes en feſte l'eſpace de trois iours durant? Or les flatteurs és courts des Princes ſont comme les oyſelleurs qui prennent les oyſeaux à la pippee, en contrefaiſant leurs voix, auſſi pour ſ'inſinuer en la bonne grace des Roys, ils ſe rendent ſemblables à eux, les attrapans par ceſte tromperie: mais à vn bon gouuerneur d'eſtat populaire, il n'eſt pas conuenable d'imiter ny contrefaire les meurs ny le naturel de ſon peuple, mais de les cognoiſtre & vſer enuers vn chaſcun des particuliers, des moiens par leſquels il ſçait qu'il ſe peut prendre & gagner: car la faute d'auoir bien cogneu & ſceu manier les hōmes ſelon leurs humeurs, apporte & cauſe des rebuts & des reculemens, auſſi bien és gouuerneurs populaires, comme il fait aux mignons des Roys. Mais apres que lon a acquis authorité & foy grāde enuers le peuple, c'eſt alors que lon doit taſcher à reformer ſon naturel ſ'il eſt vicieux, & le retirer petit à petit, & ramener tout doucement à ce qui eſt meilleur: car c'eſt choſe bien laborieufe, & bien difficile de changer toute vne commune, mais pour y paruenir il faut que tu commances à toy-meſme le premier, en reformant ce qu'il y a de deregulé en ta vie, & en tes meurs, ſçachant que tu as à viure deſormais, comme en vn Theatre ouuert

A ouuert, où tu es veu de tous costez. Et si d'adventure il est malaisé de retirer ton ame de toutes sortes de vices entierement, au moins en osteras & retrencheras tu ceux qui sont les plus apparents & qui plus se presentent au dehors: car tu oys comme Themistocles, quand il se voulut addôner au manient des affaires, se retira des compagnies où lon ne faisoit que boire, dâser, iouïr & faire grand chere, & comme en veillant, ieunant, & estudiant, il disoit à ses familiers, que la victoire & le trophée de Miltiades ne le laissoient pas reposer. Pericles

B au cas pareil changea ses façons de faire, en sa maniere de viure, & en sa personne, quant à marcher graument, & parler posément, à monstrier tousiours vn visage pensif, à contenir ses mains au dedans de sa robbe, sans iamais les monstrier dehors, à n'aller iamais par la ville ailleurs qu'au conseil, & à la tribune aux harégues: car ce n'est pas chose aisee à manier qu'une tourbe de populaire, ne qui se laisse prédre à toute personne d'une prise salutaire, & gaigne lon beaucoup si lon peult tant faire que côme vne beste ombrageuse & souspeçonneuse, il

C ne s'effarouche & ne s'effroye point de chose qu'il oye, ne qu'il voye, tant qu'on le puisse manier & gouverner. Pourtant ne fault il pas mettre cela en nōchaloir, ny auoir peu de soing de ses meurs & de sa vie, en s'estudiant de faire autāt qu'il est possible, qu'elles soient sans blasme & sans reproche: pour ce que ceulx qui prennent en main le gouuernement des affaires publiques, ne sont pas subiects à rendre compte & raison de ce qu'ils disent, & de

ce qu'ils font en public seulement, ains recherche
 lon curieusement iusques à leurs liets, leurs maria-
 ges, & à tout ce qu'ils font en leur priué, soit en ieu,
 soit à bon esciant. Car que dirons nous d'Alcibia-
 des, lequel estant homme d'exécution, autant ou
 plus que nul autre capitaine de son tēps, & s'estant
 tousiours maintenu inuincible, quant à luy, en ce
 qu'il mania du public, finit neantmoins ses iours
 malheureusemēt, pour la dissolution & le desbor-
 dement de sa vie domestique: de maniere qu'il fru-
 stra son pais du fruit de ses autres bōnes qualitez,
 par son intemperance, & sa somptueuse superfluité
 de despense. Ceulx d'Athenes reprochoient en Ci-
 mon, qu'il aimoit le vin: & les Romains ne trou-
 uans autre chose à redire en Scipion, le blasmoient
 de trop dormir: & les malueuillans de Pompeius,
 aians remarqué qu'il grattoit quelquefois sa teste
 d'un doigt, luy reprochoient, & tournoient à iniure
 cela. Car tout ainsi comme vne lentille, vn seing,
 vne verrue en la face de l'hōme font plus d'ennuy,
 que ne feroiēt vne balafre, ou vne cicatrice, ou vne
 mutilation en tout le reste du corps: aussi les fautes
 petites & legeres de soy, apparoiſſent grandes es
 vies des Princes, & de ceulx qui ont le gouuerne-
 ment de la chose publique entre leurs mains, pour
 l'opinion imprimee en l'entendement des hom-
 mes, touchāt l'estat de ceux qui gouernent, & qui
 sont en magistrat, estimans que c'est chose grande,
 & qui doit estre pure & nette de toutes fautes, &
 de toutes imperfections. Pourtant à bon droit fut
 grādement loué Iulius Drusus, Sénateur Romain,

de ce

A de ce qu'il respondit à quelques ouuriers, qui luy promettoient de faire en sorte, s'il vouloit, que ses voisins qui descouuroient & vbioient en plusieurs endroits de sa maison, n'auroient plus nullement de veüe sur luy, & ne luy cousteroit que trois mille escus seulement: mais ie vous en donneray six mille, dit-il, & faites en sorte que lon voye dedans ma maison de tous costez, à fin que tous ceux de la ville voient & sçachent comment ie vis: car c'estoit vn personnage graue, honeste & sage: mais à l'adventure n'estoit-il ia besoing que lon luy rendist sa maison veüe de tous costez, pource que le peuple penetre iusques à voir au fond des meurs, des conseils, des actions, & vies que lon pense estre plus cachees & couuertes de ceulx qui gouuernent, non moins par ce à quoy ils s'adonnent en priué, qu'à ce qu'ils leur voient faire & dire en public, en aimant les vns, & les estimant pour cela, & en haïssant, & mesprisant les autres. Et quoy, me dira quelqu'un, les citez ne se seruent elles pas quelquefois de gouuerneurs, qu'elles sçauent estre dissolus & desordonnez en leur maniere de viure? Le croy c bien: mais c'est comme nous voions que les femmes qui enchargēt, & sont enceintes, appetēt bien souuent à manger des pierres, & ceux à qui le cœur fait mal sur la mer demandent des saleures, & autres telles mauuaises viâdes: mais vn peu apres que le mal leur est passé, ils les reiettēt & les ont en horreur: aussi les peuples quelquefois par vne insolēce & vn plaisir desordonné, ou à faute de meilleurs gouuerneurs, se seruent des premiers venus, cōbien

qu'ils les mesprisent & abominent: & puis apres ils D
font bien aises quand ils oyent tenir d'eux de tels
propos que le poëte comique Platon en vne siene
comedie, fait dire au peuple mesme,

Prens moy la main, prens la moy vistement,
Car i' eslray capitaine autrement

Ægyrius:

& puis en vn autre passage il demande le bassin &
vne plume pour mettre en sa gorge & se prouoc-
quer à vomir,

Deuant moy i'ay la tribune eminente
Des harengueurs, Mantile se presente. E

Et puis apres,

Il entretient vne puante teste,

Voire, ie dis, infamè & deshoneste.

Et le peuple Romain, comme Carbon luy promist
quelque chose, en l'asseurant par vn grand sermèt,
avec vne execration & maledictiō sil n'estoit ainsi,
tout d'une voix iura haultement alencontre, qu'il
n'en croyoit rien. Et en Lacedemone, comme vn
meschant homme dissolu, nommé Demosthenes,
eust proposé vn aduis & conseil, qui estoit fort à
propos, & vtile pour la matiere dont il estoit que- F
stion, le peuple le reietta: & les Ephores aiāts choisy
vn des plus honorables Senateurs du conseil, luy
cōmanderent de proposer le mesme aduis, ne plus
ne moins que s'ils l'eussent osté d'un vaisseau sale
& ord, & remué en vn autre pur & net, pour le
rendre agreable à leur commune: tant à d'efficace
pour gouuerner vn estat, la foy & l'assurance de
la preudhommie d'un personnage, & consequem-
ment

A ment aussi tant a de force le contraire. Ce n'est pas pourtāt à dire, qu'il faille negliger la grace & science de bien dire, en faisant son total fondement de la vertu, mais estimer que l'eloquēce n'est pas celle qui persuade seule, ains qu'elle y aide & coopere, en rhabillant le dire du poëte Menander,

Les bonnes meurs de celuy qui harengue

Croire le font, non pas sa belle langue.

Car ce sont les bōnes meurs & la parole ensemble: si d'adventure nous ne voulions dire, que c'est le timonier qui gouuerne la nauire, & non pas le timon, & que c'est le cheuaucheur qui tourne le cheual, & non pas la bride: aussi que la science de gouuerner vne chose publique vse des meurs, & non pas de l'eloquence, comme d'un timon, ou d'une bride, pour manier & regir toute vne ville; qui est, ainsi que dit Platon, l'animal le plus aisē à tourner qui soit point, prouueu qu'il soit conduit & menē en maniere de dire par la poupe: car veu que les grands Roys enfans de Iupiter, ainsi comme Homere les appelle, enfloient encore leur magnificence avec de grandes robbes de pourpre, avec des sceptres en leurs mains, avec des gardes & satellites, dont ils estoient enuironnez, avec des oracles des Dieux en leur faueur, assubiecttissants à eulx par ceste venerable apparence exterieure, la cōmune, en leur imprimāt opinion qu'ils estoient quelque chose plus que hommes: & neantmoins vouloient encore apprendre à disertement parler, & ne mettoient point en nonchaloir d'acquerir la grace de bien dire,

Et harenguer, pour estre plus parfaicts

A soustenir de la guerre le faix:

& ne se recommandoient pas seulement à Iupiter
conseiller, ny à Mars sanglant, ou à Minerve guer-
riere, ains reclamoient aussi la Muse Calliopé,

Qui suit les Roys, & les rend venerables:

adoulcissant par grace persuaſiue, & appaiſant la
violence & la fierté des peuples: veu, diſ- ie, que les
grands princes ſe ſeruent de tant d'aides & de ſub-
ſides, ſeroit il bien poſſible que vn homme priué,
auec vne ſimple cappette & vne apparence popu-
laire, entre-prenant de manier toute vne cité à ſa
guiſe, en peult venir à bout & donter tout vn peu-
ple, ſ'il n'auoit l'eloquence qui luy aidait à ce faire
pour les perſuader & amener à ſa deuotion: quant
à moy, ie croy que non. Or les patrons des galeres
& des nauires, ont d'autres officiers deſſous eulx,
comme les Comites qui font par toute la nauire
entendre leurs commandements: mais le bon gou-
uerneur d'eſtat doit auoir dedans ſoy-meſme l'en-
tendement qui manie le timon, & puis la parole
qui fait entendre ſa volenté, à fin qu'il n'ait point
affaire à tout propos de la voix d'un autre, & à fin
qu'il ne ſoit contrainct de dire comme faiſoit Iphi-
crates quand il ſe trouuoit rabroué par l'eloquen-
ce d'Ariſtophon, Le ioueur de mes aduerſaires eſt
bien meilleur que le mien, mais mon ieu vault
beaucoup mieux que le leur: & qu'il ne luy faille
ſouuent vſurper ces vers d'Euripide,

Que pleuſt à Dieu que l'humaine ſemence
Fuiſt ſans parole & ſans point d'eloquence.

A Et ces autres,

O Dieux que n'ont les affaires du monde

Voix pour parler, à fin que la faconde

Des harengueurs ne seruist plus de rien.

car ces propos là, se pourroient à l'aduéture conce-
der à vn Alcamenes, ou vn Nesiotes, ou vn Ictinus,
& à telle maniere de gens viuans de leurs bras, &
gaignans leur vie à la sueur de leur corps, qui n'ont
point d'esperance de iamais atteindre à ceste perfe-
ction de bien dire: comme lon escrit de deux archi-
rectes & maçons, que lon vouloit esprouuer à Athe-
B nes, pour sçauoir lequel des deux seroit mieulx à
propos pour entreprendre vne grande fabrique &
edifice publique: l'vn, qui estoit affecté & sçauoit
bien dire sa raison, recita vne harengue qu'il auoit
premeditee touchant celle fabrique, si bien qu'il
emeut toute l'assistance du peuple: & l'autre qui
entendoit bien mieulx l'architecture, & ne sçauoit
pas si bien harenguer, se presentant au peuple ne
fit que dire, Seigneurs Atheniens, ce que cestuy cy
a dit, ie le feray. Et quant à ceux là ils ne recognois-
sent que Minerue artisanne & ouuriere, comme dit
C Sophocles,

Qui dessus l'enclume massiue

Forment à grands coups de marteaux

Vne masse sans ame viue

Obeïssante à leurs trauaux.

Mais celuy qui est ministre & prestre de la Mi-
nerue Poliade, c'est à dire gardiene des villes, & de
Iustice conseillere,

Qui aux conseils des hommes presidente,

Ou à les rompre ou assembler regente. D

celuy là, dis- ie, n'ayant qu'un seul instrument dont il se puisse seruir, qui est la parole, forme les vns à son moule & les accommode, les autres qu'il treuve repugnans au dessein de son ouurage comme feroient des nœuds en du bois, ou des feuilles & pailles en du fer, en les polissant & applanissant, il embellit toute vne cité. Par ce moien le gouuernement de Pericles qui de nom & d'apparence estoit populaire, à la verité & en effect estoit principauté regie par un seul homme premier de sa ville, par le moien & la force de son eloquence: car au mesme temps Cimon estoit bien homme de bien, si estoit Ephialtes, & Thucydides aussi, qui estant un iour enquis par le roy de Lacedemone Archidamus, lequel estoit le plus adroit à la luitte de luy ou de Pericles: Cela, respondit il, seroit bien mal-aisé à dire: car quand ie l'ay porté par terre en luitant, luy en disant persuade aux assistans qui l'ont veu, qu'il n'est pas tombé, & le gaigne: ce qui n'apportoit pas seulement gloire & honneur à luy, mais aussi salut à toute sa ville, laquelle se laissant persuader à luy, maintient & garda tresbien la richesse & l'estat qu'elle auoit, & s'absteint de vouloir conquerir l'autrui: là où le pauvre Nicias qui auoit bien la mesme intention, & non pas la mesme grace de persuader avec sa parole, qui estoit come un mors trop doux, tascha bien de refrener & arrester la cupidité du peuple, mais il n'en peut venir à bout, ains fut emporté mal gré luy, & entraîné à coltors par la violence du peuple, iusques en la Sicile.

- A** On dit communément par vn ancien prouerbe, Qu'il ne fault pas tenir le loup par les aureilles: mais c'est vn peuple & toute vne cité qu'il fault principalement prendre par les aureilles, non pas aller chercher d'autres prises lourdes & grossieres, pour attirer & gagner vne cōmune, ainsi que font ceulx qui ne sont pas suffisammēt exercez en cest art d'eloquēce, les vns tirās le populaire par la pāse, en luy faisant des banquetts, les autres par la bourse, en luy donnant de l'argent, ou luy faisant voir des ieu, des danses, ou des combats d'escrimeurs à
- B** outrance, qui n'est pas tant mener que trainer par flatterie vn peuple: car le mener proprement est le persuader par force d'eloquence, là où ces autres allechements de populace ressemblēt proprement aux appasts que lon fait pour prendre les bestes brutes. Puis qu'il est donc ainsi, que le principal instrument d'un sage gouuerneur est la parole, il fault tout premierement qu'elle ne soit point affectee, ny pompeuse & fardee, cōme seroit celle d'un ieune charlatan & triacleur, qui voudroit mōstrer son eloquence en pleine assemblee de foire, composant son oraison des plus beaux, plus doux, & plus elegans termes qu'il pourroit choisir: ny aussi tant elabouree & trauaillēee, cōme disoit Pytheas, qu'estoit celle de Demosthenes, luy reprochant qu'elle sentoit l'huile de la lāpe: ny pleine de trop de curiosité sophistique, de raisons trop aigues & subtiles, ou de clauses exactement mesurees à la regle & au compas, ne plus ne moins que les musiciens veulent qu'au touchement des cordes il se

sente vne affection doulce, non pas vn rude batte-
 ment: aussi au langage du sage gouuerneur, soit qu'il
 conseille, ou qu'il ordōne quelque chose, qu'il ap-
 paroisse non vne ruze, ny vn artifice d'orateur, non
 vne affectation de louange d'auoir parlé docte-
 ment, subtilement, & ingenieusement, mais soit son
 parler plein d'une affection naïfue, d'une vraye
 magnanimité, d'une franchise de remonstrance
 paternelle, qu'il sente son pere du public, plein de
 bon sens, de prouoyance soigneuse, aiant la grace
 attraiante conioincte avec l'honeste dignité, en
 termes graues, raisons pertinentes & vraysembla-
 bles. Il est bien vray que le langage d'un homme
 de gouuernement reçoit plus que ne fait celuy d'un
 aduocat plaidant en iugement, des sentences, des
 histoires, des fables, des translations, lesquelles es-
 meuent fort vne commune, quand celuy qui les
 allegue en sçait vser modérément, & en temps &
 lieu, cōme fait celuy qui dit: Ne veuillez, Seigneurs,
 rendre la Grece borgne, parlant de la ville d'Athe-
 nes que lon vouloit destruire: & comme parla De-
 mades quand il dit qu'il n'auoit à gouuerner que
 le naufrage de la chose publique. Et Archilocus
 qui disoit, Que la pierre de Tantalus ne soit pas
 tousiours suspendue sur ceste Isle: & Pericles qui
 vouloit qu'on ostast vne petite Isle, qu'il disoit estre
 vne maille en l'œil du port de Pirce: & Phocion
 parlant de la victoire qu'auoit gaignee le capitaine
 Leosthenes, que la carriere de ceste guerre estoit
 belle, mais qu'il en craignoit le retour & le redou-
 blement, c'est à dire, la longueur. En somme le par-
 ler

A ler tenāt vn peu du graue, & du hault & du grand, est mieulx feant à vn gouuerneur de ville: dequoy lon peut prendre pour exemple & patron les oraisons que Demosthenes a escriptes contre le Roy Philippus, & entre les harengues & concions de Thucydides celle del'Ephore Sthenelaiidas, & celle du roy Archidamus en la ville de Platées, & celle de Pericles apres la grande pestilence d'Athenes. Mais quand aux longs preschements & grandes trainees de harégues que Theopompus, Ephorus, & Anaximenes font dire aux capitaines, quand ils ont ia fait prédre les armes à leurs gés, & les ont régez en bataille, on en peut dire ce que dit vn poëte,
Si follement on ne va langager

Quand on est prest de l'ennemy charger.

Il est bien vray que l'homme de gouuernement troussera bien aucunes fois quelque mot de rencontre, & quelque traitt de risée, mesmement si c'est pour chastier & prouoquer quelqu'un modestement, & avec vtilité, non pas le taxer ne picquer outrageusement en son honneur avec gaudissérie: mais cela est principalement trouué bon & loué, quand il se fait en repliquant & rendant le change à quelqu'un, car de cōmancer & le faire de propos deliberé & premedité, c'est à faire à vn plaisant, qui cherche à faire rire la compagnie, outre ce que lon en encourt opinion de malignité, cōme il y en auoit és brocards de Ciceron & de Caton le vieil, & d'un Euxitheus qui estoit familier d'Aristote, car ceux là ordinairement commencent les premiers à se moquer: mais quand on ne fait que repliquer,

la soudaineté de l'occasion donne à celuy qui fait **D**
la rencontre, pardon & bõne grace, tout ensemble,
comme fait Demosthenes à vn qui estoit souspe-
çonné d'estre larron, qui se mocquoit de ce que
Demosthenes veilloit toute la nuict pour estudier
„ & escrire: Je sçay bien, dit-il, que ie te fasche fort de
„ ce que ie tiens la lampe allumee toute la nuict: &
aussi quand il respõdit à Demades qui crioit à plei-
„ ne teste, Demosthenes me veut corriger: c'est bien
„ ce que lon dit en cõmun proverbe, La truye veut
„ enseigner Minerue: Ceste Minerue-là, luy replica
„ il, fut l'autre iour surprise en adultere. Aussi n'eut **E**
pas mauuaise grace ce que respondit Xenetus à ses
citoyens qui se mocquoient de luy, de ce qu'estant
„ leur capitaine il s'en estoit enfuy: Avec vous mes
„ beaux amis, respondit il. Mais il se fault bien don-
ner garde de passer vne certaine mediocrité en
matiere de ces rencontres & mots de risée, & d'of-
fenser importunémēt les escoutās, ou de se raualler
& se monstrier lasche soy-mesme, en le disant, com-
me fait vn Democrates, lequel vn iour montant
en la tribune aux harēgues, dit au peuple assemblé,
„ qu'il ressembloit à leur ville, par ce qu'il auoit peu **F**
„ de force, & beaucoup de vent: & vne autrefois du
tēps de la deffaitte & bataille perdue à Cheronee,
„ se presentant deuant l'assemblee du peuple: Je suis
„ bien desplaisant, dit-il, que la chose publique soit si
„ calamiteuse, que vous preniez la patience d'ouir &
„ receuoir mon conseil: car l'vn est acte d'hõme bas
& vil, & l'autre de fol & insensé: & à l'homme
d'estat, ny l'vn ny l'autre n'est bien cõuenable. On
a aussi

Aa aussi en admiration la brefueté du langage de Phocion : tellement que Polyuctus faisant iugement de luy, disoit, que Demosthenes estoit bien vn tresgrand orateur, mais que Phocion sçauoit mieulx dire, pource que son langage en peu de paroles contenoit beaucoup de substance : & Demosthenes qui ne faisoit compte de tous les autres orateurs de son temps, quãd Phocion se leuoit pour
 » parler apres luy:voila,disoit il,le couperet de mes
 » paroles qui se leue. Mets donc peine le plus qu'il te
 » sera possible, quand tu auras à parler deuât le peu-
Bple de bien propenser ce que tu auras à dire, pendant que tu le pourras faire seurement, & non pas vser de paroles vaines & vuides de sens, sçachant que Pericles mesme, ce grand gouuerneur prioit aux Dieux auant que de monter en chaire,qu'il ne luy eschappast de la bouche aucune parole,qui ne seruist à la matiere dont il deuoit traiter : toutefois encore se faut il exercer à sçauoir respondre & repliquer promptement:car les occasions passent en vn momét,& apportent beaucoup de cas soudains en matiere de gouuernement : au moien dequoy
CDemosthenes,pour n'y estre pas bien fait,estoit reputé inferieur à plusieurs autres de son téps, pource que quãd l'occasion se presentoit, bien souuent il se tiroit en arriere, & se cachoit s'il n'auoit bien premedité ce qu'il auoit à dire. Et Theophrastus escrit qu'Alcibiades voulant non seulement dire ce qu'il falloit,mais aussi ainsi qu'il le falloit, restiuoit bien souuent en parlât, & quelquefois demouroit tout court, pendant qu'il cherchoit en luy mesme,

& composoit les termes propres esquels il deuoit dire: mais celuy qui prent occasion de se leuer pour parler des occurrences mesmes, & des temps qui se presentent soudainement, il estonne merueilleusement & mène comme il veut vne cōmune: comme Leon Byzantin vint vn iour à Athenes, enuoyé par ceux de Constantinople pour faire des remonstrances de pacification aux Atheniens, lesquels estoient tombez en grādes dissentions les vns contre les autres: or estoit il fort petit, de maniere que quand le peuple le veit sur la chaire aux harēgues, chascun s'en prit à rire: dequoy luy s'apparceuant,

» Et que feriez vous doncques, dit il, si vous voiez
 » ma femme, qui à peine me vient iusques au ge-
 » nouil? alors la risée fut encore bien plus grande de
 » toute l'assemblée: Et neantmoins tous petits que
 » nous sommes, dit il, quand nous entrōs en querelle
 » l'un cōtre l'autre, la ville de Byzance n'est pas assez
 » grande pour nous contenir tous deux. Et Pytheas
 l'orateur, lors qu'il contredisoit aux honneurs que
 lon decernoit à Alexandre, comme quelqu'un luy
 » dist, Comment, ozes tu bien parler de si grandes
 » choses, toy qui es si ieune? Et quoy, dit il, Alexandre
 » que vous faictes vn Dieu par voz decrets, est enco-
 » re plus ieune que moy: mais encore outre ceste pa-
 role bien exercitee, il faut apporter vne forte voix,
 vn bon & puissant estomach, & vne longue halei-
 ne à ce combat de gouuernement qui n'est pas le-
 ger, ains où il fault que tout aille, de peur que si
 d'aduenture sa voix se pert, ou se lasse, il ne viene
 souuent à estre gaigné & supplanté par quelque

A Larron criart, aiant la voix d'acier.

Et Caton le second, quand il sentoit que le Senat ou le peuple estoit preueni par brigues & menees, tellement qu'il n'esperoit pas pouuoir persuader ce qu'il pretendoit, il se leuoit & parloit tout vn iour, à fin d'empescher, que pour le moins il ne se feist rien de tout ce iour là, & faisoit ainsi couler le temps: mais à tant, quāt à la parole du gouuerneur, de quelle efficace elle est, & cōment il la fault preparer, nous en auons desormais traitté suffisamment, pour ceux qui y sçaurōt bien d'eulx mesmes
 B adiouster ce qui necessairement y est ensuyuant. Au surplus il y a deux aduenues & deux chemins pour entrer en credit de gouuernement, l'vn court & honorable pour bien tost acquerir gloire, mais il n'est pas sans danger: l'autre plus long & plus obscur, mais où il y a aussi plus de seureté: car les vns partans & faisans voile d'vne roche assise en pleine mer, en maniere de dire, commencent à quelque entreprise grande & illustre, là où il est besoing de hardiesse, & se iettent de prim-sault au beau milieu des affaires de gouuernement, estimās que le poëte
 C Pindare dit verité en ces vers,

A tout œuure & acte naissant,
 Ceux qui le vont encommanceant
 Doient donner vn front illustre,
 Qui de loing face voir son lustre:

car certainement vn peuple communémēt estant ia las & saoul des gouuerneurs qu'il a de long temps accoustumez, reçoit plus volōtiers ceulx qui commencent: ne plus ne moins que les specta-

teurs regardent plus affectueusement vn nouveau champion qui vient tout frais sur les rens, & les faueurs, credits, & puiffances, qui ont tout soudain vn illustre accroiffemēt, estonnent & esblouissent l'enuie : ne plus ne moins que le feu, disoit Ariston, ne fait point de fumee, quand il s'enflamme soudainement, aussi la gloire n'engēdre point d'enuie quand elle s'acquiert promptement: mais ceux qui croissent à loisir & petit à petit sont ceux à qui lon s'attache, l'vn d'vn costé, l'autre de l'autre : & pour ceste cause plusieurs auant que florir en matiere de credit au gouuernement, sont demourez tous amortis & fenez à l'entour de la tribune aux haren-gues: mais là où il y a, comme dit l'Epigramme du coureur Ladas,

Quand on oyoit le son de la barriere,

Il estoit ia au bout de la carriere,

Aiant le chef de laurier couronné,

quelqu'vn qui fait vne ambassade illustre, ou gagne vn triomphe, ou conduit vne armee glorieusement, ny les enuieux, ny les malveuillans encontre ceulx là, n'ont pas pareille puiffance. Ainsi vint Aratus en grand credit dès son commencement, pour auoir deffaict & ruiné le tyran Nicocles : ainsi feit Alcibiades quand il pratiqua l'alliance des Mantiniens avec les Atheniens contre les Lacedemoniens. Et Pompeius voulut entrer en triomphe dedans la ville de Rome, auant que d'estre receu au Senat : & comme Sylla l'en voulust empescher, il ne faignit pas de luy dire, Il y a plus d'hōmes qui adorent le Soleil leuant, que le Soleil couchant:

A ce que Sylla aiant ouy, ceda, sans rien repliquer alencôtre. Et ce que le peuple Romain eleut Cornelius Scipion tout soudain Consul contre la disposition des loix, lors qu'il ne demãdoit que l'office d'Ædile, ne fut pas pour vn vulgaire cōmanemēt & entree telle quelle aux affaires, ains pour l'admiration qu'il eut de sa grande vertu en ce qu'estant encore en son adolescence, il auoit combattu teste à teste en champ clos en Espagne, & auoit vaincu son ennemy, & pour autres plusieurs grandes prouësses qu'il auoit faittes estant coulombel de mille hommes de pied alencontre des Carthaginois: pour lesquels beaux faits d'armes le vieil Caton retournant du camp exclāma,

Luy seul se peut mettre au nombre des sages,

Les autres tous sont comme vmbres volages.

Mais maintenant que les citez de la Grece sont reduittes à tels termes, qu'elles n'ont plus d'armees à conduire, ny d'alliance à pratiquer, ny de tyrannies à ruiner, quelle noble & illustre entree voulez vous que face vn ieune homme en l'entremise de gouuernement? Il reste encore les causes publiques
c à plaider, les ambassades deuers l'Empereur à negocier, où il est ordinairement besoing d'un personnage ardent à l'action, qui ait cœur & entendement pour en venir à chef: & si y a plusieurs honestes coustumes anciennes que lon a par negligence laissé abastardir, que lon pourroit remettre sus & renouueller, & plusieurs abus qui par mauuaise accoustumance se sont coulez dedans les villes, & y ont pris pied au grand deshōneur & grād dom-

mage de la chose publique, qui se peuuent redres-
 ser & rhabiller. Il est plusieurs fois aduenü, qu'un
 grand procès iugé droittement, foy & diligence
 cogneue en la cause d'un pauvre homme defendu
 librement & vertueusement contre l'oppression
 d'un puissant aduersaire, vne parole roide dite
 hardiment à vn grand Seigneur mauuais pour le
 droit & la iustice, ont donné entrees honorables
 au maniemēt des affaires publiques: plusieurs mes-
 mes se sont mis en auāt par les inimitiez qu'ils ont
 prises alencontre de quelques personages, dont
 l'autorité estoit odieuse, suspecte, & formidable
 au peuple: car tout premierement la puissancē &
 l'autorité de celuy qui est ruiné accroist à celuy
 qui l'a deboutté avec meilleur reputation: non pas
 que ie veuille dire, qu'il soit bon de s'attacher par
 enuie à vn homme de bien & d'honneur, qui par
 sa vertu tient le premier lieu de credit en son país,
 comme Simmias fait à Pericles, Alcmeon à The-
 mistocles, Clodius à Pompeius, & Meneclides
 l'orateur à Epaminondas: car cela n'est ny bon, ny
 honorable, & encore moins profitable: pource
 que quand le peuple par vne soudaine cholere a
 offensé vn homme de bien, & que puis soudai-
 nement il s'en repent, il n'estime point auoir de
 plus aisee ny plus iuste defense & excuse enuers
 luy, que de ruiner celuy qui a commencé le pre-
 mier à les induire à ce faire: mais bien de se prendre
 à vn meschant homme, qui par vne audace teme-
 raire & par ces ruzes & cautelles aura mis soubs
 luy toute vne cité, comme estoient anciennement

A vn Cleon & vn Clitophon à Athenes, pour le ruiner & renuerſer: cela eſt vn beau preambule, ne plus ne moins que d'une comédie, pour entrer au gouuernement d'une choſe publique. Je n'ignore pas auſſi que quelques vns pour auoir vn peu rongné les ailes à vn Senat trop imperieux & ſ'attribuant trop de ſouueraineté, cōme fait vn Ephialtes à Athenes, & vn Phormion en la ville des Eliens, en ont acquis honneur & credit en leur païs, mais cela eſt vn dangereux commencement pour ceux qui veulent venir au manient des affaires: & ſemble que Solon commancea par vne meilleure entree, eſtant la ville d'Athenes diuiſee en trois parts, la premiere, des habitans de la montaigne: la ſeconde, de ceux de la plaine: la tierce, de ceux de la marine: car ne ſe meſlant avec pas vne des trois, ains ſe maintenant commun à toutes, & diſant & faiſant toutes choſes pour les reünir & reconcilier enſemble, il fut eleu d'un commun conſentement de toutes reformateur, pour faire loix nouuelles de pacification entre elles, & par ce moien rafferma l'eſtat d'Athenes. Voyla donc cō-

cment on peut entrer au manient d'affaires par honorables & glorieux commencemens. Et quant à l'autre entree qui eſt plus ſeure & plus lente auſſi, il y a eu pluſieurs hommes notables, qui ancienement l'ont mieux aimée, Ariſtides, Phocion, Pammenes le Thebain, Lucullus à Rome, Caton, Ageſilaus à Lacedemone: car tout ainſi que le lierre ſ'entortille alētour des arbres plus puiſſans que luy, & ſe leue à mont quand & eux: auſſi chaſ-

cun de ces personnages là estant encore ieune & incogneu, se couplât avecvn autre anciẽ, qui desia estoit en credit, en se leuât petit à petit sous l'ombre de l'autorité de l'autre, & croissant avec luy, a fondé & enraciné son entremise au maniemẽt des affaires. Ainsi Clisthenes poulsa en auant Aristides, & Chabrias Phocion, & Sylla Lucullus, Valerius Caton, Pammenes Epaminondas, & Lyfander Agesilaus : mais ce dernier par vne ambition hors de propos & vne importune ialousie feit tort à sa reputation, en reiettant soudain arriere de soy celuy qui le guidoit en ses actions, mais tous les autres sagement & honestement ont tousiours reueré, recogneu & aidé de leur pouuoir à amplifier iusques à la fin les autheurs de leur auancement, ne plus ne moins que les corps opposez au Soleil en rebattant & renuoyant la lumiere qui les enlumine l'augmentent & l'esclarcissent encore d'auantage : de maniere que les mesdisants qui porteroient enuie à la gloire de Scipion, disoient qu'il n'estoit que le ioueur des beaux faiçts d'armes qu'il executoit, mais que l'autheur en estoit Lelius son familier : toutefois Lelius ne s'en eleua ny altera iamais pour tous ces langages là, ains continua tousiours à seconder & promouuoir la gloire & la vertu de Scipion. Et Afranius amy de Pompeius, encore qu'il fust de bien petit lieu, estoit neantmoins prest à estre eleu Consul, mais sentant que Pompeius fauorisoit à d'autres, il se deporta de sa poursuite, disant qu'il ne luy seroit pas tant honorable d'estre promu au consulat, comme il luy se-
roit

Aroit moleste de l'auoir obtenu contre la volontré & sans le port & faueur de Pompeius : ainsi en differant & attendant vn an seulement, il obtint ce qu'il demandoit, & si se cōserua la bonne grace de son amy : par ce moien il aduient à ceux qui sont ainsi menez comme par le poing au chemin de la gloire par d'autres, qu'en gratifiant à vn, ils gratifient ensemble à plusieurs, & que s'il arriue mal ils en sont moins hais. C'est pourquoy Philippus admonestoit fort son fils Alexandre qu'il aduisast bien à faire force seruiteurs & amis pendant qu'il

En auoit le loisir, estant vn autre en regne, & qu'il parlast gracieusemēt à vn chascun, & carestast tout le monde : mais il faut eslire pour son guide & conducteur, non simplement celuy qui est le plus puissant, & qui a plus de credit, ains celuy qui est tel par sa vertu. Car ainsi comme tout arbre ne reçoit pas, ou ne peut pas porter la vigne entortillee alentour de son tronc, & y en a quelques vns qui la suffoquent, & empeschent de croistre & de profiter : aussi és gouuernements des villes ceux qui ne sont pas vrayement gens de bien,

Camateurs de la vertu seulement, ains ambitieux & conuoiteux de l'honneur & des grandeurs, ils ne laissent point aux ieunes gens de moiens & occasions de faire de belles choses, ains par enuie & ialousie les reculent & tiennent loing le plus qu'ils peuuent, en les faisant languir, comme ceux qui leur ostent la gloire, laquelle ils estiment estre leur nourriture, ainsi que fait Marius en Afrique, & depuis en la Gaule, à l'endroit de Sylla duquel

il auoit tiré beaucoup de beaux & bons seruices, & puis soudainement il ne s'en voulut plus seruir, pource que à la verité il estoit marry de le veoir venir en auant, & acquerir reputation, prenant pour sa couleur le cachet qu'il auoit fait grauer en vn anneau, à fin d'auoir quelque occasion de le reculer: car Sylla aiant la charge des finances sous Marius, qui estoit capitaine general, fut enuoyé par luy deuers le roy Bocchus, dont il amena Iugurtha prisonnier: & comme ieune homme qu'il estoit, ne faisant que commencer à gouter la douceur de la gloire, ne s'estoit pas porté trop modestement en cest affaire, par ce qu'il portoit en son doigt vn anneau, sur lequel il auoit faict engrauer ceste histoire, comme Bocchus luy liuroit entre ses mains Iugurtha prisonnier: c'est de quoy Marius se plaignoit, & qu'il prenoit pour occasion coulree de le reculer: au moien de quoy Sylla se retirant deuers Catulus & Metellus gens de bien, aduersaires de Marius, en peu de temps chassa & ruina Marius par vne guerre ciuile, qui fut bien près de renuerfer entierement tout l'Empire Romain. Sylla ne fit pas ainsi à l'endroit de Pompeius, car il l'auancea tousiours dès sa premiere ieunesse, se leuant de sa chaire au deuant de luy, & se descouurant la teste quand il arriuoit: & semblablement departant aux autres ieunes gentils-hommes Romains les moiens de faire exploits de capitaines, & mesmes y poulfant aucuns qui n'y vouloient pas aller, de maniere qu'il emplit en ce faisant toutes ses armées de zele & d'emulation,

A tion; à qui feroit le mieux, & vint par ce moien au dessus de tous, en voulât estre non seul, mais le premier & le plus grand entre plusieurs grâds. Ce sont doncques tels hōmes auxquels il se faut ioindre, & par maniere de dire, attacher & incorporer, non pas cōme le petit roytelet des fables d'Æsope, qui s'estât faiēt porter sur les espaules de l'aigle, quād il fut aupres du beau Soleil s'en vola soudainemēt, & y arriua deuant l'aigle, aussi leur derobier leur honneur & leur soubstraire leur gloire: ains au cōtraire la prenāt & receuant d'eux avec leur consentemēt

B & bōne grace, en leur donnant à cognoistre qu'ils ne sçauoiēt pas bien cōmander, s'ils n'auoient premieremēt appris d'eux à bien obeir, ainsi cōme dit Platon. Apres cela suit l'election que lon doit faire d'amis: en quoy il ne faut suiure ny la façon de Themistocles, ny celle de Cleon: car Cleon quād il voulut s'entremettre du maniemēt des affaires, assemblāt tous ses amis ensemble, il leur declara qu'il renonceoit à l'amitié d'eux tous, par ce qu'il disoit que l'amitié estoit bien souuēt cause d'amollir les hōmes, & de les deuoir de leur droitte intétion en

C affaires de gouuernemēt: mais il eust biē mieux fait de chasser hors de son ame toute auarice & toute opiniastrété, & de nettoyer son cœur de toute enuie & de toute malignité: car les gouuernemēs des villes n'ont pas besoin d'hōmes qui n'aient ne familiers ny amis, ains seulemēt qui soiēt sages & gēs de bien: mais luy aiant chassé ses amis, auoit alentour de luy des flatteurs qui le lechoiēt ordinairement, ainsi que luy reprochoient les poētes Comi-

ques, & se mōstrant aspre & rude aux gēs de bien, ^D
il se laissoit puis apres aller à flatter & caresser vne
commune, en faisant & disant toutes choses à leur
gré, & prenant argent à toutes mains, en se liguant
avec tous les plus meschants & plus perdus hōmes
de toute la ville, pour courir sus & faire la guerre
aux gens de bien & d'honneur. Au contraire The-
mistocles respondit à vn qui luy disoit, Tu feras le
deuoir de bon magistrat, si tu te monstres egal à
tous : I'à-dieu ne plaise que ie seie iamais en siege
presidial, où mes amis n'aient point plus d'avan-
tage, que ceux qui ne seront point mes amis : ne ^E
faisant pas bien, non plus que l'autre, de promettre
ainsi l'autorité de son gouuernement à ceux, avec
lesquels il auoit amitié, & de soubmettre les affai-
res publiques à ses priuees & particulieres affe-
ctions: nonobstant qu'il eust bien mieux respondu
à Simonides, qui le requeroit de quelque chose qui
n'estoit pas iuste, Ny le Musicien, dit-il, ne feroit
pas bon qui chanteroit contre mesure, ny le magi-
strat iuste qui fauoriserait vne partie cōtre les loix.
Car ce seroit veritablement grande pitié & chose
bien indigne, qu'en vne nauire le maistre & pa- ^F
tron de la nauire donnast ordre à recouurer vn
bon pilote & timonnier, & que ce timonnier choi-
sist de bons matelots, & compagnons mariniers,
Scachans tresbien le timon gouuerner,
Dresser la voile, ou soudain amener,
Lors que le vent impetueux se leue:
& qu'en vn atelier le maistre sceust bien eslire des
ouuriers & maneuvres soubz luy, qui ne luy gastēt
point

A point son ouurage, ains luy aident, & luy seruent à le paracheuer, & que l'homme de gouuernement, qui est, comme dit Pindare,

Le maistre ouurier de la iustice,

Le directeur de la police,

ne sceust pas dès le commencement choisir des amis de mesme zele & mesme affection que luy, qui le secondét en ses entreprises, & qui soient cōme luy espris du desir de bien faire, ains se laislast plier iniustement, ores à faire vn tort à l'appetit de l'vn, ores à en faire vn autre au gré d'vn autre : car
 B celuy-là ressembleroit proprement à vn charpentier ou maçon, qui par erreur ou ignorance vseroit d'esquierre, ou de plomb & de reigle, qui luy rendroient son ouurage tortu. Car certainement les amis sont les vtils viuans & sentans des hommes de gouuernement, & ne faut pas glisser avec eux, quand ils sortent de la droite ligne, ains auoir l'œil soigneusement à ce, que sans son sceu mesme ils ne fouruoient point : car ce fut cela qui deshōra & feit calomnier Solon enuers ses citōiens, par ce qu'ayant intention d'abolir les debtes, & introduire ce que lon appelloit à Athenes Sisaethia, cōme qui diroit allegemēt de charge, qui estoit vn nom addoucy, pour signifier vne abolition generale de toutes sortes de debtes, il communiqua sa conception à quelques siens amis, qui luy feirent vn lasche & meschant tour: car ils se hasterēt d'emprunter çà & là le plus d'argent qu'ils peurent, & peu de temps apres l'edict de l'abolition generale des debtes estāt venu en lumiere, il se trouua qu'ils

auoient achepté plusieurs belles maisons, & grande quantité de terres, de l'argent qu'ils auoient emprunté: & fut Solon mescreur & chargé d'auoir fait ce tort là, qui luy-mesme l'auoit receu. Et Agefilaus s'est monsté es affaires & poursuites de ses amis plus foible & plus failly de cœur, qu'en nulle autre chose, comme le cheual Pegasus en Euripide,

Qui se tapist à bas s'humiliant,

Plus qu'on ne veut son eschine pliant:

& portant ses familiers plus affectueusement que la raison ne vouloit, quand ils estoient appelez en iustice pour aucunes forfaitures, il sembloit que luy mesme s'estoit entendu avec eux à les faire: car il sauua Phœbidas, qui estoit accusé d'auoir surpris d'emblee le chasteau de Thebes, appellé la Cadmee, sans commandement du Senat, alleguant pour la defense d'iceluy, que telles entreprises se deuoient executer de son motif propre, sans en attendre autre mandement: d'autre costé, il fit tant par son port & faueur, que Sphodrias, qui estoit attainct d'un meschât & malheureux acte, d'estre entré à main armée dedans le païs d'Attique, lors que les Atheniens estoient en paix & amitié avec les Lacedemoniens, s'echappa, & fut absouls en iugemēt, & ce estat amolly par les prieres amoureuses d'un sien fils. Lon trouue aussi vne siēne missiue qu'il escriuit à quelque Seigneur en ces termes,

” Si Nicias n'a point forfait, deliure le pour la iustice: si a forfait deliure le pour l'amour de moy: mais comment que ce soit, deliure le.

A Au cōtraire, Phocion ne voulut pas assister seulement en iugement à son gendre Charillus, qui estoit accusé d'auoir pris de l'argent d'Harpalus, „ ains s'en alla, en luy disant, Ie t'ay fait mon allié à „ toutes choses iustes, & raisonnables. Et Timoleon le Corinthien apres auoir fait tout ce qui luy fut possible par prieres enuers son frere, pour le cuider diuertir de vouloir estre tyran, voiant qu'il n'en pouuoit venir à bout, il se tourna contre luy avec ceux qui le tuerent: car il ne faut pas seulement estre „ amy iusques aux autels, c'est à dire, iusques à ne se **B** vouloir point pariurer pour eux, ainsi que respondit vn iour Pericles: mais aussi iusques à ne vouloir rien faire pour eux contre les loix, contre le droit, & contre l'vtilité publique: car quand on met cela à nonchaloir, il est cause d'amener vne grande perte & ruine, comme fut ce que Phœbidas & Sphodrias ne furent pas punis ainsi qu'ils auoient mérité, car ils furent cause que les Lacedemoniens tomberent en la guerre Leuctrique. Il est vray que le deuoir de bon & vray administrateur du public, ne nous contrainct pas de vouloir seuerement punir **C** iusques aux petites & legeres fautes de noz amis, ains nous permet apres auoir mis en seureté le public, au surplus de donner secours à noz amis, leur assister, suruenir, & secourir en leurs affaires, & y a des faueurs que lon peut faire sans enuie, cōme aider à vn amy à paruenir à quelque office, ou bien luy faire tomber entre mains quelque honorable commission, ou quelque aisée legation, cōme d'aller saluer de la part de la ville quelque Prince,

ou de porter parole d'amitié, & de bonne intelligence à quelque autre ville, ou bien s'il est question de quelque affaire difficile, & de grande importance, alors prenant la principale charge sur soy, on peut bien choisir pour adioint vn sien amy, ainsi que fait Diomedes en Homere,

Si vous voulez que moy-mesme i'elise
Vn compagnon qui soit mieux à ma guise,
Comme pourroisie, Vlysses, t'oublier
Esprit diuin, ny d'autre m'allier?

Vlysses aussi ne fault pas de luy rendre pareille louange,

Les beaux coursiers desquels tu me demandes
Sages vieillard, arriuez en ces bandes
Nouvellement de la grand Thrace sont,
Et leur seigneur au combat perdu ont,
Diomedes le vaillant chef de guerre,
En combattant l'a rué mort par terre,
Et avec luy douze de ses amis,

Tous grands guerriers, à mesme fin a mis.
ceste modestie dont on vse enuers ses amis n'honore pas moins ceux qui louent, que ceux qui sont louez: là où au cōtraire, l'arrogance qui n'aime rien que soy-mesme, cōme dit Platon, demeure avec solitude, c'est à dire, elle est abandonnee de tout le monde. D'auantage en ces honestes faueurs & plaisirs que lon peut faire ciuilemēt à ses amis, il y faut associer ses autres amis, & admonester ceux qui reçoient telles graces, qu'ils les en louent & remercient, & leur en sçachent gré, comme en aians esté cause en partie, & leur aians cōseillé. Et si d'aduen-

A ture ils nous font quelque requeste inciuile & de-
raisonnable, ils les en faut tresbien escōduire, mais
non pas aigrement, ains tout doucement, en leur
remonstrāt pour les consoler, que telles requestes
ne sont pas dignes de leur bonne reputation, ny de
leur vertu, cōme fait Epaminōdas mieux que tous
les hōmes du monde, quād il refusa à Pelopidas de
mettre hors de prison vn tauernier, & peu d'heures
apres, à la requeste d'vne sienne amie il le laissa al-
ler, en luy disant, Seigneur Pelopidas ce sont de tel-
les graces & faueurs qu'il faut conceder à des con-
B cubines, & non pas à de grāds capitaines: mais Ca-
ton au contraire, respondit brusquement & fiere-
ment à Catulus, qui estoit l'vn de ses plus grāds &
plus familiers amis. Ce Catulus estant Censeur re-
queroit à Caton, qui pour lors n'estoit que Que-
steur, qui est cōme general des finances, que pour
l'amour de luy il voulust laisser eschapper vn clerc
» de finances, auquel il faisoit faire le procès. C'est
» grand' honte, dit-il, à toy qui es Censeur, c'est à di-
» re, correcteur & reformateur des meurs, & qui
» nous deussēs reformer nous autres qui sommes
C plus ieunes, d'estre chassé hors d'icy par noz sergēs:
car il pouuoit bien en luy refusant de faict sa re-
queste, oster ceste aspreté & ceste aigreur de paro-
les, luy donnant encore à entendre que la rudesse,
dont il luy vsoit de faict, luy desplaisoit, mais qu'il
y estoit contrainct par le droict & la loy. Il y a d'a-
uantage, que lon peut bien dignement quelque-
fois aider à ses amis, qui sont pauures, à faire leurs
besongnes, comme fait Themistocles apres la ba-

taille de Marathon, voiant vn corps mort, qui ^D
 auoit des chaines & carquants à l'entour du col, il
 passa outre quant à luy, mais se retournant deuers
 „ vn sien familier qui le suiuiot, luy dit: Amasse cela
 „ toy, car tu n'es pas vn Themistocles. Les affaires
 mesmes presentent bien souuent au sage gouuer-
 neur des occasions telles, de pouuoir enrichir ses
 amis: car tous ne peuuent pas estre riches & opu-
 lents, comme toy Menemachus. Donne donc à
 l'vn vne cause bonne & iuste à defendre, où il y ait
 bien à gagner: à l'autre recōmande luy l'affaire de
 quelque personnage riche, qui ait besoing d'hom- ^E
 me qui luy sçache dresser & procurer son faict: à
 vn autre, sois luy fauorable à auoir quelque mar-
 ché de quelque œuvre publique, ou à luy faire
 estrouffer quelque ferme à bon pris, où il y ait à
 profiter. Epaminondas feit bien plus, car il enuoya
 vn sien amy pauvre deuers vn autre riche bour-
 geois de Thebes, luy demander six cents escus en
 don, & luy dire que Epaminondas luy comman-
 doit de les luy bailler. Le bourgeois esbahy de ceste
 demāde vint deuers Epaminondas, pour sçauoir à
 quelle occasion il luy mandoit de bailler ces six ^F
 „ cents escus: C'est pourautant, dit il, que cestuy cy
 „ estant hōme de bien est pauvre, & toy qui as beau-
 „ coup derobbé à la chose publique es riche. Et Age-
 filaus, ainsi cōme escrit Xenophon, se glorifioit de
 ce qu'il enrichissoit ses amis, & luy ne faisoit com-
 pte aucun d'argent. Mais pouratāt que, ce dit Si-
 monides, ainsi cōme toutes alouettes ont la cresse
 sur la teste, aussi tout gouuernement de chose pu-
 blique

A blique apporte des inimitiez, enuies & ialoufies, c'est vn poinct duquel l'hōme d'estat & d'affaires, doit estre bien informé, & bien instruit. Pour cōmancer doncques à en traiter, Il y a plusieurs qui louent grandement Themistocles & Aristides, lesquels comme ils sortoient du païs d'Attique pour aller ou en ambassade, ou en guerre ensemble, aiās charge ils deposoiēt toutes leurs inimitiez & malueuillances sur les confins, & puis quand ils reuenoient, ils les reprenoient arriere. Et y en a aussi à qui la façon d'un Cretin Magnesien agree merueilleusement : Il auoit pour concurrent & aduersaire au gouuernemēt vn gentilhomme de sa mesme ville nommé Hermias, qui n'estoit pas fort riche, mais conuoiteux d'honneur, & de cœur magnanime, du tēps de la guerre de Mithridates pour la conqueste de l'Asie: ce Cretin voiant sa ville en danger, s'adressa à Hermias, & luy fait offre qu'il prist la charge de capitaine general de leur ville, & luy cependant s'en iroit dehors & se retireroit ailleurs, ou bien fil aimoit mieux que luy prist la charge des affaires de la guerre, qu'il se retirast cependant hors du païs, de peur que demourans tous deux ensemble, & s'entr'empeschās l'un l'autre cōme ils auoient accoustumé, ils ne fussent cause de perdre & destruire leur ville. Ceste semōce fut agreable à Hermias, lequel confessant que Cretin estoit plus expert au faict de la guerre que luy, sortit de la ville avec sa femme & ses enfans, & Cretin le conuoya en luy dōnant de l'argēt du sien, qui est plus vtile à ceux qui sont hors de leurs maisons

qu'à ceux qui sont assiegez dedans, & aiant tres-
 bien gouverné & defendu sa ville, qui approcha
 bien pres d'estre de tout poinct destruite, la pre-
 serua contre l'esperance de tout le monde. Car si
 c'est vne parole genereuse, & de cœur magnani-
 me, de dire à haute voix,

Les miens enfans j'aime de bon courage,

Mais j'aime encor mon país d'auantage,
 comment & pourquoy ne sera il plus aisé à cha-
 cun d'eux de dire, Je hay celuy là, & desire luy fai-
 re desplaisir, mais j'aime plus mon país? Car ne se
 vouloir reconcilier à vn ennemy pour les causes
 qui nous doiuent mesme faire abandonner nostre
 amy, seroit à faire à vn cœur trop barbare & trop
 sauuage: toutefois à mon aduis Phocion & Caton
 faisoient mieux, qui ne prenoient inimitié quelcon-
 que à l'encontre de leurs citoiens, pour different
 aucun qu'ils eussent avec eux à raison du gouver-
 nemēt, ains se rendoient seulement implacables, &
 irreconciliables, où il estoit question d'abandonner
 ou d'offenser le public: au demourant en leurs pri-
 ues negoces se portoient humainemēt, sans aucu-
 ne haine ny rancune enuers ceux contre qui ils
 auoient contesté en public. Car il ne faut estimer
 ny reputer aucun des citoiens ennemy, si d'aduen-
 ture il n'estoit tel comme vn Aristion, vn Nabis,
 ou vn Catilina, qui n'estoient pas tant citoiens, que
 bosses & pestes d'une cité: mais ceux qui seroient
 autrement vn peu discordans, il les faut ramener à
 vne bonne armonie & accord, en les roidissant
 ou relaschant ainsi que feroit vn bon musicien,

non

A non pas en s'attachât en courroux avec outrageu-
ses iniures à ceux qui faillent, ains plus gracieuse-
ment, ainsi que fait Homere,

O doux amy, certes i'eusse cuidé,

Que ton sens eust tous autres excédé.

Et en vn autre passage,

Si tu voulois y penser sagement,

Tu ferois bien vn meilleur iugement:

& quand ils disent ou qu'ils font quelque chose de
bon, ne se montrât point marry de les honorer, &
n'espargnant point les paroles honorables à leur
louange & auantage: car en ce faisant on gaigne
cela, que le blasme qu'on leur donnera, quand ils
faudrôt, en sera plus tost creu: & d'autant que nous
exalterons leur vertu, d'autant deprimerons nous
leur vice, quand ils viendront à faillir, en faisant
comparaison de l'un à l'autre, & montrant com-
bien l'un est plus digne, & mieulx seât, que l'autre.
Quant à moy, ie trouuerois fort honeste, que l'hô-
me de gouuernemēt portast tesmoignage en cho-
ses iustes à ses aduersaires, voire qu'il les honorast
en iugement, s'il aduenoit qu'ils fussent trauaillez
en iustice par des calomniateurs, & mesme qu'il
mescreust & se deffiaist des imputations qu'on leur
mettroit sus, quand il verroit qu'elles seroient mal-
accordantes avec l'intention qu'ils scauroient que
ceux-là auroient: comme Neron ce cruel tyran, vn
peu deuât qu'il feist mourir Thraseas qu'il haïssoit
& craignoit plus que nul autre, comme quelque vn
le chargeast deuât luy d'auoir donné vne sentence
iniuste: le voudrois estre asseuré, dit-il, que Thra-

„ seas m'aimast autāt , comme ie suis asseuré qu'il est D
 „ bon iuge : & ne seroit pas mauuais pour estonner
 d'autres , qui seroient de nature meschants, quand
 ils auroiēt fait de plus lourdes faultes, de faire quel-
 quefois mention d'un sien aduersaire , qui seroit
 „ plus modeste, en disant, vn tel n'auroit en piece dit
 „ ne fait telle chose. Aussi faut il ramener en memoire
 à ceulx qui faillent, leurs ancestres qui ont esté
 gens de bien, ainsi que fait Homere,

Certainement Tydeus a en toy

Semé vn fils peu ressemblant à soy.

Et Appius Claudius, estant concurrent de Scipion E
 l'Africain en la brigue d'un magistrat , luy dit en le
 „ rencontrant par la rue , O Paule Æmile, combien
 „ tu soupirerois d'ennuy & de courroux , si tu estois
 „ aduerty , qu'un Philonicus banquier accompagne
 „ ton fils par la ville , allant en l'assemblée des ele-
 „ ctions, pour demander l'office de Censeur! Ces
 manieres de reprehensions là admonestent celuy
 qui fault , & honorent celuy qui l'admoneste : &
 Nestor en la Tragedie de Sophocles , respond
 aussi ciuilement à Ajax qui l'iniurie,

Je ne me plains de toy Ajax, combien

Que parles mal, pource que tu fais bien.

Et Caton qui auoit cōtesté vifvement alencontre
 de Pompeius, lors qu'estant en ligue avec Iules Cē-
 far, il forceoit la ville de Rome, quand depuis ils fu-
 rent en guerre ouuerte l'un contre l'autre , il fut
 d'aduis que lon donnast la charge des affaires à
 „ Pompeius, disant, que ceulx mesmes qui font les
 „ grands maulx, sont ceulx qui les peuuent mieulx
 rhabiller:

A rhabiller: car vn blasme meslé avec vne louange, contenant non vne iniure, mais vne libre & franche remonstrance, imprimant non vn despit de courroux, mais vn remors de conscience, & vne repentance, semble gracieux & amiable: là où les iniures ne sont iamais bien seantes en la bouche d'un homme de bien & d'honneur. Voiez les reproches que fait Demosthenes à Æschines, & Æschines à luy, & semblablement les iniures atroces, que Hyperides a escriptes cōtre Demades, si Solon les eust iamais proferees, ny Pericles, ny Lycurgus le Lacedemoien, ou Pittacus le Lesbien: encore n'vse iamais Demosthenes de ceste maniere de picquer iniurieusement, sinon en cause criminelle: car ses oraisons Philippiques sont pures & nettes de toutes iniures & toutes mocqueries: pource que telles choses diffament plus ceux qui les disent, que ceux à qui elles sont dittes, elles apportent confusion aux affaires, & troublent les assemblees de ville & de conseil: au moien de quoy Phocion cedāt à vn qui luy disoit iniures, le laissa dire, & cessa de parler, & apres que l'autre en fin à toute peine se fut teu, recmontant de rechef en la chaire, il cōtinua son propos entrerompu, disant: Je vous ay desia parlé des gens de cheual & des gens de pied pesamment armez, oyez maintenant de ceux qui sont armez à la legere: mais pour autant que c'est chose bien mal aisee à plusieurs, de supporter & de se contenir, & que bien souuent on clost la bouche à ses iniurieux là, & les fait on taire tout court par vne petite replique, ie voudrois qu'elle fust courte, en peu de

paroles, ne mōstrant point de courroux ny de cho- **D**
 lere, ains vne douceur avec vne graue risée, mor-
 dante toutefois vn petit, comme sont principale-
 ment celles qui se retournent contre celuy qui a
 dittes les premieres : car tout ainsi que les traictz
 qui réualissent cōtre ceux qui les ont tirez, semblent
 estre rebattus & renuoyez par la force & fermeté
 solide de celuy qui en a esté frappé, aussi semble il
 que vne parole picquante retorquee contre celuy
 qui l'a ditte, soit renuoyee par la force & vigueur
 d'entendement de celuy qui l'a receuë: comme fut
 la repliche d'Epaminondas à Callistratus, qui re- **E**
 prochoit aux Thebains & aux Argiens le parricide
 d'Oedipus & celuy d'Orestes, l'vn qui tua son pere,
 & l'autre sa mere, l'vn natif de Thebes, & l'autre
 d'Argos : Nous les auons, dit il, chassez de noz vil-
 les, & vous les auez receus en la vostre. Sembla-
 blement aussi la responce d'Antalcidas Lacedemo-
 nien, à vn Athenien qui luy disoit par maniere de
 vanterie, Nous vous auons souuent chassez de la
 riuiera de Cephise: & nous, dit il, ne vous auons ia-
 mais rechassez de celle d'Eurotas. Et de Phocion,
 quand il repliqua plaisammēt à Demades qui luy **F**
 cryoit tout hault, Les Atheniens te feront mourir
 fils entrent vne fois en leur folie: mais bien toy, dit
 il, fils entrent iamais en leur bon sens. Et Crassus
 l'orateur, quand Domitius luy demanda, Lors que
 la lamproye que tu nourrissois en ton viuier mou-
 rut, ne ploras tu pas ? Il luy redemanda tout court,
 Et toy, pour les trois femmes que tu as mises en
 terre, en as tu iamais ploré ? mais ces regles là sont
 vtils

A vtils non seulement en matiere d'affaires de gouvernement, mais aussi à toute autre partie de la vie humaine. Au demourant il y en a qui se iettent & fourrent à toute sorte d'affaires publiques, comme faisoit Caton, voulât que le bon citoyen ne refuye aucune charge ny administration publique, tant que son pouuoir se pourra estādre, & louent grandement Epaminondas de ce, que ses malveuillans par enuie l'aians fait elire superintendant des gabelles, pour luy cuyder faire iniure, il ne mesprisa pas cest office, ains disant que non seulement le magistrat monstre quel est l'homme, mais aussi l'homme monstre quel est le magistrat, il eleua en grande dignité & reputatiō cest office, qui n'estoit rien au parauant, aiant seulement charge de faire nettoyer les rues, emporter hors la ville les fumiers, & destourner les eaux. Et ne fais point de doute, que moy mesme Plutarque n'appreste à rire à plusieurs de ceux qui passent par nostre ville, quand ils me voient souuent en public occupé & vacquant à pareilles choses: alencontre dequoy me sert ce que lon treuue escrit d'Antisthenes, car comme quelques vns s'esmerueillassent de ce, que luy mesme portoit en sa main à trauers la place des saleures, comme des botargues qu'il venoit d'acheter: C'est pour moy, leur dit il, que ie les porte: mais au contraire, ie respons à ceulx qui me reprennent quand ils me treuuent present à voir mesurer & compter la brique & la thuyle, ou les pierres, & le sable, & la chaux, que lon amēne en la ville: ce n'est pas pour moy que ie bastis, c'est pour la chose publique: car

il y a plusieurs autres choses, que qui les exerceroit **D**
ou manieroit luy mesme, il pourroit sembler bas
de cœur, sale & mechanique: mais si c'est pour le
public, & pour le païs, ce n'est point acte de cœur
bas ne petit, de se demettre iusques à prendre vo-
lontiers soing des moindres choses. Les autres esti-
ment la maniere de faire, dont vsoit Pericles plus
digne & plus graue, comme Critolaus entre autres,
lequel veult, que comme les deux galeres que lon
nommoit à Athenes la Salaminienne & la Paralos
ne se tiroient pas en mer indifferemmēt pour tou-
tes occasions, ains seulement pour causes grandes **E**
& necessaires, ainsi que l'homme de gouvēnemēt
s'employe soy mesme aux principales & plus gran-
des besongnes comme fait le Roy du monde:

Dieu met la main aux choses seulement
Qui sont de pois & de grand mouuement,
Mais ce qui est de peu de consequence,
A la fortune en laisse la regence,

ainsi que dit le poëte Euripides: car nous ne sçau-
rions louer la trop grāde ambition & opiniastrētē
de Theagenes, lequel ne se contentant pas d'auoir
vaincu le tour des ieux ordinaires, mais aussi en plu **F**
sieurs autres combats extraordinaires: & nō seule-
ment à l'escrime generale, où lon fait de pieds &
de mains le pis que lon peult, mais aussi à l'escrime
simple des poings, à la coursc longue: finablement
estāt vn iour au bācquet de l'anniuersaire d'vn de-
my-dieu, cōme lon estoit ia seruy, & la viāde assize
sur la table, il se leua pour aller encore combattre
vne autre escrime generale, cōme s'il n'eust appar-

Arenu à homme du monde de vaincre en tels combats, là où il estoit present, de maniere qu'il assembla iusques à douze cens couronnes qu'il auoit gaignees à tels combats, dont la plus part estoient de nul ou de bien peu de pris: à celuy là ressemblét proprement ceux qui se mettent en pourpoint, par maniere de dire, à toutes heurtes, quelque affaire qui se presente, faoulans le peuple d'eux, & se rendans odieux: de maniere qu'on leur porte enuie quand ils font bien, & se resiouit on quand il leur arriue mal: Et ce que lon admiroit en eulx à leur arriuee au gouuernement, à la fin se tourne en risce
 „ & en mocquerie, telle comme ceste cy, Metiochus
 „ est capitaine, Metiochus dresse les chemins, Metiochus cuit le pain, Metiochus moult la farine,
 „ Metiochus fait tout, Metiochus aura mal an. Cestuy estoit vn des accoursiers & fauorits de Pericles, qui abusoit excessiuelement de son autorité à se faire employer à toutes charges & toutes commissions publiques: car il fault que l'homme de gouuernement tiene tousiours le peuple en appetit de foy, & luy laisse tousiours vn desir de le re-
 e uoir quand il est absent, comme sagement faisoit Scipion l'Africain se tenant la plus part du temps aux champs, diminuant par ce moien l'enuie qui estoit alencontre de luy, & donnant ce pendant loisir de reprendre aleine à ceulx qui se sentoient offusquez & opprimez de sa gloire. Timesias Clazomenien estoit au demourant fort homme de bien, mais il ne sçauoit pas qu'il estoit fort enuie & fort haï en sa ville, à cause qu'il y vouloit

faire tout luy seul, iusques à ce qu'il luy aduint vn
tel accident: Il y auoit au milieu de la rue de ieunes
garçons qui iouoient, ainsi comme il passoit, à faire
fortir à coups de baston vn osselet dehors d'une
fosslette: les autres garçons maintenoiet qu'il estoit
encore dedās, & celuy qui auoit frappé dit, Qu'euf-
se-ie aussi bien fait fortir la ceruelle de la teste de
Timesias, comme cest osselet est sorty de la fosse.
Timesias ayant entendu ceste parole, & cognois-
sant par là l'enuie publique qui estoit imprimée au
cœur du peuple, soudain qu'il fut en sa maison ra-
conta le faict à sa femme, & luy cōmandant qu'elle
trouffast incontinent ses hardes pour le suiure, s'en
alla de ce pas hors de la ville de Clazomenes. Et
semble que Themistocles, luy estant aduenu à peu
pres vn semblable cas, respondit aux Atheniens:
Dea, beaux amis, pourquoy vous laissez vous de re-
cevoir souuent du bien de moy? Mais quant à ce
propos, vne partie en est bien ditte, & l'autre non:
pource qu'il faut que le sage entremetteur d'affai-
res, quant au soing, à l'affection, & prouoyance, ne
se deporte d'aucune charge publique, ains qu'il les
espouse toutes, & mette peine de les voir, entendre
& cognoistre toutes particulieremēt, non pas qu'il
se tiene en reserue à part, comme l'ancre sacree en
quelque coing de la nauire, attendant l'extremie
besoing & necessité de son pais pour s'employer.
Mais comme les bons patrons de nauire font vne
partie de la besongne, eux mesmes avec leurs pro-
pres mains, & l'autre partie avec d'autres vtils, &
par d'autres hommes, eulx estans assis, de loing ils
tirent,

A tirent, tournent ou laschent les cordages, & se ser-
 uēt des autres mariniers, les vns pour prouiers, les
 autres pour comites, & en appellent quelquefois
 vn en la poupe, auquel ils mettent le timon en la
 main: ne plus ne moins faut il aussi, que le sage gou-
 uerneur de chose publique, cede aucunefois aux
 autres l'honneur de commander, qu'il les conuie
 gracieusement & amiablemēt à venir quelquefois
 harenguer & prescher le peuple, non pas qu'il re-
 mue toutes choses avec ses propres harengues ny
 ses propres decrets, cōme avec ses propres mains:
 B mais qu'ayant des gens de bien fideles qui le secon-
 dēt & s'entendēt avec luy, il les employe par tout,
 les vns à vne charge, les autres à autre, selon qu'il
 les verra estre plus aptes & plus propres, ainsi com-
 me Pericles vsoit de Menippus aux expeditions de
 guerre, & deprima la court de Areopage par l'en-
 tremise d'Ephialte, & par Charinus il meit en auāt
 & fait passer le decret contre les Megariens, il en-
 uoya Lampon pour peupler la ville de Thuries: car
 en ce faisant non seulement il diminue l'enuie que
 lon a contre luy, d'autant qu'il semble que sa puis-
 c sance, & son autorité est diuisee & departie en
 plusieurs, mais aussi il fait plus commodément &
 mieulx les affaires de la chose publique: ne plus ne
 moins que la diuision de la main en cinq doigts
 n'affoiblit pas la force de toute la main, ains la rend
 plus propre & plus commode à l'usage de tout ar-
 tifice. Aussi celuy qui en matiere de gouuernemēt
 communique partie du maniemēt des affaires à ses
 amis, rend par ceste communication, les choses

mieulx & plus aiseement faictes: mais celuy qui par vne cupidité insatiable de monstrier son credit, s'attribue tout, & veult tout faire ce qui se presente à faire en vne ville, se mettant bien souuent à vne charge à laquelle il n'est pas bien né, ny assez exercité, comme Cleon à conduire vne armee, & Philopœmen à mener vne flotte de vaisseaux, Hannibal à harenguer, il n'a aucun moien d'excuser sa faute s'il vient d'aduerture à faillir, & leur reproche lon ce que dit Euripides,

Tu te meslois aussi d'autre mestier

Que d'ouurer bois, n'estant que charpentier. E
 aussi ne sçachant pas bien haréguer, tu as entrepris vne ambassade: estant paresseux, tu as voulu auoir charge de recepte: ne sçachant compter, tu as pris charge de thresorier: estant vieil & maladis, tu as voulu commander à vne armee. Pericles fait bien mieulx, car il partagea l'autorité du gouuernement avec Cimon, se retenant la puissance de commander dedans la ville, & laissant à Cimon le pouuoir d'armer les galeres pour aller ce pendant faire la guerre aux barbares, pour ce que luy estoit plus propre à commander dedans la ville, & l'autre plus F
 à propos pour la guerre. Aussi louë lon grandemēt Eubulus Anaplystien de ce que le peuple se fiant à luy, & luy donnant autant de credit qu'à nul autre, toutefois il ne se messia iamais d'aucune guerre de la Grece, ny ne s'entremeit iamais de conduire armee, ains s'estant des son commencement proposé de vaquer aux finances, il augmenta grandement le reuenu de la chose publique, là où Iphicrates

A crates estoit mocqué de ce qu'il s'exercitoit en sa maison, en presence de plusieurs, à faire des harangues: car encore qu'il eust esté excellent & non pas vulgaire harangueur, si valoit il mieulx qu'il se contentast de la reputation qu'il auoit acquise par les armes d'estre bon guerrier, & qu'il cedast l'eschole de bien dire aux Orateurs, Rhetoriciens & Sophistes. Mais pour autant que toute commune de peuple naturellement est maligne, mesmement alencontre de ceulx qui gouernent, prenant plaisir à les blasmer & les ouïr calomnier, &

B qu'ils soupçonnent ordinairement que plusieurs choses profitables que lon leur met en auant, si elles ne sont debattues & qu'il n'y ait de la contradiction, se facent par intelligence & conspiration: & est ce qui descrie principalement les amitez & societez entre les personnes qui se meslēt des affaires: il ne fault pas pour cela se laisser aucune inimitié, ou resistance veritable, cōme feist iadis vn gouuerneur de Chio appellé Onomademus: apres qu'en vne sedition ciuile il fut venu au dessus de ses ennemis, il ne voulut pas chasser de la ville tous

C ceulx qui luy auoiēt esté aduersaires, de peur, dit il, que nous n'entrions desormais en discorde à l'encōtre de noz amis apres que nous n'aurōs plus d'ennemis, car cela seroit vne folie. Mais quād le peuple aura quelque proposition qui luy sera salutaire & de grāde consequence, pour suspecte, il ne fault pas lors que tous, cōme d'un cōplot, dient vne mesme sentēce, ains que deux ou trois s'y opposans cōtredissent sans violēce à leur amy, & puis que cōme

estans conuaincus par raisons ils reuiennent à son opinion: car ils attirēt par ce moien le peuple avec eulx, quand il semble qu'ils soient tirez par le regard de l'vtilité publique: vray est qu'es choses legeres il n'est pas mauuais de souffrir que noz amis mesmes discordent à bon esciant d'avec nous, & qu'ils suyuent chacun son iugemēt & son opinion, à fin que quand il viendra en affaire principal & de grande importance, il ne semble pas que ce soit par vn complot proparlé entre eulx, qu'ils soient tous d'accord. Or faut il penser que l'homme sage par nature est tousiours en autorité de magistrat en sa ville, comme le roy entre les abeilles, & sur ceste persuation il faut qu'il ait tousiours le timon des affaires en la main, mais toutefois qu'il ne poursuiue pas tousiours chaudement ne souuent les estats & offices que le peuple eslit par ses voix: car ceste conuoitise de vouloir tousiours estre en office n'est point venerable ny agreable au peuple, aussi ne les faut il pas reietter quand le peuple legitimement les donne, & nous y appelle, ains les faut accepter, encore que ce soient à l'aduenture offices de moindre dignité que ne requerroit la reputation que nous aurions desia acquise, & s'y employer de bonne affection: car il est iuste que comme nous auons esté honorez par les estats de plus grande dignité: aussi que reciproquemēt nous honorions ceux de moindre qualité, & quand nous serons esleus aux magistrats supremes, comme à l'estat de capitaine en la ville d'Athenes, à l'estat de Pritanes à Rhodes, de Bæotarche en nostre pais de

A de la Bœoce, il fera bien seant que par modestie nous cedions & rabbaissions vn peu de sa souueraine grandeur: & au contraire aussi, que aux petits estats nous y adioustions vn petit de dignité & d'apparence d'auantage, à fin que nous ne soions ny enuiez en ceux là, ny mesprizez en ceulx cy. Et aux premiers iours que nous entrerôs en quelque magistrat que ce soit, il ne nous faut pas seulement ramener en memoire les discours que faisoit Pericles quand il prenoit sa robbe de magistrat pour
 » sortir en public, Pense à toy Pericles, Tu cōmandes
 B à hommes libres, non pas à des esclaués: tu com-
 » mādés à des citoiens qui sont pareils à toy, tu com-
 » mandes à des Atheniens: ains nous faut d'auantage dire en nous mesmes, Tu commandes estant com-
 mandé & subiect, tu commandes à vne ville qui est
 soubz vn proconsul Romain, ou soubz vn procureur & lieutenant de l'Empereur. Ce ne sont plus, comme disoit celuy là, icy les campagnes de la Lydie où lon puisse courrir la lance, ce n'est plus icy l'anciene cité de Sardis, ny la puissance qui fut au temps passé des Lydiés: il faut porter sa robbe plus
 c estroite, & du palais de ville, où logent les magistrats, fault tousiours auoir l'œil au siege imperial, & ne prendre pas trop de cœur pour se voir vne couronne sur la teste, regardās des foulers cornus, marques des seigneurs Romains, qui sont encore au dessus: ains faut en cela imiter les ioueurs des tragedies, lesquels adioustent bien du leur au rolle qu'ils iouënt, le geste, l'accent, & la contenance qui luy est conuenable, mais toutefois ils eſcoutēt touſ-

ieurs leurs protecolles, à fin que nous ne passions, & ny n'excediōs point les mesures ny les bornes de la licee qui nous est baillee par ceulx qui ont la puissance de nous cōmander : car le sortir hors de ses termes, n'apporte pas quāt & soy peril d'estre sifflé ny mocqué seulemēt, ains y en a desia eu plusieurs,

Dessus le col desquels est ia monté

Le fil trenchant de la hache aceree,

Qui a du corps la teste separee:

comme il en est pris en nostre pais à Pardalas, pour estre vn peu sorty des bornes: & tel autre y a, qui estant confiné en quelque meschante isle deserte, & est deuenue, comme dit Solon,

Sicinitain ou Phelegandrien,

Forpaissant au lieu d'Athenien.

Nous nous rions bien quelquefois des petits enfans, quand nous voions qu'ils taschent à chauffer les souliers de leurs peres, ou qu'ils veulent mettre sur leurs testes leurs couronnes en se iouant : les magistrats des villes bien souuent, ramenās en memoire aux peuples solemēt les beaux faiets de leurs predecesseurs, la grandeur de leurs courages, & leurs deportements trop disproportionnez aux temps, & aux qualitez de maintenāt, les font quelquefois faire des choses dignes de rire, mais il n'y a pas à rire puis apres pour tous, si ce n'est qu'ils soiēt si bas & si petits, que pour leur bassesse on ne face compte d'eulx. Il y a bien d'autres histoires de l'ancienne Grece, que lon peult ramenteuoir & reciter aux hommes de ce temps icy, pour adoucir & moderer leurs meurs, comme à Athenes, faisant
souuenir

A souuenir au peuple non des prouësses de leurs ancestres, mais pour exemple, du decret d'abolition & d'oubliance generale, qui fut iadis fait apres que la ville fut deliuree de la captiuité des trête tyrans, & de ce qu'ils condamnerent à l'amende le poëte Phrynichus, pour ce qu'il auoit fait iouer en vne tragedie la prise de la ville de Milet, & aussi que par ordonnance publique ils porterent chappeaux de fleurs sur leurs testes, quand ils sceurent que Cassander faisoit rebastir la ville de Thebes : & cōme quand ils entendirent la cruelle occision qui
 B fut faitte en Argos, en laquelle les Argiens feirent mourir quinze cents de leurs citoiens, ils feirent en pleine assemblee de ville apporter les sacrifices d'expiation, à fin qu'il pleust aux Dieux destourner vne si cruelle pensée du cœur des Atheniens. Et du temps que lon recherchoit ceulx qui auoient pris ou argent ou present de Harpalus, en visitant toutes les maisons de la ville, ils ne voulurent pas permettre que lon fouillast celle d'un nouveau marié, & passerent celle là seule. Car en cela peuuent ils bien encore aujourd'huy ensuiure leurs maieurs, &
 C se rendre semblables à eulx : mais la bataille de Marathō, & celle de la riuere de Eurymedō, & celle de Platées, & autres tels exēples qui ne font qu'enfler & hausser le courage vainemēt à vne commune, il les faut laisser aux escholes des sophistes & des maistres de Retorique. Si ne faut pas seulement auoir l'œil à se maintenir si sagement soy & sa ville, que les seigneurs souuerains n'aiēt aucune occasion de se plaindre, ains faut dōner ordre d'auoir tousiours

quelqu'un des seigneurs, qui ont le plus d'autorité à Rome, & en la court de l'Empereur, pour special amy, qui serue comme d'un rempart assés pour defendre toutes noz actions au gouuernement de nostre pais: car tels seigneurs Romains se monstrent ordinairement fort affectiōnez aux affaires que poursuiuent leurs dependans & leurs amis, & le fruit que lon peut tirer de l'amitié & bonne grace de tels seigneurs, il n'est pas honnestes de le conuertir à l'auancement & enrichissement de soy & des siés particulièrement, mais l'employer, ainsi comme firent iadis Polybius & Panetius, qui par le moien de la bienueillance que leur portoit Scipion, firent beaucoup de bien à leur pais: au nombre desquels il fault aussi mettre Arrius, car quand Cēsar Auguste prit la ville d'Alexandrie, il entra dedans tenāt Arrius par la main, & deuisant avec luy seul de toute sa fuite: puis il respondit aux Alexandrins, qui s'attendoient bien d'estre sacagez, & le supplioient de leur pardonner, qu'il leur pardonnoit, & les receuoit en sa bonne grace, premierement pour la beauté & grandeur de leur ville, secondement pour le fondateur Alexandre le grand, & tiercement pour l'amour de cestuy vostre citoien, qui est mon amy. Pourroit on bien avec raison comparer ceste grace, avec les riches commissions de regir & administrer les prouinces, que poursuiuent aucuns à la court, avec seruitude & subiection si obstinee, qu'il y en a qui vieillissent aux portes d'autrui à la poursuite, en delaisant pendant les affaires de leur pais? ne vaudroit-il pas

A pas mieux corriger & changer le dire d'Euripi-
 „ des, en disant & chantant , S'il est honeste de
 „ veiller & faire la court aux portes d'autrui, en se
 „ rendant subiect à la suite d'un seigneur, il est dōc-
 „ ques honeste de le faire pour l'amour & pour le
 „ bien de son païs: au demourant chercher & am-
 brasser amitez pareilles, à conditions iustes & ega-
 les. Mais aussi en rendant sa ville & son païs obeis-
 sant aux grands, il se faut bien garder que nous ne
 l'assubiections encore d'avantage qu'il ne l'est, ne
 qu'estant attaché par la iambe nous ne le lions en-
 B core par le col: comme font aucuns, qui raportant
 toutes choses, autant petites que grandes, à ces sei-
 gneurs, rēdent leur seruitude reprochable, ou pour
 mieux dire, ils ostent à leur païs toute forme de
 gouvernement, en le rendant ainsi timide, & luy
 ostāt tout pouuoir. Car ainsi cōme ceux qui se sont
 accoustumez à ne disner, ne soupper, ny s'estu-
 uer iamais sans le medecin, n'vivent pas de leur san-
 té, autant que la nature leur permet: aussi ceux qui
 à tout decret, à toute resolution de conseil, à toute
 grace, voire à toute administration publique de
 c leur ville, veulent adiouter le consentement, iuge-
 ment & gré des seigneurs, ils contraignent lesdits
 seigneurs d'estre plus maistres qu'ils ne veulent
 eux-mesmes: dequoy sont ordinairement cause l'a-
 uarice, & la ialousie & l'émulation des premiers &
 principaux citoiens des villes, par ce que voulans
 quelquefois opprimer ceux qui sont moindres
 qu'eux, ils les contraignent d'abandonner leurs
 villes, ou bien aians quelques differents avec leurs

egaulx concitoiens, & ne voulans pas auoir du pi-^D
 re en la ville, ils ont recours aux seigneurs supe-
 rieurs, par où ils font cause de faire perdre au Se-
 nat, au peuple, aux iuges & officiers de leur vil-
 le, tout ce peu d'autorité & de puissance qui leur
 estoit demouré: là où il faut en entretenant ceux
 des bourgeois qui sont hommes priuez par egali-
 té, & ceux qui sont puissans par leur ceder recipro-
 quement, contenir les affaires au dedans de la
 ville, & les y resouldre & terminer, guerissans
 tels inconueniens, comme maladies secrettes des
 choses publiques, avec vne medecine ciuile, ai-^E
 mans mieux quant à soy estre vaincu entre ses ci-
 toiens, que vaincre dehors, en faisant tort à son
 pais, & estant cause de violer ses droicts & priui-
 leges: & quant aux autres les priât, & leur remon-
 strant particulièrement à vn chascun, de combien
 de maux est cause l'obstination, que maintenant
 pour n'auoir voulu à leur tour s'accommoder en
 leurs maisons, à leurs concitoiens, qui feront bien
 souuent d'une mesme lignee, à leurs voisins & cō-
 pagnons en charges & offices, avec honneur &
 bonne grace, ils vont deceler les secrettes dissensiōs^F
 & debats de leur ville, aux portes des aduocats, &
 es mains des pratticiens de Rome, avec non moins
 de honte, de dompage & de perte. Les medecins
 ont bien accoustumé de tourner & tirer au dehors
 à la superficie du corps les maladies qu'ils ne peu-
 uent pas du tout oster du dedans: mais au cōtraire,
 l'homme de gouuernement, fil ne peult contre-
 garder sa ville totalement paisible, qu'il n'y sur-
 uienne

A uieñe tousiours quelques troubles, à tout le moins s'efforcera il de contenir au dedans d'icelle, ce qui s'y remue, & qui y esmeut la sedition, & en le tenāt caché taschera de le guarir & y remedier, à celle fin que s'il est possible, il n'ait besoing de medecin, ny de medecines exterieures: car l'intention de l'homme d'estat & de gouuernement doit bien estre de proceder en ses affaires seurement, & de fuir les violents & furieux mouuements de vaine gloire, comme nous auons desia dit, mais neātmoins son intention & sa resolution,

■ Qu'il ait au cœur vne ferme assurance,
 Sans vaciller, & virile constance,
 Comme les preux guerriers, qui hazarder
 Leurs vies vont pour leur païs garder:

& non seulement contre des hommes ennemis, mais aussi contre des affaires perilleux, & des tēps dangereux, aux quels il faut resister & faire teste: car il ne faut pas qu'il soit cause de mouuoir les tourmētes, mais aussi ne faut il pas qu'il abandonne son païs au besoing, quand il les sent venir: ne qu'il poulse sa ville en apparent danger, mais aussi
 c quand elle y est vne fois esbranlee, & qu'elle flotte en danger, c'est à luy à la secourir, en iettant la derriere ancre sacree de soy-mesme, qui est la hardiesse de franchement parler, quand il est question de si grande chose que du salut de son païs: comme furent les affaires qui arriuerent aux Pergameniēs du temps de Neron, & nagueres, aux Rodiens du temps de Domitian, & au parauant aux Thessaliens du tēps d'Auguste, pour auoir brullé tout vif

Petrus. En telles occurrences vous ne verrez point D
 que l'homme de gouvernement, si est digne d'un
 tel nom, face du restif, ne qu'il tire le pied arriere
 de peur, ou qu'il accuse les autres, & qu'il se tire luy
 mesme hors de la meslee du danger, ains le verrez
 aller en ambassade, s'embarquer sur mer, parler le
 premier, disant non seulement,

Nous auons fait, Apollo, l'homicide,

Fay que la peste hors nostre pais vuide:
 mais encore qu'il ne soit point coupable du pe-
 ché de la commune, si se mettra il en danger pour
 eux, car c'est chose tres-honeste, & outre l'honeste- E
 té du faict en soy, il est adueni plusieurs fois, que
 la vertu & grandeur de courage d'un tel homme
 a tant esté estimee, qu'elle a effacé le courroux qui
 estoit emeu contre toute vne commune, & a dissi-
 pé toute l'aigreur & la fureur d'une menasse, ainsi
 qu'il aduint à vn roy de Perse à l'endroit de Bulis
 & de Sperchis gentils hommes Spartiates, & con-
 me fait aussi Pompeius enuers Sthenon son hoste:
 car ayant proposé de punir aigrement les Mamer-
 tins de ce qu'ils s'estoient rebellez contre luy, Sthe-
 non luy dit qu'il ne feroit pas bien ne iustement, si l' F
 faisoit mourir plusieurs innocens au lieu d'un seul
 qui estoit coupable, pource que c'estoit luy seul
 qui auoit fait rebeller toute la ville, y ayant induit
 ses amis par amour, & ses ennemis par force: ces
 paroles toucherent tellement au cœur de Pom-
 peius, qu'il pardonna à la ville, & se porta humainement
 enuers Stenon. Et l'hoste de Sylla ayant
 usé de semblable vertu, mais non pas enuers vn
 sem

- A** semblable seigneur & capitaine, mourut genereusement: car Sylla aiant pris la ville de Preneſte, cōdamna tous les habitans à mourir, excepté son hoſte, auquel il pardōna pour l'ancienne alliance d'hoſpitalité qu'il auoit avec luy: mais son hoſte luy reſpondit qu'il ne vouloit point eſtre tenu de ſa vie au meurtrier de ſon païs, & ſe ietta parmy la troupe de ſes citoiēs que lon maſſacroit, où il fut meurtry quand & eux. Or faut il bien prier aux Dieux qu'ils nous gardent de tomber en ſi calamiteux temps, & en eſperer de meilleurs: mais au reſte il
- B** faut eſtimer tout magiſtrat public, & celui qui l'exerce, choſe grāde & ſacrée: à l'occaſion dequoy il le faut ſur tout honorer, & l'honneur qu'on doit au magiſtrat eſt de ſ'accorder avec luy, & aimer ceux qui ſont conſtituez pour l'exercer: ceſt honneur là eſt beaucoup plus digne que ne ſont pas les couronnes qu'ils portent ſur leurs teſtes, ny leurs grands manteaux de pourpre. Mais ceux qui prennent le commencement de leur amitié pour auoir eſté enſemble à la guerre, ou auoir paſſé les ans de leur adoleſcence enſemble: & au contraire
- C** prennent pour commencement de leur inimitié d'eſtre capitaines enſemble, & auoir quelque charge de la choſe publique enſemble, ils ne ſçauroient euitier que ce ne ſoit pour l'vne de ces trois mauuiſes cauſes, ou que eſtimans leurs compagnons ſemblables à eux, ils commencent les premiers à les embrouiller de diſſenſion, ou les eſtimans plus grands ils leur portent enuie, ou plus petits & ils les meſpriſent: là où il faut courtiſer les plus grāds,

honorer les egaulx, & auancer les petits, & les
 aimer & embrasser tous, comme aians auec eux
 vne amitié engendree, non pour auoir mangé à
 vne mesme table, ou disné à vn mesme festin,
 ains par vne obligation commune & publique,
 comme si c'estoit vne beneuolence paternelle
 contractee pour l'affection commune enuers la
 patrie. C'est pourquoy Scipion fut mal estimé à
 Rome de ce qu'en dediant le temple d'Hercules,
 aiant conuié tous ses amis au banquet, il n'y
 fait point semondre son compagnon au magi-
 strat Mummius : car encore qu'ils se sentissent
 d'ailleurs n'estre pas amis, si est-ce qu'en telles oc-
 casions ils se deuoient honorer & caresser l'un
 l'autre, à raison de leur commun magistrat. Si
 doncques Scipion, personnage au demourant
 grand & admirable, a encouru reputation d'es-
 tre fier & presumptueux, pour auoir oublié &
 omis vne si petite demonstration d'humanité,
 comment est-ce que celuy qui s'efforcera de di-
 minuer la dignité de son compagnon, ou qui
 taschera à luy faire receuoir vne honte, mesme-
 ment en chose où il va de l'honneur, ou qui par
 vne arrogance voudra tout faire, & s'attribuer
 tout à luy seul, comment le pourra lon estimer
 homme modeste & raisonnable? Il me souuient
 qu'estant encore bien ieune, ie fus enuoyé, auec
 vn autre, en ambassade deuers le Proconsul, & ce
 mien compagnon estant ne sçay pourquoy de-
 mouré derriere, i'y allay seul, & feis ce que nous
 auions commission de faire : à mon retour, ainsi
 que

A que ie voulu rendre compte en public, & faire le rapport de ma charge, mon pere se leuant seul, me defendit de dire, ie suis allé, mais nous sommes allez: ny, i'ay parlé, mais nous auons parlé: & faire mon recit, en associant tousiours mon compaignon à ce que i'auois fait: cela est non seulement gracieux & humain, mais qui plus est, il oste de la gloire ce qui offense, l'enuie. C'est pourquoy les grâds capitaines attribuēt & ascriuent leurs beaux-faicts à la fortune, & à leur bon ange, comme fait Timoleon, celuy qui ruina les tyrannies establies

B en la Sicile, lequel fonda vn temple à la bonne fortune. Et Python estant hautement loué & prisé à Athenes, pour auoir occis de sa main le Roy Cottys: C'est Dieu, dit-il, qui pour le faire s'est voulu seruir de ma main. Et Theopompus Roy des Lacedemoniens, à vn qui luy disoit, que Spar-te demouroit sur ses pieds, pourautāt que les Roys y sçauoient bien commāder, mais plus tost, dit-il, pource que le peuple y sçait bien obeir: ces deux choses là se font par le moien l'vne de l'autre: mais il y en a la plus part qui disent & estiment, que la

C meilleure partie de la science ciuile de gouuerner, est, sçauoir rendre les hommes idoines à estre bien commandez: car en chasque ville il y a tousiours trop plus grand nombre de ceux qui sont commandez, que de ceux qui commandent, & chascun en chascune commande à son tour, pour vn peu de temps, au moins en vn gouuernement populaire, & est puis apres commādé tout le reste de sa vie, de maniere que c'est vn treshoneste, & tres-

utile apprentissage, que d'apprendre à obeïr à ceux qui ont autorité de cōmander, encore qu'ils soient de moindre estoife, & de moindre credit que nous. Car il n'y auroit point de propos qu'un excellent & premier iouëur de Tragedies, comme seroit vn Theodorus, ou vn Polus, marche bien souuent apres quelque mercenaire, qui n'aura que trois mots à dire, & qu'il parle en toute humilité & reuerëce à ce mercenaire, pource qu'il a le bandeau royal du diadème à l'entour de la teste, & le sceptre en la main: & qu'en action veritable & non fainte, vn riche & puissant homme contemne & mesprise celuy qui sera en magistrat, d'autant qu'il sera homme simple & de petit estat, oultrageant & rauallant la dignité publique, pour cuidoier faire paroistre la sienne priuee, là où il deuroit plus tost adiouster de son credit, & de sa puissance à celle du magistrat. Comme en la ville de Sparte, les Roys se leuoient de leurs chaires au deuant des Ephores, & de tous les autres citoiens, celuy qui estoit mādē par eux n'y venoit pas le pas, ains courant à grande haste, pour monstrer à leurs citoiens comme ils estoient bien obeïssans, se glorifians de ce qu'ils honoroïēt leurs magistrats, non pas comme quelques fots glorieux, de mauuaise grace, & de peruers iugement, qui pour monstrer qu'ils ont grande autorité, feront quelque honte aux iuges & directeurs des combats, ou diront iniure aux entrepreneurs, qui font iouër les tragedies & comedies es festes Bacchanales, ou se mocquerōt des capitaines, ou de ceux qui president aux ieux &

A exercices de la ieunesse, n'entendans pas que l'honorer bien souuent est plus honorable, que non pas l'estre honoré: car à vn homme d'honneur qui a grande fuitte & grande autorité en vne ville, ce luy est vn ornement plus grand d'accompagner & costoyer le magistrat, que si le magistrat le conuoioit & l'accompagnoit: & pour mieux dire, cela cause vn desplaisir & vne enuie aux cœurs de ceux qui le voyent, & cecy apporte vne vraye gloire, qui procede de beneuolence, quand on le voit quelquefois à l'huis d'un magistrat, quand

B il le saluë le premier, & quand il luy donne le lieu du milieu en se promenant, il adioust ce ostement à la dignité de la ville, & ne diminue rien de la sienne: aussi est-ce chose, qui attrait grandement la grace du peuple, que d'endurer patiemment vne iniure ou vne cholere de celuy qui commande, y repliquant ce que dit Diomedes en Homere,

Il m'en viendra cy apres grande gloire:
ou le dire de Demosthenes, que maintenât il n'est pas seulement Demosthenes, mais il est legislateur, il est president des ieux sacrez, il a vne couronne sur la teste: & pourtât il en faut remettre la vengeance à vn autre temps, car, ou nous luy courrons sus, apres qu'il sera depose de son magistrat, ou nous gaignerons cela à differer, que nostre cholere en sera passée. Bien faut-il tousiours faire à l'enuy des magistrats en diligence, soing & prouoyance du bien public, fils sont personnes de bonne sorte, en leur allant declarer, & exposer ce

qui se presentera bon à faire, en leur baillant à ^D
executer ce que nous aurons meurement delibe-
ré, & leur donnant moien de se faire honorer en
profitât par mesme cōseil à la chose publique: mais
si ce sont personnes, qui ou par crainte & faute de
cœur, ou par malignité restiuent à entendre à ce
que nous leur mettrons en auant, alors il fault que
nous mesmes allions le declarer publiquement au
peuple, non pas negliger, dissimuler, ou passer
soubz conniuece aucune chose qui appartienne
aux bien public, soubz couleur de dire, qu'il n'ap-
partient à autre, qu'au magistrat, d'estre curieux, ny ^E
de s'entremettre du maniemēt des affaires: car la
loy generale donne tousiours le premier lieu du
gouuernement à celuy qui fait ce qui est iuste, &
qui cognoist ce qui est profitable, comme lon peut
comprendre par l'exemple de Xenophon, lequel
„ escrit de soy-mesme, Il y auoit en l'armee vn ap-
„ pellé Xenophon, qui n'estoit ne capitaine, ny
„ lieutenant, mais qui pour entendre ce qu'il falloit
„ faire, & l'oser entreprendre, se meit à commander,
„ si bien, qu'il fut cause de sauuer les Grecs. Et le plus
glorieux faict d'armes que feit iamais Philopœ-^F
men, fut, que quand il eut nouuelles cōme le Roy
Agis auoit surpris la ville de Messene, & que le ca-
pitaine general des Acheïens ne la vouloit pas al-
ler secourir, ains restiuoit de peur, luy avec vne
troupe des plus gaillards & plus deliberez y alla,
sans aucun mandemēt public, & osta la ville d'en-
tre les mains d'Agis: non pas qu'il faille pour cho-
ses legeres & vulgaires attenter rien de nouveau,
ains

Ains seulement pour choses necessaires, comme feir lors Philopœmen : ou belles & honestes, comme Epaminondas, lequel estendit & allongea le tēps de son magistrat de Bœotarche, quatre mois plus qu'il n'estoit permis par la loy du païs, durant lesquels il entra en armes dedans le païs de la Laconie, & feit rebastir & repeupler Messene, à fin que si d'adventure il en aduenoit puis apres quelque plainte ou accusation, nous aions pour responce à l'accusation l'excuse de la necessité, ou pour reconfort du peril auquel nous nous serons exposez, la grandeur & beauté de la chose entreprise. On recite & remarque vne sentence de Iason, celuy qui iadis fut tyran de la Theffalie, laquelle il disoit & repetoit souuent, toutes & quantes fois qu'il forceoit ou outrageoit quelques vns des particuliers habitans du païs, Qu'il est force de faire iniustice en petites choses, qui veut venir à chef de faire iustice és grandes : & qu'il est necessaire de faire tort en detail, qui veut faire droict en gros. mais quant à ceste sentencelà, il est aisé à veoir de prime face, que c'est vne instruction propre pour vn qui se veut faire seigneur & vsurper la tyrannie. Ceste regle est bien plus ciuile, Qu'il faut laisser aller plusieurs choses legeres pour gratifier au peuple, à fin de pouuoir en choses grandes luy resister & le garder de faillir : car celuy qui veut estre en toutes choses regardant de trop pres, & trop vehement, sans iamais rien ceder ny lascher, ains est tousiours aspre & inexorable, il accoustume le peuple à estriuer opiniaistrement, & se courroucer contre luy,

Mais vn peu la scote lente

D

Contre l'onde violente

Sçauoir à propos lascher,

partie en se relaschant vn peu soy-mesme, & se iouant gracieusement avec eux, comme à faire sacrifices, à veoir les ieux des combats, à assister aux Theatres, partie en ne faisant pas semblant de les veoir ny ouir, comme nous faisons aux fautes des petits enfans en la maison, à fin que l'autorité de les reprendre & de parler franchement à eux, comme la force d'une drogue non sus-année ny passée, ains estant en sa vertu & vigueur, ait plus d'efficace & plus de foy pour les toucher & assener au vif, quand il sera question de choses de grande consequence. Alexandre aiant entendu que sa sœur auoit eu accointance d'un beau ieune gentilhomme, il ne s'en courroucea point autrement, ains dit qu'il luy falloit aussi bien à elle permettre de se sentir & iouir vn peu de la royauté: ne faisant pas en cela sagement, de luy conceder cela qui faisoit honte à sa grandeur: car il ne faut pas estimer ieune plaisir ce, qui est la ruine ou le deshonneur d'un estat. Et pourtant le sage homme de gouuernement ne permettra point, tant qu'il luy sera possible, que le peuple face vne iniure aux particuliers habitans, comme seroit en confisquant leur bien, en leur laissant departir entre eux les deniers communs, ains y resistera de tout son pouuoir en les preschant, menassant & intimidant, il combattra contre tous tels appetits desordonnez d'une commune: à l'opposite de ce que fait Cleon à Athenes, qui nourrissant

A fant & augmentant tels fols desirs du peuple, fut cause de faire naistre en la ville plusieurs frelons & mouches guespes, comme dit Platon, qui veulent viure sans rien faire que poindre & picquer tantost cestuy cy, & tantost celuy là. Mais si le peuple d'adventure prent vne feste solennelle du país, ou bien l'honneur de quelque Dieu pour occasion de faire quelques ieux, ou quelque donnee legere, ou quelque gracieuseté honeste, ou magnificence publique, il est raisonnable, que leur permettant telles choses on les laisse iouir aucunement & de leur liberté & de leur opulence: car au gouuernement de Pericles & de Demetrius Phalereus, il y a plusieurs exemples de choses semblables. Cimon mesme embellit la place d'Athenes de plusieurs belles allees de platains, qu'il y feit planter à la ligne: & Caton voiant au temps de la coniuuration de Catilina, que le menu peuple de Rome estoit tout esmeu par les menees de Iule Cesar, & qu'il ne falloit gueres de chose pour faire changer tout l'estat, il persuada au Senat d'ordonner, qu'il se feroit quelque petite donnee & distribution de deniers aux pauures citoiens: & cela fait à propos appaisa tout le tumulte, & reprima la sedition & soubleuation qui estoit toute preste à se faire. Tout ainsi que le sage & discret medecin, apres qu'il a tiré à son patient beaucoup de sang corrompu, luy donne vn peu de bõne nourriture: aussi l'aduisé gouuerneur d'estat populaire, apres auoir osté à la commune quelque grande chose, qui estoit pour leur apporter hõte &

dommage : au contraire, par quelque legere grace & douceur qu'il leur concede, il les reconforte & engarde de se fascher & de se plaindre. Et n'est pas mauuais quelquefois pour les destourner d'une folie à quoy ils ont affection sans propos, de les ramener à autres choses qui sont vtils, ainsi que feir Demades lors qu'il auoit la superintendance des finances & de tout le reuenu de la chose publique, estant le peuple d'Athenes en volonté d'enuoyer des galeres au secours de ceux qui s'estoient rebellez contre Alexandre le grand, & luy commandant de fournir argent pour cest effect : Il leur **E** dit, vous auez bien de l'argent tout prest, car i'en auois fait prouision pour vous distribuer à ceste feste des Bacchanales, si que chascun de vous eust peu auoir enuiron demy mar d'argent, qui eust esté enuiron cinq escus pour teste : si vous aimez mieux que ces deniers soient employez à cest vsage, ie m'en rapporte à vous, vsez ou abusez en, comme de chose vostre : par ceste ruze les aiàs destournez de vouloir plus armer la flotte de vaisseaux qu'ils vouloient enuoyer, de peur de perdre la distribution qu'il leur promettoit, il les engarda **F** d'offenser griefuement Alexandre. Il y a beaucoup de telles volonteiz dommageables & dangereuses qu'il seroit impossible de rompre de droit fil, mais il y faut vser de destour & de torse, comme feir vn iour Phocion quand les Atheniens vouloient à toute force qu'il allast hors de temps & de saison dedans le pais de la Bœotie, car il feir incontinent crier à son de trompe, que tous citoiens, depuis l'aage

A l'aage de l'adolescence iusques à soixante ans, eussent à le suivre avec leurs armes : à raison duquel cry s'estant eleué vn grand bruit des vieillards, qui se mutinoient de ce qu'on les faisoit aller à la guerre en tel aage: Quel mal y a il, leur dit il : l'ay bien
 „ quatre vingts ans, & seray avec vous comme vous
 „ sire capitaine. Par tels moiens on pourra rompre beaucoup d'ambassades importunes, en y commettant ceux que lon verra les plus mal dispos à faire voyages, plusieurs entreprises de grands bastiments inutiles, en commandant de contribuer
B doncques argent, & plusieurs procès inciuils, en leur disant, qu'ils aillent doncques eux mesmes à la court pour les solliciter: à quoy faire, il y faut attirer & associer les premiers ceux qui mettent telles choses en auant, & qui incitent le peuple à les vouloir : car s'ils reculent, il semblera qu'ils rompent eux mesmes ce qu'ils auront proposé, & s'ils l'acceptent, ils porteront partie de la fâcherie & de la peine qu'il y aura. Mais là où il sera question de quelque affaire de grande consequence & de grande vtilité pour le public, où il faudra grandement trauailler & chaudement s'y employer, alors
C regarde à choisir de tes amis ceux qui auront le plus d'autorité, & mesmement entre les autres, ceux qui seront de plus douce nature : car ceux là te resisteront le moins, & te secourront le plus, aians le sens bon, & point de ialousie ny d'opiniaistreté : toutefois en cela faut il encore que chascun cognoisse bien sa nature, & qu'entendant ce à quoy il est moins apte, il eslise pour adioincts

plus tost ceux qu'il sentira valoir en ce qui est re-^D
quis pour ce qui se presente, que ceux qui luy se-
ront plus semblables: comme Diomedes estant
deputé pour aller recognoistre le camp des enne-
mis, choisit pour son compagnon le plus aduisé, &
laissa les plus vaillans: par ce moien les actions en
seront mieux contrepesées, & ne s'engendrera pas
si facilement la ialousie & l'émulation entre ceux
qui desirent faire cognoistre leur valeur en vertus
differentes. Si doncques tu as vne cause à plai-
der, ou vne ambassade à faire, choisy pour ton
adioint quelque homme bien eloquent, si tu te
sens mal idoine à bien parler, ainsi comme Pe-
lopidas choisit Epaminondas: Si tu te sens mal
propre à caresser vne commune, & auoir le cœur
en trop bon lieu pour t'abaisser à faire la court,
comme estoit Callicratidas capitaine Lacedemo-
nien, choisis en vn qui ait grace à entretenir les
gens, & qui soit bon courtisan: Si tu as le corps foi-
ble, & mal dispos pour porter beaucoup de peine,
eslis en vn qui soit plus robuste, & qui aime à tra-
uailer, comme Nicias choisit Lamachus. C'est
ainsi que Geryon estoit esmerueillable, que aiant ^F
plusieurs iambes, plusieurs bras, & plusieurs yeux,
le tout estoit regy & gouuerné par vne seule ame:
mais les sages hommes de gouuernement fils
s'entre-entendent, peuuent bien conferer ensen-
ble non seulement leurs corps & leurs biens, mais
aussi leurs fortunes, leurs credits, & leurs vertus en
vn mesme affaire: de sorte qu'ils viendront tous-
iours mieux à bout de quelque executiō qu'ils en-
treprenent

Atreprennent à faire, que ne fera vn autre qui qu'il
 soit. Non pas cōme les Argonautes, qui, apres auoir
 delaisié Hercules, furent contraincts d'auoir re-
 cours aux sorcelleries & enchantemēts d'vne fem-
 me pour se sauuer, & dérober la royson d'or. Or
 y a il des temples, aux quels ceulx qui entrent lais-
 sent l'or dehors, fils en ont sur eulx : & quant au
 fer, on n'en porte presque en maniere de dire de-
 dans pas vn : & d'autant que la tribune aux haren-
 gues, & le siege presdial est vn temple commun à
 Iupiter conseiller & garde des villes, & à iustice &
Bequité, auant que d'y mettre le pied dés à present
 despouille ton ame de toute auarice, de toute con-
 uoitise d'auoir, comme si c'estoit du fer, ou bien
 vne maladie pleine de rouille, & la reiette en la hal-
 le des marchands, des reuēdeurs, bancquiers & v-
 suriers, & t'en esloigne le plus arriere que tu pour-
 ras, estimant que celuy qui s'enrichit du maniēmēt
 des affaires publiques, est vn sacrilege qui derobe-
 roit iusques sur le maistre autel, iusques dedans les
 sepultures des morts, dedans les coffres de ses amis,
 s'enrichiroit de trahison & de faulx tesmoignage :
Cqu'il est conseiller infidele iuge pariure, magistrat
 concussionnaire, brief contaminé de toutes les
 meschancetez que l'homme peult commettre : &
 pour ceste cause n'est il ia besoing de plus ample-
 ment en parler. Au demourant l'ambition, enco-
 re qu'elle soit de plus belle apparēce que l'auarice,
 apporte neantmoins des pestes non moins dange-
 reuses ne moins pernicieuses qu'elle, au gouuerne-
 ment de la chose publique : car elle est ordinaire-

ment accompagnée d'audace & de temerité, d'au- D
tant qu'elle ne s'engendre point és natures basses,
ny foibles ou paresseuses, mais principalement és
fortes, actiues, & vigoureuses: & la vogue des peu-
ples qui l'enléue & la poulse bien souuent par
louanges qu'on leur donne, rend son impetuosité
bien malaisée à retenir, à manier & regir. Comme
doncques Platon escrit, qu'il faut accoustumer les
ieunes garçons dès leur enfance à ouir dire, qu'il ne
leur est pas loisible, ny de porter de l'or à l'entour
de leur corps, pour ornement, ny mesme en auoir
& posseder, pource qu'ils en ont vn autre propre E
interieur meslé avec leur ame. voulant donner à
entendre sous paroles couuertes, à mon aduis, la
vertu deriuee de leurs ancestres, par la descente &
continuation de leur race: ainsi pouuons nous re-
conforter & addoucir la cupidité de l'ambition,
en remonstrant aux esprits ambitieux, qu'ils ont en
eux de l'or qui ne se peut ternir, gaster ne contami-
ner par l'enuie, ne par Momus mesme le repreneur
des Dieux, qui est l'honneur lequel ira tousiours
croissant & augmentant, tant plus on discourra,
considerera & rememorera les choses par eux fait- F
tes & accomplies au gouuernemēt de la chose pu-
blique: & pourtant qu'ils n'auront pas besoing de
ces autres honneurs qui se moulent, qui se taillent,
ou qui se paignent, ne qui se fondent en bronze,
attendu que bien souuent, ce que plus on y prise
appartient à autre qu'à eux. Car la statue que feit
Polyclerus du Trompette, & celle du Hallebardier
sont louees, pour le regard de celuy qui les a fait-
tes

A tes, non pour le regard de ceulx en faueur de qui
 elles furent faictes. Et Caton lors que la ville de
 Rome commanceoit desia à se remplir route d'i-
 mages & de statues, ne voulut pas permettre qu'on
 en feist aucune pour luy, disant, qu'il aimoit mieux
 que lon demandast pourquoy on ne luy en auoit
 point fait, que pourquoy on luy en auoit fait : car
 ces choses-là apportent enuie, & si pensent les peu-
 ples estre redevables à ceux, à qui ils n'ont point
 baillé de telles fumees : & au contraire, ceulx qui
 les ont receuës, leur sont ennuyeux & fascheux,
 B comme ayant recherché d'auoir les affaires de la
 ville en main, à fin d'en receuoir vn tel salaire.
 Ainsi donc comme celuy qui auroit nauigué sans
 peril tout le long du gouffre de Syrtis, & puis se
 seroit venu perdre & noyer à l'entree du port,
 n'auroit pas fait rien de grand, ny de fort recom-
 mandable : aussi celuy qui se seroit sauué du tresor,
 & auroit eschappé les fermes publiques, c'est à di-
 re, qui n'auroit point souillé ses mains du larrecin
 des deniers communs, ny de mauuaise intelligen-
 ce avec les fermiers des impositions & gabelles
 C publiques, & puis se seroit laissé prendre à la cupi-
 dité de vouloir presider au palais, & d'estre le pre-
 mier au conseil de la ville : celuy-là auroit bien don-
 né contre vne plus haulte roche, mais il seroit allé
 à fond, & se seroit noyé aussi bien que les autres :
 ainsi seroit-ce de beaucoup le meilleur, n'appeter
 ny conuoitter point ces honneurs là, ains les fuir &
 refuser du tout : toutefois si d'auéture il est malaisé
 de rebouter de tout poinct vne grace & vne de-

monstration d'amitié que le peuple a quelquefois **D**
 eue de faire à ceulx qui combattent en ce champ
 de gouuernement, non à vn ieu de pris d'argent,
 ny de riches presents, ains à vn ieu veritablement
 sainct & sacré, & digne d'estre couronné, il suffise
 de se contenter de quelque honorable inscription,
 ou de quelque tableau, ou quelque decret publi-
 que, quelque rameau de laurier ou d'oliue, comme
 Epimenides en eut vn de l'oliue sacree du chasteau
 d'Athenes, pour auoir nettoyé & purifié la ville:
 & Anaxagoras, refusant tous autres hōneurs qu'on
 luy vouloit decerner, demanda seulement, que le **E**
 iour qu'il mourroit, les enfans eussent congé de
 iouer, & n'allassent point à l'eschole pour ce iour-
 là: & aux sept gentils hommes Persiens, qui tue-
 rent les Mages tyrans, on leur donna priuilege de
 porter le chapeau pointu Persien, penchant sur
 le deuant de la teste, à eulx & à ceulx qui descen-
 droient d'eux: car c'estoit le signal qu'ils auoient
 pris entre eulx, quand ils allerent pour executer
 leur entreprise. Aussi eut de la ciuilité & modestie
 grande, l'honneur que lon fait à Pittacus: car com-
 me ses citoiens luy eussent permis & commandé **F**
 de prendre de la terre qu'il auoit conquise sur les
 ennemis, autant comme il en voudroit pour luy, il
 en prit seulement autant, que contenoit le iect de
 son iauelot qu'il lancea: & le Romain Cocles eut
 autant de terre comme il en peut labourer en vn
 iour, estant boiteux: car il ne fault pas qu'un hon-
 neur ciuil soit salaire d'un acte vertueux fait pour
 le public, ains marque pour la souuenance seule-
 ment,

A ment, à fin que la memoire en demeure plus longuement, comme ont fait ceux que nous auons recitez. Là où les trois cents statues de Demetrius le Phalerien n'engendrèrent iamais rouille, ny crasse & ordure, ains furent toutes de son viuant mesmes abbatues, & celles de Demades furent fondues, & en fait on des vrinaux, & bassins à selles percees, & plusieurs autres tels honneurs ont esté de mesme effacez, aians despleu & fasché au monde, non seulement pour la mauuaistié de ceux qui les receuoient, mais aussi pour la grandeur de ce qu'on leur donnoit : & pourtant la plus honeste & plus seure garde de l'honneur pour le faire longuement durer, c'est la sobriété, & simplicité, pource que les honneurs excessifs & demesurez en grandeur, sont ne plus ne moins que les statues mal contrepesees & mal proportionnees, lesquelles se ruinent & tombent par terre d'elles mesmes: i'appelle maintenant hōneurs ces choses exterieures, comme fait le vulgaire, en tant qu'il est loisible, comme dit Empedocles: toutefois i'affirme aussi bien que les autres, que le sage homme d'estat & de gouuernement ne doit point mespriser le vray honneur, qui gist en la beneuolence & bonne affection de ceulx qui ont souuenance des seruices & biens qu'ils ont receuz, ny ne doit point cōtemner la gloire, fuyant le plaisir à ses prochains, ainsi que vouloit Democritus, car ny les escuyers ne doiuent pas reietter les caresses de leurs cheuaux, ny les veneurs les festes de leurs chiens, ains les doiuent plus tost chercher, pource que c'est chose vtile & plaisante de pou-

uoir imprimer à tels animaux, qui nous sont familiers, & viuent avec nous, vne telle affection en nostre endroit, comme le chien de Lyſimachus monſtra enuers ſon maïſtre, & que le poëte Homere recite des cheuaux d'Achilles enuers Patroclus. Et quāt à moy i'eſtime, qu'il en prendroit mieulx aux abeilles, ſi elles vouloient careſſer, & laiſſer amiablemēt approcher d'elles ceux qui les nourriſſent, & qui les traittēt & ont ſoing d'elles, plus toſt que de les picquer, & de ſaigrir ſi aſpremēt contre eux: mais maintenant les hommes auſſi les chaſtient avec de la fumee, & dontent les cheuaux farouches avec des mors de bride, & les chiens ſubiects à ſ'enfuir, ils les attachent à des billots de bois: là où il n'y a rien qui rende l'hōme libre volontairement obeïſſant, & ſe ſoubmettant à vn autre homme, que la fiance qu'il a en luy pour l'amour qu'il luy porte, & l'opinion qu'il a conceuē de ſa bonté & de ſa iuſtice. C'eſt pourquoy Demoſthenes dit bien, que les citez libres n'ont point de meilleur moien pour ſe garder & preſeruer des tyrans, que de ſe deſſier d'eux: car celle partie de l'ame qui croit & qui ſe fie, eſt celle qui eſt la plus aiſee à prendre. Tout ainſi donc comme le don de prophetie qu'auoit Caſſandra, ne ſeruoit de rien à ſes citoiēs, d'autant qu'ils ne luy croyoient point,

Dieu n'a voulu que ma voix prophetique
 Portast effect à la choſe publique:

Car quand ils ont receu quelque meſchef,
 Tant que le mal leur poiſe ſur le chef,
 Je ſuis par eux alors ſage appellee,

A Mais au surplus folle & eceruëlee:
 ainsi la foy & bienveillance des citoiens d'Archytas & de Battus enuers eulx apportèrent de grands profits aux vns & aux autres qui se voulurent seruir d'eux, & suiure leur conseil, pour la bonne opinion qu'ils en eurent : aussi est-ce le premier & principal bié qui soit en la reputation des hommes de gouuernement, la foy & confiance que lon a en eux, laquelle leur ouure la porte à faire toutes bonnes actions: le second bien est l'amitié & bienveillance du peuple, qui est aux bons vn bouclier
 B & vn rempar grand à l'encôtre des enuieux & des meschants,

Comme la mere empesche que la mousche

Son fils dormant de doux sommeil ne touche, destournant l'enuie qui peult sourdre à l'encontre d'eux : & quant au credit egalant celuy qui sera né de bas & petit lieu aux plus nobles, le pauvre aux riches, & le priué au magistrat : brief quand vertu & verité sont conioinctes à ceste beneuolence populaire, c'est comme vn vent fort & gaillard en poupe, qui les poulse à toute entremise de gouuernement. A l'opposite aussi peult on voir quels effects produit la disposition contraire és cœurs du peuple, par tels exemples: car ceux d'Italie aians surpris la femme & les enfans du tyran Dionysius, apres les auoir forcez & violez honteusement, les feirent mourir, & puis en aiant bruslé les corps, en jetterent les cendres dedás la mer. Au contraire, vn Menander aiant regné doucemēt sur les Bactriens, & estant à la fin mort en la guerre, les villes de son

obeissance feirent bien ensemble, & par commun d'accord, les funerailles & obseques : mais quand ce vint à sçauoir où lon en logeroit les reliques, elles en vindrēt en tresgrāde contention les vnes contre les autres, qu'elles pacifierēt à la fin à grāde peine, sous condition que ses cendres seroient partagees également entre elles, & qu'en chascune y auroit vne sepulture de luy. A l'opposite, ceulx d'Agri-gente apres qu'ils furēt deliurez du tyran Phalaris, feirent vne ordonnance, que de là en auant il ne fust loisible à aucun de porter robbe de couleur bleüe, pource que les satellites de ce tyran auoient porté des hoquetons bleus: Et les Persiens, pource que Cyrus auoit le nez aquilin, iusques aujour-d'huy aiment encore ceux qui l'ont tel, & les esti-ment les plus beaux. C'est l'amour le plus sainct, & le plus puissant de tous, que celuy que les villes & peuples portent à quelqu'un de leurs citoiens pour sa vertu: les autres honneurs, ainsi nommez à faul-ses enseignes & demōstrations de bienveillance, que les peuples donnent à ceulx qui leur font ba-stir des Theatres, iouer des ieux, distribuer de l'ar-gent, ou d'autres presens, ou de leur dōner le passe-temps de voir combattre des gladiateurs & escri-meurs à outrance, ressemblent proprement aux caresses & flatteries des putains, qui rient tousiours à celuy qui leur dōne & qui leur fait plaisir, qui est vne reputation qui ne dure gueres, ains se passe en
 „ bien peu de temps. Celuy qui dit le premier, que
 „ le premier qui donna de l'argent au peuple, ensci-
 „ gna le vray moien de ruiner l'estat populaire, en-
 tendit

A tendit bien, qu'un peuple perd son autorité, quand il se rend subiect à corruptiō: mais aussi faut-il bien que ceux qui le corrompent entendent, qu'ils se ruinent & destruisent eux-mesmes, achetans leur reputation à si grands frais & si grands despens, & rendent la cōmune plus hautaine & plus arrogante, d'autāt qu'elle presume qu'il est en sa puissance de donner ou oster vne chose grande. Ce n'est pas à dire, que ie veuille que l'hōme d'estat, es despenses ordinaires & liberalitez accoustumees, se monstre chiche & mechanique, quand ses affaires luy en dōneront le moien, par ce qu'un peuple prend en plus grande haine le riche, qui ne luy communique pas de ses biens en telles occasions, que le pauvre qui desrobbe du public, pource qu'ils estiment que l'un procede de mespris & de contemnement, & l'autre de necessitē. Parquoy ie voudrois que telles largesses premierement se feissent gratuitemēt & pour neant, d'autant que faites en ceste sorte, elles font admirer & obligent d'avantage ceux qui les reçoivent: & puis ie voudrois que ce fust tousiours pour occasion belle, bonne & honeste, comme pour l'honneur de quelque Dieu, ce qui attire tousiours de plus en plus le peuple à deuotion, pource que tout ensemble il s'imprime au cœur du peuple vne vehemente opinion & apprehension, que la diuinité & maiesté des Dieux doit estre grande & venerable chose, quand ils voient ceux qu'ils honorent, & qu'ils reputēt grands personnages, si affectionnez à despendre liberalement pour les seruir & honorer. Tout ainsi donc com-

me Platon defend au ieunes qui apprennent la musique, l'armonie Lydiene & la Phrygiene, d'autant que l'vne excité en nostre ame toutes affections plaintiues & lamentables, & l'autre augmente l'inclination à la volupté & lubricité : ainsi quant aux largesses & despenſes publiques, chaffe hors de ta ville tant que tu pourras celles qui prouoquent les affections bestiales, barbares & sanglâtes en nostre ame, ou les dissoluës & lubriques, ou si tu ne les peulx du tout chasser & oster, pour le moins fais deuoir d'en contester tant que tu pourras contre le peuple, qui te demandera de tels spectacles, & fais E que le subiect de ta despenſe soit tousiours honeste & pudique, & la fin & intention bonne & necessaire, ou pour le moins que le plaisir & ioyeuseté qui y sera, soit sans insolence ny dommage. Mais si d'aduéture tes biens sont mediocres, & que le centre & la circonferéce d'iceux ne contienne ny n'embrasse pas plus qu'il ne te fault necessairement, sçache que ce n'est ny lascheté, ny vileté & bassesse de cœur, de ceder ces ambitieuses despenſes, & laisser faire ces liberalitez à ceux qui ont bien dequoy, en confessant franchement sa pauureté, non pas en F s'endebtant & prenât argent à vsure, se faire regarder en pitié, & mocquer tout ensemble, en telles commissions : par ce que ceux qui le font ne peuvent si secrettement faire, que lon ne pense bien qu'ils entreprennent plus qu'ils ne peuuent, & qu'ils sont contraincts de molester d'emprunts leurs amis, ou de flatter & courtiser des vsuriers, tellement qu'ils n'acquierent ny honneur ny credit, ains plustost

A tost honte & mespris par telles despesnes:& pour-
tant seroit il bon , que lon eust tousiours en telles
choses Lamachus & Phocion deuant les yeux , car
Phocion vn iour comme les Atheniens en vn sa-
crifice luy criassent qu'il leur donnaist quelque ar-
gent pour faire les frais : l'aurois honte, ce leur dit-
il, de vous donner , & ce pendant ne payer pas ce-
stuy-cy . en leur monstrant Callicles l'vsurier, du-
quel il auoit emprunté. Et Lamachus és comptes
de sa charge, quand il auoit esté capitaine de l'ar-
mee d'Athenes en quelque voyage, il y mettoit
B tousiours en ligne de compte de la despesse, pour
vne paire de pantoufles, & pour vne robbe à son
vsage. Et les Theffaliens ordonnerent à Hermon,
qui refusoit d'estre leur capitaine general, par ce
qu'il estoit pauvre, vn poinçon de vin par chasque
mois, & vn minot de bled de quatre en quatre
iours:ainsi n'est-ce point honte de confesser sa pau-
ureté, & n'ont pas les pauvres moins de moien
d'acquérir credit & autorité au gouuernement
des villes, que ceulx qui despendent beaucoup à
faire des festins & des ieux publiques, pour acque-
C rir la bonne grace de la commune, prouueu que
par leur vertu ils ayent acquis foy & liberté de frā-
chement parler au peuple. Pourtant se fault il bien
sagement maistriser & moderer en telles choses,
& ne descendre pas à pied en campagne rase, pour
combatre contre des gens à cheual, ny entrer en
carriere pour faire ieux, ou sur vn eschaffault, ny
en salle de festin, estant pauvre, pour faire à l'en-
uy des riches à qui se monstrera plus magnifique,

ains fault essayer de manier le peuple par vertu, par gentillesse de cœur, bon entendement conioinct avec vne sage parole: en quoy il n'y a pas seulement vne honnesteté venerable, mais aussi vne grace attrayante & fauorable,

Plus que tout l'or de Crœsus desirable: car pour estre bon il n'est pas necessaire d'estre fascheux ne presumptueux,

Pour estre chaste & bien moriginé

On n'est pourtant feuer & rechigné,

Ne par la ville on ne monstre vne trongne

Hydeuse à voir, tant elle se renfrongne:

au contraire, l'homme de bien est premierement de facile acces, affable à tous, tenant sa maison ouverte, cōme vn port de refuge pour tous ceulx qui se veulent seruir de luy. Et puis il ne monstre pas sa debonnaireté soigneuse aux negoces & affaires de ceux qui l'emploient, mais aussi en ce qu'il se va resiouir avec ceux à qui il sera arriué quelque bōne aduenture, & condouloir aussi avec ceulx auxquels il sera escheut quelque mesaduenture, ne se rendant point moleste ny fascheux à personne par vn grand nombre de valets qu'il menera quand & soy aux estuues, ny à retenir places aux theatres quand on y iouëra des ieux, ny remarquable par aucuns signes exterieurs de delices & de sumptueuse superfluité: ains estant egal & semblable au commun des autres en habillements, en despense de table, en la nourriture de ses enfans, suitte, estat & vestements de sa femme: & brief se voulāt comporter en toutes choses, comme vn simple homme

& simple citoien, n'ayant rien plus d'apparêce que l'un des autres, conseillant au reste chascun amiablement en son affaire, defendant leurs causes, comme vn aduocat gratuitement sans prendre aucun salaire, reconciliant gracieusement le mary avec la femme, les amis les vns avec les autres, n'employant pas vne petite partie du iour à la tribune aux harangues, ou au parquet de l'audience pour le public, & puis tout le reste de sa vie tirant à soy tous affaires & tous moiens de mesnager de tous costez pour son particulier profit, ainsi que lon dir que le vent de Cécias attire à soy les nues, ains ayant tousiours l'esprit tendu au soing du public, en faisant par effect apparoir, que la vie d'un sage homme de gouuernemēt, est vne continuelle action & fonction publique, non pas vne oyssiueté comme le vulgaire pense. Par ces façons & autres semblables il gaigne & attire à soy la commune, laquelle en fin vient à cognoistre que toutes les flatteries, attraiçts & allechements des autres, ne sont que faulx appasts & amorfes bastardes, au pres & à comparaison de la prudence, bonté & diligence de luy. Les flatteurs qui estoient alentour de Demetrius ne vouloient pas qu'il appellast les autres princes de son temps Roys, ains disoiēt qu'il falloit que lon nommast Seleucus, le capitaine des Elephans: Lyfimachus, garde des tresors: Ptolomeus, general de la marine: Agathocles, gouuerneur des Isles: mais le peuple encore que du cōmancement à l'aduēture ils eussent reietté le sage & prudent homme de gouuernement, toutefois à la fin apres qu'ils auront

cogneu sa verité, sa preudhommie & bonté de son naturel, ils le reputeront seul populaire, seul gouuerneur, & seul magistrat : & quāt aux autres, ils en appellerōt l'vn le defrayeur, l'autre le festoyāt, l'autre le president des ieux, & les tiendront pour tels seulement. Et puis tout ainsi que aux festins dont vn Alcibiades ou vn Callias faisoient la despense, il n'y auoit que Socrates qui parlast, & estoient les yeux de tous les conuiez tournezz sur luy seul : ainsi és villes saines & bien ordonnees Ismenias fait des largesses, Lichas dōne à soupper, Niceratus defraye les ieux, mais vn Epaminōdas, vn Aristides, vn Lyfander, sont ceulx qui tiennent les magistrats, qui gouuernent & qui commandent aux armées. Ce consideré il ne se fault point lascher de courage ny festonner pour la reputation qu'acquierēt enuers vne cōmune, ceux qui leur bastissent des Theatres, qui leur font des festins, & qui tiennent grādes maisons, pource que c'est vne gloire qui dure bien peu, & qui se dissout & s'esuanouit en fumee quand & la fin de ces combats de gladiateurs, & avec les ieux de leurs theatres, n'aians en soy rien de venerable ny de grand. Or ceulx qui sont mestier de nourrir & gouuerner des ruches d'abeilles disent, que les exaims qui resonnēt le plus, & qui font plus grand bruit sont les meilleurs, les plus fructueux, & les plus sains : mais celuy, à qui Dieu a donné la charge & le soing de l'exaim raisonnable & ciuil des hommes, iugera celuy heureux qui sera le plus doux & le plus paisible, & approuuera bien les ordonnāces & statuts de Solon en plusieurs autres choses, tafchant

A chant à les ensuyure & obseruer à son pouuoir:
 mais il doutera & s'esbahira à quoy il pësoit quand
 il escriuoit, que ceulx qui en vne sedition de ville
 ne se rengerioient à l'vne ou à l'autre des parties,
 fussent notez d'infamie: car en vn corps naturel
 malade, le commencement de mutation à recou-
 uremët de santé, ne luy vient pas des membres ga-
 ftez ny des parties malades, mais quand la tempe-
 rature des fortes, saines & entieres, est si puïssante
 qu'elle chasse ce qui est en tout le reste du corps
 contre la nature: aussi en vn peuple tumultuant en
 B sedition non dangereuse ny mortelle, ains qui soit
 pour se terminer & prendre fin, il fault qu'il y ait
 beaucoup de sain & entier, & qu'il y demeure, & se
 maintienne ensemble: car il flue & decoule des sages
 ce qui guarit & penetre à trauers de ce qui est ma-
 lade: mais les villes qui sont entieremët troublees,
 & toutes sans dessus dessous, perissent de fond
 en comble, si ne leur suruient de dehors quelque
 contraincte & quelque chastiment qui les face
 sages par force. Non pas que ie veuille dire qu'il
 faille en sedition & dissension ciuile, demourer in-
 C sensible & impassible, sans sentir aucune passion
 du mal public, en chantant son repos & sa tran-
 quillité, & sa vie heureuse & paisible, ce pendant
 que les autres se battront, en s'esuiuant de la fol-
 lie d'autrui: car c'est là principalement, où il fault
 chauffer le brodequin de Theramenes qui seruoit
 à l'vn & à l'autre pied, & parler à toutes les deux
 parties sans se ioindre ny aux vns ny aux autres:
 par ce moien tu ne sembleras pas estre aduersaire,

en estant prest à offenser, ains commun à tous en aidāt aux vns & aux autres, & ne t'apportera point d'enuie ce que tu ne te sentiras point du malheur, si tu te monstres auoir compassion également de tous. Mais le meilleur est de procurer & prouueoir que iamais ils ne viennent à ouuerte sedition, & doit on estimer, que cela est la cyme & le poinct principal de toute la sciēce ciuile de gouverner: car il est tout euident que c'est la cause des plus grands biens que les villes sçauroient desirer de la paix, de la liberté, de la fertilité, de multitude de peuple, & d'vnion & concorde: & quant à la paix pour le temps qui court aujourd'huy, les peuples n'ont pas grand besoing de sage gouuerneurs pour la leur maintenir, pource que toutes guerres, & contre les Grecs & contre les barbares, s'en sont fuies arriere de nous: & quant à la liberté, les peuples en ont autant qu'il plaist aux princes & superieurs leur en departir: & le plus, à l'aduenture, ne seroit pas le meilleur pour eulx: quant à la fertilité de la terre & abondance des fruiets, & la bonne disposition & temperature des saisons de l'annee,

Que les enfans des ventres de leurs meres

F

Sortent à temps semblables à leurs peres,
 l'homme de bien priant pour le salut d'iceulx enfans nouuellement nez, le demādera en ses prieres aux Dieux pour tous ses citoiens. Il reste donc à l'homme de gouuernement de tous les ouurages proposez, celuy qui est vn bien non moindre que pas vn des autres, c'est de faire qu'il y ait tousiours amitié, vnion & concorde entre ses citoiens, & chasser

A chasser hors de sa ville toutes dissensions, toutes querelles & toutes malveuillances, comme entre communs amis, en reconfortant premierement la partie qui semblera estre plus offensée, & môstrant de s'en sentir offensé aussi bien comme eux, & qu'il luy en fait aussi grand mal comme à eux : & puis petit à petit tascher à les adoucir & à leur donner à entendre, que ceux qui fleschissent & qui chalent la voile vn petit, surmontent ordinairement ceux qui s'opiniastrét à vouloir gagner à toute force, & surmontent non seulement en douceur & bonté

B de nature, mais aussi en grandeur de courage & en magnanimité : & qu'en pliant & cedant en quelques petites choses, ils gagnent en de tresbelles & tresgrandes : & puis apres en remonstrant en particulier à chascun, & en public à tous, & leur declarant la petitesse & foiblesse des affaires de la Grece, & qu'il est beaucoup plus expedient aux hommes de bon & sain iugement, iouir du fruiet & du bien qu'il y a en ceste imbecilité, en viuant en paix & en concorde les vns avec les autres, attendu que la fortune ne leur a laissé au milieu, aucun grand

C & digne pris à gagner pour tous leurs efforts. Car quelle gloire, quelle authorité, ne quelle puissance demourera à ceux qui gagneront & qui demoureront les maistres, que le Proconsul avec vn simple mandement ne renuerse & ne trāsporte en vn autre toutes & quantesfois qu'il luy plaira, encore que quand elle demoureroit, elle ne meritaist pas que lon en feist autrement grand cas. Mais comme le plus souuent les grands embrasements de feu ne

commencent pas aux edifices saints & sacrez ny d
 publiques, ains sera par le moien d'une lampe que
 lon aura laissé tomber sans y penser, en quelque
 pauvre & petite maison, ou bien quelque paille
 que lon bruslera, qui iettera soudain vne grande
 flamme, dont il aduient apres vne grande & publi-
 que perte de plusieurs bastiments: aussi n'est ce pas
 tousiours par les contentions & dissensions tou-
 chant les affaires publiques que les seditions des
 villes sallument, ains bien souuent les querelles
 & riottes yssues de negoces particuliers, & proce-
 dees iusques au public, ont mis sans dessus des-
 sous toute vne ville. Au moien de quoy il appar-
 tient à l'homme politique autant que nulle autre
 chose, d'y prouueoir & remedier, à fin que tels dif-
 ferents ou ne naissent point du tout, ou qu'ils soient
 bien tost assopis, & qu'ils ne croissent point, ou
 pour le moins qu'ils ne touchent point au public,
 ains demeurent entre ceux qui les auront eueus:
 en considerant luy mesme & le donnant à enten-
 dre aux autres, que les priuez débats sont à la fin
 cause des publiques, & les petits des grands, quand
 on les neglige, & que lon n'y vse pas des remedes
 conuenables dès le commencement. Comme lon
 tient que le plus grand mouuement de sedition ci-
 uile qui fut oncques en la ville de Delphes, aduint
 par le moien de Crates, duquel Orgilaus fils de
 Phalis estant pres à espouser la fille, il arriua par cas
 d'aduenture que la coupe, de laquelle on deuoit
 premierement faire les effusions de vin en l'hon-
 neur des Dieux, & boire puis apres l'un à l'autre
 par

A par les ceremonies nuptiales, se rôpit en deux piéces d'elle mesme : ce que ledit Orgilaus prenant à mauuais presage, abandonna l'espousee, & s'en alla sans rien acheuer avec son pere: peu de iours apres, ainsi comme ils faisoient vn sacrifice aux Dieux, Crates leur feit supposer quelque vase d'or, de ceux qui estoient sacrez & dediez au temple, & ainsi feit precipiter du haut en bas de la roche de Delphes, sans autre iugement ny forme de procès, comme sacrileges manifestes, Orgilaus & son frere: & depuis encore feit mourir aucuns de leurs paréts & amis, bien qu'ils suppliaissent qu'on les laissast iouir de la franchise du temple de Minerue prouidente, dedans lequel ils s'en estoient fuis, & s'estants commis plusieurs tels meurtres, les Delphiés à la fin feirent mourir ce Crates & ceux qui avec luy auoient emeu la sedition, puis de l'argent procedé de la confiscation des excommuniez, ainsi qu'on les appelle, ils feirent bastir les temples qui sont au bas de la ville. Et à Syracuse de deux ieunes hommes qui auoient grande familiarité ensemble, l'un s'en allant hors du païs laissa en garde à c l'autre vne siene concubine iusques à ce qu'il fust de retour: l'autre en l'absence de son amy la corrompit, & son compagnon à son retour l'aiāt sçeu, feit tant qu'il desbaucha & adultera la femme de l'autre: & y eut lors vn des plus anciens Senateurs qui meit en auant au cōseil, que lon les bannist de la ville tous deux, deuant qu'ils fussent cause de la mettre en combustion & de la perdre en la remplissant de haines & d'inimitiez: ce qu'il ne peut pas

persuader tellement que le peuple entrant en sedi-
tion, par grandes calamitez ruina vn tres bon gou-
uernement. Tu as aussi des exemples domestiques
de Pardalus & de Tirrhenus qui cuiderēt destruire
& ruiner la cité de Sardis, pour causes legeres &
priuees, l'ayant iettée en guerres & rebellions par
leurs factions & inimitiez particulieres: pourtant
faut il que l'homme de gouuernement soit tous-
iours au guet, & qu'il ne mesprise pas non plus
qu'en vn corps naturel les cōmancements des ma-
ladies, les petites hargnes, qui courent aiseemēt de
l'vn à l'autre, ains qu'il les arreste, en y remediand
de bonne heure: car en y ayant bien l'œil, ce qui
estoit premierement grand deuient petit, & ce qui
estoit petit se reduit à neant: or pour les bien indui-
re & persuader à ce faire, il n'y a point de meilleur
artifice ny de plus grand moien, que de se mōstrer
foy-mesme facile à pardonner, & aisé à reconcilier
en semblables differents, demourāt en ses premie-
res causes & raisons sans rancune, & n'adioustant
à pas vne ny opiniastrété, ny cholere, ny autre pas-
sion qui puisse engendrer vne aspreté & vne ai-
greur és disputes necessaires & que lon ne sçauroit
euitier. Car aux cōbats & escrimes des poings que
lon fait par plaisir nud à nud, on a accoustumé de
munir les mains de mouffles rondes, à fin que quād
les combattans viennent à s'eschauffer il n'en puisse
arriuer aucun maling accident, estans les coups
mols, & ne pouuans faire grande douleur: aussi és
procés & differents qui suruiennent entre les citoiēs
d'vne mesme ville, le meilleur est de combattre, en
deduisant

A deduisant ses moiens, raisons & arguments tout simplement & nuement, sans aigrir ny enuenimer les affaires, comme les traictés, en y faisant des incisions, ou en les empoisonnant par iniures, par obstinations malignes, & par menasses, pour rendre le mal incurable, & l'augméter, de sorte qu'il vienne à toucher iusques au public: car celuy qui se portera ainsi en ses propres affaires enuers ses parties, viendra facilement à bout aussi des autres: & depuis que lon a vne fois osté les occasions particulières des malveillances priuees, les picques & **B** discordes, que lon a à cause du public, sont faciles à pacifier, & n'apportent iamais inconueniens irremediables ny malings.

SI L'HOMME D'AGE SE

DOIT ENCORE ENTRE-

mettre & meïler des affaires
publiques.



NOUS sçauons bien, seigneur Euphanes, que tu es assez coustumier de louer hautement le poëte Pindare, & que tu as souuent en la bouche ces paroles siennes, comme estans à ton aduis bien assises & veritablement dites,

Quand le combat est présenté,
Qui restiue en cherchant excuse,

Iette en profonde obscurité

D

Le bruyt de sa vertu confuse.

Mais pour autant que lon allegue ordinairement plusieurs causes & pretextes pour couvrir la paresse & faute de cœur de s'entremettre des negoces & affaires de la chose publique, & entre autres pour la derniere, cōme par maniere de dire celle de la ligne sacree, on nous amene en ieu la vieillesse, & pèse lon auoir bien trouué vn suffisant argument pour reboucher & attiedir le desir de se faire honneur par le moien d'iceluy, en nous disant, qu'il y a vn certain but, & fin limitee, non seulement à la reuolution du temps que lon est propre pour les combats & ieux de pris, mais aussi pour les affaires & negoces publiques: Il m'a semblé qu'il ne seroit point hors de propos, si ie t'enuoyois & communiquois les discours que ie fais quelquefois à par moy, sur l'ëtremise des vieilles gēs au gouuernemēt de la chose publique, à fin que nul de nous deux n'abandōne le long pelerinage que nous auons lōguement continué en chemināt tous deux ensemble iusques à présent, ny ne reiette la vie ciuile au maniement des affaires, non plus qu'il voudroit faire vn vieil cōpagnon de son aage, ny vn ancien familier amy, pour en prendre vne autre non accoustumee, & pour à laquelle se familiariser & accoustumer il n'auroit pas du temps assez: ains demourons fermes & constans en la maniere de viure que nous auons dès le commancemēt choisie, tellement que la fin de nostre viure soit aussi de bien viure, si nous ne voulons pour ce peu de tēps qui

A qui nous reste à viure diffamer le beaucoup que nous auons desia vescu, comme aiant esté despendu vainement à nulle bonne & louable intention, car la domination tyrannique n'est pas vn beau monumēt pour y estre ensepueli, ainsi cōme quelqu'vn iadis dit au tyran Dionysius, mais à luy ceste principanté acquise & iouie par voye si iniuste & si meschāte, plus elle duroit sans danger de faillir, plus elle luy estoit grande & parfaite calamité: & comme Diogenes depuis voiant son fils deuenu pauvre homme priué, de seigneur & prince qu'il estoit: ô, dit-il, Dionysius que tu es indigne de l'estat auquel tu es reduit maintenant! car tu ne meritois pas de viure icy en liberté, sans doute quelconque avec nous, ains deuois demourer par dela comme ton pere, emmuré & confiné dedans vne forteresse, pour toute ta vie, iusques à la vieillesse. Mais vn gouuernement populaire, iuste & legitime, auquel vn homme de bien a accoustumé de se monstrer tousiours, non moins en obeissant qu'en commandant, vtile & profitable au public, est à la verité vn beau sepulchre pour y estre en tel exercice honorablemēt inhumé, en adioustant à sa mort la gloire de sa vie, c'est le dernier qui descēd sous terre, comme dit Simonides, sinon à ceux en qui l'honneur & la bonté meurent premier, & en qui le zeile du deuoir se lasse & default deuant que la conuoitise des choses necessaires à ceste vie, comme si les parties diuines de nostre ame, & qui dirigent les actions, estoient plus fresles, & s'amortissoient plus tost que les sensuelles & corporelles: ce

qui n'est ny honeste à dire, ny bon à croire, non plus que ceux qui disent, que nous ne nous laissons jamais de gagner, ains plus tost faut redresser en micux, & ramener le dire de Thucydides à la verité, en ne croiant pas ce qu'il dit, qu'il n'y ait que l'ambition seule qui ne vieillisse point en l'homme, ains plus tost qu'il y ait aussi la socialité de vouloir verser & viure en compagnie, & la ciuilité de vouloir entendre & se mesler des affaires: ce qui perseuere tousiours iusques à la fin aux fourmis & aux abeilles, car iamais homme ne voit qu'une abeille par vieillesse deuint frelon, comme il y a des gens qui veulent que ceux qui ont esté toute leur vie nourris aux affaires, quand la vigueur de leur aage est passée demeurent assis, & se retirent en leurs maisons à ne rien faire, laissans estaindre & consommer la vertu active par paresse, ne plus ne moins que la rouille gaste le fer. Car Caton disoit tressagement, que la vieillesse d'elle mesme auoit assez de laideurs, sans que volontairement nous y adioustissions encore la villanie & laideur du vice: or n'y a il entre tous les vices vn qui plus diffame l'homme vieil, que fait la paresse, la delicatesse & voluptuosité, le faisant sortir d'un palais où s'exerce la iustice, ou d'une court où se tient le conseil, pour s'aller cacher en vn coing de maison, ne plus ne moins qu'une femme, ou en quelque terre aux champs, pour auoir l'œil à ce que font les moissonneurs & les glaneuses.

Mais où est or' Oedipus, & où sont
Ses tant prizez enigmes?

A ainsi comme il y a en Sophocles. Car de vouloir commander en la vieillesse à s'entremettre des affaires, & non pas deuant, comme lon dit que Epimenides s'estant allé coucher ieune, se resueilla vieillard, cinquante ans apres: ainsi quittant & laissant vn repos si long & si fort collé avec soy par longue accoustumâce, s'aller ietter tout d'un coup en des traux & des occupations laborieuses, sans y estre duit, dressé, ny exercité en façon quelconque & sans auoir hanté personnes entendues en matiere d'estat, ny pratiqué affaires du monde,

B celui qui le feroit, donneroit à l'aduenture occasion à qui l'en reprendroit, de luy mettre au deuant ce que la prophetisse Pithia respondit vn iour à quelqu'un qui enquerroit Apollon de semblable chose,

Tu es venu bien tard me demander

Estat qui puisse au peuple commander:

Tu vas à heure indeuë & inciuile

Frapper à l'huys de la maison de ville.

comme feroit vn mal appris qui arriueroit au festin, ou vn estrangier, la nuict toute noire: tu ne changes pas de lieu ny de place, mais de vie que tu n'as iamais essayee. Car quant à ceste sentence de Simonides,

La ville enseigne & rend habile l'homme, elle est bien vraye en ceux qui ont encore du tēps assez pour estre enseignez, & pour apprendre vne science qui ne s'apprent qu'avec beaucoup de traux, longues & laborieuses occupations à toute peine, prouuen encore qu'elle rencōtre vne nature

patiente de labeur, & qui puisse aisément supporter toutes aduersitez de fortune. Ces raisons la pourroient sembler bien à propos alleguees cōtre ceux qui commenceroient en leur vieillesse à se vouloir mesler des affaires: & toutefois nous voïos au cōtraire, des hōmes de grand iugement qui diuertissent les adolescēts & les ieunes gens du gouuernemēt de la chose publique: à quoy se rapporte le tesmoignage des loix, par ordonnances desquelles à Athenes le crieur publique à haute voix appelle à la tribune pour haranguer aux assemblees de ville deuant le peuple, non les ieunes gens de gaillarde ceruelle, comme vn Alcibiades, ou vn Pythias les premiers, ains ceux qui ont passé cinquante ans, les enhortans de venir dire & conseiller au peuple ce qu'ils verront estre bon à faire:

** Icy y a faulte de quelques lignes en l'original Grec. **

Et Caton aiant esté accusé apres l'aage de quatre vingts ans, en plaidant luy mesme sa cause, dit: Il est bien malaisé, Seigneurs, rendre compte de sa vie, & la iustifier deuant d'autres hommes, que deuant ceux avec lesquels on a vescu. Et n'y a personne qui ne confesse que les actes que feit Auguste César, qui deffist Antonius, vn peu auant que de mourir, ne soient trop plus royaux, & plus profitables à la chose publique, que nuls autres qu'il ait oncques faits. Et luy mesme refrenant seuerement par bōnes coustumes & ordōnances la dissolution des ieunes gens, comme ils s'en mutinaient, il ne leur feit que dire, Escoutez ieunes hōmes vn vieillard, que les vieillards escoutoient bien quand il estoit

A estoit ieune. Et le gouuernement de Pericles eut sa plus grand' vogue & vigueur en sa vieillesse, lors qu'il persuada aux Atheniens de hardiment entrer en la guerre Peloponesiaque: mais comme importunément ils voulussent à toute force sortir de la ville, pour aller combattre soixante mille hommes de pied armez, qui fourrageoient & saccageoient leur plat pais, il s'y opposa & l'empescha, en arrachant, par maniere de dire, les armes au peuple, & feellant les serrures des portes. Mais il vaut mieux coucher les propres termes, q̃e met Xenophon

B quand il escrit du Roy Agesilaus: Quelle ieunesse, » dit-il, est plus gaillarde que n'estoit sa vieillesse? » Qui fut iamais en sa plus grande fleur & vigueur » plus formidable aux ennemis, que fut Agesilaus, » estant tout au bout de son aage? De la mort de qui » demenerét oncques les ennemis plus grande ioye, » qu'ils feirent de celle d'Agesilaus, encore qu'il fust » vieil quand il mourut? Qui estoit celuy qui asseu- » roit les alliez & confedererez, sinon Agesilaus, com- » bien qu'il fust des-ia sur le bord de sa fosse, & pres » de la fin de ses iours? Quel ieune hōme regretterét » onc les siēs plus amerement que luy mort, quelque » vieil qu'il fust? Le long tēps que ces grands person- » nages auoient vescu ne les empeschoit pas de faire de si belles & si honorables choses: & maintenant nous autres faisons les delicats au gouuernement des villes, où il n'y a ny tyrānie à cōbattre, ny guerre à cōduire, ny siege à soustenir, ains seulement des debats & contentions ciuiles entre des citoiens, & quelques emulations, lesquelles se vident pour

la plus part par la loy, avec paroles, & par la iustice, nous tirons le pied arriere de peur, en nous monstrant plus lasches & faillis de cœur, ie ne diray pas que ces anciens capitaines là & gouuerneurs du peuple, mais aussi que les poëtes, les sophistes, & les ioueurs de comedies & tragedies du temps passé, sil est vray, comme il est, que Simonides en sa vieillesse emporta le pris d'auoir le mieux ordonné sa danse, ainsi que tesmoignent ces derniers vers d'un Epigramme qui en fut fait,

Quatre vingts ans auoit Simonides

Athenien, fils de Leoprepes,

Quand il gaigna l'honneur de la carolle.

Aussi dit on que Sophocles estant appelé en iustice par ses propres enfans, qui luy mettoient sus qu'il radottoit, & estoit retourné en enfance pour son grand aage, à fin que par autorité de iustice il luy fust baillé curateur, leut deuant les iuges l'entree du Chorus de sa tragedie, que lon surnomme Oedipus en Colone, qui se commance ainsi:

Estranger tu as faict entree

En ceste fertile contree

Par le bourg Colone nommé,

Pour ses bons cheuaux renommé,

Là où le gracieux ramage

Du Rossignol fait le boccage

Des vaux verdoyans resonner

Plus qu'ailleurs on ne l'oyt sonner.

Et pource que le cantique en pleur merueilleusement à l'assistance, chascun se leua, l'accompagna, & le reconuoya iusques en sa maison, avec grandes

A des acclamations de ioye, & battements de mains à son honneur, cōme lon faisoit au sortir du Theatre, quand il auoit fait iouer quelqu'vne de ses Tragedies. Il est bien certain que ce petit epigramme est de luy,

Quand Sophocles ce cantique escriuoit
Pour honorer Herodote, il auoit

Desia vescu cinquante & cinq annees.

Philemon & Alexis tous deux poëtes Comiques, la mort les prit qu'ils faisoient encore iouer sur la scene leurs Comedies, & en gaignoient le pris. Et Pôlus le ioueur de Tragedies, Eratosthenes, & Philochorus escriuent, qu'il auoit soixante & dix ans qu'il ioïa encore huiët Tragedies, en l'espace de quatre iours, vn peu au parauant qu'il mourust. N'est-ce doncques pas vne grande honte, que les vieillards qui ont faict profession de haranguer au peuple de dessus vne tribune, de seoir en chaire de iudicature pour exercer la iustice, se monstrent moins genereux, & moins magnanimes que ceux qui ont fait toute leur vie mestier de iouer des ieux sur vn eschaffaut, & que quittant les ieux & cōbats qui sont veritablemēt sacrez, ils despouillēt la personne ciuile d'homme d'honneur se meslant du gouuernemēt de la chose publique, pour en prendre ie ne sçay quelle autre: car de vouloir quitter la dignité royale pour prendre le personnage d'vn laboureur, c'est chose trop basse & trop mechanique: & veu que Demosthenes dit que la galere sacree de Paralos estoit indignemēt & ignominieusement traittee: quand on s'en seruoit à apporter à

Midias du bois, des eschalats, & des moutons: si vn **D** personnage d'estat venoit à quitter l'honneur de superintédant des festes publiques de gouuerneur de la Bœoce, & de president en l'assemblée des estats des Amphictyōs, & puis apres qu'on le veist s'amuser à faire mesurer de la farine, du marc de raisin, ou bien à peser des toisons de laine, ne seroit ce pas proprement cela qu'on dit en cōmun proverbe, la vieillesse d'un cheual, sans que personne l'y contraigne? Mais encore de se mesler d'aucune manufacture mechanique, ny d'aucune traffique de marchandise, apres auoir eu office de gouuer- **E** nement en la chose publique, ce seroit autant cōme despouiller vne Dame honeste & de bonne maison de ses beaux vestemēts, & luy bailler quelques haillons pour couvrir sa vergongne, la faisant tenir en vn cabaret: car toute la dignité, toute la grandeur & honesteté de la vertu politique se pert quand on la raualle iusques à des mesnageries, espargnes & traffiques si basses & priuees. Mais si (qui est le seul poinct qui reste) ils appellent viure doucement, & iouir de ses biens, que se laisser aller aux delices & aux voluptez, & qu'ils cōuient l'hō- **F** me politique à se laisser aneātir peu à peu, en vieillissant en icelles, ie ne scay auquel des deux tableaux & exemples, tous deux villains & deshonestes, ceste sienne vie seroit plus tost comparable, ou à des mariniers qui voudroiet tout le reste de leur vie solenniser la feste de Venus, n'estant pas encore leur nauire dedans le port, ains l'ayant laissée cinglant en haute mer, ou biē à Hercules que d'aucuns
 peintres

A paintres en se iouant, mais mal & irreueremment
 pourtant, paignent, comme fil estoit au palais
 royal de la royne de Lydie Omphale, vestu d'une
 cotte de damoiselle, se laissant souffletter & tresser
 aux filles & femmes de la Royne: ainsi nous des-
 pouillans l'homme d'estat de sa peau de lion, c'est
 à dire, de son courage magnanime, de vouloir tou-
 iours profiter au public, & le mettans bien à son
 aise à table, le traiterons magnifiquement, & luy
 remplirons les oreilles du son des flustes & autres
 instruments de musique, n'aiants pas au moins
B honte de l'honeste reprimende que donna iadis
 Pópeius le grand à Lucullus, lequel apres ses guer-
 res & cōduittes d'armees s'estoit adonné à baings,
 estuues, festins, à entretenir femmes, & faire l'a-
 mour sur iour, & plusieurs autres telles dissolutiōs
 & superfluitez, à bastir de somptueux edifices, re-
 prochant cependant à Pompeius, qu'il estoit am-
 bitieux & conuoiteux de dominer, oultre ce que
 son aage ne le comportoit: car Pompeius luy res-
 „ pōdit, Je croy qu'il est plus hors d'aage à vn hōme
 „ vieil d'estre dissolu & superflu en delices, que non
C pas de vouloir commander. Et comme estant vn
 iour tombé malade le medecin luy eust ordonné
 de manger d'une griue, n'en estant pas la saison, on
 n'en pouuoit recouurer pour argēt, quelqu'un dit
 qu'il y en auoit bon nombre chez Lucullus que
 lon y nourrissoit toute l'année: il n'y voulut pas en-
 „ uoyer ny en prendre, disant, Si Lucullus n'eust esté
 „ friand & delicat, Pópeius doncques n'eust pas scē
 „ viure. Car encore que la nature requiere & re-

cherche en toute sorte de s'esgayer & de se delecter **D**
& resiouir, si est-ce que le corps des vieilles personnes ne peut plus prendre fruition des voluptez, excepté bien peu des necessaires. Et n'est pas Venus seule courroucée aux vieillards, ainsi que dit Euripide, mais encore ont ils les cupiditez du boire & du manger fort mousses, & par maniere de dire edentees, de sorte qu'ils ne font que toucher vn petit par le dessus, sans penetrer ny enfondrer au dedans. Et pourtant faut il qu'ils se preparent des plaisirs & voluptez non basses ne lasches en l'ame, cōme disoit Simonides à ceux qui luy reprochoiēt **E**
l'auarice, qu'estant priué de toutes autres voluptez corporelles à cause de sa vieillesse, il y en auoit encore vne qui l'entretenoit, c'estoit la volupté qu'il prenoit à gagner: mais la vie politique de ceux qui se messent d'affaires a de tresgrandes & treshonestes voluptez, desquelles seules ou principales il est vraysemblable que les Dieux mesmes se delectent, ce sont celles qui procedent de la beneficence de faire bien à beaucoup de gens, & de la gloire des grâdes & honestes actiōs. Car si le pain-
tre Nicias se plaisoit si fort en ses ouurages, & y **F**
estoit si affectiōné, que bien souuēt il demandoit à ses seruiteurs s'il s'estoit laué, & s'il auoit disné: & Archimedes estoit si fort attaché à son tableau, sur lequel il traçoit ses figures Geometriques, que ses seruiteurs l'en retiroient & ostoient par force, & l'huiloient: & encore ce pendant qu'on l'huiloit, il traçoit de nouuelles figures sur son corps: & Canus le iouëur de flustes que tu cognois, disoit, que les
hom-

A hommes n'entendoient pas qu'il se donnoit à luy
 mesme plus de plaisir de son ieu, qu'il ne faisoit à
 ceux qui l'escoutoient, & qui voudroient plus tost
 auoir que bailler salaire pour le venir ouyr: ne vou-
 lons nous pas imaginer en nous mesmes, combien
 les vertus apportent de grandes voluptez, des bel-
 les & louables actions qui cedent au bien public,
 & tournent au profit de tout vn peuple: non qu'el-
 les grattent ne qu'elles flattent, comme font ces
 doux & gracieux mouuements de la chair, car cel-
 les là apportent vne demangeaison impatiente, &
 B vn chattouillement inconstant & meslé d'une in-
 flammation fiéreuse: mais celles qui procedent
 des beaux & louables faicts, cōme font ceux dont
 est ordinaire ouurier celuy qui se mesle du gouuer-
 nement de la chose publique droittement, ainsi
 qu'il appartient, esleuent l'ame en vne grandeur &
 hauteſſe de courage accompagnee de ioye, non a-
 uec les ailes d'or d'Euripides, mais avec les ailes ce-
 lestes que dit Platon. Et qu'il soit vray, ramene toy
 en memoire ce que tu as souuentefois entédu d'E-
 „ paminondas, qu'estant vn iour enquis, quelle plus
 C grande aise il auoit iamais sentie en toute sa vie: Il
 „ respondit, que c'estoit d'auoir gaigné la bataille de
 Leuctres, son pere & sa mere estans encore viuans.
 Et Sylla comme il arriua la premiere fois à Rome,
 apres auoir nettoyé l'Italie des guerres ciuiles, il ne
 dormit point vn seul moment de toute la nuit,
 tant son ame estoit rauie d'aise & de ioye, comme
 d'un grand & violent vent, ainsi que luy mesme
 l'escrit en ses Commentaires: car ie veux bien con-

" ceder à Xenophon, ce qu'il dit, qu'il n'y a audition **D**
 " qui tant resiouisse l'ouye de l'homme, que d'ouïr
 " reciter ses louanges : mais aussi fault il que lon me
 confesse, qu'il n'y a ny spectacle, ny rememoratiō,
 ny pensement au monde qui tant apporte de plai-
 sir & de contentement à l'ame, comme fait la con-
 templation des belles & louables choses que lon a
 faittes pendant que lon a esté en administration
 d'offices & de charges, comme en lieux clairs &
 publiques. Il est bien vray que le gré & la grace
 amiable que lon en acquiert, accompagnant touf-
 iours les actes vertueux & la louāge du peuple fai- **E**
 sant à l'enuy à qui en dira plus de bien, guide qui
 l'achemine à vne iuste benevolence, adiousté com-
 me vn lustre & vne polissure resplendissante à la
 ioye de la vertu, & ne fault pas par negligēce laisser
 comme fener & secher en vieillesse la gloire de ses
 faicts, ne plus ne moins qu'une couronne que lon
 auroit acquise & gaignee aux ieux sacrez, ains fault
 en produisant tousiours quelque nouveau & recēt
 merite, resueiller la grace des precedents, & la ren-
 dre de tant plus grande & plus asseuree : car ainsi
 comme les charpentiers & ouuriers qui auoient **P**
 charge d'entretenir entier le galiō Deliaque, subro-
 geās tousiours d'autres pieces de bois, & les clouās
 au lieu de celles qui estoient gastees, l'ont conserué
 sain & entier depuis le temps qu'il fut premiere-
 ment fabriqué : ainsi fault il faire de la reputation,
 & n'est pas malaisé d'entretenir vne gloire, nō plus
 que vne flamme, en y mettant tousiours dessōbs
 de petits soustenements, mais depuis qu'elles sont
 vne

A vne fois du tout estaintes & refroidies, alors ce n'est pas peu d'affaire, que de les r'allumer & l'une & l'autre. Et comme Lampis ce riche marchand, enquis comment il auoit gaigné ses biens, respondit,

» Les grands, bien tost & facilement : & les petits, à

» grād' peine & en long temps : aussi n'est il pas bien aisé au commencement d'acquérir la reputation, le credit & l'autorité ciuile au maniement des affaires, mais l'augmenter depuis que le fondement en est posé, & la conseruer & entretenir grande avec peu de moien, il n'est pas malaisé, ne plus ne moins

B que vn amy, depuis qu'il est vne fois acquis ne requiert pas plusieurs & grāds plaisirs & offices d'amitié pour demourer amy, ains par petis signes la continuation conserue tousiours la beneuolence: aussi l'amitié d'un peuple, & la foy & creance qu'il a vne fois prise d'un personnage, encore qu'il ne puisse pas tousiours exercer ses largesses enuers luy, ny defendre sa cause, ny tenir vn magistrat, s'entretient neantmoins quand le personnage se monstre seulement auoir bonne volonté, & qu'il ne se lasse point de prendre peine & sollicitude pour le bien

C public: car les expeditions mesmes de guerre n'ont pas tousiours des batailles rengées, ny des combats & escarmouches ordinaires, ny des sieges de villes, ains ont quelquefois aussi parmy des sacrifices, des festins en compagnie, & beaucoup de loysir à vacquer à jeux & passe-temps. A plus forte raison doncques, pourquoy doit on craindre s'entremettre du gouuernement de la chose publique, comme si c'estoit vne charge insupportable,

pleine de trauaux innumerables fans aucune con- D
 folation, veu qu'il y a parmi des ieux, des theatres,
 des processions, des monstres, des donnees & lar-
 gesses publiques, des danſes, de la muſique, des fe-
 ſtes, & touſiours l'honneur de quelque Dieu, qui
 reſoult & diſſipe tout le ſoucy & toute l'austerité
 d'un palais, & d'un Senat & conſeil, rendant beau-
 coup plus de plaſiſir & de contentemēt, que lon n'y
 reçoit de trauail, & de deſplaſiſir : pour le moins, le
 mal qui eſt le plus à craindre, & le plus faſcheux en
 telles adminiſtrations, c'eſt à ſçauoir l'enuie, ſ'atta-
 che beaucoup moins à la vieilleſſe qu'à nul autre E
 aage: car comme ſouloit dire Heraclitus, les chiens
 meſmes abbayēt ceux qu'ils ne cognoiſſent point,
 auſſi l'enuie combat alencontre de celui qui com-
 mance à venir au gouuernement, à l'entree de la
 tribune & du ſiege preſidial, & taſche de luy en
 empescher le paſſage : mais depuis qu'elle a accou-
 ſtumé la gloire d'un homme, & qu'elle a eſté nour-
 rie avec elle, elle la porte doucement, & ne ſ'en faſ-
 che ny ne ſ'en tourmēte plus. C'eſt pourquoy quel
 ques vns comparent l'enuie à la fumee, car elle ſort
 groſſe & eſpeſſe du cōmancement que le feu com- F
 mance à prendre, mais apres qu'il eſt tout allumé
 & clair, elle ſ'en va : & en toutes autres preceden-
 ces les hommes couſtumierement en debattent &
 querellent, comme de vertu, de nobleſſe, de dili-
 gence, aians opinion qu'ils ſ'en oſtent autant à eux-
 meſmes comme ils en cedent aux autres, mais la
 precedence du temps qui proprement ſ'appelle
 Preſbion, comme qui diroit l'hōneur de vieilleſſe,
 il n'y

A il n'y a personne qui en soit ialoux, & qui ne le cede volôtiers à son cōpagnon. Et n'y a sorte d'honneur à qui conuiene mieulx ceste qualité, qui honore plus celuy qui le defere, que celuy à qui il est deferé, que fait l'honneur qu'on donne aux vieilles gens: d'auantage tous n'esperent pas d'auoir quelquefois le credit des richesses, ou la force de l'eloquence, ou de sapience: là où il n'y a pas vn de ceux qui se meslent des affaires publiques qui desespere de paruenir vn iour à celle gloire & reuerence, à la quelle la vieillesse cōduit l'homme. Par-

B quoy celuy qui apres auoir combattu longuement alencontre de l'enuie, se retireroit à la fin de l'administration publique, quand elle feroit appaisée, & presque toute amortie & estaincte, feroit ne plus ne moins que vn pilote, qui en tourmente aiant vent & marée contraire, auroit cinglé & nauigué en grand danger, & puis quand le beau tēps & le doux vent seroit venu, chercheroit à se mettre à l'abry & à l'ancre, abādonnant avec les actiōs publiques, les compaignies, alliances, & intelligences qu'il auoit avec ses amis: car plus il y a esté de

C temps, & plus il y doit auoir fait d'amis & de cōpagnons, lesquels il ne peult pas tous emmener quād & luy, comme fait vn maistre de carolle tous ses baladins, ny n'est pas aussi raisonnable qu'il les abandonne: ains comme il n'est pas aisé d'arracher vn arbre vieil & ancien, aussi n'est il pas vne vie ciuile en administration publique, laquelle doit auoir fait plusieurs grandes racines, & s'estre entrelassée en plusieurs grands affaires, lesquels dōnent

plus de troubles & de harassemens à ceux qui s'en retirent, qu'à ceulx qui y demeurent : & là où il seroit bien encore demouré quelque reste d'enuie ou d'émulation des combats precedents en l'administration ciuile, il est bien meilleur de l'estaindre par puissance, que non pas donner le dos, en s'en allant tout nud & tout desarmé : car les enuieux & malveillans n'assaillent pas tant par enuie ceulx qui leur font teste, & qui tiennent bon, comme ils font par mespris ceulx qui se retirent : à quoy s'accorde ce que dit iadis le grand Epaminondas aux Thebains : car comme les Arcadiens les conuiassent d'entrer dedans leurs villes, durant l'hyuer, & se loger à couuert, il ne leur voulut pas permettre : car maintenant, dit il, qu'ils vous voient exercer & lucter tous armez, ils vous ont en grande admiration, comme vaillants hommes : mais s'ils vous voyoient au long du feu brayans des febues, ils vous reputeroient semblables à eulx : aussi veu- ie inferer, que c'est vne chose venerable que de veoir vn vieillard parlant en public, de peschant affaires, honoré d'un chascun : mais celuy qui ne bouge tout le iour d'un liect, ou bien d'un coing de galerie à cacquetter, ou à cracher & moucher, celuy là est facile à estre mesprisé. Homere mesme le nous enseigne, à qui bien considere ce qu'il escrit : car le vieillard Nestor estant à la guerre deuant Troye, estoit en honneur & reputation, & au contraire Peleus & Laërtes qui demourerent à la maison, furent reiettez & mesprisez. Car l'habitude de prudence ne demeure pas semblable ny pareille en ceulx

A en ceulx qui se laschent, ains par nonchalance & oysifueté se diminue, & se dissout petit à petit, ayant tousiours besoing de quelque exercitation de soing qui luy resueille l'esprit, aguise & esclarcisse son discours de raison à demesler affaires:

Comme le fer est clair & reluisant

Tant que la main de l'homme en va vsant,

Et la maison où ne se tient personne

Auec le temps du toict en terre donne.

Et n'est pas la foiblesse & imbecilité du corps vn si grand mal pour le gouuernemēt de ceulx qui hors
B d'aage montent en la tribune aux harengues, au siege presidial ou au palais des capitaines, comme est le bien que la vieillesse leur apporte, à sçauoir la circonspection retenue & la prudence, & le non s'estre ietté à l'estourdie au maniemēt des affaires, abusé en partie de faulte d'experience, & en partie de vaine gloire tout ensemble, & puis y tirer la commune, comme vne mer troublee & agitée des vents, ains traitter & negocier doucement auec ceulx qui ont affaire à eux. Voyla pourquoy les villes, quand elles ont reçu quelque mauuaise secousse, ou bien qu'elles la craignent, alors elles demandent estre regies & gouuornees par hommes vieux & experimētez, tellement que bien souuent elles ont tiré par force de sa maison des champs vn bon vieillard qui ne pensoit ny ne demandoit rien moins, & l'ont contrainct de mettre la main au timon pour remettre les affaires en seureté reiettant ce pendant arriere des beaux harengueurs qui sçauoient crier bien hault, & prononcer

de longues clauses tout d'une halence sans respirer, D
voire & des capitaines qui eussent à la verité bien
peu aller vaillamment affronter & combattre les
ennemis. Comme vn iour à Athenes les orateurs
despouillans deuant Timotheus & Iphicrates qui
estoient desia vieux, vn nommé Chares fils de
Theochares estant en fleur d'age, & fort & ro-
buste de la personne, disoient qu'ils desireroient
que celuy qui auoit à estre Capitaine general des
Atheniens fust tel & d'age & de corpulence: Non
pas, dit Timotheus, Dieu nous en gard: mais ouy
bien son valet qui auroit à porter son mattelas
apres luy: & quant au Capitaine general, qu'il
falloit que ce fust vn personnage, qui sceust re-
garder & deuant & derriere les affaires, & qui ne
se laissast emporter, ny troubler les conseils & re-
solutions qu'il auroit prises pour le bien public
par aucune passion. Car Sophocles estant ia deue-
nu vieil, disoit qu'il estoit bien aise d'estre eschappé
de l'amour, comme de la subiection d'un maistre
furieux & enragé: mais en l'administration de la
chose publique, il ne fault pas seulement fuir vne
sorte de maistres, comme l'amour de femmes ou
de filles, ains plusieurs autres qui sont encore plus
forcenez, comme l'opiniastreté, la conuoitise de
vaine gloire, la cupidité de vouloir estre tousiours
& par tout le premier & le plus grand, vice qui en-
gendre beaucoup d'ennies, de ialousies, & de con-
spiratiōs, desquels maistres la vieillesse en esmouffe
& relasche les vns, & en refroidit & estainct du
tout les autres, ne diminuant pas tant de l'inclina-
tion

tion & affection de bien faire, comme elle retrenche des passions trop impetueuses & trop arden-tes, à fin de pouuoir appliquer le discours de la rai-son sobre, reposé & rassis, au pensément & solli-citude des affaires. Toutesfois soit à la verité, & au iugement encoré des lecteurs, allegué ce propos de Sophocles,

Demeure quoy miserable en ton liét:
pour dissuader & distraire celuy qui voudroit auec la barbe grise & les cheueux chenus, commencer encore à s'esgaillardir, & pour picquer & repren-dre vn vieillard, qui d'un long repos en sa maison, dont il ne seroit iamais bougé, ne plus ne moins que d'une longue maladie, se voudroit leuer pour s'en aller tout de primsault prédre vn office de ca-pitaine, ou vne charge de gouuerneur de ville. Mais celuy qui voudroit distraire vn qui auroit vsé toute sa vie, & seroit rompu aux administra-tions politiques & maniement d'affaires, ne luy voulant pas permettre de tirer oultre iusques au bout de la vie, & iusques à se saisir du flambeau de victoire, ains le rappelleroit d'une longue course, c pour luy faire prendre vn autre chemin: celuy là, dis-ie, seroit totalement desraisonnable, & ne re-sembleroit son discours de rien au precedant: car ainsi comme celuy, qui pour diuertir vn vieillard ia couronné de chapeau de fleurs, & parfumé pour s'aller marier, luy diroit & alleguerait ce qui en vne tragedie est dict à Philoctetes,

Qui est la femme, & qui est la pucelle

Qui pour mary te voulust au pres d'elle?

N n n

Vrayement tu es, malheureux, bien de l'aage, D

Pour maintenant entrer en mariage:

il ne seroit pas hors de propos ny impertinent, car les vieillards mesmes par ieu disent beaucoup de telles railleries d'eux mesmes,

Autant vieillard à la barbe fleurie

Pour ses voisins que pour luy se marie.

Mais qui voudroit persuader à vn mary de laisser sa femme, avec laquelle il auroit vescu en mariage, & habité longuement sans plainte ny reproche, pource que luy seroit deuenue vieil avec elle, & luy conseilleroit de viure à part, ou bien de prendre E quelque garçe au lieu de sa legitime femme, il me semble que celuy là seroit vn sot en toute perfection: aussi y auroit il bien quelque raison d'admonester vn vieillard qui sur le bord de sa fosse commenceroit à se vouloir approcher du peuple, ou vn Chlidon qui auroit esté laboureur toute sa vie, ou vn Lampon, qui n'auroit fait autre chose qu'exercer marchandise, ou quelque vn des Philosophes du verger d'Epicurus, qui veulent viure sans rien faire, & luy conseiller de demourer en son accoustumé exercice, loing de tous affaires publiques: F mais qui prendroit vn Phocion, ou vn Caton, ou vn Pericles par la main, & luy diroit, Amy estrangger, Athenien ou Romain, qui que tu sois estant ia arriué à ta seche vieillesse, fais diuorce & quitte d'ores en auant toute administratiõ publique, toutes occupations, & tous soucis, tant du conseil que de la guerre & de l'estat de Capitaine, & te retire habilement en ta maison des champs, pour y viure
le reste

A le reste de tes iours, avec ta chambriere l'agriculture, ou ton vallet, mesnage, & avec des comptes que tu examineras de tes recepueurs, il luy suaderoit choses iniques, & exigeroit d'un homme d'estat choses indignes de luy. Comment, me dira quelqu'un, n'oyons nous pas en vne comédie vn vieil soldat qui dit,

Les cheueux blancs m'excusent de m'aller

Deormais faire à la guerre enroller.

Il est bien vray, respondray-ie, mon amy : car il est requis que les seruiteurs de Mars soient en la fleur & la vigueur de leur aage, comme ceulx qui font profession des laborieux ouurages de Mars, esquels encore que la salade cache les cheueux chenus, toutesfois au dedans les membres sont aggrauez des ans passez, & la force default à la bonne volonté, mais aux ministres de Iupiter conseiller, haren-gueur & conseruateur des villes, nous ne demandons point l'œuvre des pieds ny des mains, mais de conseil, de prudence & d'eloquence, & encore non pas de celle qui soit pour exciter vn bruit, ny vn cry de ioye parmy le peuple, mais qui soit pleine de sens, meur de cōseil soigneusement propensé & seurement digeré, en laquelle apparoiſſent la barbe blanche dont lon se mocque, & les rides du front tesmoins de longue experience, qui luy adiouſtent reputation seruant beaucoup à persuader & à tourner les cœurs des auditeurs à sa volonté: car la ieunesse est faite pour suiure & obeir, & la vieillesse pour guider & commander : & est ce qui maintient & conserue les villes & estats en leur

entier, quand les conseils des vieux, & les prouës-
 ses des ieunes y ont les premiers lieux : c'est pour-
 quoy on louë grandement ces vers d'Homere,

En premier lieu ioignant la haulte naue

Du bon Nestor, il assemble le graue

Conseil des vieux capitaines vaillants.

Pour la mesme raison aussi l'oracle d'Apollo Py-
 thique appelle le conseil qui fut adioinct aux Rois
 en l'institution du gouuernement de Lacedæmo-
 ne, les Anciens : & Lycurgus mesme tout ouuerte-
 ment les appella, les vieillards : & iusques aujour-
 d'huy le conseil de Rome s'appelle le Senat, cōme
 qui diroit l'assemblée des vieillards : & comme la
 coustume & la loy donne aux Princes le diadesme,
 c'est à dire, le bandeau ou frontal, & la couronne
 sur la teste, pour la marque honorable de dignité
 & autorité royale : aussi fait la nature, les cheveux
 & la barbe blanche, pour marque du droit de pre-
 sider & de commander. Et pense quant à moy que
 ce mot *πρεσβυς*, qui signifie pris d'honneur, & *μεγαλυνω*,
 qui vault autāt comme remunerer d'honneur, ont
 esté ainsi vsitez, à cause de l'hōneur, qui est propre-
 ment deu aux vieilles gens, non pour-ce qu'ils se
 lauent d'eau chaude, ne pour-ce qu'ils couchent
 mollement : mais pour-ce qu'és villes bien ordon-
 nées ils tiennēt le rang des Rois à cause de leur pru-
 dence, de laquelle la nature ne nous laissē veoir le
 propre & parfaict bien, comme d'un arbre dont le
 fruit n'est meur iusques en l'arriere saison, sinon à
 peine en la vieillesse. Et pourtant n'y eut il pas vn
 des martiaux & plus fiers capitaines Acheïens, qui
 reprist

A reprist le grād Roy des Rois Agameimnon d'auoir
fait vne telle priere aux Dieux,

Que pleust aux Dieux que de toute la Grece
Dix conseillers i'eusse egaux en sagesse

Au vieil Nestor.

ains confessoient tous par leur silence, que non seulement en police & gouuernement, mais encore en la guerre, la vieillesse estoit de tresgrāde efficace: car comme tesmoigne l'ancien prouerbe,

» Vn bon cōseil vault mieux que plusieurs mains:
& vne sentence fondee en raison & prononcee

B avec grace persuaſiue, vient à bout de toutes les
plus grandes & plus belles actions publiques: & fil y a quelque peine, il ne s'en fault pas rebuter pour cela. Car la royauté, qui est la plus grande & plus parfaite espece de gouuernement qui soit au monde, a de tresgrands soucis, trauaux & rompements de teste, & en grande quantité: tellemēt que

» lon escrit que Seleucus disoit souuent, Si les hommes sçauoient combien il est laborieux seulement

» de receuoir & escrire tant de lettres, comme il en fault receuoir & escrire aux Rois, ils ne daigneroient

C pas seulement amasser vn diademe, quand ils le trouueroient en leur chemin. Et Philippus estant

prest de se camper en vn beau lieu, comme il fut aduertie que là n'y auoit point de fourrage pour les

» bestes: ô Hercules, dit il, quelle doncques est nostre vie, puis qu'il nous la fault accommoder, iusques à

» auoir soing des asnes! Il fauldra doncques maintenant persuader à vn Roy, quand il sera deuenu vieil, qu'il quitte le diademe, & qu'il pose la robbe

de pourpre, & se vestant d'un simple habillement, & prenant vne baguette tortue en sa main, qu'il s'en aille demourer aux champs, de peur qu'il ne semble estre trop curieux hors d'age & de saison, de vouloir regner avec des cheueux blancs: & si cela seroit impertinent & indigne d'estre dit à un Agesilaus, à un Numa, & à un Darius, Rois: pourquoy tirerons nous non plus un Solon hors du conseil d'Areopage, ny un Caton hors du Senat, à cause de sa vieillesse? Ne conseillons doncques point aussi à un Pericles d'abandonner le gouuernement populaire: car autrement encore n'y auroit il point de propos, qu'ayant monté en ses ieunes ans dedans la chaire & tribune aux harengues, apres auoir de là versé en public sur le peuple toutes les furieuses ambitions & emotions impetueuses de la ieunesse, quand l'age meur, qui a accoustumé d'apporter le bon sens, & la prudence par experience, est arriuee, quitter & repudier comme vne femme legitime le gouuernement, apres en auoir abusé longuement. Le regnard d'Æsope ne vouloit pas que le herisson luy chassast ses mouches, ne luy ostast ses tiques qui le mangeoient: car

„ si tu ostes, dit-il, ceulx qui sont desia saouls, il en
 „ viendra d'autres qui seront affamez: ainsi qui chasserait tousiours de l'administration publique les
 „ vieillards, il seroit force qu'elle se remplit de ieunes gens qui auroient vne soif trefardente de gloire & d'autorité, & point de sens politique: car d'où l'auroient ils, s'ils n'ont esté ny disciples ny spectateurs d'aucun vieillard maniant les affaires?

A Les Cartes qui monstrent l'artifice de nauiguer & de gouverner les vaisseaux en mer, ne peuuēt rendre vn marinier bon pilote, sil n'a souuent esté en la poupe luy-mesme, combattant alencontre des vagues, des vents, & de la tenebreuse tourmente:

Lors que le marinier tremblant

Desire veoir estincellant

Le feu des iumeaux Tyndarides.

Et comment doncques pourra vn ieune homme bien gouverner vne cité, donner bon conseil à vn peuple, & dire vne bonne sentence en vn Senat,
B pour auoir leu vn liure traittant du gouuernement politique, ou en auoir escrit vne declamation en l'eschole de Lyceum, si par auoir souuent tenu luy mesme les resnes en la main, & manié le timon plusieurs fois auparauāt, en oyant estriuer les Orateurs & les Capitaines les vns contre les autres, & inclinant selon les experiences & les accidents, tantost en vne part, & tantost en l'autre, en dangers & grands affaires, il n'en a de longue main acquis la suffisance? Il n'y auroit point de propos de le dire. Mais quāt il n'y auroit autre esgard, à tout
C le moins fauldroit il que le vieillard se meslast des affaires pour instruire & enseigner les ieunes: car ainsi comme ceulx qui enseignent aux enfans les lettres ou la musique, eulx mesmes entonnent premierement les chants, & lisent les lettres, pour leur monstrier comment il faut faire: aussi l'homme d'aage politique adresse & enseigne le ieune, non seulement en parlant, protecollant, & aduertissant de dehors, mais aussi en maniant mesme &

administrant les affaires, & le formant & moulant **D** vivuement, non seulement de paroles & de preceptes, mais aussi d'exēples & d'œuvres : car celuy qui est nourry & exercité en ceste maniere, non point aux escholes des Sophistes bien disans, comme en des salles de luitte, où lon oinct les corps d'une cōposition d'huyle & de cire ensemble, sans aucun danger, mais bien aux vrayx ieux publiques, Olympiaques ou Pythiques, en la veuē de tout le monde: celuy là, dis-je, suit la trace de son maistre,

Comme vn poulain suit la iument qu'il tette, ce dit Simonides. Ainsi fut Aristides sous Clis- **E**thes, & Cimon sous Aristides, Phocion sous Chabrias, & Caton sous Fabius Maximus, Pompeius sous Sylla, & Polybius sous Philopœmen: car tous ces personnages estans ieunes se sont approchez des autres vieux, & ayans pris racine, par maniere de dire, au pres d'eulx, sont creus & eleuez quand & eulx en leurs actions & administrations, dont ils ont acquis experience & accoustumance à se mesler d'affaires avec honneur & reputation. Voyla pourquoy Æschines le Philosophe Academique, comme quelques Sophistes enuieux **F** de son temps luy imposassent qu'il se vantoit d'auoir esté disciple & auditeur de Carneades, mais qu'il ne l'auoit iamais esté: Je vous dis, respondit il, que ie l'ouïs alors que son parler abandonnant le bruit & le tumulte du peuple, à cause de sa vieillesse, se resserra à profiter en priuee communication: aussi au gouuernement d'un homme d'age, non seulement la parole, mais encore les faictz estans

A estans esloignez de toute pompe affectee, & de toute vaine gloire : ne plus ne moins que lon dit que la cicoigne noire Ibis, quand elle est deuenue vieille a exhalé tout ce qu'elle auoit de forte & puante haleine, & commence à l'auoir douce & aromatique: aussi n'y a il plus rien de leger ny d'esuienté és conseils & opinions d'un homme vieil, ains y est tout graue, constant & reposé : & pourtant faut il en toute maniere, quand ce ne seroit que pour le regard des ieunes gens, que les vieux se meslent des affaires de la chose publique, à fin

B que, comme Platon dit, parlant du vin que lon mesle avec de l'eau, que c'est faire sage un Dieu furieux, en le chastiant par un autre sobre, la prudence retenue de la vieillesse meslee avec la ieunesse bouillante deuant un peuple, & transportee de couuoitise d'honneur & d'ambition, luy oste & retrenche ce qu'il y a de trop furieux, trop vehement & trop impetueux. Mais outre toutes ces raisons la, ceux qui pensent que verser au maniement des affaires publiques soit autant comme nauiguer pour son traffique, ou aller en quelque voyage de guerre, s'abusent grandemét: car le nauiguer, & le guerroyer se font à certaine fin, & cessent aussi tost que lon a atteint la fin où lon pretend, mais le verser aux affaires n'est point vne commission ou office qui ait l'vtilité pour son but & pour sa fin, ains est vne vie d'animal doux, paisible & cōpagnable, né pour viure tant qu'il plaist à la nature ciuilement, honestemét, & au bien public de la societé humaine. Et pour ceste cause faut il que l'homme verse

toufiours aux affaires, & non pas y ait verfé, comme il faut qu'il soit veritable, & qu'il soit iuste, non pas qu'il l'ait esté, & qu'il aime son pays & ses citoyens, non pas qu'il l'ait aimé: car la nature mesme nous guide à cela, & nous chante ceste leçon là, ie dis à ceux qui ne sont pas du tout corrompus de lascheté & de paresse:

Ton pere t'a en ce monde fait naistre
Pour grandement vtile aux hommes estre.

Et cest autre,

Ne nous lassons iamais de faire bien

Au genre humain.

Au demourant quant à ceux qui alleguent pour excuse la foiblesse & l'impuissance, ceux là accusent la maladie & l'indisposition, non pas la vieillesse: car il y a beaucoup de ieunes hommes maladifs, & beaucoup de vieux gaillards: tellemét qu'il ne faut pas donc diuertir les vieux de l'administration publique, mais les impuissants: ny aussi y appeller & conuier les ieunes, mais ceux qui en peuvent porter la peine: car Arideus estoit bien ieune, & Antigonus vieil: mais cestuy cy ne laissa pas tout vieil qu'il estoit, de conquerir toute l'Asie, & celuy là n'eut iamais que le nom de roy seulement, comme fil en eust ioué le rolle sur vn eschaffault, de mine, sans parler, estant toufiours vilipédé & moqué par ceux qui estoient les plus forts. Comme doncques celuy qui voudroit suader à Prodicus le Sophiste, ou à Philetas le poète, qui estoient tous deux ieunes, mais gresles, & foibles & maladifs, & la plus part du temps attachez au liét pour leur mala-

A maladie, qu'ils s'entremessent des affaires publi-
 ques, seroit vne beste sans iugement: aussi seroit
 celuy qui deffendroît à tels vieillards, comme
 estoient vn Phocion, vn Massinissa Africain, & vn
 Caton Romain, d'exercer office publique, ou de
 prendre charge de capitaine general: car Phocion
 vn iour que les Atheniens importunément vou-
 loient à toute force aller à la guerre, il commanda
 que ceux qui auroient iusques à soixante ans pris-
 sent les armes & le suiussent: dequoy eux se cour-
 rouceans, il leur respondit: Vous n'avez dequoy
 B vous plaindre, car moy qui ay quatre vingts ans
 C passez seray avec vous, vostre capitaine: & de Mas-
 sinissa Polybius escrit qu'il mourut en l'aage de
 quatre vingts & dix ans, & qu'il laissa mourant vn
 fils qui n'auoit que quatre ans, & que vn peu auât
 que mourir apres auoir deffaict les Carthaginois
 en vne grosse bataille, le lendemain on le veit
 deuant sa tente mangeant du gros pain bis, & res-
 pondit à quelques vns qui s'esmerueilloient pour-
 quoy il faisoit cela,

Comme le fer est clair & reluyfant

C Tant que la main de l'homme en va vsant,
 Et la maison où ne se tient personne,

Avec le temps du toict en terre donne,
 ainsi que dit le poëte Sophocles: autant en est il de
 ce lustre, de celle splendeur & lumiere de l'ame, de
 laquelle nous discouons, nous entendons & re-
 memorons. C'est pourquoy lon tient aussi que
 les Roys és guerres & expeditions militaires de-
 uiennent bien meilleurs que quand ils demeurent

oyseux en leurs maisons : tellement qu'on dit, que ^D
 Attalus le frere d'Eumenes, enerué d'une longue
 paix & lasche paresse, se laissoit mener par le nez à
 l'un de ses fauorits Philopœmen, qui le menoit à
 l'engrais proprement, ne plus ne moins que vne
 beste: de maniere que les Romains demandoient
 par moquerie à chasque coup à ceux qui retour-
 „ noient de l'Asie, si le roy Attalus auoit bon credit
 „ enuers Philopœmen. Lon ne trouueroit pas faci-
 lement beaucoup de capitaines Romains plus suf-
 fisans en toute sorte de guerre que fut Lucullus, ce
 pendant que par l'action il maintenoit son bon ^E
 sens en son entier : mais depuis qu'il se laissa vne
 fois aller à la vie oyseuse, & à demourer casanier en
 sa maison, sans se plus mesler d'affaires, il deuint
 tout hebeté & amorty, ne plus ne moins que les
 esponges par vn long calme : & puis il bailla sa
 vieillesse à paistre & à penser à vn sien affranchy
 nommé Callisthenes, par lequel on tient qu'il fut
 enforcélé d'un breuuage amatoire, & autres char-
 mes, iusques à ce que son frere Marcus chassant ce
 seruiteur le voulut gouuerner & cōduire luy mes-
 me le reste de sa vie, qui ne fut pas longue. Mais ^F
 „ Darius le pere de Xerxes au cōtraire disoit, qu'aux
 „ temps perilleux & affaires dangereux il deuenoit
 „ de plus en plus sage. Æleas vn roy de Scythie disoit
 luy sembler, qu'il ne differoit de rien de son pale-
 frenier quand il estoit oisif. Dionysius l'ancien en-
 „ quis vn iour, s'il estoit iamais oisif, respondit: Dieu
 „ me garde que cela iamais m'aduene: par ce que
 l'arc, comme dit le commun prouerbe, pour estre
 trop

A trop tendu se gaste & se rompt, & l'ame pour estre trop laschee. Car les musiciens mesmes s'ils discontinuent trop longuement à ouïr des accords, & les geometres à prouuer des propositions, & les arithmeticiens à s'exercer aux comptes, ordinairement, avec les actions, ils viennent à diminuer aussi par l'aage les habitudes qu'ils auoient acquises en leurs arts, encore qu'elles ne soient pas actiues, ains speculatiues: mais l'habitude politique qui est vne prudence, vn sens rassis, vne iustice, & outre cela, vne experiëce qui sçait bien en toutes occurrences

B choisir & prédre le poinct de l'occasion, vne suffisance de pouuoir par bonnes paroles persuader ce qu'il faut: ceste habitude & science la, dis-ie, ne se peut entretenir qu'en parlant souuent en public; en faisant affaires, en discourant, & en iugeant: & seroit bien estrange, si en quittant tous ces beaux exercices la, elle laissoit escouler de son ame tant de belles & de si grandes vertus: car il est vraysemblable qu'en ce faisant l'humanité, la sociale courtoisie, & la gratitude avec le temps par desaccoustumance: s'aneantissent & s'esuanouissent. Si dōc-

C ques tu auois pour ton pere Thitonius, qui fust bien immortel, mais qui pour sa grande vieillesse eust besoing d'estre tousiours bien soigneusement pensé & traicté, voudrois tu bien fuir les moïens & te lasser de luy faire seruice, de l'entretenir, de le secourir, sousbs couleur de dire que tu luy aurois seruy bien longuement? Et nostre patrie, ou nostre matric, ainsi que les Candiots la nomment, qui est encore plus vieille, qui a sur nous de plus grands

droicts & de plus estroictes obligations que n'ont ny le pere ny la mere, bié qu'elle soit de longue duree, si n'est elle pas neantmoins sans vieillir, ny aiant en soy tout ce qu'il luy faut, ains a tousiours besoing d'un grand œil sur elle, de grand secours & de grande vigilance, elle tire à soy & retiét l'homme d'honneur politique,

En le tirant par la robbe derriere,

Et le gardant qu'il ne s'en aille arriere.

Tu sçais qu'il y a ia plusieurs Pythiades, c'est à dire, plusieurs termes de cinq annees que l'exerce la presbtrise d'Apollo Pythien, toutefois ie croy que tu ne me voudrois pas dire: Plutarque, tu as assez sacrifié, tu as assez faict de processions, tu as assez mené de danfes: maintenant que tu es vieil & ancien, il est tēps que tu quittes la couronne qut tu as sur la teste, & que tu abandonnes l'oracle, à cause de ta vieillesse: aussi ne faut il pas que tu pèses, qu'il te soit loisible maintenant, à cause de ton grand aage, abandonner le sainct seruice de Iupiter, garde des villes & presidant aux assemblees de cōseil de ville, toy qui es souuerain presbtre & grād prophete des sainctes ceremonies de la religion politique, en laquelle tu as de si longue main faict profession: mais laissant à part, si tu me crois, tous ces arguments qui pourroient distraire & retirer l'homme vieil de l'administration publique, considerōs & discourons vn petit sur cecy, que nous ne faciōs entreprendre à la vieillesse aucun trauail qui luy soit trop grief ou indigne d'elle, attendu qu'au gouuernement vniuersel de la chose publique, il y
a beau-

A a beaucoup de parties bien seantes & conuenables à l'aage, auquel toy & moy de present sommes arriuez : car ainsi comme si le deuoir nous commandoit de continuer de chanter toute nostre vie, il ne faudroit pas qu'estans deuenus vieux nous suyuissons les tons les plus aigus & les plus efforcez, attendu qu'il y a plusieurs diuerses tensions & differentes sortes de voix, que les musiciens appellent harmonies: ains voudroit la raison que nous prissions celuy des tons qui seroit le plus facile à nostre aage, & plus sortable à noz meurs: aussi puis-
 B que le parler & le manier affaires, est aux hommes plus selon nature toute leur vie, que non pas aux cygnes le chanter iusques à la fin, il ne nous faut pas abandonner l'action comme vne lyre qui seroit trop hautainement montee, mais il la faut vn peu relascher en prenant les charges moins laborieuses, plus moderees, & mieux accordantes aux forces & meurs des vieilles gés: car nous ne laissons pas les corps mesmes sans exercice & sans mouuement quelconque, pource que desormais nous ne pouuons plus manier ny la marre à labourer la terre, ny les plombees à sauter, ny lancer la barre, ou ietter la pierre au loing, ou escrimer avec l'espee & rondelle, cōme nous auons fait autrefois, mais les vns s'exercitans à des branloires ou à se promener en deuissant doucemēt, resueillent les esprits & soufflent pour allumer la chaleur naturelle: parquoy ne nous laissons pas refroidir ny glacer du tout par paresse, ny aussi par nous trop charger de tous offices, ny vouloir mettre la main à toute ad-

ministratiō, ne cōtraignons pas la vieillesse cōuain-
cue d'impuissance de venir iusques à ces paroles,

O droicte main combien tu aurois cher

Prendre la lance & en escarmoucher,

Mais la foiblesse empesche ceste enuie.

car on ne trouue pas bon que celuy mesme qui le
peut faire, & qui est en la fleur de son aage, mette
sur ses espaules tous les affaires de la chose publi-
que, sans en vouloir laisser aller rien qui soit aux
autres, ainsi comme les Stoïques disent que fait
Iupiter se fourrant par tout & se meslant de tout
par vne insatiable cupidité de gloire, ou par enuie
qu'il porte à ceux qui en quelque sorte que ce soit
veulent auoir leur part de l'honneur & de l'autho-
rité en la chose publique. Mais à vn homme vieil,
encore que vous ostiez le decrimēt qu'il y a, ce se-
roit vne ambition fort penible & fort laborieuse
de se vouloir trouuer à toute election & sortition
d'office, & vne curiosité miserable d'espier l'heure
de tout iugement & de toute assemblee de cōseil,
& vne conuoitise d'honneur insupportable de ra-
uir toute occasion d'ambassade, & de porter la pa-
role en defension publique: car encore qu'on le
peust faire avec la grace & bienveillance d'un
chascun, si est il grief & outre la puissance de l'a-
age: mais il leur en aduient tout le contraire, car ils
sont haïs des ieunes, pource qu'ils ne leur laissent
eschapper aucune occasion ne moien de rien faire,
ny de se poulser en auant: & enuers leurs egaux,
ceste conuoitise de vouloir tenir le premier lieu
par tout, & d'auoir l'autorité de toutes choses,

n'est

A n'est pas moins diffamee & hayë que l'avarice ou la dissolutiõ en voluptez des autres vieillards. Parquoy ainsi comme lon dit, qu'Alexandre le grand ne voulât pas charger son cheual Bucephale, quãd il fut vn peu vieil, montoit sur d'autres cheuaux deuant le combat, pour aller reuisciter son armee en bataille, & apres qu'il l'auoit toute rangee en ordonnance de combattre, & qu'il auoit donné le mot, il remontoit sur luy, & tout aussi tost faisoit marcher droit contre les ennemis, & hazardoit la bataille: aussi l'homme politique, s'il a bon iugement, se regentera soy mesme quand il se sentira vieil, tenant les resnes en la main, & s'abstiendra des charges qui ne seront point necessaires, & laissera manier aux ieunes gens la chose publique en affaires de petite importance, mais en ceux de grãd pois & de grande consequence, luy-mesme y mettra la main à bon esciant, au contraire de ce que font les champions des ieux de pris publiques, qui contregardent leurs corps sans toucher aucunement ny trauailler aux labeurs necessaires, pour les employer aux superflus & inutiles: mais nous au contraire, laissant passer les petites & legeres charges, nous reseruerons aux serieuses & grandes: car à vn ieune homme, comme dit Homere, egalemēt tout luy aduient bien, tout le monde luy rit, tout le monde l'aime: s'il entreprend de petits affaires & beaucoup, on dit qu'il est populaire & laborieux: s'il en entreprend de grãds & honorables, on l'appelle genereux & magnanime: & y a des occurren-
 ces, où la temerité mesme & l'opiniaistreté ont gra-

ce & bienſeance en ceux qui ſont frais & ieunes. **D**
 Mais vn hōme d'aage, qui en l'adminiſtration publique a bien le cœur de prendre des commiſſions baſſes & viles, comme ſeroit de bailler à ferme des peages, ou de faire curer vn port, ou d'accouſtrer vne place publique, & outre d'aller en poſte en des ambaffades & voiajes deuers des ſeigneurs & des princes, où il n'y a rien de neceſſaire ny de graue à traiter, ains ſeulement pour les aller ſaluër & leur faire la court : quant à moy, à te dire la verité, mon bon amy, ie treuue cela plus toſt digne de cōpaſſion, que d'imitation: mais aux autres à l'aduenture ſemblera il faſcheux, odieux & importun : car ce n'eſt pas l'aage auquel l'hōme ſe doieue empeschier d'offices, ſi non de ceux où il y a dignité & grandeur, cōme eſt celuy que tu exerces maintenāt à Athenes, la preſidence du Senat d'Areopage : & certes auſſi la dignité de conſeiller en l'aſſemblée des eſtats generaux de toute la Grece qui ſ'appellēt Amphictyōs, que ton païs t'a deferee pour toute ta vie, où il y a vn doux labeur, & vn trauail fort aiſé à ſupporter : encore ne faut il pas pourſuiure tels honneurs, mais bien en les fuiant les exercer : ny **E** comme les demandans, ains comme refusans les accepter, ny receuoir telles charges comme pour ſ'en honorer, ains plus toſt comme ſe donnās ſoy-mefme pour honorer les charges. Car ce n'eſt pas honte ainſi que diſoit Tiberius Ceſar, à hōme qui a paſſé ſoixante ans de tendre ſon poulx à taſter au medecin, mais bien plus grande hôte eſt ce de tendre ſa main au peuple en le priant de donner ſa
 voix

voix & son suffrage à l'élection d'offices : car cela est trop vil & trop bas. Comme au contraire il y a de la grandeur venerable, & de la dignité honorable, quand le peuple a eleu vn personnage, qu'il l'appelle & qu'il l'attent sur la place, de descendre alors & sortir de sa maison, en faisant honneur & caresse à l'assistance du peuple, ambrasser & recevoir son present, digne veritablement d'une honorable vieillesse. Ainsi faut il semblablement que l'homme vieil vse de sa parole en assemblee de ville, ne sautant pas à tout propos sur la tribune aux harengues, ny ne contredisant pas ordinairement comme vn coc qui contrechante quand il en oit chanter d'autres, à tous ceux qui harengueront, ny ne debridant pas la reuerence que les ieunes gens ont enuers luy, en estriuant & s'attachant souuent de paroles à eux, & leur donnant luy mesme matiere de s'exerciter & accoustumer à luy desobeir, & à ne le vouloir plus ouir, ains faut qu'il passe outre quelquefois, ne faisant pas semblant de rien voir, ny ouir, leur permettant vn petit de brauer & de secouer le mors, sans s'y trouuer present, ny trop curieusement rechercher tout ce qui s'est ou fait ou dit, quand le danger n'y est pas grād, & qu'il n'est question ny du salut, ny de l'honneur & de la reputatiō du pais: car là il ne faut pas attēdre qu'on l'appelle, ains y faut de foy mesme aller courant outre la puissance de l'aage, en se faisant plus tost soustenir sous les bras, ou bien porter dedans vne chaire, ainsi comme on lit que feit anciennemēt le vieil Appius Claudius, lequel entendant que le

Senat Romain, apres vne grosse bataille que le roy **D** Pyrrhus auoit gaignee sur eux, se laissoit aller à recevoir propos de paix, ne le peut supporter, combien qu'il eust perdu la veüe des deux yeux, ains se fait porter à trauers la place iusques dedans la salle du Senat, & entré qu'il fut, se dressa sur ses pieds au milieu des Senateurs, en leur disant, que parauant il auoit eu regret d'estre priué des yeux, mais que lors il souhaitteroit mesme de ne rien ouïr, à fin qu'il n'entendist point les villains conseils qu'ils prenoient, & les lasches exploicts qu'ils faisoient: & apres, partie en les reprenant aigrement, partie **E** en leur remonstrant & les excitant, il fait en sorte qu'il leur persuada de remettre promptement la main aux armes pour combattre alencontre de Pyrrhus pour l'empire & seigneurie de l'Italie. Et Solon, comme les flatteries de Pisistratus, dont il abusoit le peuple d'Athenes, fussent apertement descouuertes ne pretendre à autre fin qu'à vsurper la tyrannie, & que personne n'osast entreprendre de luy faire teste, & de l'en empescher, luy seul tirât ses armes dehors, & les mettant en la rue deuant la porte de sa maison, crioit à ses citoiens qu'ils luy **F** voulussent aider: ce qu'entendant Pisistratus enuoya deuers luy, demander sur quoy il fondoit son assurance de faire telles choses: Il respondit, sur sa vieillesse. Les occurrences si necessaires & si belles, comme celles là, rallument & resuscitent les vieillards ia tous estaincts, prouueu qu'ils respirent encore: mais en autres moindres l'homme vieil fera sagement de s'excuser aucunefois, & refuser les char-

A charges petites & basses, où il y a plus d'occupation pour ceux qui les font que de nécessité ny utilité pour ceux qui les font faire. Et quelquefois attendant qu'on l'appelle, qu'on le desire, & qu'on l'enuoye querir iusques en sa maison, il en aura plus de foy & plus d'autorité enuers ses citoiens, quand il descendra à leur requeste. Et quand bien il sera present, il laissera dire la plus part aux ieunes gens, comme estant iuge d'une cōtention & emulation ciuile entre eux, prouueu qu'elle ne passe point vn certain moien : car alors il les reprendra doucement, leur ostant, avec vne façon amiable, toutes opiniastrès cōtentions, toutes iniures & tous courroux. Et s'il est question de dire & recueillir les aduis & opinions, reconfortant celuy qui faudra, sans le vituperer ny blasmer, enseignant & louant hardiment celuy qui aura bien rencontré, & se laissant vaincre volontairement, en leur quittât le gaigner & surmonter souuentefois, à fin que le cœur leur croisse, & qu'ils fassent, & suppleant à quelques vns, en les louant, ce qui sera defectueux en leur opinion, ainsi comme fait le bon vieillard Nestor en Homere,

Il n'y aura de tous les Grejois ame
 Qui ton parler contredie ny blasme
 Certainement: mais cela n'est pas tout,
 Car tu n'es pas allé iusques au bout:
 Aussi es tu ieune à veoir ton visage,
 Estre mon fils tu pourrois quant à l'aage.
 Mais encore sera ce plus ciuilement fait de ne les
 reprendre point ouuertement, ny publiquement

avec vne aigre picqueure qui abbat & raualle fort le
 cœur aux ieunes gens , mais plustost à part en
 priué, mesmement ceux que lon cognoistra bien
 nez pour le maniement des affaires, en les instrui-
 sant & les mettant amiablement sur les erres de
 quelques bons propos & quelques bonnes opi-
 nions & inuentions qu'ils pourroient mettre en
 auant , en les incitant tousiours à toutes entrepri-
 ses honestes, en leur esleuant le courage , & leur
 rendant le peuple du cōmancement doux & ma-
 niable: comme ceux qui monstrent aux ieunes gēs
 à piquer les cheuaux , leur en baillent vn qui soit
 facile au montouer , & si d'aduenture quelqu'un
 estoit tombé à l'entree, ne le laissant pas desesperer
 ny perdre le courage, ains le relevant & reconfor-
 tant, comme iadis Aristides feit Cimon, & Mnesi-
 philus Themistocles que le peuple du commence-
 mēt ne pouuoit gouster , & qui auoient mauuais
 nom en la ville pour estre desbauchez & dissolus:
 & ces gens de bien la les releuerent & les encoura-
 gerent. Aussi dit on que Demosthenes à son entree
 fut rebuté par le peuple , dont il estoit desesperé,
 iusques à ce que l'un des anciēs de la ville, qui auoit
 autrefois ouy Pericles harenguāt au peuple, le prit
 & luy dit qu'il ressembloit du tout en sa façon de
 faire & de dire à ce personnage la, & que pour ce-
 ste occasion il auoit grand tort de se desesperer &
 de perdre courage. Semblablement aussi Euripides
 tout de mesme reconforta Timotheus le musicien,
 qui à sa premiere arriuee fut sifflé par le peuple,
 comme violant & corrompant la Musique par la
 nou-

A nouuelleté qu'il y introduisoit, luy disant qu'il ne se descourageast point pour cela, & qu'il ne passeroit pas gueres de tēps qu'il auroit tous les theatres à sa deuotion. Brief, tout ainsi que le temps prefix aux vierges vestales à Rome est diuisé en trois parties, la premiere pour apprendre ce qu'il faut faire en leur religion, la seconde pour le faire, & la tierce pour le monstrier aux ieunes: & semblablement en la ville d'Ephese chascune de celles qui sont vouées au seruice de Diane, s'appelle premierement Mellieren, cōme qui diroit nouice qui doit deuenir presbtresse: & puis apres Ieren, c'est à dire presbtresse: & pour le troisieme, Parieren, comme qui diroit oultre presbtresse: aussi celuy qui est parfaittemēt politique du commencement apprend à manier affaires, & se rend profés, par maniere de dire, en celle religion: & puis à la fin il enseigne les autres, regente les nouices, & leur monstre les secrets: car presider, & estre cōme parrein à ceux qui combattent, n'est pas cōbattre: mais celuy qui enseigne & dresse vn ieune homme aux affaires publiques, luy monstrant comme dit Homere,

c A bien parler, & aussi à bien faire, est vtile & profite à la chose publique, non en petit seruice, mais en ministere de consequence grande, & auquel premierement & principalemēt visa & tendit Lycurgus, c'est à sçauoir à accoustumer les ieunes gens dès leur enfance à porter honneur & obeir à tout vieillard, ne plus ne moins qu'à leur maistre & legislateur: car à quelle intention auroit dit Lyfander, qu'il n'y a lieu au monde, auquel il

feist si bon vieillir qu'en Lacedemone, est-ce pour-
ce qu'il soit là permis aux vieillards plus qu'aux
autres de labourer la terre, de prester à vsure, de
iouier aux dez, assis en vn berlan, & de boire en
iouant: le croy que personne ne le dira, mais pour-
ce qu'ils n'ont pas l'œil sur ce qui est du public
seulement, ains particulièrement aussi sur les ieunes
gens, prenans garde soigneusement, & non
point par acquit en passant, comment ils exercent
leurs personnes, comment ils se iouënt, comment
ils vivent ensemble, en se monstrant terribles à
ceux qui faillent, venerables & desirables aux
bons: car les ieunes les vont chercher par tout, &
leur font la court, pource que les vieux les rendent
tousiours de plus en plus honestes, & leur accrois-
sent la generosité de leur courage sans enuie quel-
conque. Car ceste passion n'estant conuenable à
nulle partie de l'aage de l'hōme, encore a elle des
noms beaux & honestes és ieunes gens, par ce
qu'on l'appelle emulation, ialousie & desir d'hon-
neur, là où és vieilles gens elle seroit de tout point
importune, sauuage, & signe de cœur lasche: pour-
tant faut il que l'hōme vieil politique soit fort es-
loigné de toute passiō d'enuie, & ne face pas cōme
les vieux troncs d'arbres qui manifestement ostēt
& empeschent la naissance & croissance des petits
arbrisseaux qui germent alentour & deffoubs: ains
au contraire faut qu'il recoiue amiablement, &
qu'il s'offre & s'exhibe à ceux qui se prennent, &
qui s'entrelassent par frequentation avec luy, en les
adressant & conduisant cōme par la main, & les
nour-

A nourrissant, non seulement de bonnes instructions
 & sages conseils & aduertissements, mais aussi en
 leur laissant & cedant les moiens de faire quelques
 actes de gouuernemēt, dont il leur viene de l'hon-
 neur & de la gloire, & des commissions qui ne
 soient point dommageables au public, & soient
 bien agreables & plaisantes au commun peuple:
 mais celles où il y a d'entree de la dureté rebourse
 & de la difficulté dangereuse (comme és medeci-
 nes qui donnent des trenchees sur le poinct qu'on
 les prent) & l'honneur & profit en vient apres, il
 ne fault pas mettre les ieunes gens d'arriuee à ces
 charges là, ny les exposer aux troubles & crieries
 d'une commune mutine & mal aisee à contenter
 auant qu'ils y soiēt accoustumez, ains plus tost doit
 l'homme de bien prendre sur soy les malveuillan-
 ces du peuple pour le bien public: car cela luy ren-
 dra les ieunes gens plus affectionnez & plus propts
 à entreprendre tous autres seruices. Mais oultre
 tout cela il se fault souuenir, que administrer la
 chose publique n'est pas seulement exercer vn ma-
 gistrat, aller en ambassade, & crier bien hault en
 c vne assemblee de conseil, ny se tourmenter le cœur
 & le corps en vne tribune aux harengues, à force
 de prescher le peuple, mettre en auant force de-
 crets & force Edicts, en quoy le commun estime
 que consiste toute l'entremise du gouuernement,
 comme ils pensent que philosopher soit seulemēt
 discourir & disputer de la philosophie dessus vne
 chaire en vne eschole, ou bien en escrire & compo-
 ser des liures: & ce pendāt ils ne cognoissent point

l'administration ciuile ny la philosophie cōtinuelle ^D
qui se voit és œuures & actions quotidianes : c'est
comme disoit Dicæarchus, que lon estime com-
munement que faire des tours & retours, allees &
venues dedans vne galerie, soit se promener, non
pas aller aux champs, ny veoir vn sien amy. Or
fault il croire que gouuerner la chose publique &
philosopher, c'est tout vn : de sorte que Socrates
ne philosophoit pas seulement quand il auoit fait
apprester des bancs, & qu'il se mettoit en sa chai-
re, ou qu'il obseruoit l'heure de la lecture & de la
conferēce, ou du promenouer, qu'il auoit assignee ^E
à ses familiers : mais aussi quand il se iouoit aucu-
nesfois, quand il beuuoit & mangeoit, quand il
estoit au camp, ou quand il marchandait avec
eulx : & finablement alors qu'il estoit en prison &
qu'il beuuoit le poison de la ciguë, ayant le pre-
mier monstre & fait veoir, que la vie de l'homme
en tout temps, en toute partie, en toutes passions,
& tous affaires vniuersellement reçoit l'vsage de
la philosophie. Autant en fault il semblablement
penser de l'administration ciuile, que les fols &
meschants n'administrēt point la chose publique, ^F
ne quand ils sont capitaines generaux d'armees, ne
quand ils sont chācelliers, ny quand ils harenguent
au peuple, mais qu'ils flattent la commune pour
finfinuer en sa bonne grace, qu'ils declament par
ostentation, qu'ils brassent quelque sedition, ou
qu'ils font quelque charge à laquelle ils sont con-
traints par force. Mais au contraire, le bon & vray
policien qui aime ses citoiens, qui aime sa patrie,
qui

A qui a soing & amour du bien public, encore que
 iamaïs il ne veste le manteau & habit de capitaine
 & gouverneur, si est-ce que tousiours il fait office
 de gouverneur & d'administrateur publique, en
 exhortant & incitant ceulx qui le peuuent faire, en
 instruisant ceulx qui ne le sçauent pas, en assistant
 à ceulx qui luy demandent conseil, en destournant
 ceulx qui ont mauuaise volonté, confirmant &
 encourageant ceulx qui l'ont bonne, & en mon-
 strant clairement par effect en toutes ses actions,
 que ce n'est point par forme d'acquit qu'il s'entre-
B met des affaires publiques, ny là où il y a quelque
 interest pour luy ou pour les siens, ou qu'il y est
 nommeement appellé, qu'il va le premier au thea-
 tre & qu'il se trouue le premier en la salle de cōseil,
 ny que ce n'est point par maniere d'esbattement
 comme s'il y alloit pour y voir iouer des ieux, ou
 pour ouïr quelque plaisante musique quand il est
 là, ains au contraire quand il n'y peult estre present
 de corps qu'il y soit de l'esprit, & par soigneusemēt
 s'en enquerir, en approuuāt aucunes des choses qui
 s'y feront faictes, & se malcontentāt des autres : car
C ny Aristides à Athenes, ny Caton à Rome, ne furēt
 par plusieurs fois en magistrat, & toutefois ils ne
 laisserent pas d'estre toute leur vie en action pour
 le bien & seruice de leurs païs. Et Epaminōdas feit
 bien de grāds actes & plusieurs durāt qu'il fut capi-
 taine general de la Bœoce, mais on en recite vn de
 luy n'estant ny general, ny ayant charge quelcon-
 que qu'il feit en la Thessalie, lequel n'est pas moin-
 dre que pas vn des autres : quand les capiraines de

Thebes ayans ietté l'armée en des lieux aspres & mal-aisez se trouuerent chargez par les ennemis qui les pressoient fort, tellement qu'ils estoient en grand trouble & en grand effroy : luy, qui estoit deuant entre les gens de pied, fut rappellé, là où à son arriuee premierement il appaisa tout le trouble & l'effroy, en les assurant de sa presence, puis il remeit en ordre, & renga en bataille l'armée qui estoit toute confuse & esbranlee, & la tirant facilement hors de ce mauuais passage, la presenta en teste aux ennemis, qui en furent si esmerueillez qu'ils changerent d'aduis, & se retirerent. Et Agis le Roy de Lacedemone, cōme il menoit desia son armée toute rengée en bataille pour combattre les ennemis au pais d'Arcadie, il y eut quelque vn des Anciens de Sparte qui luy crya, Sire Roy, tu penses remedier à vn mal par vn autre: voulant entendre la trop facile retraitte & departement de la ville d'Argos, laquelle il cuidoit couurir par la presente importune promptitude de combattre, ainsi comme dit Thucydides: ce qu'ayant Agis entendu, le creut, & se retira lors, mais depuis il gaigna. Il faisoit tous les iours mettre sa chaire pres la porte du palais: & bien souuent les Ephores se leuans de leur parquet s'en alloient deuers luy pour auoir son aduis & prendre son conseil sur les plus importans affaires: car il estoit tenu pour homme de fort bon sens, & le renomme lon pour vn grād sage homme. Et pourtant vn iour que la force de son corps estoit desia toute aneantie, tellemēt qu'il ne bougeoit presque plus du liēt, les Ephores luy
manderent

A manderent qu'il s'en vint en la place : Il se leua du liect, & se meit bien en deuoir d'y aller : mais ayant marché vn petit à grande peine & grande difficulté, il rencontra de petits garçons en son chemin, aux quels il demanda s'ils sçauoient rien plus fort que la necessité d'obeïr à son maistre : ils luy respondirent, le non pouuoir : ainsi faisant compte que son impuissance deuoit estre la fin & borne de son obeïssance, il s'en retourna en sa maison : car il ne fault pas que la bonne volonté faille deuant la puissance : mais quand elle est faillie, aussi ne la

B doit on pas forcer. Aussi dit on que Scipion se seruoit tousiours & à la guerre, & en la ville, du conseil de Caius Lælius : de maniere qu'il y en auoit de ce temps là qui disoient, des haults faictz d'armes qu'il executoit, que Lælius en estoit l'autheur, comme d'une comedie, & Scipion le ioueur qui les iouoit. Et Ciceron luy-mesme confesse, que les plus grands & plus honorables cōseils qu'il exploita en son consulat, moiénant lesquels il preserua son pais, il les consulta avec le philosophe Publius Nigidius. Ainsi n'y a il rien qui empesche les vieil-


C les gens de pouuoir seruir & profiter au public en plusieurs sortes de gouuernement, soit de bonne parole, de bon conseil, de liberté & autorité de franchement parler, & de sage soing, comme disent les poëtes : car ce ne sont pas les pieds, ny les mains, ny toute la force du corps seulement qui sont parties & biens de la chose publique, ains sont premierement & principalemēt l'ame & les beauttez d'icelle, comme la iustice, la temperance, & la

LES DICTS NOTABLES DES ANCIENS

prudence, lesquelles venans tard à leur perfection, & il n'y auroit point de propos, qu'elle iouist d'une maison, d'une terre, & de tous autres biens & heritages de ses citoiens, & que d'eulx mesmes elle n'en peust plus tirer aucun profit en commun pour le bien public du pais, à cause de leur long temps, lequel ne leur oste pas tant des forces de pouuoir seruir, comme il leur adioust de suffisance aux facultez requises pour commander & regir. Voyla pourquoy lon figure les Hermes, c'est à dire les statues de Mercure, en vieil aage, n'ayans ne pieds ny mains, mais les parties naturelles tendues, don-
nans par là couuertement à entendre, que lon n'a pas beaucoup affaire du labeur corporel des hommes vieux, prouueu qu'ils ayent la parole actiue & seconde ainsi comme il appartient.

LES DICTS NOTABLES

DES ANCIENS ROYS, PRIN-
ces, & grands Capitaines.



AR TAXER XES le Roy de Perse, ô trespuissant Empereur Cæsar Traian, estimoit que c'estoit acte de magnanimité, & bonté Royale, non moins prédre en gré & receuoir avec bon visage de petits presens, que d'en donner de grands. Et pourtant comme quelquefois en passant chemin, vn pauvre manœuvre gaignant sa vie à la sueur de son corps, n'ayant

A n'ayāt autre chose que luy presenter, luy eust offert de l'eau qu'il venoit de puiser en la riuere avec ses deux mains, il la reçut ioyeusement, & s'en prit à soubrire, mesurant la grace de l'offre, non à la valeur du present, mais à la bonne volonté de celuy qui le presentoit : & suiuant ce propos, Lyeurgus ordonna en la cité de Sparte les Sacrifices de la moindre despense qu'il peut, à fin, ce disoit il, que ses citoiens eussent moyen tousiours & en tous lieux, d'honorer promptement & facilement les Dieux, de ce qu'ils auroient à la main. Et pourau-
 B tant, Sire, que de mesme volonté & intention ie vous offre de petits presens, comme les premices, par maniere de dire, les plus communes de la philosophie, ie vous supplie de receuoir en gré avec ma bonne affection, l'vtilité de ces beaux dictz notables que ie vous ay recueuillis, pource qu'ils vous peuuent seruir à cognoistre quelles ont esté la nature & les meurs de ces grands personnages du temps passé, attendu qu'elles apparoissent mieulx bien souuent, & se descouurent plus clairement en leurs dictz, que non pas en leurs faicts. Il est bien
 C vray que nous auons en vne autre œuvre compilé les Vies des plus illustres personnages, tāt en armes qu'en conseil, comme capitaines, legislateurs, Roys & Empereurs, qui ayent oncques esté entre les Romains & entre les Grecs : mais en la plus part de leurs faicts & gestes la fortune y est ordinairement meslee : là où és paroles qu'ils ont dittes & aux propos qu'ils ont tenus, sur l'heure mesme de leurs faicts, de leurs passios & de leurs accidents, en

apparçoit plus clairement & plus nettement, comme dedans des miroirs, quel estoit le cœur & la pensée de chascun d'eulx : au moyen dequoy Siramnes gentilhomme Persien respōdit à quelques vns qui s'esmerueilloient comme ses entreprises ne succedoient heureusement, veu que ses propos estoient si sages : c'est, dit il, pource que ie suis seul maître de mes propos, mais des effects, c'est la Fortune & le Roy . Or en l'autre œuvre des vies, les dicts notables de ces grands personnages sont accompagnez de la narration de leurs faicts bien au long escrits, tellement qu'ils requierēt vn homme de grand loysir, & qui prenne plaisir à ouir & à lire : mais en ce liure cy, n'y ayant que les eschantillons, par maniere de dire, ou les semences extraictes à part de leurs vies, la lecture d'iceluy, à mon aduis ne vous occupera point le temps que vous deuez à vos affaires, attendu qu'en peu de paroles vous y verrez le naturel dépaint au vif de plusieurs personnages dignes de memoire.

Les Perses aiment ceux qui ont le nez aquilin, c'est à dire, courbé comme le bec d'un aigle, & les estiment les plus beaux, pour autant que Cyrus, celuy de leurs Rois qu'ils ont le plus aimé, auoit le nez ainsi faict. Or disoit ce Roy là, que ceulx qui ne vouloient faire du bien à eulx mesmes, estoient contraincts d'en faire aux autres : disoit aussi, qu'il n'appartenoit à nul de commander qu'il ne fust meilleur que ceulx à qui il commandoit. Et comme les Perses voulussent changer de pais, & au lieu du leur qui estoit aspre & bossu, en prendre vn

A autre qui estoit doulx & plain, il ne le voulut pas
 permettre, disant, que les semences des plantes, &
 les meurs des hommes deuiennent à la fin sembla-
 bles aux lieux & contrees où ils demeurent. Da-
 rius pere de Xerxes, se louant soy-mesme, souloit
 dire, que és batailles & perils de la guerre il de-
 uenoit plus sage : & ayant vne annee taxé les tail-
 les & subides qu'il vouloit leuer sur ses subiects, il
 enuoya querir les principaux hommes de chasque
 prouince, & leur demanda si les tributs qu'il leur
 auoit imposez estoient point grieux à supporter : Ils
 luy respondirent, que moiennement : adonc il or-
 dōna, que nul ne payeroit que la moitié de sa cot-
 te seulement. Et comme vn iour il eust ouuert vne
 pomme de grenade belle & grosse à merueilles, &
 que quelqu'un des assistans luy demāda de quel-
 le chose il voudroit auoir autant, comme il y auoit
 de grains dedans ceste pōme, Il respondit, de Zo-
 pyres : ce Zopyre estoit vn vaillant capitaine & fi-
 dele amy, lequel s'estant luy-mesme deschiré le
 corps à coups de fouët, & couppé le nez & les au-
 reilles, abusa tellement par ceste ruze les Babylo-
 niens, qu'ils se fierent en luy du gouuernement de
 leur cité, laquelle depuis il liura entre les mains de
 Darius, qui par plusieurs fois depuis asseura qu'il
 aimeroit mieulx auoir Zopyrus entier de tous ses
 membres, que gagner cent telles citez cōme estoit
 celle de Babylone. La Royne Semiramis ayant fait
 cōstruire sa sepulture, feit engrauer dessus ceste in-
 scription : Le Roy qui aura affaire d'argent face de-
 molir ceste sepulture, & il en trouuera autant com-

me il en vouldra. Darius la feit ouurir, & n'y trou-
 ua point d'argent, mais bien rencontra il d'autres
 „ lettres qui disoient, Si tu n'eussies esté mauuais
 „ hōme, & d'une auarice insatiable, tu n'eussies point
 „ remué les sepultures des trespassez. Arimenes,
 frere de Xerxes fils de Darius, querellāt alencontre
 de son frere le Royaume de Perse, descendit de la
 prouince Bactrienne où il se tenoit: son frere luy
 enuoya des presens au deuant, & cōmanda à ceulx
 qui les luy presentoyent de sa part, de luy dire, Ton
 frere Xerxes t'honore de ces presens pour ceste
 heure, mais il t'assure que si vne fois il est déclaré
 Roy, tu seras le plus grand homme qui soit aupres
 de luy: & de faict Xerxes aiant esté iugé Roy, Ari-
 menes fut le premier qui luy feit hommage, & luy
 meit le diademe Royal alentour de la teste, aussi le
 Roy son frere luy donna le second lieu d'honneur
 & d'autorité apres luy, en tout son Royaume. Et
 estant indigné alencontre des Babylonniens pour
 autant qu'ils s'estoient rebellez contre luy, apres les
 auoir reconquis, il leur defendit de porter plus ar-
 mes, & leur commanda de danser, chanter, iouër
 des haubois, paillarder, & tauerner, & porter de
 longs sayes à plein fond. Et comme on luy eust
 apporté des figues seiches à vendre, du pais de
 l'Attique, il dit, qu'il n'en mangeroit point qu'il
 n'eust conquis la region qui les portoit. Aiant sur-
 pris quelques espions de nation Grecque dedans
 son camp, il ne leur feit aucun desplaisir, ains apres
 leur auoir fait monstrer à seureté tout son camp,
 leur permet de s'en retourner. Artaxerxes fils de
 Xerxes

A Xerxes , celuy qui fut surnommé Longuemain ,
 pour ce qu'il auoit vne main plus longue que l'au-
 tre, souloit dire, que c'estoit chose plus royale d'ad-
 iouster que d'oster : & fut le premier qui permit
 à ceulx qui chassoient avec luy , de frapper les pre-
 miers la beste quand ils pourroient & voudroient.
 Aussi fut-ce luy qui ordonna le premier , que les
 Seigneurs qui auroient failly en leur estat (au lieu
 qu'on les souloit fouetter eulx mesmes) fussent
 despouilleez, & leurs vestemens fouettez pour eulx :
B & au lieu qu'on leur souloit arracher les cheueux
 de la teste , qu'on leur ostast leur hault chapeau
 seulement. Il auoit vn chambellan nommé Sati-
 barzanes , qui luy demandoit quelque chose qui
 n'estoit ny iuste ny raisonnable , & estant aduertuy
 qu'il faisoit ceste poursuite en faueur de quel-
 que autre , qui luy en auoit promis trente mille
 escus de Perse , qui s'appelloient Dariques , il com-
 manda au tresorier de son espargne , de luy ap-
 porter trente mille Dariques : & en les luy don-
 nant , luy dit : Pren cest argent Satibarzanes , car
 pour tel l'auoir donné , ie n'en feray pas plus pau-
 ure : là où si i'eusse fait ce dont tu me requerois , i'en
 eusse esté plus iniuste . Cyrus le ieune , pour es-
 mouuoir les Lacedemoniens à faire alliance & en-
 trer en ligue avec luy , disoit , qu'il auoit le cœur
 plus gros que son frere le Roy Artaxerxes , qu'il
 beuuoit plus de vin sans eau que luy , & le portoit
 mieulx : & que son frere estant à la chasse , à peine se
 pouuoit tenir à cheual , & en temps de danger , non
 pas en son throsne mesme : & pour les couier à luy

enuoyer de leurs hommes de guerre, il promet-^Dtoit à ceulx qui viendroient à pied, qu'il leur donneroit des cheuaulx : & à ceulx qui auroient des cheuaux, qu'il leur donneroit des chariots : & à ceux qui auroient des metairies, qu'il leur donneroit des villages : à ceulx qui auroient des villages, qu'il leur donneroit des villes : & au reste, quant à l'or & l'argent, qu'il leur en bailleroit tant, qu'il le faudroit peser, non pas compter. Artaxerxes le frere de ce ieune Cyrus, qui fut surnommé Grande-memoire, non seulement donna libre accès & audience à tous ceux qui eurent affaire à luy, mais ^E qui plus est commanda encore à sa femme legitime, qu'elle ostast les tapisseries qui couuroient & bouschoient son chariot, à celle fin que ceulx qui voudroient, peussent parler à elle mesme par les chemins : & comme vn pauvre païsan luy eust fait present d'une belle & grosse pomme, en la receuant avec vn bon visage, il dit : Par le soleil (qui estoit le serment des Perses) il me semble que cest homme feroit d'une petite ville vne grosse cité qui la luy bailleroit à gouverner : & comme en vne deffaitte son bagage luy eust esté tout pillé, estant ^F cōtrainct de manger pour toute viande vn peu de

” figures seiches avec du pain d'orge, O Dieux, dit
 ” il, quelle volupté ie n'auois iamaïss essayee ! Pary-
 ” satis la mere de Cyrus & d'Artaxerxes disoit, que
 ” celuy qui vouloit faire quelque remonstrance à
 ” vn Roy, deuoit vser de paroles de foye: c'est à dire,
 les plus doulces qu'il pourroit choisir. Orontes le
 gendre du Roy Artaxerxes, ayant esté par vn cour-

A roux du Roy, condamné & priué de son estat, di-
 soit, que les mignons des Rois & des Princes re-
 sembloient proprement aux doigts de ceulx qui
 comptent : car ainsi comme ils les font valoir tan-
 tost vn, & tantost dix mille : aussi ceulx qui sont
 alentour des Princes peuuent vne fois tout, & vne
 autre fois peu ou rien du tout. Memnon capitai-
 ne Grec, qui feit la guerre pour Darius contre Ale-
 xandre, comme l'vn de ses souldards vint en sa pre-
 sence dire tout plein de villaines & outrageuses
 paroles alencontre d'Alexandre, luy donna sur la
 B teste d'une lance qu'il tenoit en sa main, en luy di-
 „ sant : Je te soudoye pour guerroyer, & non pas
 „ pour iniurier Alexandre. Les Rois d'Ægypte sui-
 „ uant vne ancienne ordonnance de leur pais, fai-
 „ soient iurer les iuges, quand ils les installloient en
 „ leurs offices, que quand bien le Roy leur comman-
 „ deroit de iuger iniustement, ils ne le feroient pas
 „ pourtāt. Du temps de la guerre de Troye, il y auoit
 en la Thrace vn Roy nommé Poltys, deuers lequel
 tant les Grecs que les Troyens enuoyerent pour
 auoir de luy secours : il leur feit response, qu'il estoit
 C d'aduis que Paris rendist Helene, & qu'au lieu
 d'elle, il luy bailleroit deux belles femmes. Teres
 le pere de Sitalces souloit dire, que quand il estoit
 de loysir, & qu'il ne faisoit point la guerre, il luy
 estoit aduis qu'il n'y auoit point de differēce entre
 luy & son palefrenier. Cotys rēdit vn lyon à celuy
 qui luy auoit fait present d'un leopard : & pour-
 autant qu'il estoit prompt à se courroucer, & aspre
 à punir ses seruiteurs domestiques, quād ils auoier

failly en leurs seruices : comme vn sien amy , chez D
 lequel il estoit logé , luy eust fait present de plu-
 sieurs vases & vailles de terre fort tenues & ai-
 sez à rompre , mais au demourant singulierement
 bien ouurez & labourez , il donna bien de riches
 dons à celuy qui les luy auoit presentez , mais il les
 rompit & cassa tous entierement , de peur que par
 vne soudaine cholere il ne chastiaist trop aigremēt
 ses seruiteurs qui viendroient à les rompre. Idathyr-
 sus Roy des Tartares , contre lequel Darius
 mena son armee, māda aux Seigneurs des Pæoniés
 qu'ils rompissent le pont que Darius auoit fait fai- E
 re sur la riuiera de Danube pour passer en ses païs,
 à fin qu'en ce faisant ils se deliurassent de toute ser-
 uitude: ce qu'ils ne voulurēt pas faire, pource qu'ils
 vouloient garder leur foy à Darius : au moien de-
 quoy il les appelloit esclaués de bien, qui n'auoient
 point de volonté de s'enfuir. Ateas escriuit à
 „ Philippus roy de Macedoine, Tu commandes aux
 „ Macedoniens qui sçauent bien combattre contre
 „ des hommes: mais moy ie commāde aux Tartares,
 „ qui peuuēt combattre & la faim & la soif: & com-
 me luy mesme frottaist & estrillaist son cheual, il de- F
 manda aux ambassadeurs de Philippus, si leur mai-
 stre faisoit pas le semblable. Aiant en vne ren-
 contre pris prisonnier de guerre Ismenias excellent
 ioueur de flustes, il luy commanda d'en iouer de-
 uant luy; & comme tous les autres assistans s'esmer-
 ueillaissent de son excellence, il iura qu'il prenoit
 plus de plaisir à ouir vn cheual hennir. Scilurus
 laissant quatre vingts enfans māles, quand il fut
 prest

A prest à mourir se fait apporter vn faisceau de iauelots, qu'il presenta de reng à chacun des ses enfans, leur commandant de tascher à le rompre: & cōme chascun d'eulx se fust efforcé de ce faire en vain sans en pouuoir venir à bout, luy prenant chasque iauelot à part, les rompit tous facilement l'vn apres l'autre: leur enseignāt par ceste similitude qu'en se renāt bien ioincts ensemble ils demoureroiēt forts & inuincibles, mais s'ils se diuisoient, & qu'ils entraissent en querelles les vns contre les autres, qu'ils se trouueroiēt foibles & faciles à desfaire. Gelon

B apres auoir desfait les Carthaginois pres la ville d'Himere, faisant paix avec eulx les contraignit de mettre entre les articles du traicté, qu'ils ne sacri-fieroient plus leurs enfans à Saturne. Il menoit souuent les Syracusains aux chāps, autant pour labourer & planter, cōme pour guerroyer, à fin que leurs terres en valussent mieux estans bien labourees, & eux ne deuinsent pires à faute de trauailler. Demandant vn iour de l'argent à ses citoiens, ils commencerent à s'en mutiner: il leur dit, que c'estoit en intention de leur rēdre, & de faict leur rendit apres

C la guerre. Et cōme en vn festin on presentast de reng la lyre à tous les conuiez pour chanter dessus selon la coustume, & que tous les autres s'accōmodassent à leur tour & chantassent, luy commandāt qu'on luy amenaist son cheual, voltigea & monta dessus aiseement & dispostement. Hieron, celuy qui fut tyran de Syracuse apres Gelon, disoit que ceulx qui parloient à luy franchement & librement ne le faschoient & ne l'importunoient point:

mais que ceux qui reueloient vn propos qu'il leur ^D auroit dit en secret, faisoient tort non seulement à luy, mais aussi à ceux à qui ils le disoient, pource que coustumieremēt nous haïssons non seulement ceulx qui rapportent, mais aussi ceux qui escoutent ce que nous ne voudriōs pas estre sceu. Quelqu'un luy reprocha vn iour qu'il auoit l'haleine puante, à l'occasion dequoy il tenfa sa femme de ce qu'elle

„ ne luy en auoit iamais rien dit: elle luy respondit, Je

„ pensois que l'haleine de tous les autres hommes

„ sentist ainsi. Xenophanes natif de Colophon se plaignoit vn iour à luy, de ce qu'il estoit si pau- ^E ure qu'il n'auoit pas le moien d'entretenir deux seruiteurs, & il luy respondit: Et comment, Homere que tu reprens & que tu blasmes ordinairement, tout mort qu'il est en nourrit plus de dix mille. Il condamna Epicharmus poëte Comique en quelque amende, d'autant qu'en la presence de sa femme il auoit dit quelques paroles villaines & deshonestes. Dionysius le pere, comme les orateurs qui deuoient harenguer deuant le peuple tiraissent au sort des lettres, pour sçauoir l'ordre, auquel ils auroient à parler, & que la lettre M ^F luy fust escheutte, quelqu'un des assistans luy dit,

„ Ceste M signifie Marotte (Dionysius) pource

„ que tu diras de grandes folies: Mais bien, dit il,

„ que ie seray Monarque: & de faict, apres qu'il eut fait sa harengue, le peuple de Syracuse l'e-leut Capitaine general. Et comme tout au commencement de sa tyrannie les Syracusains soublesuez alencontre de luy, le teinssent assiegé dedans son

A son chasteau, ses amis luy conseilloyent que volontairement il quittast & se demeist de ceste domination violente, si il ne vouloit mourir honteusement, apres qu'il seroit pris: mais luy aiant veu assommer vn bœuf à vn boucher, & obserué qu'il estoit au premier coup tombé soudainement roide mort,

» Et dea, dit-il, ne seroit-ce pas grand desplaisir, que
 » pour crainte de la mort qui dure si peu, & passe si
 » viftement, ie quittasse vne si belle & si grande Seignurie? Aiant entendu que son propre fils, auquel il deuoit laisser sa Seignurie, auoit violé & forcé la

B femme d'vn des bourgeois de la ville: il luy demanda en cholere, quelle chose semblable il luy auoit iamais veu faire: le ieune homme luy respondit,

» aussi n'as tu pas eu vn pere qui fust tyran: il luy re-
 » pliqua tout promptement, aussi n'auras tu point
 » de fils qui le soit, si tu ne te deportes de commettre
 » de tels actes. Vne autrefois estant allé veoir son fils en son logis, & y voiant quantité grande de vases

» d'or & d'argent, il dit tout haut, Il n'y a rien de Seigneur & de Prince en toy: veu que d'vn si grand
 » nombre de vaisselle d'or & d'argent que tu as eu

C de moy, tu n'en as pas sçeu faire vn amy. Il demandoit vn iour de l'argent à ceux de Syracuse, & eux se plaignoient & lamentoient, en le priant de les vouloir excuser, disans qu'ils n'en auoiét point: luy au contraire leur en fait demâder encore d'autre: ce qu'il fait iusques à deux ou trois fois, coup sur coup. Et comme il continuaist à leur en exiger encore d'auantage, il entendit qu'ils ne s'en faisoient plus que rire & gaudir, en se promenant parmy la

place: adonc il commanda à ses receueurs de ne les D
 „ plus presser, Car c'est signe, dit-il, qu'ils n'ont plus
 „ rien, puis qu'ils ne font plus conte de nous. Sa me-
 re estant desia vieille & hors d'aage de se marier,
 vouloit neantmoins à toute force estre mariee à
 vn beau ieune homme: Il luy respondit, qu'il estoit
 bien en sa puissance de violer les loix de Syracuse,
 mais les loix de nature, non. Et punissant asprement
 tous autres malfaitteurs, il pardônoit aux voleurs,
 qui ostoient les robbes & manteaux à ceux qu'ils
 rencontroient la nuict parmy les rues: à fin que
 les Syracusains pour ceste occasion desistassent de E
 faire festins & assemblees les vns avec les autres.
 Il y eut vne fois vn estrangier qui luy promit tout
 haut de luy enseigner à part en secret, à quoy il
 pourroit cognoistre ceux qui conspiroient & ma-
 chinoient contre luy: Dionysius le pria bien fort
 de luy dire: & l'autre allant deuers luy, Donne
 moy, dit il, vn talent (six cens escus) à fin qu'il
 semble à ceux de Syracuse que tu aies appris de
 moy les signes ausquels tu pourras descouurir ceux
 qui coniureront alencontre de toy: il le luy donna,
 & feit semblant d'auoir appris & entendu de luy F
 ces moiens, louant grandement la subtile façon de
 tirer argent que cest homme auoit inuëtée. Quel-
 que autre luy demanda vn iour, s'il estoit point
 „ quelquefois oisif, I'à dieu ne plaise, dit il, que cela
 „ iamais m'aduienne. Estant aduertty que deux ieu-
 „ nes hommes de la ville beuans ensemble auoient
 dit plusieurs oultrageuses & iniurieuses paroles de
 luy & de sa tyrannie à la table, il les enuoya con-
 uier

A uier tous deux de venir soupper avec luy : & voiãt
 que l'un apres qu'il eut vn peu de vin en teste , di-
 soit & faisoit tout plein de folies , & au contraire
 que l'autre estoit fort retenu , & beuuoit peu sou-
 uent, il pardonna à l'un cōme estant yurongne &
 insolent de nature , & qui par yurongnerie auoit
 mesdit de luy, mais il feit mourir l'autre, cōme luy
 voulant mal en son cœur, & luy estant ennemy de
 propos deliberé. Aucuns de ses familiers le repre-
 noient de ce qu'il honoroit & auançoit vn hōme
 meschant & mal voulu des Syracusains , & il leur
 B respōdit, le veux qu'il y ait en Syracuse quelqu'un
 qui soit encore plus haï que moy. Il enuoya vne
 fois des presens à quelques ambassadeurs de Co-
 rinthe, qui estoient venus deuers luy : eux les refu-
 serent, à cause de quelque statut & ordonnance de
 leur chose publique , qui defendoit aux ambassa-
 deurs de prendre, ny receuoir, aucuns dons ne pre-
 sens de seigneur ou prince quelconque. Il en fut
 mal content, & leur dit, qu'ils faisoient mal d'oster
 le seul bien qu'il y a és tyrannies , de pouuoir don-
 ner, enseignans aux hōmes que mesme le receuoir
 C aucun bien des tyrãs est chose que lon doit redou-
 ter & fuir . Estant aduerty, que l'un des habitans
 de Syracuse auoit caché vn tresor dedans la terre
 en sa maison , il luy feit commandement de le luy
 apporter: ce qu'il feit, non pas tout pourtant, car il
 en reteint vne partie , avec laquelle il s'en alla de-
 mourer en vne autre ville, là où il en achetta quel-
 que heritage: quoy enyendant, il le renuoya querir
 & luy rendit tout son or & argēt: puis que tu sçais,

dit-il, maintenant vser de la richesse, & non pas
 rendre inutile ce qui est fait pour l'usage de l'hom-
 me. Son fils que lon appelle Dionysius le ieune, di-
 soit, qu'il nourrissoit & entretenoit plusieurs hom-
 mes de lettres, non qu'il les estimast, mais pource
 qu'il vouloit estre estimé pour l'amour d'eux: entre
 lesquels vn Dialecticien nommé Polyxenus, luy
 „ dit vne fois en disputant avec luy, Je te tiens con-
 „ uaincu: Ouy bien de paroles, luy respondit-il sou-
 „ dainement, mais moy ie te cōuains toy-mesme de
 „ faict, pour ce qu'abandonnant ta propre maison,
 „ tu me viens faire la court & seruir en la miene. E

Après qu'il eust esté chassé de sa seigneurie, comme
 „ quelqu'un luy demandast, Que t'a maintenāt ser-
 „ uy Platon & toute sa philosophie? Elle m'a seruy
 „ de ce que ie porte patiemment la mutation & le
 „ changement de ma fortune. On luy demanda vne
 fois, comment son pere estant homme pauvre &
 priué auoit acquis la domination de Syracuse: &
 luy à qui son pere l'auoit laissée toute acquise, &
 qui estoit fils d'un si grād tyran, l'auoit laissée per-
 dre: pource, dit-il, que mon pere vint à prendre les
 affaires en main lors que le gouuernement popu- F
 laire estoit haï, & moy lors que la tyrannie estoit
 enuiee. Vne autre fois il respondit à quelque autre
 „ qui luy faisoit ceste mesme demande: Mon pere
 „ m'a bien laissé sa tyrannie, mais non pas sa fortune.
 Agathocles estoit fils d'un potier de terre, & s'estāt
 fait seigneur de la Sicile, & en aiant esté déclaré
 Roy, il faisoit en son seruice mesler de la vaisselle
 de terre parmy celle d'or & d'argent, & la mōstroit

Aux ieunes gens en leur disant: Je faisois au cōman-
 cemēt de telle vaisselle, en leur montrant celle de
 terre: & maintenant i'en fais de celle cy, en leur
 montrant celle d'or, par ma diligēce & vaillance.
 Ainsi qu'il tenoit le siege deuant vne ville, quel-
 ques vns de ceux de dedans luy cryoient de dessus
 » la muraille pour luy penser faire iniure, Hó potier
 » dequoy payeras tu la soulde à tes gens? & luy sans
 fesmouuoir tout doucement en riant leur respon-
 » dit, Du sac de ceste ville, quand ie l'auray prise: &
 de fait l'ayant emportee d'assault, il vendit à l'encan
Btous les habitans comme esclauēs, en leur disant,
 » Si vous me dittes plus d'iniures desormais, ie m'en
 » plaindray à voz maistres. Et comme les habitans
 de l'Isle d'Ithaque se plaignissent à luy, disans, que
 ses mariniers estans descendus en leur Isle auoient
 emmené de leurs moutons: il leur respondit, Et
 comment, vostre Roy estant iadis descendu en la
 Sicile, non seulement en emmena des moutons,
 mais qui pis est, y creua les yeux au berger. Dion,
 celuy qui chassa Dionysius hors de sa tyrannie,
 estant aduertý que Callippus, auquel il se fioit plus
Cqu'à nul autre de ses hostes ny amis, espioit les
 moiēs de le faire mourir, n'eut iamais le cœur d'en
 informer pour le conuaincre, disant, qu'il aimoit
 mieux mourir que viure en ceste peine, d'auoir à se
 garder non de ses ennemis seulemēt, mais aussi de
 ses amis. Archelaus roy de Macedoine, cōme vn
 iour à sa table quelqu'un de ses familiers, hōme qui
 sçauoit peu de bien & d'honneur, luy demādaſt en
 don vne coupe d'or dont on seruoit à sa table, le

Roy commanda à l'un de ses gens de la porter en don au poëte Euripides : ce que l'autre trouuant estrange, il luy dit: Ne t'en esbahy point, car tu merites de demander, & luy d'auoir encore qu'il ne demande point. Et cōme son barbier, qui estoit un grand babillard, luy demanda: Comment voulez vous que ie vous face la barbe, Sire? Il luy respōdit, Sans dire mot. Et comme Euripides en un festin ambrassa & baisa le bel Agathon deuant tout le mōde: Ne vous en esbaïssez point, dit-il aux autres assistans, car des beaux l'arriere saison mesme en est encore belle. Et comme Timotheus ioueur de cithre, qui s'estoit promis que le Roy luy feroit un bon gros present, en eust eu beaucoup moins qu'il n'esperoit, & s'en mōstrast fort mal content, de sorte qu'en chantant sur sa cithre ces paroles, L'argent fils de la terre tu l'as en estime grande, faisant signe de la teste que c'estoit du Roy qu'il l'entendoit: il luy repliqua tout sur le champ, Mais toy tu en fais demande. Vne autre fois, cōme il passoit par la rue, on respendit de l'eau sur luy, à raison dequoy, ceux qui se trouuerent aupres, l'irritans alencontre de celui qui auoit versé l'eau, disoient, qu'il le deuoit bien faire chastier: voire mais, dit-il, il n'a pas versé ceste eau sur moy, mais sur celui qu'il pensoit que ie fusse. Philippus de Macedoine pere d'Alexandre le grand, ainsi que tesmoigne Theophrastus, a esté plus grand que nul autre des Roys de Macedoine, non seulement en prosperité de fortune, mais aussi en bōté & moderation de meurs: Il faignoit de reputer les Atheniens bien-heureux, en ce mesmement

A mement qu'ils trouuoient tous les ans en leur ville dix capitaines à elire : car luy au contraire en plusieurs années n'en auoit peu trouuer qu'un seul, qui estoit Parmenion. Et comme on luy eust apporté en un mesme iour les nouuelles de plusieurs prosperitez qui luy estoient aduenues toutes ensemble : O fortune, s'escria il, ne m'enuoye qu'un peu de mal alencontre de tant & de si grâds biens. Apres qu'il eut vaincu les Grecs, plusieurs luy conseillèrent de mettre de bonnes & grosses garnisons dedans les villes, pour plus seurement les tenir en bride: mais il leur respondit, l'aime mieux estre appellé par long temps debonnaire, que peu de temps Seigneur. Et comme ses familiers luy conseillaissent de chasser de sa court un mesdisant qui ne faisoit que detracter de luy : Il leur respondit, qu'il n'en feroit rien, de peur qu'il n'allast par tout ailleurs semer sa maledicence. Smicythus accusoit souuent Nicanor enuers luy, disant qu'il ne faisoit autre chose que detracter de luy, tellement que ses plus familiers estoient d'aduis qu'il l'enuoyast querir, & qu'il le feist chastier ainsi qu'il le meritoit: Voire mais, Nicanor, ce dit-il, est un des hommes de bien de la Macedoine, ne vault il pas doncques mieux s'enquerir si la faute en vient point de nous? Et de faict, aiant fait diligence d'enquerir dont venoit ce mescontentement de Nicanor, il trouua qu'il estoit oppressé d'extreme pauureté, & qu'on n'auoit tenu compte de le secourir en sa necessité: parquoy il commanda incontinent qu'on luy portast un bon present, qu'il

luy enuoya: depuis Smicythus luy vint r'apporter
 que Nicanor faisoit merueilles d'aller preschât ses
 „ louanges par tout. Voiez vous doncques, dit alors
 „ Philippus, comme il depend de nous, que lon par-
 „ le bien ou mal de nous? Il souloit aussi dire, qu'il
 „ estoit bien tenu aux harengueurs des Atheniens,
 „ pource que mesdisant de luy, ils estoient cause de
 „ le rendre plus homme de bien & de parole & de
 „ faict: car ie m'efforce, disoit-il, tous les iours & en
 „ mes dicts & en mes faicts de les faire trouuer men-
 „ teurs. Il renuoya, sans leur faire payer rençon,
 tous les prisonniers Atheniës qui auoient esté pris
 en la bataille de Cheronee, mais eux demandoient
 encore d'auantage leurs liëts, leurs vestemens, &
 leurs hardes, & se plaignoient des Macedoniens
 de ce qu'ils ne les leur rendoient pas: Philippus,
 quand il l'entendit, s'en prit à rire, & dit à ceux qui
 estoient autour de luy, Ne vous semble il pas, que
 ces Atheniens pensent auoir esté par nous vaincus
 au ieu des osselets? Il eut d'aduenture en vne bat-
 taille l'os rompu, qui ioinct par deuant les deux es-
 paules: cest os s'appelle en langage grec, la clef: &
 le chirurgien qui le pensoit luy demandoit tous les
 iours quelque argent: Philippus luy respondit,
 „ Prends en tant que tu voudras, car tu as la clef en-

L'allusion tre tes mains. Il y auoit en sa court deux freres
des mots dont l'un s'appelloit Hecateros, qui signifie en
ne se peut grec, l'un & l'autre: l'autre frere se nommoit Am-
trouuer en photeros, qui signifie, tous les deux: & voiant que
la langue Hecateros estoit homme diligent & aduisé, &
françoise. Amphoteros sot & paresseux, il disoit que Hecate-

Aros estoit Amphoterros, c'est à dire, qu'il en valoit
 deux:& que Amphoterros estoit Oudeteros, com-
 me qui diroit neant & homme de nulle valeur.
 Il disoit aussi, que ceux qui luy conseilloyent de se
 porter aigrement alencontre des Atheniens estoient
 hommes de mauuais iugement, de conseiller à vn
 Prince qui faisoit & enduroit toutes choses pour
 la gloire, de destruire le theatre de gloire, que
 la ville d'Athenes, à cause des lettres. Estant iuge
 entre deux meschants hommes, il ordonna que
 l'vn s'en fust hors de Macedoine, & que l'autre
 courust apres. Il vouloit vn iour loger son
 camp en vn beau lieu, mais entendant qu'il n'y
 auoit point de fourrage pour les bestes, il fut con-
 trainct de s'en partir, en disant: Quelle est no-
 stre vie, puis qu'il faut que nous aions le soing
 d'accommoder iusques aux asnes! Desirant for-
 cer quelque chasteau, deuant lequel il vouloit
 mettre le siege, il enuoya deuant pour recognoi-
 stre la place: ceux qu'il y auoit enuoyez luy firent
 rapport qu'elle estoit si malaisée à approcher, qu'il
 n'estoit possible de plus, & le luy depaigntrent de
 tout point imprenable. Il leur demanda, si estoit
 si fort inaccessible, que vn petit asne chargé d'or
 n'en peust approcher. Lasthenes Olynthien qui
 luy auoit aidé à s'emparer de la ville d'Olynthe,
 se plaignit vn iour à luy, disant que quelques vns
 de ses mignons qu'il auoit autour de luy, l'appel-
 loient traistre: Il luy respondit, que les Macedo-
 niens de leur naturel estoient homes rudes & gros-
 siers, & qui appelloient vne marre vne marre, &

toutes choses par leur nom. Il conseilloit à son D
 fils Alexandre de parler gracieusement & courtoi-
 sement aux Macedoniens pour acquerir leur bien-
 veillance, pendant qu'il luy estoit loisible d'estre
 gracieux, regnant vn autre: comme s'il eust voulu
 dire, que quand il seroit Roy, il faudroit qu'il leur
 teint grauité de maistre & seigneur, & qu'il feist
 iustice. Aussi luy conseilloit il de tascher à acquerir
 l'amitié de ceux qui auoient credit & authori-
 té es bonnes villes, autant des mauuais comme
 des bons, pour puis apres vsfer des bons, & abu-
 ser des meschants. Philon gentilhomme The-
 bain luy auoit faict beaucoup de plaisir du temps
 qu'il demoura ostager en la ville de Thebes: car il
 estoit logé en sa maison, & depuis ne voulut onc-
 ques receuoir dons ne presens de luy: au moien
 „ dequoy Philippus luy disoit, Ne m'oste point le
 „ tiltre & l'honneur d'inuincible, estant vaincu de
 „ courtoisie & de liberalité par toy. Il auoit esté
 pris grand nombre de prisonniers en vne bataille,
 & estoit present à les veoir vendre à l'encan, seant
 dedans sa chaire, aiant sa robbe reboursee vn peu
 plus haut qu'il n'estoit honeste, & y eut vn des pri-
 „ sonniers que lon vendoit qui luy crya tout haut:
 „ Ie te supply, Sire, de me pardonner, que ie ne
 „ sois point vendu: car ie te suis amy de pere en
 „ fils: Philippus luy demanda, De quel costé, &
 „ comment est venue ceste amitié entre nous? Ie te
 le veux dire tout bas en l'oreille, respondit le pri-
 sonnier: Philippus commanda que lon luy ame-
 nast: & lors le prisonnier s'approchant de pres luy
 dit

A dit tout bas, Abbaisse vn petit le deuant de ton
 manteau, Sire: car estant ainsi assis tu monstres ce
 qui n'est pas honeste de descouurir. Lors Philip-
 „ pus dit tout haut à ses gens, Deliurez le, & le lais-
 „ sez aller, car il est voiremēt de mes amis, & de ceux
 „ qui me veulent bien, mais il ne m'en souuenoit pas.
 Il y eut quelquefois vn sien hoste qui le cōuia d'al-
 ler soupper chez luy, il y alla: mais par le chemin il
 rencontra plusieurs qu'il y mena aussi quād & luy,
 dont il apperceut que son hoste se troubla tout,
 pour ce qu'il n'auoit pas appresté assez à soupper
 B pour tant de gens: ce qu'ayant Philippus apperceu,
 enuoya secrettement dire en l'oreille à tous ceux
 „ qu'il auoit amenez, qu'ils gardassent en leur esto-
 „ mach lieu pour la tarte: les autres cuydans qu'il le
 dist à bon esciāt, s'absteindrent de manger, de ma-
 niere que la viāde vint à estre suffisante pour tous.
 Quand il entendit la mort d'Hipparchus natif de
 l'Isle d'Eubœe, il en fut fort desplaisant: & comme
 „ quelqu'vn des assistans luy dist, Si estoit il desor-
 „ mais meur pour mourir: Ouy bien, dit-il, quant à
 „ luy, mais non pas quant à moy, à qui il est mort
 c trop tost: car il est mort auant que d'auoir receu de
 „ moy recōpense digne de l'amitié qu'il me portoit.
 Estant aduerty que son fils Alexandre trouuoit
 mauuais & se plaignoit de ce qu'il engendroit en-
 „ fans de plusieurs femmes, il luy dit: Puis que tu vois
 „ donc que tu auras plusieurs concurrens & cōpeti-
 „ teurs du Royaume apres ma mort, mets peine d'e-
 „ stre hōme de biē, à fin que tu paruienes à la courō-
 „ ne, non tāt par moy pour estre mō heritier, que par

„ toy-mesme pour en estre digne. Il l'admonestoit D
 fort d'estudier soigneusement sous Aristote en la
 „ philosophie, à fin, dit-il, que tu ne faces plusieurs
 „ choses que i'ay faittes, dont ie me repens. Il auoit
 vne fois donné quelque office de iudicature à vn
 qui luy estoit recommandé par Antipater: mais
 depuis aiant entendu qu'il se paignoit les cheueux
 & la barbe, il la luy osta, disant, que celuy qui en
 ses cheueux estoit faulsaire, mal aiseement en bon
 affaire seroit loyal. Machetas quelquefois plaidoit
 vne cause deuant luy qui sommeilloit, de maniere
 qu'à faute d'auoir bien cōpris & entendu le faict, E
 il le condamna à tort: parquoy Machetas se prit à
 crier tout haut, qu'il en appelloit. Philippus in-
 digné de cela, luy demanda incontinent, deuant
 „ qui il appelloit de luy: Deuant toy-mesme, Sire,
 „ respondit-il, quand tu seras bien esueillé, & que
 „ tu voudras plus attentiuement comprendre mon
 „ faict. Philippus picqué de ces paroles, se leua en
 pieds, & pensant mieux à foy, cogneut qu'il auoit
 fait tort à Machetas par sa sentence, & neantmoins
 ne voulut point reuoquer ne casser son iugement,
 mais luy mesme paya de son argent, autant com- F
 me pouuoit valoir la chose dont il estoit question
 au proces. Harpalus auoit vn sien parent & amy
 nommé Crates, atteint & cōuaincu de grands cri-
 mes: il pria Philippus qu'il payast bien l'amende,
 mais que la sentence ne fust point prononcee con-
 tre luy, pour en euiter la honte & le deshonneur:
 „ mais Philippus luy feit response: Il vaut mieux que
 „ luy mesme porte le deshonneur de sa faute, que
 non

A non pas moy pour luy . Ses familiers se courrou-
 ceoient de ce que les Peloponesiens , qui auoient
 receu beaucoup de biens de luy, le siffoient en la
 » feste & assemblee des ieux Olympiques: Et que
 » feroient ils au pris, leur respondit il, si nous leur
 » eussions fait desplaisir? Estant en son camp, il
 dormit vn matin plus haute heure qu'il n'auoit
 accoustumé, & s'estant à la fin esueillé & leué, il
 » dit, Je pouuois bien dormir seurement, puis que
 » Antipater veilloit. Vn musicien ioueur d'instru-
 ments auoit sonné deuant luy durant son soupper,
 B Philippus le voulut reprendre de quelque passage
 & commancea à entrer en dispute contre luy de la
 » Musique des instruments: I'à dieu ne plaise, Sire,
 » luy dit adonc le Musicien, qu'il t'aduienne iamais
 » tant de mal, que tu entendes ces choses-la mieux
 » que moy. Vne autre fois il festoit endormy sur
 iour, au moien dequoy les Grecs qui auoient af-
 faire à luy, estoient contraincts d'attendre longue-
 ment à sa porte, tellement qu'ils s'en faschoient &
 » courrouceoient: Antipater leur respondit, Sei-
 » gneurs Grecs, ne vous esbahissez pas si Philippus
 C dort maintenant, car quand vous dormiez il veil-
 » loit. Il fut quelque temps en mauuais mesnage
 avec sa femme Olympiade, & son fils Alexandre,
 durant lequel different Demaratus gentilhomme
 Corinthien l'alla visiter: Philippus luy demanda,
 commét viuoient les Grecs les vns avec les autres:
 » Vrayment, respondit Demaratus, Tu te soucies
 » bien de l'vnion & concorde des Grecs les vns avec
 » les autres, veu que les personnes qui te touchent

„ de plus pres , & que tu dois auoir les plus cheres, D
 „ font en tel diuorsé avec toy. ce mot l'y feit pen-
 ser si bien , que depuis il appaisa son courroux , &
 se reconcilia avec eux . Vne pauvre vieille aiant
 proces vouloit qu'il en fust iuge , & l'en pressoit
 ordinairement : il respondoit , qu'il n'auoit pas
 loysir d'y vacquer & entendre : & la vieille se prit
 „ à crier tout haut, Ne veuilles donc pas estre Roy.
 & luy estonné & touché au vif de ceste parole, ne
 l'ouyt pas seulement elle, mais aussi tous les autres
 de reng.

Alexandre estant encore enfant ne se resiouissoit E
 point quand il oyoit dire que son pere gaignoit &
 conqueroit tout, & disoit aux enfans d'honneur qui
 „ estoient nourris avec luy, Mon pere ne me laissera
 „ rien à faire ny a conquerir. Et cōme les enfans luy
 „ respondissent , Voire-mais c'est pour toy qu'il ac-
 „ quiert: Que me profitera il, dit-il, d'auoir beaucoup
 „ de biens , & de n'auoir rien à faire ? Il estoit fort
 dispos de sa personne , & viste à merueilles , telle-
 mēt que son pere le voulut vne fois induire à cou-
 rir en la carriere avec les autres coureurs qui cou-
 roient pour gaigner le pris és ieux Olympiques: F
 „ Je le voudrois bien , respondit-il, prouueu que ce
 „ fussent Roys qui courussent avec moy . Vn
 soir bien tard on luy amena quelque ieune garce
 pour coucher avec luy, il luy demanda pour quel-
 le cause elle estoit venue si tard : elle respondit
 qu'elle attendoit que son mary fust couché : &
 „ lors il tansa bien asprement ses gens: pour ce, dit-il,
 „ qu'il ne s'en a gueres fallu , que par vous ie n'aye
 commis

A commis adultere. Son gouuerneur Leonidas le reprit vn iour, de ce que faisant sacrifice de parfum aux Dieux, il y mettoit trop d'encens à son gré, & y retournoit trop souuent à en prendre à pleins poings, pour mettre sur le feu, en luy disant:
 „ Quand tu auras conquis la prouince qui produit
 „ l'encens, alors tu en mettras dedans le feu tant que
 „ tu voudras. Parquoy depuis, apres qu'il eust conquis l'Arabie, il luy escriuit vne lettre de telle substance: Le t'enuoye cinq cens quintaux d'encens
 „ & de cinnamome, à fin que tu apprennes à n'estre
 B plus chiche enuers les Dieux, t'auisant que pour le
 „ iourd'huy nous sommes seigneurs de la prouince
 „ qui porte les drogues aromatiques & senteurs.

Le iour de deuant qu'il dōnast la bataille du Granique, il enhorta les Macedoniens de faire bonne chere & de despendre tout ce qu'ils auoiēt de provision de viures, pour ce que le lendemain ils disneroient aux despens de leurs ennemis. Vn nommé Perillus luy demanda de l'argent pour marier ses filles: il luy feit bailler cinquante talents, qui sont enuiron trente mille escus: l'autre luy dit, que
 c c'estoit bien assez de dix seulement: Alexandre luy
 „ repliqua, Si c'est assez à prendre pour toy, ce n'est
 „ pas assez à donner pour moy. Il commanda aussi à ses tresoriers de donner au philosophe Anaxarchus tout ce qu'il leur demanderoit: les tresoriers luy rapportèrent, qu'il demandoit vne somme excessive, de cent talents: & Alexandre leur respon
 „ dit, Il fait bien, s'asseurāt qu'il a en moy vn amy qui
 „ peut & veut luy en donner autant. En la ville

de Milet il trouua plusieurs grandes statues des D
 chāpions, qui anciēnement auoiēt emporté le pris
 „ és ieux Olympiques & Pythiques : Et où estoient,
 „ dit-il aux Milesiens, ces grands corps icy, quād les
 „ barbares assiegeoient & prenoient vostre ville?

La Royne de la Carie nōmee Ada, luy enuoyoit
 soigneusement tous les iours des confitures & de
 la patisserie qui estoit fort exquisement faite par
 des ouuriers & patissiers fort excellents : mais Ale-
 xandre luy manda, qu'il auoit bien d'autres patif-
 fiers & cuisiniers encores plus singuliers que ceux
 la, à sçauoir pour le disner, le leuer matin, & chemi- E
 ner la nuict auant iour : & pour le soupper, le peu
 manger à disner. Son armee estant toute preste
 pour dōner la bataille à Darius, les capitaines luy
 vindrent demāder, si l'auoit plus rien à leur cōman-
 „ der: non, dit-il, sinon que vous faciez razer les bar-
 „ bes aux Macedoniēs. Parmenion s'esmerueillā de
 „ ce cōmandement, & Alexandre luy dit, Ne sçais tu
 „ pas qu'il n'y a point de meilleure prise en combat-
 „ tāt, que de saisir son ennemy à la barbe? Darius luy
 enuoya offrir dix mille talēs, qui sont six millions
 d'or cōptant, & de partir egalemēt par moitié tou- F
 te l'Asie avec luy: tellemēt que Parmenion luy dit,
 „ j'accepterois ceste offre la, quant à moy, si i'estois
 „ Alexandre: & moy aussi certainement, respondit
 „ Alexandre, si i'estois Parmenion: mais au demou-
 „ rant il feit responce à Darius, que la terre ne pou-
 „ uoit porter deux Soleils, ny l'Asie endurer deux
 „ Roys. Et cōme il estoit prest à donner la dernie-
 re bataille qui deuoit decider tout, pres le village
 d'Ar-

A d'Arbelles contre vn million d'hommes en armes,
 il vint quelques vns de ses mignōs à luy, accuser les
 foudards de ce qu'ils tenoient propos en leurs lo-
 ges, & conſpiroient entre eux de ne porter rien du
 butin au logis du Roy, & le retenir tout pour eulx:
 » Alexandre ſ'en prit à rire, & leur dit: Vous m'ap-
 » portez de bonnes nouuelles, car ce ſont propos
 » d'hommes deliberez de vaincre, & non pas de fuir.
 Pluſieurs des foudards meſmes venoient à luy qui
 luy diſoient, Sire, ayez bon courage, & ne craignez
 point le grand nombre de voz ennemis: car ils ne
 B pourront pas ſupporter l'odeur ſeulement qui ſort
 de noz aixelles. Mais ainſi que lon dreſſoit l'armee
 en bataille, il apperçeut vn foudard qui raccou-
 ſtroit l'attache avec laquelle il dardoit ſon iauelor,
 il le caſſa ſur le champ, & le chaſſa des bandes com-
 me foudard inutile & indigne d'en eſtre, veu qu'il
 accouſtroit encore ſes armes à l'heure propre qu'il
 en falloir vſer. Vne fois comme il liſoit des lettres
 miſſiues de ſa mere Olympiade, dedans leſquelles
 y auoit pluſieurs choſes ſecrettes & pluſieurs char-
 ges alencontre d'Antipater, Hepheſtion ſ'appro-
 c chant de luy les leut auſſi quant & luy, ainſi qu'il
 auoit accouſtumé de faire. Alexandre ne l'en en-
 garda point, mais apres qu'il eut acheué de lire, ti-
 rant ſon cachet de ſon doigt il le luy meit deſſus les
 leures. Eſtant au temple du dieu Hammon, il fut
 » nommé par le grand preſbtre du lieu, Fils de Iupiter:
 » à quoy il reſpondit, Ce n'eſt pas de merueille, car
 » Iupiter par nature eſt pere de tous, mais il adopte
 » & aduouë pour ſiens particulierement ceulx qui

„ sont les plus gens de bien. Il y fut en quelque D
 rencontre blecé d'un coup de fleſche à la cuiſſe, ſi
 accoururent ſoudain à luy pluſieurs de ceulx qui
 par flatterie auoiēt accouſtumé de l'appeller Dieu:
 & lors avec vn viſage riant il leur dit, en leur mon-
 „ ſtrant ſa playe : C'eſt du vray ſang, comme vous
 „ pouuez veoir,

& non de l'humeur telle

Qui coule aux Dieux de nature immortelle.

Comme quelques vns louaſſent deuant luy la ſim-
 plicité d'Antipater, diſans qu'il viuoit auſteremēt,
 ſans ſuperfluité ne delices quelconques, il leur re- E
 „ ſpondit, Antipater eſt voirement blanc au dehors,
 „ mais ſoiez aſſez ſur que'il eſt tout rouge cōme pour-
 „ pre au dedās. Vn de ſes amis luy dōnoit à ſoupper
 en ſon logis au cœur d'hyuer, qu'il faiſoit grand
 froit, & feit apporter en la ſalle vn petit foyer, ſur
 lequel n'y auoit que bien peu de feu. Alexandre
 „ luy dit, Fais apporter du bois ou de l'encens. vou-
 lant dire, que ſi c'eſtoit pour eſchauffer ſa ſalle, il y
 falloit du bois d'auantage : & que ſ'il n'y vouloit
 point plus de feu, que ce n'eſtoit que pour faire du
 parfum aux Dieux. Antipatrides feit venir en vn F
 feſtin où il eſtoit, vne belle ieune garſc baladine,
 qui chāta & balla ſi bien, qu'Alexādre ſ'affectiōna
 vn peu à la voir, mais premier il demāda à Antipa-
 trides qui l'auoit amenee, ſ'il en eſtoit point amou-
 „ reux: il luy cōfeſſa que ouy: adōc Alexādre luy dit, ô
 „ malheureux que tu es, ne l'emmeneras tu donc-
 „ ques pas viſtemēt hors d'icy? Vne autrefois Caf-
 ſander ſ'efforcea de baiſer malgré luy vn ieune gar-
 ſon

A son nommé Python, duquel estoit amoureux vn
 Euius excellent ioueur de flustes: Alexandre voiant
 que cest Euius en estoit fort marry, se leua en cho-
 „ lere contre Cassander, en criant, Cōment il ne sera
 „ doncques pas deormais loysible par nostre inso-
 „ lence d'aimer qui voudra. Ainsi comme il ren-
 uoyoit de son camp les malades & estropiez vers
 la mer, pour les recōduire en leurs maisons, on luy
 vint rapporter qu'un nommé Antigènes festoit
 faict escrire entre les malades & estropiez, qui n'e-
 stoit ne l'un ne l'autre, il le fait venir deuant luy, là
 B où le soudard luy confessa rondement qu'il fai-
 gnoit voirement estre malade, & qu'il ne l'estoit
 pas, pour l'amour qu'il portoit à vne ieune femme
 nommee Telesippa, qui s'en retournoit vers la ma-
 rine: Alexandre luy demanda à qui il falloit parler
 pour la faire demourer, & aiant entendu qu'elle
 n'estoit point esclau, mais de libre condition, il luy
 „ dit, Taschons dōcques par quelques bons moiens
 „ à la gagner, tant qu'elle se contente de demourer
 „ auec nous: car de retenir par force vne femme li-
 „ bre, ie ne le ferois iamais. Apres la bataille gai-
 c gnee contre Darius, aiant en sa puissance les Grecs,
 qui auoient esté à la soude de son ennemy, il com-
 manda que lon gardast aux fers les prisonniers
 d'Athenes, d'autant qu'aiants moien de viure du
 public de leur ville, ils alloient neātmoins à la sou-
 de des barbares: & les Thessaliens aussi, d'autant
 qu'aiants vn gras & fertile païs, ils ne s'arrestoient
 pas à le labourer, & aimoient mieulx aller seruir les
 barbares: mais il cōmanda que lon laissast aller les

Thebains où ils voudroiēt, pource, dit il, que nous ^D ne leur auons laissé ne ville à habiter, ny terre à labourer. Aians pris prisonnier vn Indien, que lon disoit & qui estoit de faiēt excellent à tirer de l'arc, de sorte qu'il ne failloit iamais de dōner d'vne fiesche dedans vn petit anneau, il luy feit commander de tirer deuant luy, à fin de voir la preuue de son art. L'Indien ne le voulut pas faire, dequoy Alexandre s'indigna si fort, qu'il commanda qu'on le fist doncques mourir: mais ainsi qu'on le menoit il dit à ceux qui le conduisoient, qu'il y auoit desia plusieurs iours qu'il ne f'estoit point exercité, & ^E que pour ceste occasion il auoit eu peur de faillir. Ce qu'Alexandre aiant entendu l'en estima d'auantage, & cōmanda qu'on le laissast aller, & luy donna encore vn present, d'autant qu'il auoit monstré en cela vne grande magnanimité, aiant mieulx aimé mourir, que d'estre trouué indigne de la reputation que lon luy donnoit. Taxiles estoit vn des Roys des Indes qui luy vint au deuant, & le pria

» qu'ils n'eussent point de guerre ensemble: mais si

» tu es, dit il, moindre que moy, reçois des bienfaicts

» de moy: & si tu es plus grand, que i'en reçoie de ^F

» toy. Alexandre luy feit respōse: pour le moins fault

» il que nous combattions de cela, à sçauoir lequel

» de nous deux fera plus de bien à son compagnon.

Entendant ce que lon disoit d'vne place des Indes assise dessus vn rocher, que lon appelloit Aorne, qu'elle estoit de tout poinct imprenable, mais que celuy qui la tenoit estoit homme lasche & couard:

» la place, dit il, est doncques prenable. Vn autre qui

tenoit

A renoit vn chasteau que lon estimoit semblablement
 imprenable se rendit à luy, & se meit luy & sa place
 entre ses mains. Alexandre luy rendit son païs,
 voulant qu'il le teint comme il faisoit au parauant:
 & si luy adiousta encore d'autres terres qu'il luy
 „ donna, disant, Cest homme a faict sagement de se
 „ fier plus tost à vn Prince homme de bien, qu'à vne
 „ place forte. Apres la prise de la place forte d'Aor-
 ne, aucuns de ses mignons luy disoient, qu'il auoit
 surmonté Hercules par la gloire de ses faicts: il leur
 „ respondit, Vous direz ce que vous voudrez, mais
 B quant à moy ie n'estime pas tous mes faicts, auec
 „ tout mon empire, dignes d'estre contrepelez à vne
 „ seule parole d'Hercules. Estât aduertý que quel-
 ques vns de ses familiers iouoient aux dez, non pas
 pour iouer & passer le temps, mais excessiuement
 pour se destruire, il les condamna en vne amende.
 Entre ceulx qui approchoient plus pres de luy, il
 honoroit le plus Craterus, & aimoit le plus He-
 „ phestion: car Craterus, disoit il, aime le Roy, & He-
 „ phestion aime Alexandre: voulant dire, que Crate-
 rus, homme sage & vaillant, aimoit la grandeur de
 C son maistre: & Hepheshion, homme de bõne com-
 pagnie, aimoit la personne propre de son prince.
 Il enuoya quelquefois en don cinquante talents,
 qui sont trente mille escus, au philosophe Xeno-
 crates: qui les refusa, & n'en voulut rien prendre,
 disant qu'il n'en auoit point affaire. On le rappor-
 „ ta à Alexandre, qui demanda: Et comment, Xeno-
 „ crates n'a il pas vn amy? car quant à moy, dit il, la
 „ cheuance du Roy Darius à peine m'a peu suffire à

departir entre mes amis. Porus vn Roy des Indes fut par luy pris en bataille, apres laquelle Alexandre luy demanda, Comment veux tu que ie te traicte? Porus luy respondit, Royalement. Alexandre luy repliqua, sil vouloit rien dire d'auantage: non, dit il, pource que tout est compris sous ce mot de Royalement. Alexandre estimant beaucoup son bon sens & sa vaillance, non seulement luy rendit son royaume, mais luy adiouta encore beaucoup d'autre pais. On luy rapporta vn iour, qu'il y auoit quelqu'un qui ne faisoit que mesdire de luy: il respondit, C'est acte de Roy de souffrir patiemment d'estre blasmé pour bien faire. En mourant il dit à ses familiers qui estoient autour de luy, Je voy bien que i'auray vn grand epitaphe apres ma mort: c'est à dire, des ieux funebres que lon faisoit au trespas des grands personages. Apres qu'il fut decedé, Demades orateur Athenien voiant son armee demouree sans chef qui y commandast, dit, qu'elle ressembloit à son aduis au geant Polyphemus cyclops, apres qu'Vlysses luy eut creué son œil. Ptolomeus fils de Lagus roy d'Ægypte, le plus souuent couchoit & souppoit au logis de ses amis: & sil leur donnoit à soupper, il se seruoit de leurs meubles, enuoyant emprunter de la vaisselle, des tables, des lits, pource qu'il n'en auoit chez luy iamais plus qu'il en falloit pour le seruice de sa personne: & disoit, qu'enrichir les autres luy sembloit plus royal que de s'enrichir soy mesme. Antigonus leuoit grosse somme d'argent sur ses subiects avec grosse rigueur: à raison dequoy quelqu'un luy dit,

A dit, Voire mais Alexandre ne faisoit pas ainsi : Ce
 » n'est pas de merueille, dit il, car il moissonnoit l'A-
 » sie, & ie ne fais que la glaner. Il veit vn iour em-
 my son camp des simples soldards qui iouoient à
 la boule, aians leurs corselets sur le dos, & leurs
 morrions en teste : il y prit plaisir, & fait appeller
 leurs Capitaines, en intention de les en louer : mais
 quand il sceut, qu'ils estoient en vne tauerne où ils
 beuuoient, il leur osta leurs cōpagnies, & les donna
 aux simples soudars. Quand il fut deuenu vieux,
 il commācea à se monstrier plus doulx & plus gra-
 B cieux enuers vn chascun qu'il n'auoit iamais fait, &
 se comportoit plus humainemēt en toutes choses,
 dont tout le monde s'esbahissoit : & il respondoit à
 » ceux qui luy en demandoient la cause, C'est pour
 » autant, dit il, que parauant ie cherchois de me faire
 » grand en toute puissance : mais maintenant que ie
 » l'ay acquise, ie n'ay plus besoing que de gloire &
 » de beneuolence. Vn sien fils nommé Philippus
 luy demanda vn iour en presence de beaucoup de
 » gens, quand partiroit le camp : il luy respondit, As
 » tu peur de n'ouïr pas le son de la trompette ? Ce
 C mesme fils auoit vn iour procuré qu'on luy feist
 son logis chez vne femme veufue, laquelle auoit
 trois belles filles. Le Roy son pere en estat aduerty,
 » enuoya querir le mareschal des logis, & luy dit, Ne
 » me deslogeras tu point mō fils de ce logis si estroit ?
 Il fut quelque fois malade d'vne maladie lōgue : de-
 » puis estant retourné en conualescence, Nous n'en
 » vaudrōs pas pis, dit-il, d'auoir esté malades, car cela
 » nous a admonestez de ne nous enorgueillir point,

„ attendu que nous sommes mortels . Hermodotus D
 poëte en quelques compositions sienes poëtiques
 l'appelloit fils du Soleil : & luy alencontre disoit,
 „ Celuy qui vuide ma selle percee sçait bië avec moy
 „ qu'il n'en est rien. Quelqu'un disoit en sa presence
 „ que toutes choses estoient iustes & honestes aux
 „ Roys : ou bien, dit il, aux Roys des Barbares : mais
 „ à nous cela seulement est iuste & honeste , qui par
 „ nature l'est de soy mesme. Marfias son frere a-
 uoit vn procès deuât luy, & le prioit qu'il fust plai-
 „ dé & iugé à huis clos en son logis: mais bië, respon-
 „ dit il, au beau milieu de la place, à la veüe de tout le
 „ monde, si nous ne voulons faire tort à personne. Il
 fut vne fois en hyuer contrainct de loger son camp
 en lieu, où il n'y auoit cōmodité quelconque pour
 la vie de l'homme : à l'occasion dequoy , quelques
 soudards ne sçachans pas qu'il fust si pres d'eulx le
 maudissoient , & luy disoient iniure : & luy entre-
 ouurant avec son baston la toile de son pauillon
 „ leur dit, Si vous n'allez plus loing mesdire de moy,
 „ ie vous en feray bien repentir . On estimoit que
 vn Aristodemus, l'un de ses familiers, fust fils d'un
 cuysinier : au moien dequoy , comme il luy con-
 seillaist de retrencher sa despense ordinaire , & de
 „ restaindre ses dons , il luy respondit, Tes propos,
 „ Aristodemus , sentent fort leur deuantreau de cuy-
 „ sinier . Les Atheniens donnerent droict de bour-
 geoisie de leur ville à vn sien esclauue, comme s'il
 eust esté personne libre, pour luy faire honneur:
 „ mais il leur dit, Je ne voudrois pas fouetter vn A-
 „ thenien . Il y eut vn ieune homme disciple du Re-
 toricien

A toricien Anaximenes, qui prononcea par cœur deuant luy vne harengue composee de longue main: apres qu'il eut acheué, le Roy luy demanda quelque chose qu'il vouloit sçauoir. Le ieune homme qui ne sçeut que respondre, se teut tout quoy: & adonc le Roy luy dit, Que dis tu? n'y a il que cela B escript en tes tablettes? Vn autre affecté retoricie harenquant deuant luy vint à dire, La saison iettee nege auoit fait faillir l'herbe aux champs: Il ne se peut tenir de luy dire, en rompant son propos, Ne cesseras tu au iour d'huy de parler à moy, comme si B tu parlois à vne tourbe populaire, sans iugement? Thrasyllus philosophe Cynique luy demanda vn iour vne drachme d'argent en don, qui sont trois fous & quatre: Il luy respondit, Cela n'est pas vn don de Roy. Dõne moy donc vn talent, dit le philosophe: & le Roy luy respõdit, Cela n'est pas prise de philosophe Cynique. Enuoiant son fils Demetrius avec grosse flotte de vaisseaux en la Grece pour deliurer les Grecs de seruitude, comme il disoit, il en rendoit la cause par ce qu'il disoit, que sa gloire reluiroit de dessus la Grece par toute la terre C habitable, ne plus ne moins que feroit vn brandon de feu que lon mettroit au dessus d'vne haulte tour. Le poëte Antagoras estoit en son camp, qui faisoit bouillir vn congre dedans vne poille, & secouoit la poille luy mesme: Antigonus le regardant faire derriere luy, se prit à luy dire: Antagoras, penses tu qu'Homere descriuât les haults faicts du roy Agamemnon s'amusast à faire cuire vn cõgre? Antagoras se retournant luy repliqua, Mais penses tu,

» Sire, que le roy Agamemnon faisant ces grandes
 » choses que descrit Homere, allast curieusement re-
 » chercher parmy son camp, s'il y auoit quelqu'un
 » qui feist bouillir vn congre? Il luy fut vne nuit ad-
 uis en songeant, qu'il voioit Mithridates moisson-
 nant vn bled aux espics d'or, à raison dequoy il re-
 solut en soy-mesme de le faire mourir: & aiant
 communiqué à son fils Demetrius ceste siene deli-
 beratiō, il luy feist iurer qu'il n'en diroit iamais rien:
 mais neantmoins Demetrius tirant à part Mithri-
 dates, & se promenant le long de la marine avec
 luy, il escriuit du bout de sa iaueline dedās le sable, **E**
 » Fuy t'en Mithridates. Mithridates aiant soudain
 entendu ce qu'il vouloit dire, s'en fuit au royaume
 de Pont, là où il regna toute sa vie. Demetrius
 aiant mis le siege deuant la ville de Rhodes, y trou-
 ua en l'un des faulx bourgs le tableau de la ville
 d'Ialysus que paignoit Protogenes. Les Rodiens
 l'enuoyerent prier par vn herault, de vouloir par-
 dōner à ceste excellēte peinture: il leur feist respon-
 se, qu'il gasteroit plus tost les portraicts & images
 de son propre pere, que celle peinture. Aiant ac-
 cordé avec les Rodiens, il leur laissa sa grande ma- **F**
 chine de batterie qui s'appelloit Helepolis, c'est à
 dire, engin à prédre villes, pour tesmoigner au tēps
 aduenir la grandeur de ses ouurages, & la valeur de
 leur courage. Les Atheniēs s'estans rebelles con-
 tre luy, il reprit leur ville qui auoit ia grande faulte
 de viures: Si feist incontīnēt proclamer vne assem-
 blee de ville, en laquelle il declara, qu'il leur don-
 noit en pur don grande quantité de bleds, mais en
 sa

A sa haréque il luy aduint de commettre vne incon-
 gruité: soudain l'vn de ceulx de la ville qui estoit as-
 sis pour l'escouter, le releua, prononceât tout hault
 „ le mot ainfi comme il le deuoit auoir dit: Et pour
 „ ceste correction là, dit il adonc, ie vous dōne enco-
 „ re d'auantage autres cinq mille mines de bled.

Antigonus le secōd, cōme Demetrius son pere aiāt
 esté pris prisonnier luy eust enuoyé dire par vn de
 ses familiers qu'il n'adioustaist point de foy, ny ne
 feist aucun compte de chose qu'il luy escriuist, si
 B d'aduenture il estoit forcé de ce faire par Seleucus
 qui le tenoit prisonnier; & que pour cela il ne luy
 rendist aucune des villes qu'il tenoit: au contraire il
 escriuit à Seleucus, qu'il luy cederait toutes les ter-
 res qu'il auoit en son obeissance, & se mettroit soy
 mesme en ostage, s'il vouloit deliurer son pere. Sur
 le poinct qu'il estoit prest à dōner vne bataille par
 mer aux Lieutenans & Capitaines de Ptolomeus,
 le pilote de sa galere luy vint dire, que leurs enne-
 mis auoient bien plus grand nombre de vaisseaux
 C qu'eux: Et moy, dit il, qui suis icy en personne, pour
 „ combien me comptes-tu? Se retirant vne fois de
 „ deuant ses ennemis qui le venoient assaillir, il dit
 „ qu'il ne fuyoit pas, mais qu'il alloit apres l'uti-
 „ lité qui estoit derriere luy. Et comme vn ieune
 „ homme fils d'un fort vaillant pere, mais au de-
 „ mourant n'estant pas tenu pour guerres bon
 „ soudard quant à luy, prochassast d'auoir la sou-
 „ de de son pere: Voire-mais, dit il, ieune fils mon
 „ amy, ie donne bien bon appointment & fais
 „ des presents à ceulx qui sont eulx mesmes vail-

„ lants, non pas à ceux qui ne sont qu'enfans de vail- D
 „ lants hommes. Estant Zenon le Citicien trepas-
 sé, celuy qu'il estimoit le plus entre tous les Philo-
 sophes, il dit que le theatre de ses gestes luy estoit
 osté, cōme celuy que pour sa gloire il desiroit plus
 auoir spectateur & approbateur de ses faicts. Ly-
 simachus aiant esté surpris au pais de Thrace par
 le roy Dromichetes, en vn destroict où il fut con-
 traint par la soif de se rēdre luy & toute son armee
 à la mercy de son ennemy: apres qu'il eut beu,
 „ estant prisonnier, ô Dieux comment pour peu de
 „ plaisir ie me suis fait esclauē, au lieu de Roy que
 „ i'estois! Deuisant vn iour avec Philippides poète
 comique, qui estoit son familier & amy, il luy dit:
 „ Que veux tu que ie te communique de ce qui est
 „ à moy? Ce qu'il te plaira, Sire, luy respōdit le poète,
 „ prouueu que ce ne soit point de tes secrets. An-
 tipater aiant entendu comme le Roy Alexandre le
 grand auoit fait mourir Parmenion, dit en s'esba-
 „ hissant, Si Parmenion a attenté à la vie d'Alexan-
 „ dre, à qui se faut il plus fier, Sinon? Que faut il plus
 „ faire? Il disoit de l'orateur Demades, quand il fut
 deuenu vieil, qu'il ne luy estoit demouré que le
 ventre & la langue, non plus que d'une hostie que
 lon a toute consommee. Antiochus le troisiēme
 escriuit aux villes de son obeissance, que si d'ad-
 uenture il leur mandoit de faire aucune chose qui
 fust contraire aux loix, elles n'y obeissent point,
 cōme aians esté les lettres despescnees par surprise.
 Aiant trouué la religieuse de Diane belle par ex-
 cellence, il se partit incontīnēt de la ville d'Ephese,
 de

A de peur que l'amour ne le forceast de commettre contre sa volonté chose qui ne fust pas loisible.

Antiochus surnommé le Sacre, faisoit la guerre à son frere Seleucus, à qui demoureroit Roy : & neantmoins apres que Seleucus eust esté deffait en bataille par les Galates, tellemét que lon estimoit qu'il eust esté luy mesme taillé en pieces, à cause qu'il ne comparoïsoit point, & ne sçauoit on qu'il estoit deuenue, Antiochus posant son accoustremét royal de pourpre, prit vn habillement noir : & vn peu apres aiât eu nouuelles qu'il estoit sain & sauf, B il sacrifia aux Dieux pour leur rendre graces de son salut, & cōmanda aux villes de son obeïssance d'en faire feste, en portant chapeaux de fleurs sur leurs testes. Eumenes estant tombé dedans les embusches que luy auoit dressees Perseus, le bruit courut incontinent par tout qu'il y estoit mort : tellement que la nouuelle en aiant esté apportee iusques en la ville de Pergamū, Attalus son frere se meit aussi tost le frontail royal, autremét appelé Diadème, alétour de la teste, & qui plus est espousant sa femme, se porta pour Roy : mais peu apres étant aduertie que son frere estoit sain & sauf, & qu'il s'en venoit en sa maison, il s'en alla au deuant de luy comme il auoit accoustumé au parauant avec les gardes du corps du Roy, portant luy mesme vne iaueline de barde en sa main cōme les autres. Eumenes le salua & l'ambrassa amiablemét, luy disant „ seulement tout bas en l'oreille, Vne autre fois ne te „ haste pas tant d'espouser ma femme que tu ne me „ ayes veu mort : sans que iamais depuis en toute sa

vie, il luy dist ne luy feist chose aucune, dont il se
 deust deffier, ains qui plus est en mourant luy laissa
 son royaume & sa femme: en recompense dequoy
 son frere ne voulut iamais faire nourrir ny eleuer
 aucun de ses enfans, combié qu'il en eust plusieurs
 de sa femme, ains rendit de son viuant le royaume
 au fils de son frere Eumenes, apres qu'il fut parue-
 nu en aage de regner. Pyrrhus roy des Epirotes
 eut plusieurs fils, lesquels estans encore enfans luy
 demanderent vn iour, à qui d'eux il laisseroit son
 „ royaume apres sa mort: il leur respōdit, A celui de
 „ vous qui aura l'espee la mieux trenchante. On luy
 demāda vne fois, quel estoit le meilleur ioueur de
 „ flustes, à son aduis, Python ou Cephisus: Polyper-
 „ chon, dit il, est le meilleur Capitaine. Aiant desfait
 les Romains en deux rencontres, mais avec grand'
 perte de ses meilleurs Capitaines, & de ses meil-
 „ leurs seruiteurs: Si nous gagnons, dit il, encore vne
 „ autre bataille contre ces Romains, nous sommes
 „ perdus. En montāt sur mer au partir de la Sicile,
 d'autant qu'il voioit bien qu'il ne viendroit iamais
 à bout de la gagner, en se tournāt deuers ses amis:
 „ O la belle carriere, dit il, à luitter que nous laissons
 „ aux Romains & aux Carthaginois! Ses soudards le
 „ surnommoient l'Aigle: & il leur respondoit, Pour-
 „ quoy non, quād voz armes sont les æles qui m'en-
 „ leuent au ciel? Estant aduertý que quelques ieunes
 hommes en beuuant auoient tenu à la table plu-
 sieurs propos outrageux & iniurieux de luy, il cō-
 manda que lon les luy amenast tous le lendemain:
 quand ils furent venus il demanda au premier, sil
 estoit

A estoit vray qu'ils eussent tenu tels propos de luy:
 „ Ouy, Sire, respondit il, mais nous en eussions bien
 „ dit encore d'avantage, si le vin ne nous eust failly.
 Antiochus, celuy qui feit deux voïages contre les
 Parthes, estant à la chasse poursuiuit si longuement
 sa proye, qu'il s'esgara de tous ses amis, & tous ses
 seruiteurs, tant qu'il fut contrainct pour la nuit de
 se loger en la cabane de bien pauvres païsans: là où
 en soupçant il leur demanda que c'est que lon di-
 „ soit du Roy: Il luy fut respondu, Que le Roy estoit
 „ vn bien bon prince au demourant, mais que pour
 B ne vouloir pas prendre peine à faire ses affaires luy
 „ mesme, il se remettoit de beaucoup de choses à ses
 „ mignôs qui ne valloient rien, & qu'il passoit beau-
 „ coup d'affaires de grand' importance en noncha-
 „ loir, pour estre trop affectionné à la chasse. Il ne
 respondit rien sur l'heure: mais le lendemain au
 poinct du iour, comme ses gardes fussent arriuez
 en ceste loge, estant descouvert, en reprenant son
 habit royal de pourpre, & le frontal du diademe
 „ alentour de sa teste: Depuis que ie vous pris pre-
 „ mierement à mon seruice, iusques à hier au soir,
 C iamaïs ie n'auois, dit-il, entendu vne seule parole
 „ veritable de moy. Ainsi comme il tenoit le siege
 deuant la ville de Hierusalem, les Iuifs luy deman-
 derent surseance d'armes pour sept iours seule-
 ment, à fin qu'ils peussent solenniser leurs plus
 grande feste: ce que non seulement il leur ottroya,
 mais aussi aiant fait apprester bon nombre de tau-
 reaux aux cornes dorees, & grande quantité de
 drogues & especes odorantes à faire parfums, il les

conduisit luy mesme en processio iusques à la porte de leur ville, & aiant liuré tout cest appareil de sacrifice entre les mains de leurs prestres, s'en retourna dedans son camp: parquoy les Iuifs esmerueillez de sa religieuse liberalité, incontinent apres leur feste se rendirent à luy. Themistocles en sa premiere ieunesse ne faisoit que yurôgner & pail-
 larder, mais depuis que Miltiades capitaine general des Atheniens eut desfaict les Barbares en la plaine de Marathone, iamais on ne le veit faisant aucun desordre: & respôdoit à ceux qui s'esbahissoiēt
 » de voir en luy vne si grande mutation, Le trophée
 » de la victoire de Miltiades ne me laisse point dor-
 » mir ny reposer. On luy demanda quelquefois,
 » lequel il aimeroit mieulx estre Achilles ou Home-
 » re: mais toy mesme, dit il, lequel aimerois tu mieulx
 » estre, ou celuy qui gaigne le pris és ieux Olympi-
 » ques, ou le crieur qui à son de trompe le proclame
 » victorieux? Quand le roy Xerxes descendit en
 la Grece avec celle grande flotte de vaisseaux, crai-
 gnant qu'un orateur Epicydes, qui auoit credit en-
 uers le peuple à cause de son eloquence, mais qui
 au demourant estoit lasche de cœur, & fort subiect
 à l'auarice, ne paruint par les voix du peuple à
 estre Capitaine general d'Athenes en ceste guerre,
 & ne fust cause de perdre la ville, il le gaigna par
 argent, tant qu'il se deporta de la poursuite d'estre
 Capitaine. Eurybiades le general de toute l'ar-
 mee n'auoit pas le cœur de conclurre à la bataille
 par mer, à quoy Themistocles faisoit tout ce qu'il
 pouuoit pour emouuoir & inciter les Grecs: tel-
 lement

Alement quel'autre luy dit en plein conseil, Ceulx
 „ qui se leuent auant que ce soit à leur reng és com-
 „ bats publiquesdes ieuxsacrez, sont tousiours fouët-
 „ rez. Il est vray, respondit Themistocles, mais aus-
 „ si ceux qui demeurerét derriere, ne sont iamais cou-
 „ ronnez. Eurybiades adonc le capitaine general le-
 „ ua le baston, comme pour le frapper: & Themisto-
 „ cles luy dit, Frappe si tu veux, prouueu que tu
 „ escoutes. Voyant qu'il ne pouuoit mettre en la
 „ teste de ce general Eurybiades qu'il voulust com-
 „ battre dedans le canal & destroict de Salamine, il
 „ enuoya secrettement soubs main aduertir le Roy
B barbare qu'il ne laissast pas eschapper les Grecs qui
 ne pensoient qu'à s'enfuir: à quoy ce roy aiant ad-
 iousté foy donna la bataille, qu'il perdit, pour ce
 qu'il combattit en vn bras de mer long & estroict,
 qui estoit à l'aduantage des Grecs: & sur l'heure
 Themistocles renuoya de-rechef vers luy l'admo-
 nester de s'enfuir vers le pas de l'Hellespont le plus
 tost qu'il pourroit, pource que les Grecs estoient
 en propos de luy rompre le pont de nauires qu'il
 auoit fait bastir sur ce destroict, à fin que ce qu'il
C faisoit pour sauuer les Grecs, il le semblast faire
 pour le salut de luy. Vn habitant de la petite Isle
 de Seriphe luy dit vn iour par maniere de repro-
 che, qu'il estoit renommé pour la gloire de la ville
 d'Athenes, dont il estoit, non pas pour luy mesme.
 „ Tu dis verité, luy respondit Themistocles, mais ny
 „ moy si i'eusse esté Seriphien, ny toy si tu eusses esté
 „ Athenien, n'eussions iamais esté renommez.

Antiphates le beau fils, du commencement mes-

123 prisoit & fuyoit Themistocles qui estoit amoureux D
 de luy, mais depuis quand il le veit paruenü à gran-
 de autorité & grãde reputation, il le vint recher-
 124 cher, flatter & courtiser: O ieune fils mon amy,
 125 dit-il alors, nous sommes bien tard, mais au moins
 126 à la fin, deuenus sages tous deux ensemble. Simon-
 nides le poëte luy requeroit en iugement quelque
 127 chose qui estoit iniuste, auquel il respōdit: Ny toy
 128 Simonides ne ferois pas bon musicien, si tu chan-
 129 tois contre mesure: ny moy bon magistrat, si ie iur-
 130 geois contre les loix. Il disoit que son fils qui
 faisoit faire ce qu'il vouloit à sa mere, estoit le plus E
 131 puissant homme de la Grece: Pour ce, disoit-il, que
 132 les Atheniens commandent au demourant de la
 133 Grece, ie commande aux Atheniens, sa mere à
 134 moy, & luy à sa mere. Il y auoit deux qui deman-
 doient sa fille en mariage, desquels il prefera l'ho-
 135 neste au riche, disant, qu'il aimoit mieux auoir vn
 136 homme qui eust affaire de biens, que des biens qui
 137 eussent affaire d'vn homme. Vendant vn sien
 heritage, il feit proclamer au crieur qui le crioit à
 138 vendre, qu'il auoit bon voisin. Comme les Athe-
 niens estans saouls de luy prissent plaisir à le ton- F
 139 dre & rebuter en ses poursuittes: O pauures gens,
 140 disoit il, pourquoy vous lassez vous de receuoir
 141 souuent de mesmes personnes de bons seruices?
 Il disoit qu'il estoit semblable aux grands platanes,
 soubz la rameure desquels les passans se retirent
 quãd ils sont surpris de la pluye: puis quãd le beau
 temps est venu, ils leur arrachent leurs branches &
 les deschirent. Se mocquant des Eretriens, il di-
 142 soit

A soit qu'ils ressembloient aux Casserôs, parce qu'ils L'Os des
 auoient bien des espees, mais ils n'auoient point de Casserons
 cœur. Estant fugitif de la ville d'Athenes premie- s'appelle
 rement, & puis de toute la Grece, il se retira deuers espee.
 le grand Roy de Perse, là où luy estant audience
 donnee, il dit, que la parole de l'homme ressem-
 bloit proprement aux tapisseries de haute lice fi-
 gurees & historiees: car en l'une & en l'autre, quād
 elles sont desployees & estandues bien au long, se
 descouurent à clair les figures: là où quand elles
 sont pliees & empacquetees, les protraicts y sont
 cachez, & n'y cognoit on rien: au moien dequoy il
 demanda terme de certain temps, dedans lequel il
 peust apprendre la langue Persienne, à fin que de
 là en auāt il peust par luy mesme se descourir, &
 dōner à entēdre ses conceptiōs au Roy, non point
 par vn truchement. Luy aiant doncques le Roy
 faict plusieurs grāds presens, & estant soudain de-
 uenu fort riche, il disoit à ses gens, Enfans nous
 estiōs perdus, si nous n'eussions esté perdus. My-
 ronides capitaine general des Atheniēs se meit aux
 chāps, pour aller faire la guerre aux Bœotiēs, aiant
 cōmandé à ceux d'Athenes qu'ils le suyussent avec
 leurs armes: mais sur le point qu'il falloit mener les
 mains, les Centeniers luy vindrent dire que leurs
 gens n'estoient pas encore tous venus: Tous ceux,
 dit-il, qui ont enuie de combattre, sont venus: &
 ainsi les menant en deliberation de bien faire, gai-
 gna la bataille contre les ennemis. Aristides sur-
 nommé le iuste faisoit tousiours ses affaires à part
 au gouuernement de la chose publique, fuyant

toutes liguez & partialitez, d'autant qu'il auoit opinion que l'autorité & le credit qui estoit ainsi acquis par pratiques & menees d'amis, incitoit & poulsait les hommes à faire beaucoup de choses iniustes. Et comme les Atheniens fussent assemblez en conseil de ville pour proceder au bannissement qu'ils appelloient l'ostracisme, il y eut vn païsant qui ne sçauoit ne lire ny escrire, qui tenant vne coquille en sa main le pria d'escrire dedans le
 „ nom d'Aristides : & qu'il luy demanda, Et com-
 „ ment, cognois tu bien Aristides ? Le païsant luy dit
 „ que non, mais qu'il luy faschoit de l'ouïr appeller
 „ le iuste. Aristides ne luy respondit rien, & escri-
 uant son nom dedans la coquille la luy rebaila.

Estant ennemy de Themistocles, & enuoyé en quelque ambassade quant & luy, arriuez qu'ils furent aux confins de l'Attique, il luy dit, Veux tu
 „ Themistocles que nous laissons icy sur les limites
 „ du païs, nostre inimitié, & puis quand nous serôs
 „ retournez de nostre ambassade, nous la repren-
 „ drons si bon nous semble ? Apres auoir faict le departement de la taille sur toute la Grece, & taxé combien chascque ville deuroit payer, il en retour-
 „ na plus pauvre qu'il n'y estoit allé, d'autant comme il auoit despensé par le chemin: parquoy aiant le poëte Æschylus fait ces vers en vne siene tragedie touchant Amphiaraus,

Il ne veut pas sembler iuste, mais l'estre,

Gardant iustice en pensee profonde:

Dont nous voions tous les iours apparostre

Sages conseils, où tout honneur abonde.

quand

A quand on vint à les reciter en plein theatre, toute
 l'assistance ietta les yeux sur Aristides. Pericles
 toutes les fois qu'il estoit eleu capitaine, en prenāt
 son manteau ducal souloit dire en soy-mesme, Pe-
 ricles prens garde à toy, tu t'en vas pour comman-
 der à des hommes libres, & à des Grecs, & à des
 Atheniens. Vn sien amy le requeroit de porter
 faux tesmoignage pour luy, où il falloit encore iu-
 rer: il luy respondit, Je suis ton amy iusques à l'au-
 tel: c'est à dire, iusques à n'offenser point les Dieux.
 Il suadoit aux Atheniens d'oster l'Isle d'Ægine,
 comme vne maille ou vne chassie, qui estoit en
 l'œil de leur port de Pirée. Estant pres à rendre
 son ame il dit, qu'il se reputoit heureux de ce que
 nul Atheniē ne portoit robbe noire par son moiē.
 Alcibiades estant encore ieune garson, en luittant
 contre vn autre fut saisy d'une prise, de laquelle il
 ne pouuoit pas bien se desfaire, si prit à belles dents
 la main de celuy qui le tenoit: & l'autre se prit à
 crier, Comment Alcibiades tu mords comme vne
 femme: Non pas comme vne femme, respondit-il,
 mais bien comme vn lion. Aiant vn fort beau
 chien qui luy auoit cousté sept cens escus, il luy
 couppa la cueuē, à fin (dit-il) que les Atheniens
 comptent cela de moy, & ne s'amusent point à me
 rechercher curieusement plus auant. Il entra en
 vne eschole, où il demāda au maistre l'Iliade d'Ho-
 mere. Le maistre luy dit, qu'il n'auoit rien des œu-
 res d'Homere: il luy donna vn soufflet, & passa
 oultre. Il vint vn iour battre à la porte de Pericles,
 où lon luy dit, qu'il n'estoit pas de loysir, & qu'il

estoit bien empesché à regarder comment il rendroit compte aux Atheniens de leur argent: Et ne vaudroit il pas mieux, dit-il, qu'il s'empeschast à regarder comment il ne leur en rendroit point?

Estant rappellé de la Sicile par les Atheniens qui luy vouloient faire son procès, il se cacha, disant, que qui est accusé de crime capital est vn sot de chercher à se faire absoudre, quand il s'en peut fuir. Et comme quelqu'un luy dist, Commét ne te fies-tu pas à ton pais de te iuger? non pas, dit-il, à ma propre mere, de peur qu'en n'y pensant pas, elle ne iettast par erreur la febue noire au lieu de ietter la blanche. Estant aduertie que luy & ses compagnons auoient esté condamnez à la mort: Montrons leur, dit-il, que nous sommes viuans: & se retirant deuers les Lacedemoniens, suscita la guerre qui fut appelée Decelique. Lamachus reprenoit vn capitaine de gés de pied de quelque faute qu'il auoit commise en son estat: l'autre luy disoit, qu'il ne le feroit plus: mais on ne peut pas, replica il, faillir deux fois à la guerre. Iphicrates estoit mesprisé, d'autāt qu'on le tenoit pour fils d'un cordonnier, mais il acquit reputation d'homme de valeur, alors premier que tout blecé qu'il estoit, il faist son ennemy au corps, & l'emporta tout vif avec ses armes, de la galere ennemie dedās la siene. Estant en terre d'amis & alliez, il fortifioit neantmoins son camp fort soigneusement de trêchee & de répart tout alentour. Il y eut quelqu'un qui luy dit, Dequoy auons nous peur? auquel il respondit, que la pire parole qui scauroit sortir de la bouche d'un

A d'un capitaine est, Je ne me fusse iamais douté de
 cela. Dressant son armee en bataille pour comba-
 tre des peuples barbares, il dit, qu'il ne craignoit
 autre chose sinon que les barbares n'eussent point
 cognoissance d'Iphicrates, qui estoit ce qui ef-
 froyoit ses autres ennemis. Estant accusé de cri-
 me capital, il dit au calomniateur qui l'accusoit: ô
 pauvre homme regarde que tu fais, ores que la vil-
 le est enuironnee de guerre, suadant au peuple de
 consulter de moy, & non pas avec moy. Harmo-
 dius qui estoit descendu de l'ancien Harmodius,
 luy reprochoit vn iour, qu'il estoit extraict de race
 vile & roturiere: La noblesse de ma race, luy res-
 pondit-il, commence à moy, & celle de la tiene
 acheue à toy. Vn orateur haréguant deuant le peu-
 ple en pleine assemblee de ville luy demāda, Qu'es
 tu, à fin que lon sçache dequoy tu te glorifies tant?
 Es tu homme d'armes, ou archer, ou hōme de pied
 & picquier? Je ne suis, respōdit-il, rien de tout ce-
 la, mais ie suis celuy qui sçait commander à tous
 ceux là. Timotheus estoit estimé capitaine plus
 heureux que habile homme ne vaillāt, & quelques
 vns luy portans enuie luy paignoiēt des villes qui
 venoiēt d'elles-mesmes se prēdre dedans vne nasse,
 pendant qu'il dormoit: & luy disoit, Or pensez si
 ie prens de telles villes en dormant, que c'est que ie
 feray quād ie feray esueillé. Vn des capitaines ha-
 zardeux & aduenteux monstrois aux Atheniens
 par vne maniere de gloire, quelque playe qu'il
 auoit dessus sa personne: mais luy au cōtraire i'eus
 dit-il, grande honte vn iour que i'estois Capitaine

„ general, deuant la ville de Samos, quand vn traict
 „ d'engin de batterie vint tōber tout aupres de moy.

Et comme les harengueurs louassent grandement
 „ & recommandassent le capitaine Chares, disans,
 „ Voyla vn tel homme qu'il faudroit pour en faire
 „ vn capitaine general des Atheniens: Timotheus
 „ respondit tout haut, Ne dittes pas capitaine, mais
 „ vn bon gros vallet pour porter le liēt du capitaine.

Chabrias disoit que ceux qui sçauoient mieux les
 affaires de leurs ennemis, estoient ceux qui mieux
 faisoient l'office de capitaines. Estant accusé de tra-
 hison avec Iphicrates, il ne laissoit pas d'aller à l'es-
 bat au parc des exercices, & de disner à son heure
 accoustumee, dequoy Iphicrates le tançoit: & luy
 „ respondoit, S'il aduient que les Atheniens ordon-
 „ nent de nous autre chose que bien à poinct, ils te
 „ feront mourir, dit-il, tout sale & à ieun, & moy
 „ laué, oinct, & bien disné. Il souloit dire que vne
 armee de cerfs conduite par vn lion estoit plus à
 craindre, qu'une armee de lions conduite par vn
 cerf. Hegesippus que lon surnommoit Crobylus,
 incitoit les Atheniens à prendre les armes contre
 Philippus Roy de Macedoine, & quelque vn de
 „ l'assemblee luy crya tout hault, Comment, nous
 „ veux tu introduire la guerre? Ouy certainement,
 „ dit-il, & les robbes de deuil, & les conuoys de fu-
 „ nerailles publiques, & les harengues funebres, si
 „ nous voulons demourer libres, & non pas nous as-
 „ subiectir aux Macedoniens. Pytheas estant enco-
 re fort ieune se presenta vn iour pour contredire
 en pleine assemblee, aux decrets publiques, que
 lon

A lon passoit par les voix du peuple à l'honneur de
 Alexandre : quelqu'un luy dit, Comment, oses tu
 bien entreprendre, estant si ieune, de parler de si
 grandes choses? Pourquoy non, dit-il, veu qu'Ale-
 xandre que vous faictes un Dieu par voz suffrages
 est encore plus ieune que moy? Phocion Athe-
 nien estoit si constant, que iamais on ne le veit ne
 plorer ne rire: & comme en vne assemblée de ville,
 „ quelqu'un luy dist, Tu es tout pensif, Phocion, il
 „ semble que tu estudies quelque chose: Tu cōiectu-
 „ res bien, respondit-il, car i'estudie voirement, si ie
 B pourray point retrencher quelque chose de ce que
 „ i'ay à dire aux Atheniens. Les Atheniens eurent un
 oracle qui les aduertissoit qu'il y auoit en la ville
 un personnage qui estoit contraire aux conseils &
 aduis de tous les autres: & comme ils feissent par
 tout enquerir qui estoit celuy là, & criaissent en grā-
 „ de furie contre luy, Phocion dit franchement tout
 „ haut que c'estoit luy, pour ce qu'à luy seul rien ne
 „ plaist de tout ce que le peuple faisoit & disoit.
 Aiant un iour dit son aduis en pleine assemblée du
 peuple, il pleut à toute l'assistance, & veit que tous
 C egalemēt approuuoient son dire, il en fut si esbahy
 qu'en se tournant deuers ses amis, il leur demanda,
 „ Ne m'est il point eschappé de dire quelque chose
 „ de trauers, sans y penser? Les Atheniens voulurent
 quelquefois faire un grand & solennel sacri-
 fice, pour à quoy fournir, ils demandoient à chas-
 cun quelque contribution d'argent: chascun des
 autres donnoit liberalement, & Phocion estant
 nommeement appelé par plusieurs fois pour

„ donner aussi, leur dit à la fin : l'aurois honte de **D**
 „ vous donner, & ne rendre pas à cestuy-cy. mon-
 „ strant au doigt vn vsurier, à qui il debuoit. Et
 „ comme Demades luy dist, Les Atheniens te tue-
 „ ront si vne fois ils entrent en leur fureur : Si feront
 „ certes, luy respondit-il, ils me tueront voirement,
 „ s'ils entrent en leur fureur : mais toy, s'ils entrent
 „ en leur bon sens. Aristogiton le calomniateur
 „ estant condamné à mort pour calomnie, & prest
 „ à executer en la prison, enuoya prier Phocion de
 „ venir iusques là parler à luy. Ses amis ne vouloiēt
 „ pas qu'il y allast, pour parler à vn si meschant hō- **E**
 „ me : Et en quel lieu, dit-il, pourroient les gens de
 „ bien plus volōtiers parler à Aristogiton? Les Athe-
 „ niens estoient courrouceez à ceux de Byzance de ce
 „ qu'ils n'auoient pas voulu receuoir dedans leur
 „ ville le capitaine Chares, qu'ils leur enuoyoient
 „ pour les secourir alencontre de Philippus : Pho-
 „ cion leur remonstra, que ce n'estoit pas à leurs
 „ confederez, s'ils se deffioient, qu'il s'en falloit pren-
 „ dre, mais aux capitaines dont on se deffioit, à ceux
 „ là s'en falloit il courroucer. Sur l'heure il fut luy
 „ mesme eleu capitaine: & s'estans les Byzantins fiez **F**
 „ à luy, & mis entre ses mains, il les defendit si bien
 „ contre Philippus, qu'il le contraignit de se retirer
 „ sans rien faire. Le Roy Alexandre le grand luy
 „ enuoya presenter en don cent talents, qui sont
 „ soixante mille escus. Il demanda à ceux qui luy
 „ apportoiēt cest argent, pourquoy le Roy luy en
 „ enuoioit à luy seul, veu qu'il y auoit tant d'autres
 „ Atheniens. Ils luy respondirent, que c'estoit pour
 „ ce qu'il

A ce qu'il l'estimoit seul homme de bien & vertueux:
 „ Qu'il me laisse doncques, leur dit-il, & sembler &
 „ estre tel. Alexandre leur demanda des galeres, &
 le peuple nommeement appella Phocion pour en
 dire son aduis, & leur conseiller ce qu'ils en auoient
 „ à faire. Il se leua & leur dit, Je vous conseille de
 „ trouuer moien que vous soiez vous mesmes les
 „ plus forts par armes, ou bien amis de ceux qui le
 „ sont. Estant venu vne nouuelle incertaine sans
 auteur, qu'Alexandre estoit decedé, les haren-
 gueurs ne faillirent pas incontinent de monter à
 B l'enuy les vns des autres en la tribune aux haren-
 gues, & de conseiller que sur l'heure mesme sans
 plus attendre, lon deuoit prendre les armes. Pho-
 cion au cōtraire estoit d'aduis que lon attédist ius-
 ques à ce que lon en fust plus certainement asseu-
 „ rez: car fil est au iour d'huy mort, disoit-il, il le fera
 „ aussi demain & encore apres. Et cōme Leosthenes
 eust ietté la ville en vne forte & grosse guerre, ele-
 uant le cœur au peuple sous grâdes esperâces de
 recouurer leur liberté & la principauté de la Gre-
 „ ce, Phocion accōparoît ses propos aux Cypres: car
 cils sont, disoit-il, beaux, droicts & hauts, mais ils ne
 „ portent point de fruit. Et cōme neantmoins les
 premieres rencontres en eussent esté heureuses, &
 la ville en feist sacrifices aux Dieux pour les bon-
 „ nes nouuelles, quelqu'un luy demanda: Et bien
 „ Phocion, es tu content que cecy ait esté fait? Bien
 „ suis-ie content, dit-il, que cecy soit ainsi aduenu,
 „ mais ie ne me repens point d'auoir conseillé cela.
 Les Macedoniens incontinent feirent descente au

païs d'Attique, & commencerent à courir & piller **D** toute la coste de la marine, pour à quoy remedier, il meit aux champs les ieunes hommes de la ville en aage de porter armes: plusieurs y accoururent à la foule qui luy conseilloyent les vns de se saisir de ceste moite là, les autres de mettre icy les gens en

» bataille: ô Hercules, dit-il, combien ie voy de ca-

» pitaines, & peu de souldards! ce neantmoins il leur donna la bataille, qu'il gaigna, & tua sur le champ Nicion capitaine des Macedoniens. Peu de tēps apres les Atheniens demourez vaincus en ceste guerre, & estans contraincts de recevoir garnison **E** d'Antipater, Menyllus, capitaine de ceste garnison, luy enuoya de l'argent en don: dequoy il se courroucea, disant, que ny Menyllus n'estoit meilleur qu'Alexandre, ny la cause si bonne pour laquelle il en deust prendre de luy maintenant, en aiant

» lors refusé d'Alexandre: aussi disoit Antipater qu'il

» auoit deux amis à Athenes, à l'un desquels il n'a-

» uoit iamais rien sceu faire prendre, ny à contenter

» & assouuir l'autre assez despendre. Et cōme Antipater le rechercha de faire quelque chose qui

» n'estoit pas iuste, Tu ne sçauois, luy dit-il, Sei- **F**

» gneur Antipater, auoir Phocion pour amy & pour

» flatteur tout ensemble. / Apres la mort d'Antipater les Atheniens, aians recourré leur liberté du gouuernement populaire, Phocion fut condamné à la mort par le peuple en pleine assemblee de ville, & ses amis aussi, lesquels s'en alloient plorans & se lamentans au supplice, mais Phocion marchant grauement sans mot dire, trouua par le che-

A min l'un de ses ennemis qui luy cracha au visage:
 & luy se retournant deuers les magistrats leur dict,
 N'y aura il personne qui reprime l'insolence &
 villanie de cest homme icy? L'un de ceux qui de-
 uoient mourir avec luy se courrouceoit & se tour-
 mentoit, & Phocion luy dit, Ne te reconfortes tu
 pas Euippus de ce que tu t'en vas mourir en la cõ-
 pagnie de Phocion? Et comme on luy tendoit la
 coupe où estoit le breuuage de la cigüe, on luy
 demanda s'il vouloit plus rien dire: alors adressant
 sa parole à son fils, Je te commande, dit il, & te prie
 de ne porter point de rancune pour ma mort aux
 Atheniens. Pisistratus tyran d'Athenes, aduertý
 que quelques vns de ses amis s'estans rebellez con-
 tre luy, auoient occupé le chasteau de Phyle, s'en
 alla deuers eux portant luy-mesme sur son col vn
 fardeau de son liect & de ses hardes. Ils luy deman-
 derent, que c'estoit qu'il vouloit: Je viens, dit-il, ex-
 pressément en intention de vous persuader de re-
 tourner avec moy, ou bien de demourer icy avec
 vous: & pourtant ay-ie apporté mes hardes quant
 & moy. On luy rapporta que sa mere aimoit vn
 ieune homme qui couchoit secrettement avec el-
 le, mais en grand crainte, & la refusoit souuente-
 fois: il l'enuoya conuier à soupper, & apres soup-
 per il luy demanda comment il auoit esté traité:
 fort bien, dit-il, Tu le feras ainsi tous les iours,
 dit-il, si tu fais plaisir à ma mere. Thrasybulus
 estoit amoureux de sa fille, laquelle il baisa, la
 trouuant de rencontre deuant luy en son chemin:
 dequoy sa femme fut fort courroucée, & sollicitoit

son mary d'en faire demonstration : mais il luy res- D
 „ pondit tout doucement , Si nous haïssons ceux
 „ qui nous aiment, que ferons nous à ceux qui nous
 „ haïssent? & la bailla en mariage à ce Thrasybulus.
 Quelques ieunes gës apres bien boire , allans mas-
 quer & faire les fols par la ville , rencontrerent sa
 femme, à laquelle ils feirent & dirēt plusieurs cho-
 ses dissolües & peu honestes: & puis le lendemain
 recognoissans la faute qu'ils auoient faitte, vindrēt
 plorer deuant Pisistratus , & luy demāder pardon:
 „ & il leur respondit, Donnez ordre que vous soyez
 „ d'ores en auant plus sages: au demourant ie vous E
 „ aduise, que ma femme ne sortit ny n'alla du tout
 „ hier nulle part. Estant prest à espouser vne se-
 conde femme , ses enfans du premier liēt luy de-
 manderent, s'il estoit point en quelque chose mal-
 content d'eux , pourquoy il espousast par despit
 „ d'eux ceste seconde femme: Rien moins, leur res-
 „ pondit-il: ains c'est au contraire, pour ce que ie me
 „ louë de vous , & que ie desire auoir encore d'au-
 „ tres enfans qui soient semblables à vous. Deme-
 trius surnommé le Phalerien conseilloit au Roy
 Ptolomeüs d'acheter & lire les liures qui traitēt F
 du gouuernement des royaumes & seigneuries:
 „ Car ce que les mignons de court n'ozent dire à
 „ leurs princes, est escrit dedans ces liures la . Lycur-
 gus celuy qui establit les loix aux Lacedemoniens
 accoustuma ses citoiens à porter cheueux , disant
 que les cheueux rendoient ceux qui estoient beaux
 d'eux mesmes encore plus beaux , & ceux qui
 estoient laids, hydeux & effroyables. Sur les en-
 trefaittes

A trefaittes qu'il estoit apres à reformer l'estat de Lacedemone, quelqu'un luy conseilloit d'y establir l'estat du gouuernement populaire, où l'un a autāt d'autorité que l'autre: il luy respondit, Comman-
 ce toy-mesme à establir ce gouuernement la en ta
 maison. Il ordonna que lon ne bastiroit plus les
 maisons qu'avec la sçie & la coignee seulement: pource, dit-il, que lon auroit honte de porter de-
 dās vne maison simple, de la vaisselle d'or ou d'ar-
 gent, ny des meubles precieux ou des tables riches
 & sumptueuses. Il defendit à ses citoiens de com-
B battre ny à l'escrime des poings, ny à l'escrime ge-
 nerale de pieds, de dents, & de mains, à fin qu'ils
 ne s'accoustumassent point, non pas en iouāt mes-
 me, à se rendre ny à se laisser iamais. Aussi leur de-
 fendit-il de cōbattre souuent contre mesmes enne-
 mis, de peur qu'ils ne les rédissent plus belliqueux:
 au moien dequoy, depuis le Roy Agesilaus aiāt esté
 rapporté fort griefuement blecé d'une bataille,
 Antalcidas luy dit, Tu rapportes vn beau salaire &
 escholage tel que tu l'as merité des Thebains, de ce
 que tu leur as enseigné à combattre malgré eux.
C Charillus estant enquis, pourquoy Lycurgus auoit
 faict si peu de loix, il respondit, que ceux qui vsoiēt
 de peu de paroles, n'auoient pas besoing de beau-
 coup de loix. ✕ Vn des esclauē qu'ils appelloient
 Elotes se portoit vn peu trop insolentement & au-
 dacieusement enuers luy: Par les Dieux, dit-il,
 si ie n'estois courroucé, ie te ferois tout à ceste
 heure mourir. ✕ A vn qui luy demandoit pour-
 quoy les Lacedemoniens portoient cheueux: c'est

„ pour ce que de toutes les sortes de parements, c'est D
 „ celuy qui couste le moins. Teleclus roy de Lacedemone, respondit à son frere qui se plaignoit à luy, de ce que les citoiens de Sparte se portoient en son endroiect plus iniquement & plus indigne-
 „ ment qu'enuers luy : Ce n'est pas cela, dit-il, mais
 „ c'est que tu ne sçais pas endurer que lon te face
 „ tort. Theopompus estant en quelque ville, l'un
 des habitans d'icelle luy monstroient les murailles, &
 luy demandoit si elles ne luy sembloient pas belles
 „ & hautes. Belles? non, dit-il, quand il n'y auroit
 „ que des femmes. Archidamus respondit aux al- E
 liez & confederez de Lacedemone qui les prioient de leur taxer leur cotte d'argët, qu'ils auroient à cōtribuer & fournir pour la guerre Peloponesiaque,
 „ La guerre ne s'entretient pas à pris fait & certain. Brasidas trouua vne souris parmy des figues seiches qui le mordit, tellement qu'il la laissa aller, &
 „ dict aux assistans : Voyez vous, dit il, comment il
 „ n'y a rien si petit qui ne puisse sauuer sa vie, prou-
 „ ueu qu'il ait le cœur de se defendre contre ceux
 qui l'assaillent? En vne bataille il fut blecé d'un
 coup de parthifane, qui faulsa & percea son escu: il F
 arracha la parthifane de sa playe, & du mesme baston en tua son ennemy : & estāt enquis cōment il
 „ auoit ainsi esté blecé : par ce que mon escu, dit-il,
 „ m'a trahy. Il mourut au país de Thrace, là où il
 auoit esté enuoyé pour affrāchir & remettre en lib-
 berté les Grecs qui estoiet habitās en celle marche.
 Les ambassadeurs, qui depuis furēt enuoyez par le
 país en Lacedemone, vindrent visiter sa mere : la-
 quelle

A quelle leur demanda premierement, si Brasidas son
 fils estoit mort vaillamment & en homme de bien:
 les ambassadeurs alors le louerēt bien haultement,
 iusques à dire, qu'il n'en seroit plus iamais de tel:
 " Vous vous abusez, leur dit elle: il est vray que Bra-
 " sidas estoit bien homme de bien, mais Lacedemo-
 " ne en a plusieurs autres, qui valent encore mieulx
 " que luy. Le roy Agis souloit dire, que les Lace-
 " demoniens ne demandoient point cōbien estoient
 leurs ennemis, mais seulement où ils estoient. On
 luy defendit à Mantinee de combattre, pource que
 B les ennemis estoient plusieurs contre vn: Il est for-
 " ce, dit-il, que celuy qui veult cōmander à plusieurs,
 " en combatte plusieurs aussi. A ceulx qui hault-lou-
 oient les Eliens de ce qu'ils gardoient grande lega-
 " lité en la feste des ieux Olympiques: Quelle si
 " grāde merueille est ce, dit il, si en quatre annees les
 " Eliens vsent vn iour de la iustice? & comē ils per-
 " feuerassent encore en leurs louāges: Quelle si gran-
 " de merueille est ce, dit il, si les Eliēs vsent bien d'v-
 " ne chose bonne, qui est la iustice? A vn meschāt
 homme qui luy rompoit la teste en luy demāant
 C souuent, Qui estoit le plus homme de bien des
 " Spartiates: C'est, dit il, celuy qui te ressemble le
 " moins. A vn autre qui demandoit, combien en
 " nombre estoient les Lacedemoniens: Assez, dit-
 " il, pour chasser les meschants: & à vn autre qui luy
 " demādoit le mesme, Ils te sembleroient beaucoup,
 " dit-il, si tu les voiois cōbattre. Lyfander ne vou-
 lut pas accepter des robbes sumptueuses & riches
 que Dionysius le tyran enuoyoit à ses filles, disant,

» Je craindrois que ces robbes ne les feissent trouuer D
 » plus laides. Quelques vns le reprenoient & blas-
 moient de ce qu'il faisoit la plus part de ses gestes
 par ruze & tromperie, comme estât chose indigne
 d'un qui se disoit de la race d'Hercules: Il leur re-
 » spondoit, que là où la peau du lion ne pouuoit suf-
 » fire, il y falloit coudre vn petit de celle du regnard.
 Les Argiens auoient quelque different alencontre
 des Lacedemoniens touchât leurs confins, & sem-
 bloit que les Argiens alleguassent de meilleures &
 plus pertinentes raisons touchant la terre qui estoit
 entre eux en dispute: mais luy desguainnant son F
 » espee: Ceulx, dit il, qui seront les plus vaillants avec
 » ceste cy, seront ceulx qui plaideront le mieulx de
 » leurs confins. Les Lacedemoniens faisoient diffi-
 culté d'assaillir les murailles des Corinthiens, & sur
 ces entrefaittes il faillit vn grand lièvre de dedans
 » les fossez: alors prenant ceste occasion: Comment,
 » dit-il, faites vous doute d'assaillir les murailles de
 » gens qui sont si paresseux, qu'ils laissent dormir les
 » lièvres dedans l'enceinte mesme de leurs murs? Il
 y eut vn Megarien, qui en publique assemblee des
 estats de la Grece luy parla fort hardiment & fran- F
 » chement: Il luy respondit, Tes paroles auroient be-
 » soing d'une cité. voulant dire, que Megare, dont il
 estoit, auoit trop peu de puissance pour maintenir
 ce qu'il disoit.

Agefilaus disoit que les habitants de l'Asie, pour
 hōmes libres ne valoient rien, mais qu'ils estoient
 bons esclaves. Ces Asiatiques auoient accoustu-
 mé d'appeller le Roy de Perse, le grand Roy: Pour-
 quoy

A quoy est il plus grand que moy , disoit il, s'il n'est plus iuste & plus temperant ? Estant enquis de la vaillâce & de la iustice, laquelle estoit la meilleure, „ Nous n'aurions que faire de vaillance, dit il, si nous „ estions tous iustes. Estant vne fois contrainct de desloger la nuict à grand' haste du país de ses ennemis , & voyāt vn garson qu'il aimoit tout esplore, pour ce qu'on le laissoit derriere à cause qu'il ne „ pouuoit suiure pour sa maladie : Comment il est, „ dit il, mal-aisé d'auoir pitié & bon sens tout ensemble! Menecrates le medecin qui se faisoit surnommer Iupiter , luy escriuit vne lettre avec vne telle „ superscription , Menecrates Iupiter au roy Agefilaus, Salut. Il luy fait responce, Le roy Agefilaus à „ Menecrates, Santé. voulāt dire, qu'il estoit malade du cerueau . Les Lacedemoniens aians desfait ceulx d'Athenes avec leurs allies & cōfederez pres de Corinthe , entendans le grand nombre des ennemis qui estoient demourez morts sur le champ: „ O malheureuse Grece, dit il, qui a elle mesme desfaict tant de ses hommes , qu'ils eussent esté suffisans pour subiuguer & desfaire tout tant qu'il y a „ de barbares. Aiant eu vn oracle de Iupiter en la ville d'Olympie, les Ephores luy manderent qu'en passant par la ville de Delphes , il demandast aussi responce à l'oracle d'Apollo. Parquoy quand il fut là, il luy demāda, s'il estoit pas de mesme aduis que son pere. Demandant la deliurance de l'un de ses amis, qui estoit prisonnier entre les mains de Idrieus prince de la Carie, il luy escriuit en ceste „ sorte : Si Nicias n'a point failly, deliure le : fil a

„ failly, deliure le pour l'amour de moy : mais com- D
 „ ment que ce soit, deliure le. On le conuioit vn
 iour à ouïr la voix d'un qui contrefaisoit merueil-
 leusement bien & naïfuelement le chant d'un ros-
 „ signol : l'ay ouy, dit-il, assez de fois le rossignol
 „ mesme. Apres la perte de la bataille de Leu-
 ctres, la loy ordonnoit que tous ceux qui s'estoient
 sauuez de viftesse, fussent notez d'infamie: mais les
 Ephores voians que la ville en ce faisant demou-
 reroit vuide & depeuplee d'hommes, voulurent
 abolir ceste infamie, & pour ce faire eleurent Age-
 filaus Legislateur : & luy se tirant en auant sur la B
 place, ordóna que toutes les loix du lendemain en
 auant auroient leur force & vigueur ancienne. Il fut
 enuoyé pour donner secours au Roy d'Ægypte, là
 où il se trouua assiegé avec luy par ses ennemis qui
 estoient plusieurs contre vn, & enfermoient son
 camp d'une grande trenchee: & comme le Roy luy
 commandast de sortir sur eux & de les combattre:
 „ le n'empescheray pas, dit il, noz ennemis qui veu-
 „ lent que nous soions egaulx à combattre tant à tāt:
 & comme il ne s'en fallust plus gueres que les deux
 bouts de la trenchee ne se vinssent à rencontrer & F
 à ioindre, il dressa son armee en ceste interualle, &
 par ainsi venans à combattre tant contre tant, ils
 desfeirent leurs ennemis. En mourant il comman-
 da à ses amis qu'ils ne feissent faire aucune image
 „ ny statue de luy: Car si i'ay, dit-il, fait aucune chose
 „ digne de memoire en ma vie, cela sera suffisant mo-
 „ nument de moy apres ma mort: sinon, toutes les
 „ statues & images du monde ne scauroient perpe-
 tuer

A tuer ma memoire. Archidamus la premiere fois
 qu'il veit vn traiçt de grosse arbaleste de batterie,
 que lon auoit nouuellement apporté de la Sicile,
 „ fescria tout hault:ô Hercules, la prouësse de l'hom-
 „ me s'en va perdue. Demades se mocquoit des
 espees Laconienes, disant qu'elles estoiet si petites
 & si courtes, que les baisteurs & ioueurs de passe-
 passe les aualloient toutes entieres. Agis le ieune
 „ luy respondit: Mais neantmoins les Lacedemo-
 „ niens en assenent fort bien leurs ennemis. Les
 Ephores luy manderent vne fois qu'il liurast ses
 B souldards entre les mains d'un traistre: le me garde-
 „ ray, dit-il, bien de commettre les souldards d'autrui
 „ à vn qui a trahy les siens. Cleomenes respondit
 à quelqu'un qui promettoit de luy donner des
 „ coqs si courageux, qu'ils mouroient sur la place en
 „ combattant: Ne me donne point de ceulx la qui
 „ meurent, mais de ceulx qui font mourir les autres
 en combattant. Pedaretus aiant failly d'estre eleu
 du conseil des trois cents, s'en retourna de l'assem-
 blee tout ioyeux & riât, disant, qu'il estoit tres-aise
 de ce qu'en la ville de Sparte, il se trouuoit trois
 C cents hommes meilleurs & plus gens de bien que
 luy. Damonidas aiant esté par le maistre de la
 danse colloqué tout au dernier lieu de la danse,
 „ Tu as, dit il, trouué vn bon moien pour rendre ce
 „ dernier lieu icy honorable. Nicostratus Capitai-
 ne des Argiens, estant sollicité par Archidamus de
 prendre vne bonne somme d'argent pour luy li-
 uer en trahison vne place qu'il auoit en garde, a-
 uec promesses de luy faire espouser telle fille, qu'il

voudroit choisir en toute la ville de Sparte, exceptées celles du sang royal, luy fait response, qu'il n'estoit point de la race d'Hercules: Pour ce, dit-il, que Hercules alloit par tout punissant & faisant mourir les meschants, & tu essayes de rendre meschants ceulx qui sont gens de bien. Eudamondas voiant en l'eschole de l'Academie Xenocrates desia ancien parmy les autres escoliers estudians en la philosophie, & entendant qu'il y cherchoit la vertu: Et quand en vsera il, dit-il, si il est encore à la trouuer? Vne autrefois escoutant discourir vn Philosophe, qui maintenoit que le sage seul estoit bon Capitaine: Ce propos, dit il, est merueilleux: mais celuy qui le dit, n'ouit iamais en vn camp le son de la trompette. Antiochus estant l'vn des contrerolleurs de Sparte, que lon appelle Ephores, entendant comme le roy Philippus auoit donné aux Messeniens leur territoire: Mais leur a il quant & quant, demanda il, donné le moien de vaincre en bataille quand ils combattront pour le defendre? Antalcidas respondit à vn Athenien qui appelloit les Lacedemoniens ignorans: C'est pour ce que nous sommes seuls qui n'auons iamais appris de vous rien de mauuais. Vn autre Athenien en estriuant contre luy, luy disoit: Nous vous auons souuent rechasiez de la riuere de Cephissus, qui est en Attique: & nous, repliqua il, ne vous auons iamais rechasiez de celle d'Eurotas, qui est en Lacedemone. Vn Retoricien vouloit reciter vne harenque qu'il auoit composee à la louage de Hercules: Et qui est, dit-il, celuy qui le blasme? Pendant que

A Epaminondas fut Capitaine des Thebains, iamais on ne veit aduenir en son camp ces soudaines frayeurs sans cause certaine, que lon appelle terreurs Paniques. Il souloit dire, qu'il n'estoit point de mort plus honeste que de mourir en la guerre, & que le corps d'un bon homme de guerre deuoit estre exercité, non seulement comme le sont ceulx des champions qui combattēt es ieux de pris, mais bien plus endurcy à tout trauail, ainsi qu'il conuient à un bon soudard : pourtant faisoit il la guerre à ceulx qui estoient fort gras, iusques à en casser

B un des bandes, pour ceste cause seule, disant, qu'à peine trois ou quatre boucliers luy pourroient couvrir le ventre, qui estoit si grand qu'il luy empeschoit de veoir ses parties naturelles. Au demourant il estoit si reformé en son viure, & haïssoit si fort toute superfluité, que vne fois aiant esté inuité à soupper par un de ses voisins, quand il veit en son logis un grand appareil de force friandes patisseries, confitures & parfums, il luy dit, Je pensois que

C tu feisses un sacrifice, non un excez de superfluité. & s'en alla tout aussi tost. Comme le cuisinier rendist à luy & à ses compagnons compte de leur despense ordinaire de quelques iours, il n'y trouua rien mauuais que la quantité d'huyle : dequoy ses compagnons s'esbahissans, il leur dit, que ce n'estoit pas la despense qui le faschoit, mais que tant d'huyle fust entré dedans les corps des hommes. La ville de Thebes faisoit vne feste publique, & estoient tous en bancquets, festins, & grandes assemblees les uns avec les autres : au contraire,

luy alloit tout sec sans s'estre oingt d'huyle de par-
 fum, ne paré de beaux vestemens, tout pensif par
 la ville: quelqu'un de ses familiers le rencontra en
 cest estat, qui s'en esbahissant luy demanda, pour-
 quoy il alloit ainsi seul & mal en ordre par la ville:
 „ A fin, dit-il, que vous autres tous puissiez en seure-
 „ té ce pendant yurongner & faire grand chere, sans
 „ penser à affaires quelconques. Il auoit faict met-
 tre en prison vn homme de basse condition pour
 quelque legere faute qu'il auoit commise: Pelopi-
 das le pria de le mettre dehors, ce qu'il luy refusa:
 mais puis apres vne femme qu'il entretenoit l'en
 requit, & il le feit à sa priere, disant que c'estoit de
 telles gratuitez, qu'il falloit conceder aux amies &
 concubines, non pas aux capitaines. Comme les
 Lacedemoniens vinssent à grosse puissance, pour
 faire cruelle guerre aux Thebains, on apporta de
 tous costez des oracles aux Thebains, dont les vns
 leur promettoient la victoire, les autres les menas-
 soient de desconfiture: il commanda que lon meist
 ceux de la victoire à main droite de la tribune aux
 harengues, & ceux de la desfaite à la fenestre: quā
 ils furent ainsi tous disposez, il se leua en pieds sur
 „ la tribune, & parla ainsi aux Thebains, Si vous
 „ voulez rendre bonne obeïssance à voz capitaines,
 „ & prendre la hardiesse en voz cœurs d'aller choc-
 „ quer voz ennemis: ceux cy, monstrāt les bons ora-
 „ cles à la main droite, sont les vostres: mais si à fau-
 „ te de courage, vous restiuez au peril, ceux là, mon-
 „ strant les mauuais à la main gauche, seront pour
 „ vous. Puis ainsi qu'il conduisoit l'armee aux chāps:
 pou

A pour aller trouuer les Lacedemoniens, f'estant pris
 à tonner, ceux qui estoient les plus pres de luy, luy
 demãderent, que pouuoit signifier Dieu, qu'il ton-
 noit : Cela, dit il, signifie que la ceruelle de noz en-
 nemis est estonnee, veu qu'aiants pres d'eulx de si
 commodés assiettes à loger leur camp, ils se sont
 campez en celle où ils sont. De toutes les honestes
 & heureuses fortunes qui luy estoient iamais adue-
 nues, il disoit que celle qui luy auoit donné plus de
 ioye en son cœur, estoit d'auoir desfaiët les Lace-
 demoniens en la iournee de Leuctres du viuât des
 pere & mere qui l'auoient engendré. Aiant ac-
 coustumé tout le reste du temps de se mōstrer net
 & propre avec vne face ioyeuse, le lendemain de la
 bataille Leuctrique il sortit en publique tout sale,
 morne & pensif : parquoy ses amis luy demande-
 rent incontînët, s'il luy estoit point arriué quelque
 sinistre accident: Non, dit il, mais ie senty hier que
 pour la ioye de la victoire, ie m'estois eleué plus
 que ie ne deuois, & pourtât au iourd'huy ie corri-
 ge ceste aise qui fut hier trop excessiue. Et sçachât
 que les Spartiates auoient accoustumé de couvrir
 & cacher le plus qu'ils pouuoient tels inconue-
 nients, & voulant conuaincre & monstrer à des-
 couuert la grandeur de la perte qu'ils auoient fait-
 te, il n'ottroya pas permission d'enleuer les morts
 en bloc à tous ensemble, ains à chasque cité les vns
 apres les autres, tellement qu'il apparut qu'il y en
 auoit plus de mille des Lacedemoniens. Iason
 prince de la Theffalie estant allié & confederé des
 Thebains, vint vn iour en la cité de Thebes, & en-

uoya à Epaminondas deux mille escus en don, sça-
 chant qu'il estoit extremement pauvre. Il ne vou-
 lut pas receuoir le present d'argent & qui plus est,
 la premiere fois qu'il veit depuis Iason, il luy dit,
 „ Tu commances à m'oultrager. Et ce pendant il
 emprunta d'un bourgeois de la ville cinquante
 drachmes d'argent, qui peuuent valoir enuiron
 cinq escus, pour son entretenement au voiage qu'il
 alloit entreprendre: & avec cela entra en armes
 dedans le Peloponese. Depuis encore le grand
 Roy de Perse luy enuoya trente mille pieces d'or
 comme escus de Perse, que lon appelle Dariques: E
 pour raison dequoy il fattacha fort aigrement à
 Diomedes, luy demandant fil auoit bien entrepris
 vne si longue nauigation pour cuider corrompre
 Epaminondas: & au demourant luy commanda
 de rapporter à son Roy, que tant comme il vou-
 droit & procureroit le bié des Thebains, il l'auroit
 pour amy, sans qu'il luy coustast rien: mais tât qu'il
 prochasseroit leur dommage, qu'il luy seroit enne-
 my. Les Argiens aians fait ligue & confederation
 avec les Thebains, ceulx d'Athenes enuoyerét
 leurs ambassadeurs en Arcadie pour essayer d'atti-
 rer à eux les Arcadiens. Si commencerent ces am-
 bassadeurs à charger & accuser à bon esciât les vns
 & les autres: de maniere que Callistratus qui par-
 loit pour eux, reprocha à ces deux citez Orestes &
 Oedipus. Epaminondas qui se trouua en ceste
 „ assemblee de conseil, se leua, & dit: Seigneur, nous
 „ conseillons qu'en nostre ville iadis y a eu vn parri-
 „ cide, & en Argos vn matricide: mais quant à nous,
 nous

A nous auons chassé & banny de noz païs ceulx qui
 » ont commis telles malheuretez, & les Atheniés les
 » ont tous deux receus. Et aux Spartiates qui auoiēt
 chargé les Thebains de plusieurs grādes & grieues
 » imputations : S'ils n'ont fait autre chose, au moins
 » vous ont ils, Seigneurs Spartiates, respondit Epa-
 » minondas, fait oublier vostre peu parler. Les A-
 theniens auoient contracté alliance & amitié avec
 Alexander tyran de Pheres en Theffalie, qui estoit
 ennemy mortel des Thebains, & promettoit aux
 Atheniens qu'il leur feroit auoir la liure de chair
 B pour demy obole. Epaminondas luy respondit,
 Et nous leur fournirōs de bois, qui ne leur coustera
 rien, pour cuire ceste chair, car nous leur irōs raser
 & couper tout tāt d'arbres qu'ils ont en leur païs,
 s'ils entreprennent de remuer autre chose que bien
 à poinct. Cognoissant que les Bœotiés se gastoient
 & perdoient par oyfisueté, il deliberoit de les tenir
 continuellement en l'exercice des armes: au moien
 dequoy quand approchoit le temps de l'election
 des Capitaines, & qu'on le vouloit elire Bœotar-
 che, c'est à dire, Capitaine de la Bœoce, il disoit à ses
 C citoiens, Péssez y bien, Messieurs, pendāt qu'il vous
 » est encore loisible, auāt que de m'eslire : car ie vous
 » aduise, que si vous me faictes vostre capitaine, qu'il
 » vous faudra venir à la guerre. Il appelloit le païs de
 la Bœoce, qui est tout plat & tout ouuert, l'eschaf-
 fault de la guerre, disant qu'il estoit impossible de
 le garder, sinon que les habitās eussent tousiours le
 bouclier sur le bras, & l'espee au poing. Chabrias
 Capitaine des Atheniens auoit desfait quelque

bien petit nombre de Thebains, qui par trop d'ardeur de combattre auoient couru à la desbandee iusques tout contre les murs de Corinthe, & comme si c'eust esté vne rencontre, il en feit eriger vn trophée: dequoy Epaminondas se mocquant, dit, qu'il ne le falloit pas appeller Trophée, mais plus tost Hecatésie, comme qui diroit statue de Proserpine, pource qu'au temps passé on colloquoit ordinairement l'image de Proserpine au premier carrefour qui se trouuoit au deuant de la porte d'une ville. Et comme quelqu'un luy vint rapporter, que les Atheniens auoient renuoyé au Peloponese vne

» armee equippee de nouuelles armes: Et bien, dit il,

» Antigenidas pleure il quand il sçait que Tellin a de

» nouuelles flustes? car ce Tellin estoit vn mauuais

» ioueur de flustes, & Antigenidas vn excellent. Il

» s'apperçeut que son Escuyer auoit reçu grosse

» somme d'argét pour la rençon d'un qui auoit esté

» prisonnier entre ses mains: Il luy dit, Rens moy mô

» escu, & t'en va acheter vn cabaret pour y vser le

» reste de ta vie, car ie voy bien que tu ne te veux

» plus en homme de bien exposer aux hazards de la

» guerre, comme parcy deuant, depuis que tu es de-

» uenu vn des riches & opulents. On luy demanda

» quelquefois lequel il estimoit plus grand Capitaine de luy, de Chabrias, ou d'Iphicrates: il respon-

» dit, Il seroit bien mal-aisé d'en iuger, tant que nous

» sommes en vie. A son retour du païs de la Laconie il trouua qu'on l'accusoit de crime capital avec les autres Capitaines ses compagnons, pour auoir retenu la charge de Capitaine l'espace de quatre

mois

A mois oultre & par dessus le temps qui estoit prefix par la loy : si dit à ses compagnons qu'ils en reiet-
tassent toute la coulpe sur luy, comme aians esté
forcez par luy : & quant à luy, il dit, que ses paroles
ne pourroient estre meilleures que ses effectz, mais
route fois que s'il estoit forcé comment que ce fust
de dire quelque chose deuant ses iuges, qu'il les re-
queroit s'ils estoient d'aduis de le faire mourir, qu'ils
feissent escrire sur la coulombe quarree de sa sepul-
ture sa cōdamnation, à fin que les Grecs entendis-
sent, que Epaminondas auroit esté condamné à
B mourir pour ce, qu'il auroit cōtrainct les Thebains
malgré eux de brusler le pais de la Laconie, qui de
cinq cents ans au parauant n'auoit iamais esté pil-
lé : qu'il auroit repeuplé la ville de Messene, deux
cens & trente ans apres qu'elle auoit esté destruite
& desertee par les Lacedemoniens : qu'il auroit
reüny & rassemblé en vn corps & vne ligue, tous
les peuples & villes de l'Arcadie : & qu'il auroit
rendu & restitué aux Grecs leur liberté : car toutes
ces choses ont esté faictes par nous en ce voyage.
Les Iuges aians ouy ces propos, se leuerent de leurs
C sièges en riant à bon esciant, sans vouloir seulemēt
prendre leurs ballottes pour ballotter contre luy.
Après la dernière bataille où il fut blecé à mort
estāt rapporté en sa tente, il feit appeller Diophan-
tus, & apres celuy là Iolidas : mais quand il enten-
dit qu'ils estoient morts tous deux, il ordonna à ses
citoiens de faire appointemēt avec leurs ennemis,
comme n'aians plus de Capitaines qui les sceuf-
sent mener à la guerre : & de faict l'euenement

porta tesmoignage à sa parole, qu'il cognoissoit p
 tres-bien ses citoiens. Pelopidas, cōpagnon d'E-
 paminondas en la charge de Capitaine de la Bœo-
 ce, comme ses amis le reprissent de ce qu'il negli-
 geoit vne chose qui estoit necessaire, c'est à sçauoir
 „ de faire amas d'argent: L'argent necessaire, dit il,
 „ ouy bien à ce Nicomedes la. monstant vn pauure
 boiteux estropié de bras & de iambes. Ainsi cōme
 il se partoît de Thebes pour aller à la bataille, sa
 „ femme le prioit, auoir soing de se sauuer: C'est aux
 „ autres, dit il, à qui il fault recorder cela: mais au Ca-
 „ pitaine & qui a charge de commander, il luy fault e
 „ recorder qu'il ait le soing de sauuer les autres, non
 „ pas luy. A vn de ses souldards qui disoit, nous som-
 „ mes tombez dedans noz ennemis: Pourquoi nous
 „ dedans eux, plus tost qu'eux dedans nous? Au reste
 estant proditoirement retenu prisonnier & mis aux
 fers, contre la foy des trefues, par Alexandre tyran
 de Pheres, il luy en disoit iniure en l'appellant trai-
 „ stre pariure: Le tyran luy demāda, si auoit si grāde
 „ haste de mourir: ouy, respōdit il, à fin que les The-
 „ bains en soient plus irritez contre toy, & que tant
 „ plus tost tu sois puny de ta desloyauté. Thebe la f
 femme du tyran, l'estant allé veoir en la prison, luy
 dit, qu'elle s'esbahissoit comment il pouuoit estre si
 „ ioyeux estant en prison au fers: Mais ie m'esbahis
 „ bien plus de toy, dit il, cōme estant en toute liberté
 „ tu peux supporter vn si meschant homme qu'Ale-
 „ xandre. Apres qu'Epaminondas le fut venu tirer
 de prison, il dit, qu'il se sentoît tenu à Alexandre,
 „ Pource que par son moien, dit il, j'ay esprooué plus
 que

A que i'aimais, que mon cœur est ferme assez, non seulement cōtre la crainte de la guerre, mais aussi contre la peur de la mort. Manius Curius, comme quelques vns de ses souldards se plaignissent de ce qu'il dōnoit à chasque souldard bien peu de la terre qu'ils auoient cōquise sur les ennemis, & en incorporoit la plus grand' part au domaine de la chose publique: l'À Dieu ne plaise, dit il, qu'il y ait aucun
 „ citoiën Romain qui estime peu de terre, ce qui est
 „ suffisant pour nourrir vn homme. Les Samnites, apres qu'il les eut desfaicts en bataille, enuoyerent
B deuers luy pour luy presenter en don vne bonne somme d'or & d'argent. Ils le trouuerent autour de son foyer, où il faisoit bouillir des naueaux dedans vn pot: il feit responce aux ambassadeurs des Samnites, que celuy qui se contētoit d'vn tel soupper n'auoit que faire d'or: au reste, que commander à ceulx qui auoient de l'or, luy sembloit plus honorable que d'en auoir. Caius Fabricius aiant entendu que les Romains auoient esté desfaicts en bataille par Pyrrhus, il dit, c'est Pyrrhus qui a vaincu Labienus, non pas les Epirotes les Romains.
C Estant enuoyé deuers Pyrrhus pour traiter de la deliurance des prisonniers, le Roy luy offrit en don vne grosse somme d'or, laquelle il ne voulut pas accepter: Et le lendemain Pyrrhus ordōna que lon amenast le plus grand de ses Elephans, & qu'on le meist droict derriere Fabricius sans qu'il en sceust rien, puis qu'à l'improuueu on le feist soudainement bramer. ce qui fut faict ainsi. Fabricius se retournāt
 „ s'en prit à rire & dit, Ny ton or hier, ny ton Elephāt

„ au iour d'huy, ne m'ont point estonné. Pyrrhus luy
 cuida persuader qu'il voulust prendre party avec
 luy, en luy promettant de luy dōner toute l'autho-
 rité au maniemēt de ses affaires apres luy. Il luy
 „ respondit, Cela ne te seroit pas expedient, car quād
 „ les Epirotes auroient bien cogneu l'vn & l'autre de
 „ nous deux, ils aimeroiēt mieulx m'auoir pour Roy
 „ que toy. Fabricius aiant esté créé Consul, le me-
 decin de Pyrrhus luy escriuit vne lettre, en laquelle
 il luy promettoit de faire mourir son maistre par
 poison, s'il vouloit. Fabricius enuoya incontīnēt
 la lettre mesme à Pyrrhus, luy mandant qu'il reco-
 gneust par là qu'il auoit mauuais iugemēt à discer-
 ner quels il deuoit choisir pour ses amis, & quels
 pour ses ennemis. Pyrrhus aiant ainsi descouuert
 & auéré l'embusche que lon dresseoit à sa vie, feit
 pēdre son medecin, & renuoya les prisonniers Ro-
 mains à Fabricius sans leur faire payer rēçon : mais
 Fabricius ne les voulut pas accepter en don gratui-
 tement : ains luy en renuoya autant de ses gens, de
 peur qu'il ne semblast que ce fust vn loyer qu'il
 receust pour la descouuerture qu'il luy auoit faite,
 attendu qu'il ne luy auoit fait faire pour bien qu'il
 luy voulust, mais de peur qu'il ne semblast que les
 Romains le voulussent faire mourir par trahison,
 comme s'ils ne le pouuoient vaincre par vertu.

Fabius Maximus ne voulant pas combattre en
 bataille regee Hannibal, ains cōsommer par lon-
 gueur de temps son armee, laquelle auoit faute de
 viures & d'argent, l'alloit tousiours suyuant par
 lieux aspres & montueux, en le costoyant aucune-
 fois

A fois: dequoy plusieurs se mocquoient, en l'appellant le pedagogue d'Hannibal: mais luy ne se souciant point de toutes telles paroles, persistoit tousiours en ses desseings & conseils particuliers, disant, que celuy qui ne pouuoit endurer vn traitt de mocquerie, ou vne iniure, estoit plus couard que celuy qui s'enfuyoit deuant son ennemy. Et comme son compaignon Minucius eust desfaict quelque nombre des ennemis, tellement que lon ne parloit plus que de luy, & disoit on que c'estoit veritablemēt vn personnage digne de Rome, il dit,

B qu'il redoubtoit plus la prosperité de Minucius que son aduersité: & peu de temps apres, aiant donné dedans vne embusche que Hannibal luy auoit dresse, en si grand dāger qu'il fut bien pres d'y demourer luy & toute son armee, Fabius luy allant vistement au secours, non seulement le preserua de ce danger, mais encore tua bon nombre des ennemis: tellement que Hannibal dit adonc à ses familiers, Ne vous auois-ie pas bien dict, que ceste nuee, qui estoit tousiours alentour de nous sur ces montaignes, respandroit à la fin quelque grosse pluye dessus nous? Apres la desconfiture de Cannes, estant esleu Consul de Rome avec Claudius Marcellus homme courageux, qui ne demandoit qu'à s'attacher au combat, alencontre de Hannibal: luy au contraire auoit esperance, si lon ne le combattoit point, que son armee harassée & traueillée se desferoit d'elle mesme: de maniere que Hannibal disoit, qu'il craignoit plus Fabius ne combattant pas, que Marcellus combattant. On luy

rapporta qu'il y auoit vn soudard Lucanien en son camp, vaillant homme au demourant, & hardy à merueilles, mais qui souuent se derobboit la nuit du camp, & s'en alloit veoir vne femme qu'il aimoit. Il commanda que lon prist secrettemēt ceste femme dont le soudard estoit amoureux, & que lon la luy amenast: quand on la luy eust amence il
 » fait appeller le soudard, & luy dit, l'ay esté aduer-
 » ty comme contre les loix de la discipline militaire
 » tu couches souuent dehors du camp: mais aussi ay-
 » ie bien sceu d'ailleurs, que tu es homme de bien:
 » & pourtant les faultes soient remises & pardonnées
 » par les bons seruices: mais d'ores en auant tu demoureras avec nous, car i'ay vn plege qui m'en
 » respondra. & en disant ces paroles il fait venir la femme, laquelle il luy consigna entre ses mains.
 Hannibal tenoit toute la ville de Tarente avec grosse garnison, excepté le chasteau: Fabius trouua moien de l'attirer & esloigner le plus qu'il peut de celle marche, par ruse militaire, puis retournant tout à coup, reprit la ville & la saccagea toute: le greffier luy demanda ce qu'il ordonnoit touchāt
 » les statues & images des Dieux: Laissons, dit-il, aux
 » Tarentins leurs Dieux, qui leur sont courroucez.
 Au reste Marcus Liuius qui tenoit le chasteau, se vantoit que par son moien la ville auoit esté reprise: dequoy les autres se mocquoient, mais luy respondit, Tu dis la verité: car si tu ne l'eusses perdue,
 » ie ne l'eusse iamais recouuree. Estant ia sur l'aage son fils fut esleu Consul, & comme il donnoit audience, & despeschoit affaires de sa charge en public,

A blic, Fabius le pere mōta à cheual pour l'aller trou-
 uer: mais son fils enuoya au deuant de luy vn huis-
 fier, luy faire cōmandement de descendre de son
 cheual: dequoy les assistans eurent honte, mais luy
 descendant promptemēt de cheual, accourut plus
 viste que son aage ne portoit, ambrasser son fils,
 „ en luy disant, Tu fais tresbien, mon fils, de ressen-
 „ tir à qui tu cōmandes, & de monstrier que tu entēds
 „ la grandeur de la charge que tu as prise. Scipion
 l'ancien estant à repos des affaires, ou de la guerre,
 ou de gouuernement, employoit tout son loysir à
 B l'estude des lettres: au moien de quoy il souloit di-
 „ re, que quand il estoit seul, il estoit plus accōpagné:
 „ & quand il estoit de loysir, c'estoit lors qu'il auoit
 „ plus d'affaires. Aiant pris d'assaut la ville de Car-
 thage la neufue en Espagne, quelques soudards
 luy amenerent vne fort belle fille qu'ils auoiēt pri-
 se prisonniere, & la luy offrirent: Il leur respondit,
 „ Ie la receuroye volontiers, si i'estois homme priué,
 „ & non pas Capitaine general. Estant au siege de-
 uant vne ville, laquelle estoit assise en lieu bas, par
 dessus laquelle apparoiſsoit vn temple de Venus, il
 C commanda que lon continuaſt les assignations de
 ceux qui auoient à plaider deuant luy dedans ce
 temple la, & qu'il y tiendroist son audience au troi-
 sième iour d'apres; comme il feit, aiant pris la ville.
 Quelqu'vn luy demanda en Sicile, ainsi qu'il
 estoit prest de passer en Afrique, sur quoy il se con-
 fioit de vouloir traicter sa flotte en l'Afrique, il
 luy monstra trois cents hōmes qui se iouoient &
 exercitoient tous armez aux exercices militaires,

au long d'une haute tour assise tout sur le bord de **D**
 la mer: Il n'y a, dit-il, pas un de ces hommes que tu
 vois là, qui ne monte au hault de ceste tour, & ne
 se iette du haut en bas la teste la premiere, si ie luy
 commande. Estant passé de là, & s'estant aussi tost
 fait maître de la campagne, & ayant brulé deux
 camps de ses ennemis, les Carthaginois enuoyerēt
 incontinent deuers luy pour traiter d'appointe-
 ment: & tant fut menée la pratique, qu'ils promi-
 rent de quitter tout tant qu'ils auoient de vaisseaux,
 quitter tous leurs Elephants, & de payer vne bon-
 ne grosse somme d'argent: mais aussi tost comme **E**
 Hannibal fut repassé d'Italie en Afrique, ils se re-
 pentirent de ce qu'ils auoient accordé & pro-
 mis, pour la confiance qu'ils auoient es forces &
 en la personne de Hannibal: dequoy Scipion estāt
 aduertty leur dit, que quand ils voudroient il ne
 tiendroient pas le traicté qu'il leur auoit accordé, si-
 non qu'ils payassent cinq mille talents, qui sont
 trois millions d'or, d'auantage que ce qui auoit esté
 accordé, pour ce qu'ils auoient mandé & fait ve-
 nir Hannibal. Et apres que les Carthaginois eu-
 rent esté par luy à vifue force desfaits en battail- **F**
 le, ils renuoyerēt de rechef des ambassadeurs pour
 traiter d'appointement & de paix: mais il leur
 commanda incontinent, qu'ils eussent à se retirer,
 pour ce qu'il ne leur donneroit iamais audience,
 que premierement ils ne luy eussent ramené Lu-
 cius Terentius, lequel estoit un gentilhomme Ro-
 main homme de bien & d'honneur, qui par fortune
 de guerre estoit tombé prisonnier es mains des
 Car-

A Carthaginois: puis quand ils le luy eurent amené,
 il le feit seoir coste à coste de luy au conseil, & donna
 lors audience aux ambassadeurs, aux quels il ot-
 troia la paix. Depuis quand il entra dedans Ro-
 me en triomphe, à cause de ceste victoire, Teren-
 tius suyuit son char triomphant, aiant vn chappeau
 sur sa teste, comme estant son serf affranchy, & ad-
 uouant tenir sa liberré de luy. Et quād il fut tref-
 passé, à tous ceux qui accompagnerent le corps à sa
 sepulture, il donna à tous à boire du breuuage faict
 de vin & de miel, & procura diligemment toutes
 autres choses dont il esperoit honorer ses funeraïl-
 les: mais cela fut depuis. Au reste quand Antio-
 chus veit que les Romains estoient passez en Asie
 avec puissante armee pour luy faire la guerre, il
 enuoya ses ambassadeurs deuers Scipion, pour
 traicter d'appointement: aux quels il respondit,
 Il falloit auoir faict cecy deuant, & non pas à ceste
 heure, que vostre maistre a desia receu & le mors
 en la bouche, & la selle avec le cheuauteur sur le
 dos. Le Senat auoit ordonné qu'il prendroit quel-
 que argent és coffres de l'espargne & tresor de la
 chose publique, mais les Tresoriers ne vouloiēt pas
 ouurir la chambre du tresor pour ceste iournee la:
 Il leur dit qu'il l'ouuriroit doncques luy mesme, &
 qu'il le pouuoit bien faire, attendu qu'il estoit cau-
 se qu'on le tenoit ainsi fermé, pour la quātité gran-
 de d'or & d'argent qu'il auoit faict apporter dedās.
 Petilius & Quintus, deux Tribuns du peuple l'ac-
 cusoient de plusieurs charges enuers le peuple: Et
 luy au lieu de s'en iustifier dit, Seigneurs Romains

à tel iour qu'il est au iourd'huy proprement, ie desfeis en bataille les Carthaginois & Hannibal: & pourtant m'en vois-ie tout de ce pas, avec ce chapeau de fleurs sur ma teste, au Capitole, pour y sacrifier & rendre graces de la victoire à Iupiter: ce pendant qui voudra donner sa voix pour ou contre moy, le face à son plaisir. & de faict aiant dit cela, il s'y en alla: & tout le peuple alla apres luy laissant ses accusateurs plaider tout leur saoul.

Titus Quintius des son aduenement aux affaires estoit desia si renommé, que deuant qu'auoir esté ny *Ædile*, ny *Preteur*, ny *Tribun du peuple*, il fut élu *Consul*: & estant enuoyé *Capitaine general* lieutenant du peuple Romain, pour faire la guerre à Philippus Roy de Macedoine, il fut conseillé de fabboucher premierement & parlementer avec luy. Philippus pour la seureté de sa personne luy
 „ demandoit ostages: Pour ce, disoit-il, que les Ro-
 „ mains ont icy plusieurs capitaines avec toy, & les
 „ Macedoniens n'ont que moy: Non, respondit
 „ Quintius, pour ce que tu t'es rendu tout seul, aiant
 „ faict mourir tous tes amis & parents. Apres qu'il
 eut desfait en bataille ce Roy Philippus, il fit pro-
 clamer en la feste des ieux Isthmiques, qu'il remet-
 toit tous les Grecs en leur franchise & liberté en-
 tiere, pour desormais viure à leurs loix: alors les
 Grecs feirēt rechercher par toute la Grece les Ro-
 mains qui auoient esté vendus pour esclauues du-
 rant les guerres de Hannibal, & les aians rachet-
 tez de cinq cents drachmes pour teste, qui sont cin-
 quante escus, ils luy en feirent vn present: & eux le
 suiui-

A suiuirent en son triomphe avec des chappeaux sur
 leurs testes, cōme la coustume est des serfs qui sont
 de nouveau affranchis. Les Acheïens estoient
 en propos de faire entreprise pour aller conquerir
 l'Isle de Zacynthe : mais il les admonesta de ne se
 ietter point hors du Peloponese, fils ne se vouloiēt
 mettre en danger, comme les tortues quand elles
 estendent leurs testes hors de leur cocque. La
 nouuelle estant par toute la Grece, que le roy An-
 tiochus sy en venoit avec grosse puïssance : telle-
 ment que tout le monde estoit effroyé d'ouïr nō-
 mer le nombre des combattans & leurs diuerses
 armeures, il teint vn tel propos au conseil des A-
 cheïens: Qu'estant logé chez vn sien hoste en la
 ville de Chalcide qui luy donnoit à soupper, il fesi-
 merueilla dont il pouuoit auoir recouuré tant de
 diuerses sortes de venaison, comme il en voioit ser-
 uir sur la table deuant luy: & que son hoste luy res-
 pondit, que c'estoit toute chair de pourceau, qui
 estoit seulement diuersifiée de saulces & de façon
 de l'accoustre. En cas pareil aussi, ne vous esba-
 hissez point de ceste grande armee du Roy Antio-
 chus pour ouïr nommer des hommes d'armes ar-
 mez de toutes pieces, des cheuaux legers, des ar-
 chers à cheual, des gens de pied: car tous ceux la ne
 sont que Syriens, hommes nez à seruitude, diffé-
 rens les vns des autres de la diuersité d'armeures.
 Philopœmen estoit lors capitaine des Acheïens
 qui auoit bien des gens de cheual & des gens de
 pied, mais il n'auoit point d'argēt pour les entrete-
 nir: Quintius en se iouant disoit, que Philopœmen

» auoit bien des mains & des pieds, mais qu'il n'a-
 » uoit point de ventre. ce qui estoit de tant plus plai-
 fant, que à la verité il se trouuoit de la cōposition
 de son corps tel. Caius Domitius, celuy que Sci-
 pion l'aîné laissa en son lieu aupres de son frere
 Lucius Scipion en la guerre contre le roy Antio-
 chus, aiant recogneu l'armee des ennemis estans
 en bataille, comme les capitaines qui auoiēt char-
 ge en l'armee des Romains luy conseillaissent que
 promptement il donnaist la bataille: il leur respon-
 dit qu'il n'y auoit pas assez de iour pour pouuoir
 mettre en pieces tant de milliers d'hommes, les
 saccager & piller leur bagage, & puis s'en retour-
 ner au camp & se traiter, mais qu'il le feroit le len-
 demain de bon matin: & de faict, le lendemain il
 leur donna la bataille, & en tua cinquante mille.
 Publius Licinius consul, en vne rencontre de gens
 de cheual fut vaincu par le Roy Perseus, & perdit
 bien enuiron deux mille huit cens hommes, que
 morts que pris en la bataille. Apres ceste victoi-
 re, Perseus enuoya deuers le Consul pour traiter
 de paix & d'appointement: là où les conditiōs de
 paix que le vaincu proposa au vainqueur furent,
 qu'il se soubmeit entierement luy & son estat aux
 Romains, pour en faire & ordonner à leur discre-
 tion. Paulus Æmylius poursuiuant vn second
 cōsulat, en fut debouté & refusé: mais depuis, quād
 on veid que la guerre contre le Roy Perseus alloit
 trop à la longue par l'ignorance, paresse & lascheté
 des capitaines que lon y enuoyoit, les Romains
 l'esleurent Consul pour la seconde fois: mais il leur
 dit,

A dit, qu'il ne leur en sçauoit ny gré ny grace, d'au-
 tant qu'ils l'auoient eleu, non pour luy gratifier,
 attendu qu'il ne demandoit plus de charge, mais
 pour ce que eux mesmes auoient besoing d'un ca-
 pitaine. Retournant de la place en sa maison, il
 trouua vne sienne petite fille, qui auoit nom Ter-
 tia, toute esploree: Si luy demanda la cause pour-
 quoy elle ploroit: elle respondit, Nostre Perseus est
 mort, mon pere. c'estoit vn petit chien qui auoit
 ainsi nom. A la bonne heure, dit-il, ma fille: ie pren
 ceste mort pour bon augure. Estant arriué en son
 B camp, il y trouua force babil & force brauerie des
 foudards qui se mesloient de vouloir faire l'estat de
 capitaine, & qui s'entremettoient curieusement de
 plusieurs choses plus auât qu'ils ne deuoient: il leur
 commanda qu'ils ne se messassent point de tant de
 choses, mais seulement qu'ils se donnassent peine
 que leurs espees fussent bien afilees & bien poin-
 tues, & que luy prouiroit au demourant. Ceux
 qui estoient aux escoutes la nuiet, il ne vouloit point
 qu'ils portassent ne picque ny espee, à fin que sen-
 tans qu'ils n'auoient moien de combattre, s'ils
 C estoient surpris de l'ennemy, ils en fussent plus soi-
 gneux de resister au sommeil. Estant entré dedans
 la Macedoine atrauers les montaignes, il trouua
 deuant soy les ennemis bien regez en bataille: &
 luy conseilloit Scipion Nasica, que tout sur l'heure
 il leur allast donner la bataille: Si i'estois en l'aage
 que tu es, dit-il, i'aurois la mesme opinion que tu
 as: mais la longue experience en ce mestier me de-
 fend d'aller tout las du chemin combattre vne ar-

mee ordonnee en bataille. Apres qu'il eut des-
faict entierement Perseus, en faisant aux alliez &
confederez les festins de sa victoire, il disoit que
de mesme sens & experience procedoient le sca-
uoir renger vne bataille tres effroyable à ses enne-
mis, & vn festin tres-agreable à ses amis. / Perseus
estant son prisonnier, qui le supplioit fort instam-
ment qu'il ne fust point mené en triomphe: Cela,
" luy dit-il, est en ta puissance. luy donnant congé
" par ses parolles de se desfaire soy-mesme. / Il fut
trouué és tresors de ce roy vne quātité infinie d'or
& d'argēt, dont il ne toucha ny ne prit iamais rien
pour luy: mais il dōna à Tubero son gendre, pour
honorer sa vertu, vne couppe d'argent du pois de
cinq marcs: encore dit on que ce fut la premiere
vaisselle d'argent qui entra en la maison des Aemy-
liens. De quatre siēs enfans masles, il en auoit pa-
rauant dōné les deux premiers à adopter en autres
familles nobles: & des deux derniers qui luy estoier
demourez en sa maison, l'vn aagé de quatorze ans,
luy mourut cinq iours auant son triomphe: & l'au-
tre, qui auoit douze ans, cinq autres iours apres:
dont le peuple fut fort desplaisant, & en auoit grā-
de compassion de luy: mais luy sortant en public,
& recomfortant le peuple, dit, que desormais il
pensoit estre hors de crainte & hors de danger que
malheur aucun n'aduint à la chose publique, pour
ce qu'il supportoit pour tous l'enuie de tāt de pro-
speritez qu'il auoit eues pour le public, d'autāt que
la fortune l'auoit deriuee & tournee toute sur sa
maison seule. Caton l'ancien en harenguant de-
uant

Auant le peuple Romain, & reprenant aigrement
 son intemperance, ses delices & superflue despen-
 se: Il est bien malaisé, disoit-il, de parler à vn ven-
 tre qui n'a point d'aureilles. & disoit aussi, qu'il s'es-
 bahissoit commét pouuoit durer vne cité, en la-
 quelle vn poisson se vendoit plus qu'un bœuf.
 Et blasmant aussi la trop grande autorité & li-
 cence que lon donnoit par tout aux femmes:
 Tous autres hommes, disoit-il, commandent aux
 femmes, & nous à tous hommes, & les femmes à
 nous. Aussi disoit-il, qu'il aimoit mieux ne rece-
Evoir gré ny grace quand il auroit faict quelque
 seruice, que n'estre pas puny quand il auroit faict
 quelque faute: & qu'il pardonnoit à tous ceux qui
 failloiet par erreur ou ignorance, excepté à luy: &
 en sollicitant les magistrats de chastier ceux qui
 offensoient les loix, il disoit que ceux qui auoiét le
 moien & l'autorité de reprimer les malfaitteurs,
 & ne le faisoient, cōmandoient eux mesmes le mal.
 Il disoit aussi, que les ieunes gents qui rougissoient
 quand on les reprenoit, luy plaisoient plus que
 ceux qui pallissoient: &, qu'il haïssoit vn souldard
E lequel en cheminant demenoit les mains, & en cō-
 battant les pieds, & qui ronfloit plus haut en dor-
 mant, qu'il ne crioit en frappant: & que celuy la
 estoit vn mauuais gouuerneur, qui ne se sçauoit pas
 gouuerner soy-mesme. *Il* auoit opinion que cha-
 cun doit auoir plus de honte de soy-mesme, que
 d'autre personne quelconque. / Voyant que plu-
 sieurs prochaissoient que lon leur erigeast des sta-
 tues: l'ayme mieux, disoit-il, que lon demãde pour-

„ quoy on n'a point erigé de statue à Caton, que D
 „ pourquoy on luy en a erigé. Il conseilloit à ceux
 qui auoient licence de faire ce qu'ils vouloient, de
 l'espargner, à fin qu'elle leur durast tousiours.
 Ceux qui estoient l'honneur à la vertu, estoient,
 disoit il, la vertu à la ieunesse. Il estoit d'aduis que
 lon ne deuoit ne prier vn bon magistrat ou iuge
 de chose iuste, ne deprier de chose iniuste. Il di-
 soit que si bien l'iniustice n'apportoit peril à celuy
 qui la commettoit, qu'elle en apporte à tous les
 autres. *Il* admonestoit les vieilles gents de n'ad-
 iouster point à leur aage la laideur du vice, attendu E
 qu'elle en a tant d'autres. *Il* estimoit qu'il n'y auoit
 difference entre le courroucé & le furieux, sinon
 d'autant que l'vn duroit plus, & l'autre moins.
 Il disoit aussi, que lon ne portoit point d'enuie à
 ceux qui vsoient de leur fortune sagement & mo-
 „ dereemēt: pource, disoit-il, que ce n'est pas de nous
 „ que lon est enuieux, mais de ce qui est autour de
 „ nous. Et que ceux qui font à bon esciant là où il
 faut ioïer & rire, apprestent aussi à rire là où il
 faudra faire à bon esciant: & que les belles & ver-
 tueuses actions deuroient tousiours rencontrer de F
 belles descriptions, pour ne demourer iamais sans
 la gloire qui leur appartient. Il reprenoit les ci-
 toïens Romains qui dōnoient tousiours leurs voix
 à vn mesme personnage aux elections des magi-
 strats: car il semblera, dit-il, ou que vous n'estime-
 rez pas beaucoup l'honneur de vos magistrats, ou
 que vous n'aurez pas beaucoup d'hommes que
 vous en iugiez dignes. Il faisoit semblant d'auoir
 en

A en admiration la force d'un qui auoit vendu des
 terres qu'il possedoit assises au long de la mer,
 comme estant plus puissant que la mer mesme:
 » car ce qu'elle mine à peine peu à peu, cestuy cy l'a
 » auallé tout à vn coup. Prochassant l'estat & offi-
 ce de Censeur, & voiant que d'autres siens compe-
 titeurs & concurrens alloient caressant & flattant
 le peuple pour fin sinuer en sa bonne grace: luy au
 contraire alloit criant que le public auoit besoing
 d'un medecin aspre & maupiteux, & d'une grande
 purgation: & pourtant qu'il falloit elire non ce-
 E luy qui seroit le plus gracieux, mais le plus seuer:
 & en faisant ces remonstrances la il fut eleu deuât
 tous autres. Enseignant les ieunes hommes à har-
 diment & asseurement combattre, il disoit, que la
 parole bien souuent effroye plus l'ennemy que
 l'espee, & la voix que la main, & luy fait prendre la
 fuitte. En faisant la guerre en Espagne à ceux qui
 habitent au long de la riuere de Betis, il se trouua
 en danger pour la multitude grande des ennemis
 qui estoient en armes contre luy, & ne pouuoit
 auoir promptement secours, sinon des Celtibe-
 c riens, qui pour ce faire luy demandoient deux cets
 talents, qui sont six vingts mille escus: les autres ca-
 pitaines Romains ne vouloient point qu'il pro-
 meist cest argent à des Barbares pour leur salaire,
 » mais Caton leur dit qu'ils s'abusoient: Car si nous
 » gagnons, dit-il, nous les payerons, non du nostre,
 » mais aux despens de nos ennemis: & si nous per-
 » dons, il n'y aura plus ne qui paye, ne qui demande
 » à estre payé. Aiant pris plus de villes qu'il ne de-

moura de iours en Espagne, ainsi que luy mesme **D** dit, il n'y prit pour luy iamais rien plus, que ce qu'il y beut & mangea : mais bien departit il à chascun de ses souldards vne liure d'argent, disant qu'il valloit mieux que plusieurs retournassent de la guerre en leurs maisons avec de l'argent, que peu avec de l'or : pour ce que les magistrats & capitaines ne se deuoient accroistre de rien en leurs charges & gouuernemés, sinon d'honneur & de gloire. Au voiage de ceste guerre il auoit quād & luy cinq de ses seruiteurs, desquels il y en eut vn qui achetra trois prisonniers de guerre: mais estāt aduertie que son maistre l'auoit sceu deuant que venir deuant luy, il se pendit & estrangla luy mesme. Scipion l'Africain le priant de vouloir fauoriser à la cause des bannis d'Achaïe, à fin qu'ils fussent remis & restituez en leurs païs, il feist semblant de ne se soucier point de tel affaire: mais voiant que lon en parloit tant, & en faisoit on si grande instāce au senat, il se leua &
 „ dit, Cōme si nous n'auions autre chose à faire, nous
 „ demourons tout le iour à disputer icy de ces vieil-
 „ lards Grecs, à sçauoir s'ils seront portez en terre par
 „ les fossoyeurs & porteurs de deça, ou par ceux de **F**
 „ dela. Posthumius Albinus auoit escrit des histoires en Grec, au prologue desquelles il prioit les auditeurs & lecteurs de luy pardonner s'il y auoit aucune impropriété au langage. Caton s'en moquant disoit, qu'il meriteroit qu'on luy pardonnast, si c'estoit par ordonnance & commandement des Amphictyons, qui estoient les estats de la Grece, qu'il eust esté cōtrainct, mal gré luy, d'entreprendre
 ceste

A ceste histoire. Scipion le puisné, en cinquante & quatre ans qu'il vesquit, n'achetta, ny ne vendit, ny ne bastit oncques rien: & dit on qu'en vne si grosse & si puissante maison, cōme estoit la siene, lon n'y trouua iamais que trente trois liures pesant de vaisselle d'argent, mesmement apres auoir eu la ville de Carthage en sa puissance, & auoir enrichy ses souldards plus que iamais autre capitaine n'auoit faict. Obseruant le precepte que luy auoit donné Polybius, il mettoit peine de ne se retirer iamais de la place, qu'il ne se fust rendu de nouueau **B**

quelque vn de ceux qu'il rencontroit, comment que ce fust, familier & amy. Estant encore ieune il auoit desia si grande reputation de vaillance & de sagesse, que Caton l'aîné enquis des ieunes gens qui estoient au camp deuant Carthage, entre lesquels il estoit, il respondit:

Celuy là seul est au nombre des sages,
 Les autres sont vaines vmbres volages.

Au moien dequoy, apres son retour à Rome, ceux qui estoient demourez au camp le rappelloient, non pour enuie qu'ils eussent de luy faire plaisir, **C**

mais pour ce qu'ils esperoient prendre plus tost & plus facilement la ville par son moien. Au dedans des murailles de laquelle estât desia entré, & neâtmoins les Carthaginois cōbattans encore du chasteau, Polybius luy conseilloit de faire ietter dedās la mer qui est entre deux, laquelle n'est pas fort, creuse, des chaussees-trappes, ou bien des aix percez de pointes de cloux, de peur que les ennemis passās ce bras de mer ne vinsent en sursaut assaillir leurs

remparts. Il luy respondit que c'estoit vne moc-^Dquerie, veu qu'ils auoient desia gaigné les murailles, & qu'ils estoient dedans la ville de leurs ennemis, chercher les moiens de ne combattre point contre eux. Et trouuant la ville toute pleine de statues & de tableaux Grecs, qu'ils auoient emportez des villes de la Sicile, il commanda que les Siciliens vinssent recognoistre ce qui seroit à eux, & qu'ils l'emportassent : mais de tout le pillage il ne voulut pas endurer qu'aucun esclau ny affranchy en prist ny en achettast chose du monde, combien qu'au demourant chascun en pillast & em-^Eportast ce qu'il vouloit. Le plus grand & le plus familier amy qu'il eust, Lelius, poursuuiuoit l'estat du consulat, & luy fauorisoit & aidoit sa poursuite en tout ce qu'il pouuoit : à l'occasion dequoy il demanda à vn Pompeius qui briguoit aussi le mesme estat, s'il estoit vray qu'il le poursuuiust : or estimoit on que ce Pompeius la fust fils d'un menestrier ioueur de flustes : Il luy feit response qu'il ne le poursuuiuoit pas, & qui plus est, luy promet qu'il accompagneroit Lelius à faire sa poursuite par tout, & qu'il prieroit pour luy. Ils se fierēt à ses^F paroles, dont ils furent trompez, & le iour de l'election l'attédirent long temps, iusques à ce qu'on leur vint rapporter qu'il estoit desia en la place qui briguoit pour luy mesme, & se recommandoit à tous les citoiens, les vns apres les autres. Dequoy tous les autres se courrouceans, Scipion s'en prit à
 „ rire disant, C'est vne grande sortise à nous, quand
 „ i'y pense, que nous auons icy demouré si long tēps
 à atten-

A à attendre vn flusteur, comme si nous eussions à C'est pour
 » prier & inuoquer non des hōmes, mais des Dieux. ce que du
 Appius Claudius briguoit à la concurrence de luy, rant les sa
 l'office de Censeur, & disoit pour rendre sa brigade crifices,
 plus fauorable, qu'il saluoit sans aide de protecolle on iouoit
 par nom & par surnom, tous les citoiēs de Rome, tousiours
 là où Scipion n'en cognoissoit, par maniere de dire, des flu-
 » pas vn : Tu dis la verité, respondit Scipion, car i'ay stes.
 » tousiours eu soing non d'en cognoistre beaucoup,
 » mais de n'estre incogneu de pas vn. Au reste il cō-
 feilloit aux Romains qui lors auoiēt la guerre con-
 B tre les Celtiberiēs, qu'ils les enuoyassent tous deux
 au camp en estat ou de lieutenans, ou de coulons-
 nels de gēs de pied, & puis qu'ils receussent les tes-
 moignages des Capitaines & hommes de guerre,
 qui auroit mieulx faict le deuoir d'homme de bien
 d'eux deux. Aiant esté créé Censeur, il osta le che-
 ual à vn ieune homme, d'autant que despendant
 excessiuelement à faire grand' chere, du temps que la
 ville de Carthage estoit assiegee, il auoit fait faire
 vne piece de four, en forme de ville, & l'appellant
 Carthage, l'abandonna à deschirer & piller à ceulx
 C qui estoient à table avec luy. Et comme le ieune
 homme luy demanda, pour quelle cause il le cas-
 » soit & le priuoit du cheual public: pour autant, dit-
 » il, que tu as saccagé & pillé Carthage deuant moy.
 Durant le temps de sa censure, il apperçeut vn iour
 » Caius Licinius qui passoit: le sçay de certain, dit-il,
 » que cest homme icy est pariure: mais d'autant qu'il
 » n'y a personne qui l'accuse, ie ne puis estre iuge &
 » tesmoing ensemble. Estant enuoyé luy troisieme

par le Senat, comme contrerolleur general pour syndiquer, cōme dit Clitomachus, les hommes & le gouuernement des villes, & voir cōme se gouuernoient les peuples, les nations, & les Roys, quād il fut arriué en Alexandrie, & descendu de la nauire, les Alexandrins accourans de toutes parts pour le voir, le prierent de descouurir sa teste, d'autant qu'il auoit le bout de sa robbe dessus, à fin qu'ils le veüssent mieulx à face toute descouuerte: ce qu'il feit, dequoy ils ietterent grandes acclamations, & luy applaudirent des mains en signe de ioye: & comme leur Roy se parforceast à grāde peine, tant E il estoit gras & delicat, à faire à l'enuy d'eulx qui le

„ suyuoient par tout: Scipion dit tout bas en l'oreille
 „ de ceux qui estoient plus pres de luy: Les Alexan-
 „ drins reçoient desia ce fruiēt de nostre voyage,
 „ qu'au moins ils voient leur Roy se promenāt pour
 „ l'amour de nous. En ce voyage il estoit accompa-
 gné d'un sien amy philosophe nommé Panætius,
 & de cinq seruiteurs, desquels cōme l'un fust mort
 en ceste peregrination, il n'en voulut point acheter
 d'autre hors de païs, ains en feit venir vn autre
 de Rome. Il sembloit que les Numantins fussent F
 inuincibles & inexpugnables, d'autāt qu'ils auoiēt
 ia vaincu & desfaict plusieurs Capitaines: au moiē
 dequoy le peuple Romain eleut Scipion Consul
 pour la seconde fois, & comme plusieurs ieunes
 hommes en bien grand nombre se preparassent
 pour le suyure à ceste guerre, le Senat l'empescha
 sous couleur de dire, que l'Italie demoureroit de-
 ferte de gens de defense: & si ne luy permeirent pas
 de

A de prédre de l'argent qui estoit ia tout prest & present au thresor, ains luy baillerent des assignations sur les payemens des fermiers, dont les termes n'estoient pas encore escheus. Et quant aux deniers, Scipion dit qu'il ne demoureroit pas pour cela, d'autant que son argent & celuy de ses amis fourniroit à cela : mais quant à ce qu'on ne luy vouloit pas souffrir leuer & emmener gens, il s'en plaignit bien fort, pource qu'il disoit que la guerre où lon
 2 l'enuoyoit estoit dangereuse & difficile: Car si c'est
 3 pour la vaillance des ennemis que noz gens y ont
 4 esté tant de fois desfaictz, elle est dangereuse pour auoir à combattre contre de tels ennemis : & si ç'a
 5 esté par la faute & lascheté de noz gens, elle l'est
 6 encore, pour auoir à combattre avec de si lasches
 7 amis. Estant arriué au camp, il y trouua vn grand desordre, grande dissolution, superstition, & grãde superfluité de toutes choses : si en bannit & chassa incontînét toutes sortes de deuins & de diseurs de bonne aduenture, tous sacrificateurs, & tous macquereaux tenãts bordeaux publiques, & commanda que chascun renuoyast chez soy toute autre sorte de vaisselle & d'utenfiles, sinon la marmite à faire cuire la chair, la broche, & le pot à boire, de terre: de couppes ou de flacons d'argent ne permet que lon en peust retenir pesant plus de deux liures. Il defendit de se baigner & estuuer, & s'il y en auoit qui se voulussent oindre, qu'ils se frottassent eulx mesmes, & que c'estoient les bestes qui n'ont point de mains, qui auoient besoing d'hommes qui les frottassent. Il ordonna aussi que lon disnast tout

debout sans māger viande chaulde, mais que pour
 soupper, on s'asseist qui vouldroit, sans y manger
 autre chose que du pain avec quelque potage lié,
 & vn simple mets de chair boulie ou rostie, & luy
 mesme alloit vestu d'une cappe noire bouclée par
 deuant, disant qu'il portoit le deuil de la honte de
 son armee. Il trouua que vn Colonel de gens de
 pied, nōmé Memmius, faisoit porter apres luy sur
 ses sommiers des coupes & vases à boire, enrichis
 de pierreries, & d'ouillage de Thericles, si luy dit:
 » Tu t'es rendu pour trente iours inutile à moy & à
 » ton pais, estāt tel & pour toute ta vie à toy mesme, **E**
 » t'accoustumant à si superflues delices. Vn autre luy
 monstrois sa rondelle fort bien & richement or-
 » nee, auquel il respondit: Voyla vne belle rondelle,
 » mō amy, mais il faut qu'un soudard Romain met-
 » te plus son esperance en sa main droite, que non
 » pas en sa gauche. Vn autre aiant chargé sur ses
 espaulles vn faisceau des pallis dont on réparoit le
 camp, se plaignoit qu'il estoit trop chargé: c'est biē
 employé, dit-il, pource que tu te fies plus en ces
 pallis, que tu ne fais en ton espee. Voiant les enne-
 mis Numantins desesperez, il ne voulut pas incon- **F**
 tinēt les aller combattre, ains tira la chose en quel-
 que longueur, disant qu'il achettoit avec le temps
 la seureté des affaires, pource que le bon Capitaine
 doit faire comme le sage medecin, qui ne vient ia-
 mais à l'extreme remede de couper la partie avec
 le fer, sinon à l'extremité, apres que tous autres
 moiens de medecine luy defaillent, toute fois aiant
 espié son occasion, il donna la bataille à ceulx de
 Numance

A Numance & les desfeit : quoy voians les vieillards
 dirēt iniure à leurs gens, de ce qu'ils s'estoient ainsi
 laissez battre par ceux qu'ils auoient battus tant de
 10 fois:mais il y en eut vn qui leur respōdit, Les mou-
 20 tons sont bien les mesmes qu'ils estoient par cy de-
 30 uant,mais ils ont vn autre berger. Apres auoir pris
 la ville de Numance, & auoir entré en triumphe
 dedans Rome pour la deuxieme fois, il tomba en
 different grand alencōtre de Caius Gracchus,pour
 la cause du Senat, & des alliez & confederez : de-
 quoy le commun peuple estant indigné cōtre luy,
B feit bruit & le siffla pour le faire descēdre de la tri-
 bune aux harégues,ainsi comme il leur cuyda faire
 10 ses remōstrances: Mais il leur dit,Iamais la clameur
 20 de tout vn camp en armes ne m'estonna, tant s'en
 30 fault que la crierie d'une tourbe de gens ramassez
 40 me puisse troubler, à qui ie sçay que l'Italie n'est
 50 point mere, mais marastre. Et comme ce Caius
 60 Gracchus criaist tout haut, qu'il le falloit tuer com-
 70 me vn tyran: Ils ont raison de me vouloir faire
 80 mourir ceux qui font la guerre à leur propre païs,
 90 car ils sçauēt bien que Rome ne peult tomber tant
C que Scipion sera debout, ny Scipion viure quand
 10 Rome sera abbattue. Cecilius Metellus deliberant
 comme il pourroit faire seurement ses approches
 deuant vne place forte, comme vn Centenier luy
 20 dist, En perdant seulement dix hommes tu l'em-
 30 porteras: il luy demāda,s'il vouloit estre l'un de ces
 40 dix. Et comme vn autre Colonel de gens de
 pied encore ieune d'aage luy demanda ce qu'il
 50 vouloit faire: Si ie pensois,dit-il,que ma chemise le

» sçeuſt, ie la deſpouillerois tout à ceſte heure pour la
 » mettre dedans le feu. Il auoit eſté contraire à Sci-
 pion durant ſa vie, mais quand il fut mort il en eut
 regret, & commanda à ſes enfans qu'ils allaſſent
 mettre leurs eſpaules ſoubs le liçt pour le porter à
 ſon enterrement, diſant qu'il rendoit graces aux
 Dieux, de ce que Scipion auoit eſté né à Rome, &
 non pas ailleurs. Caius Marius eſtant venu de fort
 bas lieu au maniement des affaires, par le moien des
 armes, demanda l'office d'Ædilité grande: & ſen-
 tant qu'il n'y faiſoit pas bon, au meſme iour paſſa
 à demander & pourſuyure la petite: & neantmoins
 encore qu'il fuſt deboutté de toutes les deux, ſi ne
 perdit il point l'eſperâce de ſe veoir vn iour le pre-
 mier des Romains. Aiant des varices qui ſont des
 venes eſlargies en l'vne & en l'autre cuiſſe, il les
 bailla à coupper au chirurgien ſans eſtre lié, & en-
 dura toute l'operation du chirurgien, ſans ſouſpi-
 rer ny froncer les ſourcils: mais comme le medecin
 aiant fait à vne cuiſſe paſſaſt à l'autre, il ne la luy
 voulut pas donner, diſant que la cure de tel mal ne
 meritoit pas que lon en enduraſt de ſi griefues dou-
 leurs. Il auoit vn neueu appellé Lucius qui au ſe-
 cond conſulat de ſon oncle voulut forcer vn beau
 ieune fils, qui ne faiſoit lors que commander à por-
 ter les armes ſoubs ſa charge. Ce ieune homme le
 tua tout roide: & comme pluſieurs l'accuſaſſent de
 ce meurtre, il confeſſa franchement qu'il auoit voi-
 rement fait mourir ſon Capitaine, & en dit & de-
 clara la cauſe tout publiquement. Marius, le faiçt
 entendu, ſe feit apporter vne des couronnes que
 lon

A lon auoit accoustumé de dōner à ceulx qui faisoient
 quelque bel acte de prouesse à la guerre, & la posa
 luy mesme de sa propre main sur la teste du ieune
 homme. Estant campé assez pres du camp des
 Teutons, en lieu où il y auoit bien peu d'eau, com-
 me ses foudards se plaignissent qu'ils mouroient de
 soif, il leur monstra vne riuere non gueres loing,
 qui couloit au long du camp des ennemis: c'est là,
 dit-il, qu'il faut que vous alliez acheter à boire au
 pris de vostre sang, si vous en voulez auoir: les fou-
 dards luy respondirent, qu'il les y menast donc, ce
 B pendāt que leur sang estoit encore liquide, & qu'il
 n'attēdist pas qu'il fust du tout sec & caillé de soif.
 Du temps de la guerre des Cimbres il donna tout
 à vn coup droit de bourgeoisie Romaine à mille
 hommes de Camerin, qui auoient fort bien seruy
 en ceste guerre, chose qui estoit contre toutes loix:
 & comme quelques vns le reprissent de ce qu'il a-
 uoit ainsi transgressé les loix, il leur respondit, qu'il
 n'auoit peu entendre ce que disoient les loix, pour
 le grand bruit des armes. Et du temps de la guerre
 Sociale, se voiant enfermer de trenchées tout alen-
 C tour, & assieger, il eut patience, attendant tousiours
 son occasion: & comme Pompeius Silo Capitaine
 general des ennemis luy dit, Marius si tu es si grand
 Capitaine que lon dit, sors dehors de ton camp &
 me viens combattre: mais toy, dit-il, si tu es si grand
 Capitaine que tu penses, contrains moy malgré
 que i'en aye de sortir pour t'aller combattre.
 Catulus Luctatius en la guerre Cimbrique estant
 campé au long du fleuve d'Athesis, & voians les

Romains que les Barbares s'efforçoient de passer le
 l'eau, ils delogerent, quelque remonstrance que leur
 Capitaine leur sceust faire: & quand il veit qu'il ne
 les pouuoit autrement arrester, luy mesme se mit
 entre les premiers qui fuyoient, à fin qu'il ne sem-
 blast point qu'ils fuyssent deuant leurs ennemis,
 mais qu'ils fuyissent leur Capitaine. Sylla sur-
 nommé l'heureux, entre ses prosperitez en com-
 ptoit deux pour les plus grandes, l'une qu'il auoit
 eu bonne amitié avec Metellus Pius: l'autre, qu'il
 n'auoit pas destruit la ville d'Athenes, ains l'auoit
 preseruee de ruine. Caius Popillius fut enuoyé
 deuers le roy Antiochus portant vne lettre du Se-
 nat, par lequel on luy mandoit, qu'il eust à retirer
 son armée d'Ægypte, & de ne point s'attribuer &
 vsurper le Royaume qui appartenoit aux enfans
 de Ptolomeus orphelins. Antiochus le voiant
 venir deuers luy à trauers son camp, le salua de
 tout loing: Popillius sans le resaluer luy bailla sa
 lettre: laquelle Antiochus leut, & apres l'auoir leue
 respondit, qu'il delibereroit sur ce que le Senat luy
 mandoit, & puis qu'il luy feroit response. Popil-
 lius adonc luy feit vn cercle au tour de luy avec vne
 baguette qu'il tenoit en la main, en luy disant: De-
 libere d'ocques, dit-il, auant que sortir de ce cercle,
 & m'en fais response. Toutel'assistance s'estonna
 merueilleusement de l'assurance & hardiesse de
 cest hōme. Et Antiochus sur le champ luy respon-
 dit, qu'il feroit doncques ce qu'il plairoit aux Ro-
 mains: & adonc Popillius le salua amiablement, &
 l'embrassa. Lucullus en Armenie s'en alloit avec

A dix mille hōmes de pied , & mille de cheual , trou-
 uer le roy Tigranes, qui auoit cent cinquante mille
 hommes de guerre, pour luy donner la bataille, &
 estoit le sixiesme iour d'Octobre, auquel l'armee
 Romaine, qui estoit sous vn Scipion , auoit esté
 desfaicte par les Cimbres. Et cōme quelqu'vn luy
 dist, que les Romains abominoiēt & redoubtoient
 fort ce iour là : C'est pourquoy, dit-il, il nous fault
 au iourd'huy combattre vertueusement & coura-
 geusemēt , à celle fin que nous rendions ceste iour-
 nee , que les Romains tiennent pour triste & mal-
 encontreuse, ioyeuse & heureuse. Et comme les
 Romains redoubtassent principalement les hom-
 mes d'armes Armeniens , estants armez de toutes
 pieces , il leur dit , qu'ils ne s'en donnassent point
 d'ennuy, Pour ce que ie vous assure que vous au-
 rez plus de peine à les despouiller , que vous n'au-
 rez à les tuer. Et mōtāt le premier dessus vne mot-
 te, apres auoir de là vn peu consideré la contenāce
 des Barbares qui branloient , il s'escria tout hault:
 Compagnons , ils sont à nous . & de faict , s'estans
 d'eux mesmes mis en route, sans que personne eust
 hardiesse d'attendre, il les chassa tellement, qu'il en
 tua sur le champ iusques à bien cent mille , sans y
 perdre des siens que cinq tant seulement. Cneus
 Pompeius surnommé le grand fut autant aimé des
 Romains, comme son pere auoit esté hai: & estant
 encore fort ieune, il se ioignit à la faction de Sylla,
 & sans auoir office quelconque de la chose publi-
 que, ny estre du Senat, il leua grād nombre de gens
 de guerre de tous costez d'Italie : & comme Sylla

l'appellast à soy il dit, qu'il ne meneroit point ses D
gens à son Capitaine, qu'ils n'eussent premieremēt
fait quelque destrouffe, & quelque desfaicte avec
effusion du sang des ennemis : & de faict il n'y alla
point que premierement il n'eust desfait en plu-
sieurs rencontres plusieurs chefs des ennemis.

Depuis estant enuoyé par Sylla pour gouuerneur
en la Sicile, entendant que ses gens s'escartans de la
troupe, alloient robant, forceant & pillant par
tout le chemin, il feit mourir ceulx qui se desban-
doient sans congé, & qui alloient courir çà & là :
mais à ceux qui alloient par son comandement E
en quelque commission qu'il leur bailloit, il leur
scelloit leurs espees avec son cachet. Il fut sur le
poinct de faire passer au fil de l'espee tous les Ma-
mertins entierement, d'autant qu'ils auoient tenu
& suiuy le party contraire à Sylla. Mais Stennius
vn des habitants de ceux qui auoient accoustumé
de prescher & mener le peuple par leurs haren-
„ gues, luy dit, Qu'il ne feroit pas biē si pour vn seul
„ coupable, il en faisoit mourir plusieurs innocents,
„ & que c'estoit luy seul qui auoit esté cause de tout
„ le mal, aiant induit par persuasions ses amis, & par F
„ force ses ennemis à prendre & suyure le party de
„ Marius. Pompeius esmerueillé de ceste remon-
strance dit, qu'il pardonnoit aux Mamertins, s'ils
f'estoient laissez mener & persuader à vn tel per-
sonnage, qui auoit plus cher le salut de son païs
que sa vie propre, & de faict il absolut la ville toute,
& Stennius mesme. Depuis estant passé en Afri-
que contre Domitius, & y aiant gaigné vne grosse
bataille

A bataille, comme ses souldards le salüassent Empe-
 reur, qui est à dire souuerain Capitaine general, il
 leur dit, qu'il ne receuroit point cest honneur tant
 que le répar du camp des ennemis seroit debout:
 & adonc eux s'en courants tout de ce pas, encore
 qu'il feist vne grosse pluye, allerét abbattre la pal-
 lissade, & saccager le camp des ennemis. A son re-
 tour Sylla luy feit de grandes caresses & beaucoup
 d'honneur, & entre autres fut le premier qui l'ap-
 pella Magnus: toutefois cōme il se deliberaſt d'en-
 trer en triomphe dedans Rome, Sylla l'en voulut
 B empeschier, alleguant pour sa raison, qu'il n'estoit
 pas encore receu au Senat. Pompeius se tour-
 „ nant deuers les assistans: Il semble, dit il, que Sylla
 „ ignore qu'il y a plus d'hommes qui adorent le So-
 „ leil leuant, que le Soleil couchant. quoy entendant
 „ Sylla, s'escria: Et bien de par Dieu, qu'il triomphe
 „ donc, s'il en a tant d'enuie. toutefois encore luy fai-
 soient empeschement Seruilius homme de dignité
 Senatoriale, qui s'en courrouceoſt, & plusieurs de
 ses souldards mesmes s'opposoient à son triomphe,
 s'ils n'auoient quelques presents qu'ils pretédoient
 leur estre deuz: mais Pompeius dit hault & clair,
 „ qu'il quitteroit plus tost là triomphe & tout, que
 „ de se soubmettre à les caresser ne flatter: & adonc
 „ Seruilius luy dit, A cela voy-ie maintenant, Pom-
 „ peius, que tu es grand veritablement, & digne de
 „ triomphe. Estant la coustume à Rome que les
 Cheualiers, apres auoir esté à la guerre le téps pre-
 fix & ordonné par les loix, amenassent leur cheual
 sur la place deuant les deux reformateurs des meurs,

que lon appelle les Censeurs, & racontassent là ^D publiquemēt les guerres où ils se feroient trouuez, & les Capitaines sous lesquels ils auroient porté les armes, à fin que selon leurs merites ils en fussent oulouez ou blasmez. Pompeius estant Consul amena luy mesme son cheual par la bride deuant les Censeurs, qui pour lors estoient Gellius & Lentulus : & comme eulx suyuant l'ordonnance luy

„ demādassent, s'il auoit esté à la guerre autant d'an-
 „ nees comme il estoit requis par les loix : ouy, re-
 „ spondit il, & tousiours sous moy mesme Capitaine.

Estāt en Espagne faisy des papiers de Sertorius, ^E entre lesquels y auoit plusieurs lettres missiues des principaux du Senat, qui appelloient Sertorius à Rome pour y remuer encore quelque nouueau mesnage, il les meit toutes au feu, donnant à ceulx qui auoiēt eu mauuaise volōté, moien de se repentir & de se corriger. Phraates Roy des Parthes, enuoya deuers luy le prier de ne passer point la riuere d'Euphrates, & faire que ce fust la borne d'entre luy & eux : mais plus tost, dit-il, sera ce la iustice qui sera la borne d'entre les Parthes & les Romains. Lucius Lucullus apres estre retourné de ^F ses guerres & conquestes s'abandonna debordement aux voluptez & à viure sumptueusement, reprenant Pompeius de ce qu'il appetoit tousiours de plus en plus à auoir de grandes charges plus que son aage ne portoit : à quoy Pompeius respondoit,

„ qu'il estoit plus hors d'aage à vn vieillard s'aban-
 „ donner aux delices & voluptez, que de vacquer
 „ aux charges de la chose publique. Vn iour qu'il
 estoit

A estoit malade, les medecins luy ordonnerent qu'il mangeast d'une griue : on en chercha en plusieurs lieux, & n'en peut on trouuer, pour ce que ce n'estoit pas en leur saison : mais il y eut quelqu'un qui dit que lon en pourroit recouurer chez Lucullus, là où lon en nourrissoit tout le long de l'annee. Et quoy, dit il, si Lucullus donc n'estoit friand & delicat, Pompeius ne viuroit il pas? & laissant là l'ordonnance de son medecin, il se fait apprestre de ce que lon peut trouuer par tout ordinairement. Pour vne grande famine & disette de bleds qui aduint à Rome, il fut eleu en apparence de parole prouoyeur general, ou superintendant des viures, mais en effect de pouuoir, seigneur de la mer & de la terre : à l'occasion dequoy il alla en Afrique, en Sardaigne & en Sicile : là où aiant fait grand amas de bleds, il s'en vouloit vistement retourner à Rome : mais vne grosse tourmente se leua, tellement que les pilotes & mariniers mesmes craignoient fort de se mettre en mer & de faire voile : mais luy s'embarquant le premier, & commandant de leuer l'ancre, dit tout hault, Il est necessaire d'aller, & non pas necessaire de viure. Quand la querelle d'entre luy & Cesar fut à plein descouuerte, il y eust vn Marcellinus qui auoit esté auacé par luy, & s'estoit neantmoins depuis tourné du costé de Cesar, qui en plein Senat dit plusieurs choses alencontre de luy. Pompeius ne se peut tenir qu'il ne luy dist adonc : N'as tu point de hôte Marcellinus, de mesdire ainsi publiquemēt de moy, qui t'ay rendu eloquent, au lieu que tu estois muet : & saoul, iusques à

rendre ta gorge, là où tu mourois de faim au para-
uant? A Caton qui le tançoit & reprenoit aigre-
ment de ce qu'il ne l'auoit iamais voulu croire,
quand il luy auoit predit par plusieurs fois que la
puissance & l'augmentation de César, à quoy il te-
noit la main, estoit au grand danger & preiudice
de la chose publique, il respōdit, Tes cōseils estoiet
plus prudents, & les miens plus amiables: & par-
lant de soy-mesme librement, il disoit, qu'il auoit
eu toutes ses charges plus tost qu'il ne les auoit at-
tendues, & les auoit quittees plus tost qu'on ne l'a-
uoit attendu. Apres la bataille de Pharsale s'en-
fuyant en Ægypte, en voulant passer de sa galere
en vne petite barque de pescheur, que le Roy luy
auoit enuoyee pour l'amener à bord: en se retour-
nant deuers sa femme & deuers son fils, il ne leur
dit autre chose sinon ces vers d'Euripide,

Qui en maison de Prince entre, deuiant

Serf, quoy qu'il soit libre quand il y vient.

Estant passé en ceste barque, & luy aiant esté don-
né vn coup d'espee à trauers le corps, il ne fit au-
tre chose que soupirer vne fois seulement, & sans
mot dire, ains s'affublant le visage, s'abandonna à
tuer. Ciceron l'orateur estoit moqué de quel-
ques vns à cause de son nom qui signifie vn pois
chiche, à cause dequoy ses amis luy conseilloyent
de changer son nom: mais luy au contraire disoit,
qu'il rendroit le nom des Cicerons plus illustre &
plus renommé que ceux des Catons, des Catules,
ne des Scaures: & faisant vne offrande d'vn vase
d'argent aux Dieux, il y fit bien engrauer les let-
tres

A tres de ses deux premiers noms, mais pour le troi-
 sieme, il feit engrauer la figure d'un pois chiche. Il
 disoit que les orateurs qui crioient hault à pleine
 teste, pource qu'ils se sentoient foibles de suffisance,
 auoient recours au hault braire, ne plus ne moins
 que les boitreux môtent sur des cheuaux. Verres
 auoit vn fils diffamé d'auoir abusé de son corps en
 la fleur de sa ieunesse, & neantmoins il disoit iniure
 à Ciceron iusques à l'appeller impudique & pail-
 lard : Ciceron luy respondit, Tu n'entens pas que
 c'est à part en la maison à huys fermez, qu'il fault
 B tanfer de cela ses enfans. Metellus Nepos luy dit
 vn iour en debattant avec luy, Tu as fait mourir
 plus de gens par ton tesmoignage, que tu n'en as
 sauué par ton bien dire : le croy bien, respondit il,
 car i'ay plus de foy que d'eloquence. Ce mesme
 Metellus luy demandoit, qui estoit son pere, com-
 me luy reprochant qu'il estoit homme neuf : Ta
 mere, dit il, a fait ceste responce bien plus mal aisee
 à toy. car la mere de Metellus estoit tenue pour
 femme impudique, & Metellus luy mesme hom-
 me leger & eceruellé, & se laissant aller à tous ses
 C appetits. Il auoit fait mettre dessus la sepulture
 d'un Diodorus qui auoit esté son maistre en Reto-
 rique, la figure d'un corbeau de pierre : Voyla, dit
 Ciceron, la recôpense telle qu'il luy falloit : car il luy
 a enseigné à voler, & non pas à parler. Vatinius
 estoit vn mauuais homme & son aduersaire : il cou-
 rut vn bruit, qu'il estoit trespasé : depuis le bruit se
 trouua faulx : Perisse malemēt, dit Cicerō, celuy qui
 a si malemēt menty. Il y auoit quelqu'un que lon

souspeçonnoit estre natif d'Afrique, qui luy disoit, D
 » Je ne t'entend point: Je m'en esbahy, dit il, veu que
 » tu as les oreilles perrees. Caius Popilius vouloit
 estre tenu pour iuriconsulte, encore qu'il n'y sceust
 rien, & qu'il fust au demourant homme de lourd
 entendement. Il fut appellé en iugement pour
 porter tesmoignage de verité touchant quelque
 fait, duquel il respôdit qu'il ne sçauoit rien: & Ci-
 » ceron luy dit, Tu penses à l'aduenture que lon t'in-
 » terroge du droict. Hortésius l'orateur qui plai-
 doir la cause de Verres, auoit eu de luy pour son
 loyer vne image de Sphinx, qui estoit d'argët: Ci-
 » ceron luy aiant d'aduenture ietté quelque parole
 » ambiguë & obscure: Je ne sçay, dit il, que cela veult
 » dire quant à moy, car ie n'entends rien à soudre les
 » enigmes: Si est-ce, dit Ciceron, que tu as le Sphinx
 » en ta maison. Il rencontra quelque fois Voco-
 nius qui menoit quand & luy trois sienes filles, les-
 quelles estoient fort laides toutes trois: Il se prit à
 » dire tout bas à ceux qu'il auoit autour de luy, Cest
 » homme cy a semé ses enfans en despit du Soleil.
 Faustus fils de Sylla se trouua à la fin tant endebté,
 qu'il fut contrainct d'exposer ses meubles en vête, F
 & en fait mettre des affiches par les carrefours
 » pour le notifier: J'aime bien mieulx ces affiches &
 » proscriptions icy, dit Ciceron, que celles de son pere.
 Cæsar & Pompeius estans entrez en aperte guerre
 » l'un contre l'autre: Je sçay bien, dit-il, qui fuir, mais
 » ie ne sçay à qui. Il reprenoit grandement Pom-
 peius de ce qu'il auoit abandonné la ville de Rome,
 & qu'il auoit mieulx aimé imiter en cela le gou-
 uerne-

A uernement de Themistocles que celuy de Pericles, disant que les affaires de lors ressembloient plus au temps de Pericles qu'à celuy de Themistocles. Il se retira du costé de Pompeius premiere-
 ment, puis quand il y fut, il s'en repentit : & comme Pompeius luy demanda, là où il auoit laissé son gendre Pison : il luy respondit promptement, chez ton beau pere. Quelqu'un estoit passé du camp de César en celuy de Pôpeius, & disoit qu'il auoit eu si grande haste de venir, qu'il auoit laissé
 » son cheual : Tu as, luy dit-il, mieux prouueu à
 B sauuer la vie de ton cheual que la tiene. A quelque autre qui venoit rapporter au camp de Pompeius, que les amis de César estoient tous tristes :
 » Mais dis tu qu'ils veuillent mal à César ? Apres la bataille de Pharsale perdue, Pompeius s'en estât desia fuy, il y eut vn Nonius qui vint dire, qu'il ne se falloit point desesperer, & qu'ils auoient encore sept aigles, qui estoient les enseignes des legions :
 » Tes admonestemens, dit-il, seroient bons, si nous
 » auions la guerre contre les geays. Apres que César victorieux fut venu au dessus de tous ses affaires, & qu'il eut fait redresser avec honneur les statues de Pompeius, qui auoient esté abbatues, Ciceron dit, que César en releuant celles de Pôpeius
 » auoit asseuré les sienes. Il estimoit tant l'honneur de bien dire, & y prenoit si grand' peine, avec si grande ardeur d'affection, que ayant à plaider vne cause deuant les cent iuges seulement, estant escheut le iour de l'assignation, l'un de ses serfs, Eros, luy vint apporter la nouuelle que la cause estoit

remise au lendemain : il en fut si aise , qu'il luy en **D**
 donna liberté pour ceste bonne nouvelle. Caius
 César, lors qu'il fuyoit la fureur de Sylla, estant en-
 core fort ieune, il tomba entre les mains de quel-
 ques courfaires, qui luy demanderent de premiere
 arriuee quelque petite somme d'argent pour sa
 rençon: il se mocqua d'eux, qui ne scauoient pas
 quel personnage ils auoient pris, & de luy mesme
 leur promeit de leur en payer deux fois autant
 qu'ils luy en auoient demandé: & estant par eux
 gardé soigneusement pendant qu'il auoit enuoyé
 chercher & amasser argent pour leur bailler, il leur **E**
 enuoyoit faire commandement de se taire, & ne
 mener point de bruit pendant qu'il reposoit. Et
 s'exercitant à escrire tant en prose que en vers du-
 rant qu'il estoit entre leurs mains, il leur recitoit
 apres ce qu'il auoit composé: & si il voioit qu'ils ne
 le louassent pas assez à son gré, il les appelloit bar-
 bares & ignorans, & en riant les menassoit qu'il les
 feroit pendre, comme il feit bien tost apres: car
 estant sa rençon venue, luy deliuré de leurs mains
 assembla incontinent des vaisseaux & des hom-
 mes en la coste de l'Asie, leur courut sus, & les aiant **F**
 pris, les feit attacher en croix. Estant de retour à
 Rome, & aiant entrepris la brigue du souuerain
 Pontificat alencontre de Catulus qui lors estoit le
 premier homme de Rome: ainsi comme sa me-
 re le conuoyoit iusques à la porte de son logis, il
 „ luy dit, Ma mere vous aurez au iour d'huy vostre
 „ fils souuerain Pontife, ou banny de la ville de
 „ Rome. Il repudia sa femme Pompeia, pour le
 mau-

A mauuais bruit qu'elle eut d'auoir forfait à son
 honneur avec Clodius: & depuis Clodius aiant
 esté appellé en iustice pour ce fait, il fut adiour-
 né pour venir en iugement porter tesmoignage
 de verité: là ou estant enquis par serment il dit,
 qu'il n'auoit iamais rien sceu de mal de sa femme:
 & comme l'accusateur luy repliquast, Et pour-
 » quoy l'astu donc repudiee? Pour ce, dit-il, qu'il
 » faut que la femme de César soit non seulement
 » innocente & nette de crime, mais aussi de souf-
 » peçon de crime. En lisant les faicts d'Alexandre
 B le grand, les larmes luy vindrent aux yeux: &
 comme ses amis luy en demandassent la raison, il
 » respondit: A l'aage ou ie suis, Alexandre auoit ia
 » vaincu Darius, & ie n'ay encore rien fait. Ainsi
 comme il passoit par vne meschante petite ville
 assise dedans les Alpes, ses familiers en iouant de-
 mandoient entre eux si y auoit point en ceste
 ville là des factions & des brigues entre les habi-
 tans à qui y seroit le premier: il s'arresta tout
 court, & apres auoir vn peu pensé en luy-mesme:
 J'aimerois, dit-il, mieux estre icy le premier, que le
 C second à Rome. Les hautes & hazardeuses en-
 treprises, il disoit qu'il les falloit executer, & non
 pas en consulter: & de fait quand il passa la riuere
 » de Rubicon, qui separe la prouince de la Gaule de
 » l'Italie, pour aller cõtre Pompeius, il dit, Tout le dé-
 » soit ietté: comme qui diroit, A tout perdre il n'y a
 » qu'un coup perilleux. Et comme Pompeius s'en
 fut fuy de Rome vers la mer, & que Metellus qui
 auoit la superintendance du tresor public l'eust

fermé, & le voulust empescher d'y prēdre de l'ar-^D
gent, il le menassa de tuer : dequoy Metellus mon-
strant semblant d'estre esbahy de son audace, Non
²⁹ non, mon amy, dit-il, Je veux que tu sçaches qu'il
³⁰ m'est plus difficile de le dire, que de le faire. Et pour
ce que ses gens demouroiēt trop à passer la mer de
Brindes à Duras, se iettāt en vn petit vaisseau sans
que personne des siens en sçeust rien, il voulut tra-
uerfer la mer, mais comme le vaisseau fust prest à
estre submergé des vagues de la mer, il se descou-
³² urit au pilote & luy dit tout hault, Assēure toy &
³³ te fie en la fortune, car saches que tu mēes Cēsar.^E
Pour lors toutefois il fut diuert y & empesché de
passer, tant par la tourmente qui se rengregea de
plus en plus, comme aussi pource que les soudards
accoururent de toutes parts qui se plainquirent à
luy, & luy dirent qu'il leur faisoit tort d'attendre
d'autres forces, comme fil se deffioit d'eux. Il y
eut peu de temps apres vne grosse rencontre, en
laquelle Pompeius eut du meilleur, mais il ne sui-
uit pas la pointe, ains se retira en son camp : & lors
³⁴ Cēsar dit, La victoire estoit au iour d'huy à noz
³⁵ ennemis, mais leur chef ne l'a pas sceu cognoistre.^F
En la plaine de Pharsale, le iour de la bataille Pō-
peius aiant rengé son armee en ordonnance, com-
manda à ses gens qu'ils demourassent fermes en
leurs places, & attendissent de pied quoy les enne-
mis: en quoy Cēsar depuis dit qu'il auoit lourde-
ment failly, pource, dit-il, qu'il ostoit aux soudards
la vehemence & violence du choc que leur donne
l'essancement de la course, outre l'ardeur de cou-
rage

A rage que ceste roideur là leur apporte. Aiant des-
 fait de premiere arriuee Pharnaces le roy de Pont,
 „ il escriuit à ses amis, Le veins, Le vey, Le vainquy.
 Apres la desconfiture & fuitte de ceux qui estoiet
 avec Scipion en Afrique, comme Caton se fust
 „ desfait luy mesme, il dit: Le te porte enuie de ta
 „ mort Caton, pource que tu m'as enuié l'honneur
 „ de t'auoir sauué la vie. Quelques vns auoient
 pour suspects Antonius & Dolobella, & si luy di-
 soient qu'il sen deuoit prendre garde: Il leur res-
 pondit, qu'il n'auoit point de deffiance de ceux là
 „ qui estoient ainsi bien coulerez & en bon point:
 mais bien, dit il, de ces pasles & maigres là, en
 montrant Brutus & Cassius. Vn iour à sa table
 „ comme propos se fust emeu, quelle sorte de mort
 „ estoit la meilleure, il respondit soudain, celle dont
 „ on se deffie le moins. Cēsar, celuy qui fut le pre-
 mier surnommé Auguste, estant encore en son
 adolescence, redemanda à Antonius enuiron deux
 millions & quatre cents mille escus, qui apres que
 Iules Cēsar eut esté tué, auoient esté trāsportez de
 sa maison en celle d'Antonius, voulant payer aux
 „ Romains ce que Cēsar leur auoit laissē par testa-
 ment: car il auoit legué à chasque citoien Romain
 par teste, septante & quinze drachmes d'argēt, qui
 peuuent estre enuiron sept escus & demy. Anto-
 nius retenoit cest argent par deuers luy, & respon-
 doit au ieune Cēsar, qu'il se deportast de le rede-
 māder s'il estoit sage: quoy voiant l'autre, fait pro-
 clamer à vendre, & vendit de faict, tous ses biens
 patrimoniaux, dont il paya les legs aux Romains,

& en acquit la bien-veillance des citoiens à soy, ^D
 & la malveillance à Antonius. Rymetalces roy
 de la Thrace auoit laissé le party d'Antonius, &
 festoit tourné de son costé: mais il estoit impor-
 tun à la table, par ce qu'il ne faisoit iamais autre
 chose que parler de ce grand seruice qu'il luy
 auoit fait, & de luy reprocher son alliance, telle-
 ment qu'à vn soupper, César beuuant à quel-
 qu'un des autres Roys qui estoient à la table, dit
 „ tout haut, l'aime bien la trahison, mais ie ne louë
 „ point les traistres. Les Alexandrins apres la pri-
 se de leur ville, s'attendoient bien de souffrir toute ^E
 l'extremité de mal que lon peut faire au sac d'une
 ville prise par force: mais César montant sur la tri-
 bune aux harengues, & approchant de luy le phi-
 losophe Arius qui estoit son-familier, natif d'Ale-
 xandrie, il dit, qu'il pardonnoit à la ville, premiere-
 ment pour la grandeur & beauté d'icelle: seconde-
 mēt pour Alexandre le grand, qui en estoit fonda-
 teur: & tiercemēt pour l'amour d'Arius qui estoit
 son amy. Estant aduertý cōme vn sien serf nom-
 mé Eros qui faisoit ses affaires en Egypte, auoit
 achetté vne caille qui battoit toutes les autres, & ^F
 estoit inuincible, & l'auoit fait rostir & mangée, il
 l'euoya querir, & l'interroga pour sçauoir sil estoit
 vray: & comme il luy eust confessé que ouy, il le
 feit crucifier au mas de sa nauire. Il mit en la Sici-
 le Arius pour son agent & procureur au lieu d'un
 Theodorus: & y eut quelqu'un qui luy presentavnt
 „ petit billet, où il y auoit escrit: Le chauue Theodo-
 „ rus natif de Tarise, est vn larron, non pas? Que t'en
 sem-

A semble? Aiant leu le billet, il ne feit qu'escrire au
 „ deffoubs, Il le semble. Tous les ans au iour de sa
 natiuité il receuoit de Mecenas l'vn de ses plus fa-
 miliers vn present d'vne couppe. Athenodorus le
 philosophe estant fort vieil luy demanda congé
 de se pouuoir retirer en sa maison pour sa vieilles-
 se. Il luy donna: mais en luy disant adieu, Atheno-
 „ dorus luy dit: Quand tu te sentiras courroucé, Sire,
 „ ne dy ny ne fais rien, que premierement tu n'ayes
 „ recité les vingt & quatre lettres de l'Alphabet en
 „ toymesme. César aiant ouy cest aduertissement,
 „ le prit par la main & luy dit, l'ay encore affaire de
 ta presence: & le reteint encore tout vn an, en
 luy disant,

Sans peril est le loyer de silence.

Entendant comme Alexandre le grand en l'aage
 de trête deux ans, aiant fait la plus part de ses con-
 quêtes estoit en peine de sçauoir ce qu'il feroit
 plus desormais, il dit, qu'il s'esbahissoit si Alexan-
 dre estimoit qu'il y eut moins d'affaire à bien or-
 donner, regir & conseruer vn grand empire, quād
 il est tout acquis, qu'à le conquerir. Aiant faict
 „ la loy Iulia des adulteres, par laquelle il est por-
 té, comme lon doit faire le procès à ceux qui en
 sont attaincts, & comme lon doit punir ceux qui
 en sont conuaincus: il aduint qu'il se rua par im-
 patience de cholere sur vn ieune homme qui estoit
 accusé d'auoir commis adultere avec sa fille Iulia,
 & le battit à coups de poing. Le ieune homme se
 prit à cryer, Tu as fait la loy, César, qui ordonne
 comment il faut proceder contre les adulteres: il

en fut si marry, & se repētit tant de ce qu'il en auoit **D**
 faict, que de ce iour là il ne voulut point soupper.
 Enuoyant son nepueu Caius en Armenie, il feit
 prieres aux Dieux de l'accompagner de la bien-
 ueillance de tous enuers Pompeius, de la hardies-
 se d'Alexandre le grand, & de sa bonne fortune de
 luy. Il disoit qu'il laisseroit aux Romains en la suc-
 cession de l'empire, vn successeur qui n'auoit ia-
 mais consulté deux fois d'une chose, entendant de
 Tibere. Voulant appaiser quelques ieunes gentils
 hommes Romains qui estoient en autorité de ma-
 gistrat, & menoient vn grand bruit deuant luy: **E**
 quand il veit que pour les premiers admoneste-
 „ ments ils n'en faisoient rien, il leur dit à certes, Ef-
 „ coutez vous autres ieunes gens, vn vieillard que
 „ les vieillards ont bien escouté quand il estoit ieu-
 „ ne. Le peuple d'Athenes luy auoit faict quelque
 „ faute & desplaisir, il leur escriuit, Je croy que vous
 „ n'ignorez pas que ie suis mal content de vous, car
 „ autrement ie n'hyuerneroy pas en ceste petite Isle
 „ d'Ægine. mais iamais depuis il ne leur en fit ny ne
 leur en dit pis. L'un des accusateurs d'Eurycles,
 apres auoir bien au long deduit contre luy en tou- **F**
 te licence, sans aucun respect, tout ce qu'il voulut,
 finalement il se laissa aller iusques à dire vn tel
 „ propos: Et si ces choses là ne te semblent grâdes,
 „ Cēsar, commande luy qu'il me rende le septieme
 „ de Thucydide. Cēsar offensé de son audace & im-
 pudence, commanda que lon le menast en prison:
 mais depuis estant aduertuy qu'il estoit demouré
 seul des descendans du capitaine Brasidas, il le ren-
 uoya

A uoya querir, & apres luy auoir fait vn peu de remonstrances commanda que lon le laissast aller. Piso bastissoit fort magnifiquement sa maison depuis les fondements iusques à la couuerture: quoy
 » voiant Cēsar, luy dit: Tu me resiouis tout de te
 » veoir ainsi bastir, comme si Rome deuoit estre
 » d'eternelle duree.

LES DICTS NOTABLES DES LACEDÆMONIENS.

B



GASICLES Roy des Lacedemoniens estant de sa nature conuoiteux d'ouir & d'apprendre, il y eut quelqu'un de ses familiers qui luy dit: Je m'esbahis, Sire, veu que tu prens si grand plaisir à ouir bien dire, que tu n'approches

de toy le Retoricien Philophanes pour t'ēseigner.
 » Il respondit, C'est pource que ie veux estre disciple
 c de ceux dont ie suis né. A vn autre qui demandoit, Comment pourroit vn prince regner seurement, sans auoir autour de soy des gardes, pour la
 » seureté de sa personne: fil commāde à ses subiects,
 » comme vn bon pere fait à ses enfans.

AGESILAVS le grand, en vn festin où il auoit esté conuié, fut eleu par le fort maistre du conuiue, à qui il appartenoit de donner la loy, comment & combien chascun deuoit boire: & comme celuy

qui auoit la charge du vin luy eust demandé, com-
 „ bien il en verseroit à chascun, il respondit : S'il y a
 „ bonne prouision de vin, tant que chascun en vou-
 dra: s'il y en a peu, egaleement à tous. Il y eut vn
 malfaitteur qui estant prisonnier endura fort con-
 stamment deuant luy le tourment de la gehenne:
 „ O que voyla vn hōme, ce dit-il, extremement mes-
 „ chant, qui employe la patience & constance à de si
 „ malheureux & si meschants actes comme les siēs!
 On louoit en sa presence vn maistre de Rhetorique,
 de ce qu'il pouuoit par son eloquence amplifier &
 rendre grandes les choses petites : & au contraire, E
 „ appetisier les grādes: le ne trouuerois pas bon, dit-
 „ il, vn cordonnier, qui à vn petit pied chaufferoit
 „ vn grand soulier. Cōme quelqu'un en debattant
 „ contre luy, luy dist, Tu l'as ainsi promis : & luy re-
 „ petast par plusieurs fois ceste mesme pārole : Si la
 „ chose est iuste, dit-il, ie l'ay promise voiremēt: mais
 „ si elle n'est iuste, ie ne l'ay pas promise, mais ditte
 „ seulement. Et cōme l'autre luy repliquast, Voire-
 „ mais il faut que les Roys accōplissent tout ce qu'ils
 „ ont accordé, fust ce d'un signe de la teste seulemēt:
 „ Ils n'y sont pas plus tenus, respondit-il, que ceux F
 „ qui s'adressent à eux de demander & dire toutes
 „ choses raisonnables & iustes, & d'observer l'op-
 „ portunité & commodité des Roys. Quand il
 oyoit quelques vns qui en louoient ou blasmoiet
 d'autres, il disoit, qu'il ne falloit pas moins cognoi-
 stre les meurs & le naturel de ceux qui parloient,
 que de ceux de qui ils parloient. Comme il
 estoit encore ieune enfant, en vne feste publique
 où les

A où les ieunes gens fils & filles dansoient tous nuds, le superintendant de la danse luy dōna vn lieu qui n'estoit pas fort honorable, duquel neantmoins il se contenta, combien qu'il fust ia declaré Roy, &
„ dir: Voyla qui va bien, car ie monstreray que ce
„ ne sont pas les lieux qui honorent les hommes,
„ mais les hōmes les lieux. Le medecin luy auoit
ordonné en quelque siene maladie vne maniere
de medecine pour recouurer sa santé, qui n'estoit
point simple ne facile, mais fort laborieuse & dif-
„ ficile: Par les Dieux iūmeaux, dit-il, si ma destinee
B ne porte que ie viue, ie ne viuray pas quād ie pren-
„ drois toutes les medecines du monde. Estant
vn iour aupres de l'autel de Minerue surnommé
Chalceœcos, qui vaut autant à dire, comme au
temple de bronze, où il faisoit sacrifice d'un bœuf,
vn pou le mordit: il n'eut point de honte de le
prendre, & de le tuer publiquement deuant tout
„ le monde, en disant, Par les Dieux, iusques sur l'au-
„ tel mesme ie tuerois volontiers celuy qui en trahi-
„ son me viendroit assaillir. Vne autrefois il apper-
çeut, comme vn petit garson tiroit d'une fenestre
C vne souris qu'il auoit prise: la souris se retourna qui
le mordit à la main, tellement qu'elle luy fait las-
cher prise, & s'en fuit. Il le monstra aux assistans, &
„ leur dit, Veu qu'une si petite bestiole a bien le
„ cœur de se reuenger contre ceux qui luy font tort,
„ pensez ce qu'il est raisonnable que les hommes fa-
„ cent. Voulant entreprendre la guerre contre le
Roy de Perse pour la deliurance des peuples Grecs
habitās en l'Asie, il en alla demāder conseil à l'ora-

cle de Iupiter, qui est en la forest de Dodone : & D
comme l'oracle luy eust respondu ainsi qu'il de-
siroit, qu'il entreprist le voiage, il en communi-
qua la response aux Ephores, qui sont les contre-
rolleurs, lesquels luy ordonnerent qu'en passant il
en demandast aussi le conseil à celuy d'Apollo en
la ville de Delphes. Il s'en alla au temple où se ren-
doient les oracles, & fait ainsi sa demande, ô Apol-
lo, es tu pas de mesme aduis que ton pere? Et com-
me il luy eust respondu, que ouy : il fut eleu pour
conducteur de ceste guerre, & s'y en alla. Tissaphernes
lieutenant du roy de Perse en Asie, estonné de son arriuee, du commancemēt fait appoin-
tement avec luy, par lequel il promeit de luy lais-
ser toutes les villes & citez Grecques qui sont en
l'Asie frāches & libres pour se gouverner par leurs
loix : & ce pendant depescha deuers son maistre,
qui luy enuoya vne grosse armee, sur la fiance de
laquelle il luy enuoya denoncer la guerre, si bien
tost il ne se partoit de l'Asie. Agésilas estant bien
aise de ceste rouverte d'appointement, fait sem-
blant de vouloir entrer premierement en la Ca-
rie, parquoy Tissaphernes assembla là ses forces, & F
lors il tourna tout court en la Phrygie, là où aiant
pris plusieurs villes & grande quantité de tout bu-
tin, il dit, que violer la foy promise à ses amis est
impieté, mais abuser ses ennemis non seulement
est iuste, mais aussi plaisant & profitable : & se sen-
tant foible de gens de cheval, il s'en retourna en la
ville d'Ephese, là où il fait entendre aux riches qui
se voudroient exempter d'aller en personne à la
guerre,

A guerre, qu'ils eussent à fournir pour teste vn homme & vn cheual, tellement qu'en peu de iours il assembla bon nombre de cheuaux & d'hommes idoines à la guerre, au lieu de riches & de couards. En quoy il disoit qu'il ensuyuoit Agamemnon, qui pour vne bonne iument dispensa vn homme riche & couard de venir à la guerre. Quand on vendoit les prisonniers de guerre pour esclauues, les commissaires qui en faisoient la vente, par son ordonnance vendoyent à part leurs habillemens & leurs hardes, & leurs corps à part tous nuds, & se trouuoient plusieurs qui achettoient leurs vestemens, mais de leurs corps, il n'y auoit personne qui en voulust, pource qu'ils estoient blancs & mols, comme gens qui auoient esté nourris delicatement sous le couuert des maisons, & s'en moquoit on comme de corps inutiles, & qui n'estoiēt bons à rien. Agesilaus se tenant pres de là: Voyla doncques, dit-il, ce pourquoy vous combattez, monstrant les hardes: & ceux là contre qui, monstrant les hommes. Aiant desfaiēt en battaille Tissaphernes au pais de Lydie, & tué grand nombre de ses gens, il courut les prouinces du Roy, lequel luy enuoya de l'or & de l'argent en don, le priant de faire appointement. Agesilaus luy feit response, que quant à traiter appointement de paix, c'estoit à faire à la cité de Lacedemone: & au demourant qu'il prenoit plus de plaisir à enrichir ses gens, qu'à estre riche luy mesme: & que les Grecs reputoient honorable non receuoir des presents de leurs ennemis, mais leur oster des despoil-

les. Megabates le fils de Spithridates, qui estoit **D** beau de visage par excellence, s'approcha vne fois de luy pour l'embrasser & le baiser, pensant en estre fort aimé, mais Agesilaus destourna sa face, tellement que l'enfant desista de se presenter plus deuant luy, dont il fut marry, & demanda pourquoy c'estoit : ses amis luy respondirent que luy mesme en estoit cause, aiant eu peur de se laisser baiser à vn si bel enfant, & que là où il n'en auroit plus de crainte, l'enfant y retourneroit bien volontiers. Il demoura vn espace de temps à penser en
 „ luy mesme sans mot dire, puis leur respondit : Il **E**
 „ n'est point de besoing que vous luy en parliez, car
 „ quant à moy i'ay plus cher de demourer superieur
 „ & vainqueur en telles choses, que de prendre par
 „ force la plus forte & plus puissante ville de mes
 „ ennemis, pour ce qu'il me semble meilleur de gar-
 „ der sa liberté que de l'oster à autrui. Au demou-
 rant il estoit en toutes autres choses bien roide à
 obseruer de poinct en poinct tout ce que les loix
 cōmandēt : mais és affaires de ses amis il disoit, que
 garder estroittemēt la rigueur de iustice, estoit vne
 conuerture dont se couuroiēt ceux qui ne vouloiēt **F**
 point faire pour leurs amis. Auquel propos on treu-
 ue encore vne petite lettre missiue qu'il escriuait à
 Idrieus prince de la Carie pour la deliurance d'un
 „ sien amy : Si Nicias n'a point failly, deliure le : si a
 „ failly, deliure le pour l'amour de moy : mais com-
 „ mēt que ce soit, deliure le. Tel estoit dōcques Age-
 silaus en la plus part des affaires de ses amis : toute-
 fois il escheoit bien des occasions, qu'il regardoit
 plus

A plus tost à l'vtilité publique: comme il monstra vn
 iour à quelque partemēt qu'il fut cōtraint de faire
 à la haste & en trouble, tellemēt qu'il luy fut force
 d'abandonner vn qu'il aimoit estant malade: & cō-
 me l'autre l'appellast par son nom ainsi comme il
 partoist, & le suppliaist de ne le vouloir point aban-
 „ donner, Agesilaus en se retournant dit, O qu'il est
 „ malaisé d'aimer & estre sage tout ensemble! Au re-
 ste quant à son viure & au traitemēt de son corps,
 il ne vouloit riē auoir d'auātage ne de meilleur que
 ceux qui estoient en sa cōpagnie. Iamais il ne man-
B gea iusques à se saouler, ny ne beut iusques à s'en-
 yurer, le dormir ne luy cōmanda iamais, n'en vsant
 sinon autant que luy permettoient ses affaires, &
 estoit tellemēt disposé contre le chaud & contre le
 froid, que pour toutes saisons de l'annee il n'auoit
 iamais qu'une sorte d'habillement, aiant sa tente
 tousiours au milieu de ses gēs, il n'auoit liēt qui fust
 meilleur que piece des autres: & souloit dire, qu'il
 falloit que celuy qui auoit la charge de cōmander
 surmōtast les priuez qui estoient sous sa charge, non
 en mignardise ny delicateſſe, mais en tolerance de
C labour & en force de cœur. Cōme doncques quel-
 qu'un demandast en sa presence, Qu'est-ce que les
 loix de Lycurgus ont apporté de bon à la ville de
 „ Sparte? Il respōdit, Ne faire compte des voluptez:
 & à vn autre qui s'esmerueilloit de veoir la simpli-
 cité grāde, tant du viure que du vestir de luy & des
 „ autres Lacedemoniēs: Le fruit que nous recueillōs,
 „ dit-il, de ceste si estroitte maniere de viure, est la li-
 „ berté. Vn autre l'enhortoit de relascher vn petit de

ceste roide & austere maniere de viure, quand ce D
 ne seroit, dit-il, que pour l'incertitude de la fortune,
 & qu'il pourroit venir vne occasion de temps
 „ qu'il le faudroit faire ainsi: Voire-mais ie me vais
 „ accoustumât, dit-il, à cela, qu'en nulle mutation de
 „ fortune ie ne cherche mutatiō de vie. de faict quād
 il fut deuenü vieil, il ne laissa pour l'aage la durescé
 de sa maniere de viure: & pourtant respondit il à
 vn qui luy demādoit, pourquoy il ne portoit point
 de faye en vne si grande rigueur d'hyuer, en l'aage
 „ où il estoit: A fin que les ieunes apprennent à en
 „ faire autant, aians pour exemple les plus vieux de E
 „ leur país, & ceux qui leur commandent. Auquel
 propos on treuve que quand il passa avec son ar-
 mee à trauers le país des Thasiens, ils luy enuoye-
 rent des refreschissements de farines, d'oysons &
 autres volailles, de cōfitures, de pastisserie, & de tou-
 tes autres sortes de viandes exquisés, & de vins de-
 licieux: il n'en prit que les farines seulement, & cō-
 manda à ceux qui les auoient apportez, qu'ils les
 reportassent, comme choses dont ils n'auoient que
 faire: mais à la fin comme ils le suppliassent & luy
 feissent toute l'instance du mōde de les prendre, il F
 leur cōmanda qu'ils les departissent doncques en-
 tre les Ilots qui estoient leurs esclaués: & comme
 ils luy en demandassent la cause, il leur dit, que
 c'estoit pour ce qu'il n'estoit point conuenable à
 ceux qui faisoient profession de force virile & de
 prouesse, de receuoir ces friandises-la: & que, ce
 „ qui amorse & alleche les hōmes de seruile nature,
 „ ne doit point agreer à ceux qui sont de courage
 franc

A franc & libre. D'auantage les Thasiens aians receu beaucoup de bienfaicts, & pour ce se sentans grandemēt tenus à luy, luy dedierent des temples, & luy decernerent des honneurs diuins, comme s'il eust esté vn Dieu, & luy enuoyerent des ambassadeurs pour luy faire entēdre leur resolution. Aiant leu leurs lettres, & entendu les honneurs qu'ils luy faisoient, il leur demanda si leur païs & leur communaulté pouuoit deifier les hommes: ils luy respondirent, que ouy. Or fus doncques, dit il, com-
mancez à vous mesmes, & si vous vous pouuez
B faire Dieux vous mesmes, alors ie vous croiray
que vous me le puissiez faire aussi. Et comme les
peuples de l'Asie, qui sont d'extraction Grecque, eussent ordonné, qu'en toutes leurs principales citrez ils luy feroient eriger des statues, il leur rescri-
uit, Ie ne veulx que lon face de moy aucune statue
ny image, ne painte, ne moulee, ny taillee. Et voyāt
en Asie en la maison de son hoste, le planché fait
de bois quarré, il demāda au maistre de la maison, si les arbres naissoient aussi quarez en leur païs: l'autre luy respōdit que non, mais qu'ils croissoient
C ronds. Et comment, dit-il, s'ils naissoient quarez,
les feriez vous ronds? On luy demanda vne fois
iusques où s'estendoient les confins de Lacedemone: en branlant vne iaueline qu'il tenoit en la main
il respondit, Iusques là où cecy peult arriuer. Vn
autre luy demandant, pourquoy la ville de Sparte
n'auoit point de murailles: en monstrant de ses ci-
toiens armez il respondit, Voyla les murailles des
Lacedemoniens. Et à vn autre qui en demandoit

„ autant, il respondit, qu'il ne fault pas que les villes D
 „ soient fortifiees de pierres, ny de bois, mais de la
 „ prouësse & vaillance des habitans: & admonestoit
 ordinairement ses familiers de ne chercher pas à
 fenrichir de deniers, mais de vaillance & de vertu.
 & quand il vouloit que quelque ouurage fust bien
 tost paracheué par les soudards, il commâceoit luy
 mesme le premier à mettre la main à l'œuure en la
 veuë de tout le monde. Il se vantoit de trauailler
 autant qu'homme qui fust en sa compagnie, & se
 glorifioit plus de ce, qu'il se sçauoit commander à
 soy-mesme, que d'estre Roy. A vn autre qui s'es- E
 merueilloit de veoir vn Lacedemonien boitteux
 „ aller à la guerre, & qui disoit, Pour le moins ie de-
 „ manderois vn cheual: Ne sçais tu pas, luy respōdit
 „ il, que lon n'a point affaire de fuyards à la guerre,
 „ mais de gents qui tiennent ferme: On luy deman-
 da comment il auoit acquis si grande reputation,
 „ En mesprisant la mort, dit il. Enquis aussi, pour-
 quoy les Spartiates cōbattoient au son des flustes:
 „ à fin, dit il, que marchants en bataille à la cadence
 „ & mesure on cognoisse ceulx qui sont vaillans d'a-
 „ uec ceux qui sont couards. Quelqu'un reputoit F
 heureux le Roy de Perse, de ce qu'il estoit venu
 „ fort ieune à vn si puissant estat: Voire-mais, dit il,
 „ Priam en tel aage ne fut pas mal-heureux. Aiant
 ia conquis la plus grāde partie de l'Asie, il delibera
 d'aller faire la guerre à la personne du Roy mesme,
 pour luy rompre son long repos, & l'empescher
 ailleurs qu'à penser de corrompre par argent les
 orateurs & gouuerneurs des citez de la Grece: mais
 comme

A comme il estoit en ceste deliberation, il fut rappellé par les Ephores, à cause d'une grosse guerre des peuples Grecs, dont la ville de Sparte estoit environnée, par le moien des deniers que le Roy de Perse y auoit enuoyez : à l'occasion dequoy il fut contrainct de partir de l'Asie, disant, que vn bon prince se doit laisser commander par les loix : & en partant laissa vn tresgrand regret de son partement aux Grecs habitants pardela. Et pour ce qu'en la monnoye Persienne estoit empreinte l'image d'un archer, il disoit, que le Roy de Perse le chassoit de l'Asie avec trente mille archers: Car autant de Dariques d'or auoient esté portez par vn Timocrates à Thebes & à Athenes, qui auoient esté distribuez aux harengueurs & gouuerneurs de ces deux citez par qui elles furent suscitées à commencer la guerre à la ville de Sparte. Si rescriuit aux Ephores vne missiue de telle teneur : Agésilas aux Ephores, Salut.

„ Nous auons conquis la plus grand' part de l'Asie, & en auons dechassé les Barbares, aussi auons nous fait plusieurs armes au pais d'Ionie: mais puis que vous me commandez de me trouuer par dela le iour nommé, ie vous aduise que ie suiuray de pres ceste lettre, ou parauanture la preuiendray : car l'autorité que j'ay de commander, ie ne l'ay pas pour moy, mais pour mon pais, & pour ses alliez. Et lors vn Magistrat commande à la verité selon droit & iustice, quand il obeit aux loix de son pais, & aux Ephores, ou autres tels magistrats qui sont en son pais.

Aiant trauersé le destroit de l'Hellespont, il en-

tra dedans le pais de la Thrace, là où il ne deman-
da iamais passage à aucun prince ne ville barbare,
ains enuoyant deuers eux leur faisoit demander,
fils vouloient qu'il passast comme par pais d'amis,
ou cōme par pais d'ennemis : tous les autres prin-
ces & peuples le receurent amiablement, & l'ac-
compagnerent par honneur en passant par leurs
terres : mais ceux que lon appelle les Trochaliens,
ausquels, à ce que lon dit, Xerxes mesme dōna des
presens pour son passage, luy demanderent pour
loyer de le laisser passer cent talents d'argent, qui
font soixante mille escus, & autant de femmes. F
Agésilas en se mocquant d'eulx, respondit à ceulx
" qui luy portoient ceste parole, Que ne sont ils dōc
" venus quāt & vous pour les recevoir? & tira oultre:
mais les trouuant en son chemin il leur donna la
bataille, & les desfeit avec grāde occision de leurs
gents, puis passa oultre: autant en manda il au Roy
de Macedoine, lequel feit response qu'il s'en con-
" seilleroit: Qu'il s'en conseille donc, dit-il, tant qu'il
" voudra : mais ce pendant marchons. Le Roy s'es-
merueillant de sa hardiessē, & la redoubtant, luy
māda, qu'il passast amiablement. Les Thessaliens F
estoyent lors alliez de leurs ennemis, parquoy en
passant il pilla leur pais, & enuoya en la ville de
Larissa deux de ses amis, Xenocles & Scytha, pour
veoir s'ils la pourroient prattiquer & attirer à faire
ligue avec les Lacedemoniēs, mais ceulx de Larisse
les arresterent & les reteindrent prisonniers : dont
les autres estans indignez, vouloient à toute force
qu'il y menast son camp tout de ce pas, & allast
mettre

A mettre le siege deuant, mais il leur respondit qu'il aimeroit mieulx faillir à gaigner toute la Theſſalie entierement, que de perdre l'un de ces deux hommes là ſeulement: ainſi les retira il par appointement. Entendant qu'il y auoit eu vne bataille donnee aupres de Corinthe, en laquelle il eſtoit demouré bien peu des Lacedæmoniens, mais des Atheniens, des Argiens, des Corinthiës, & de leurs alliez vn bien grãd nombre: on ne le veit oncques faire bonne chere, ny ſ'eleuer de ioye pour la nouuelle de ceſte victoire, ains ſouſpirant du profond
B du cœur, dit, O mal-heureuſe Grece, qui de ſes
» propres mains a deſfaict tant de ſes gens, qu'ils ſeroient ſuffiſans pour deſfaire en vn iour de bataille
» le tous les Barbares enſemble. Mais comme les Pharfaliens le veinſſent harceler, & endommager la cueuë de ſon armee, il print cinq cents cheuaux, avec leſquels il les alla charger ſi viſuemēt, qu'il les rompit entieremēt: & pour ceſte victoire feit drefſer vn trophée au deſſous du mont qui ſ'appelle Narthecium, & luy fut ceſte victoire autāt ou plus agreable que nulle autre, pour ce qu'avec ſi petite
C troupe de gens de cheual que luy meſme auoit mis ſus, & qu'il auoit drefſez, il ſe trouua auoir deſfaict en bataille ceulx qui de tout temps ſe van-toient eſtre des meilleurs hōmes d'armes du monde: là le vint trouuer Diphridas l'un des Ephores, eſtāt enuoyé expres de Sparte pour luy commander qu'il euſt à entrer incontinent en armes dedās le païs de Bœoce: & luy, combien qu'il euſt delibéré d'y entrer vne autre fois avec beaucoup plus

grosse puissance, toutefois ne voulant en aucune chose desobeir aux Seigneurs du conseil de Sparte, il enuoya querir deux enseignes de ceux qui estoient au camp pres de Corinthe, & avec cela entrant dedans le pais de la Bœoece, il donna la bataille aux Thebains, Atheniès, Argiens, Corinthiens, les deux Locriens pres la ville de Coronee, & la gaigna, qui fut la plus sanglante & plus grande bataille, ainsi que tesmoigne Xenophon, qui fut donnee de son temps: mais il est vray qu'il y fut fort blecé en plusieurs endroits de sa personne: & depuis estant de retour en sa maison, apres tant de victoires, tant de grandeurs & de prosperitez, il ne changea rien qui soit du traitement de sa personne, ny de toute sa maniere de viure. Voiant qu'aucuns de ses citoyens se glorifioient & pensoient estre quelque chose de plus que les autres, pour autāt qu'ils nourrissoient & entretenoient des cheuaux pour courir aux ieux de pris, il persuada à sa sœur qui se nommoit Cynisca, de monter sur son chariot, & s'en aller à la feste des ieux Olympiques, pour essayer de gaigner le pris de la course avec les cheuaux, voulant par là faire cognoistre aux Grecs, que tout cela n'estoit acte de vertu quelconque, mais seulement de richesse & de despense. Il auoit autour de luy Xenophon le philosophe qu'il aimoit & estimoit beaucoup, il le pria d'enuoyer querir ses enfans pour les faire nourrir en Lacedemone, & y apprendre la plus belle discipline du monde, de scauoir obeir & commander. Vne autre fois luy estant demandé, pourquoy il estimoit les Lacedemoniens

A moniens les plus heureuses gents du monde : c'est,
dit il, pour ce qu'ils font profession & exercice, plus
que tous les hommes du monde, d'apprendre à bien
commander, & à bien obeir. Apres la mort de
Lyfander, il trouua en la ville de Sparte de grandes
ligues & factions que Lyfander incontinent qu'il
fut retourné de l'Asie, auoit dressées & suscitees
contre luy: si fut en propos & en volonté de mon-
strer & faire veoir à ceulx de Sparte quel citoien il
auoit esté: aiant leu vne harengue, qui fut trouuée
apres sa mort entre ses papiers, laquelle Creon Ha-
licarnassien auoit composée, & luy la deuoit lire
deuant le peuple en assemblee de ville, pour intro-
duire de grandes nouuelletez, & renuerser tout
l'estat & le gouuernement de Sparte. Il la voulut
produire en public, mais apres que l'un des Sena-
teurs l'eut leuë, & que redoutât la force des raisons
& vehemence d'eloquēce qui estoit en icelle, il luy
eust conseillé de ne deterrer point Lyfander, ains
plus tost enterrer sa harengue quand & luy, il creut
son cōseil & ne bougea rien: & quant à ceux qui par
ceste menēce luy estoient aduersaires, il ne les harassa
C point ouuertemēt, mais il trouua moien d'en faire
enuoyer les vns Capitaines en quelques voyages,
& de faire commettre quelques offices publiques
aux autres, esquelles charges ils se portoiēt tellemēt
qu'ils estoient descouverts pour larrōs & meschāts:
& depuis en estans appelez en iustice, au contrai-
re il leur aidoit & les secouroit en leurs affaires, tel-
lemēt qu'il se les rédoit bienueuillās & amis, & n'y
en demoura à la fin pas vn qui luy fust aduersaire.

Quelqu'un le pria d'escrire en sa faueur à ses hostes
 & amis qu'il auoit en Asie, qu'ils luy gardassent
 „ son bon droict: Mes amis, dit-il, font ce qui est de
 „ droict, encore que ie ne leur escriue point. Vn au-
 tre luy monstroit les murailles de sa ville fortes à
 merueilles & magnifiquement basties, en luy de-
 „ mādant si elles luy sembloient pas bien belles: ouy
 „ certes pour y loger des femmes, mais non pas des
 „ hommes. Vn Megarien luy magnifioit & hault-
 „ louoit sa ville: auquel il respondit, Ieune homme
 „ mon amy, tes propos auroient besoing d'une gran-
 „ de puissance. Ceux que les autres homes auoient
 en admiration, il ne monstroit pas de les cognoi-
 stre seulement: comme quelquefois vn Callipides
 excellent ioueur de tragedies, qui auoit fort grand
 nom & grāde reputation parmy les Grecs, de ma-
 niere que toutes sortes de gens en faisoient cas;
 l'ayant rencontré en son chemin, il le salua premie-
 rement, puis s'ingera presumptueusement de se
 promener avec d'autres quand & luy, se presentant
 & se monstrant à luy, en esperāce que le Roy com-
 manceroit le premier à luy vser de quelque careffe.
 A la fin voyant qu'il ne commençoit point, luy
 mesme l'auancea de luy demāder: Comment, Sire
 Roy, ne me cognois tu point, & n'as tu point ouy
 dire qui ie suis? Agesilaus le regardant au visage:
 „ Et n'es tu pas, dit-il, le farceur Dercillidas? On le
 conuia vn iour à ouir vn qui contrefaisoit naïfue-
 ment bien le rossignol: il n'en voulut rien faire, di-
 „ sant, l'ay ouy le rossignol luy mesme par plusieurs
 „ fois. Le medecin Menecrates auoit esté heureux
 en

A en la cure de quelques maladies desesperees, au
moien dequoy quelques vns l'auoient surnommé
Iupiter:& luy par trop arrogamment vsurpoit ce
surnom là, de sorte qu'il eut bien la presumption
de mettre en la superscription d'une lettre qu'il luy
„ escriuoit, Menecrates le Iupiter au Roy Agefilaus,
„ Salut. Agefilaus luy rescriuit, Agefilaus à Mene-
„ crates, Santé. Et comme Pharnabazus & Co-
non avec l'armee nauale du Roy de Perse estans
sans contredit, seigneurs de la marine, pillassent
toutes les costes de la Laconie, & d'auantage
B les murailles de la ville d'Athenes se rebastissent
de l'argent que Pharnabazus fournissoit: les sei-
gneurs du conseil de Lacedemone furent d'aduis
qu'il valoit mieulx faire paix avec le Roy de Perse,
& pour cest effect enuoyerent Antalcidas deuers
Tiribazus, abandonnans laschement & mescham-
ment à ce Roy barbare les Grecs habitans en l'A-
sie, pour la liberté desquels Agefilaus luy auoit
parauant fait la guerre: ainsi n'eut point Agefilaus
de part à cesté honte & infamie, pource que Antal-
cidas qui estoit son ennemy mortel, chercha par
C tous moiens de faire ceste paix à cause qu'il voioit
que la guerre augmentoit tousiours l'autorité,
„ l'honneur & le credit d'Agefilaus: lequel toutefois
„ respondit lors à vn qui luy reprochoit que les La-
„ cedemoniens Medisoient, c'est à dire, fauorisoient
„ aux Medois: non font, mais ce sont les Medois qui
„ Laconisent. On luy demanda quelquefois, laquel-
le des deux vertus estoit la meilleure à son iuge-
ment, la force, ou la iustice: Il respōdit, que la force

ne sert de rien là où regne la iustice : & que si nous
estions tous iustes & gens de bien, il ne seroit point
besoing de la force. Les peuples Grecs habitans
en Asie auoient accoustumé d'appeller le Roy de
" Perse, le grād Roy: Pourquoy, dit il, est il plus grand
" que moy, si il n'est plus temperāt & plus iuste? Aussi
disoit il, que les habitans de l'Asie estoient bons es-
claues, & mauuais hommes libres. Estant enquis,
Comment vn homme se pourroit bien faire valoir
" & acquerir tresgrande reputation, il respondit : En
" disant tout bien, & faisant encore miculx. Il sou-
loit dire, que le Capitaine doit auoir hardiesse alē-
contre des ennemis & amitié enuers ses gēs. Quel-
que autre demandoit, Que doiuent apprendre les
" enfans en leur ieunesse? Il respondit, Ce qu'ils doi-
" uent faire quand ils sont deuenus grands. Il estoit
iuge en vne cause où le demandeur auoit tresbien
dit, & le defendeur tres mal, ne faisant que repeter
" à tous propos, Sire Agésilas, il fault qu'un Roy se-
" coure les loix. Agésilas luy respondit, si quel-
" qu'un t'auoit abbatu ta maison, ou que lon t'eust
" osté ta robbe, aurois tu recours au maçon pour te
" faire raccoustrer ta maison, ou au cousturier pour
" te faire rendre ta robbe? Le Roy de Perse luy escri-
uit vne lettre missiue qu'apporta le gētilhomme
Persiē qui vint avec Callias pour faire iurer la paix,
& estoit le subiect de ceste lettre, Que le Roy vou-
loit particulieremēt auoir amitié & fraternité avec
" luy. Il ne la voulut point receuoir, & luy dit: Tu di-
" ras au Roy ton maistre de ma part, qu'il n'est point
" de besoing qu'il m'escriue des lettres particulieres,
pource

A pource que ſil eſtoit amy en general de Lacede-
» mone, & monſtroit aimer & deſirer le bien de la
» Grece, que luy auſſi reciproquemēt luy ſeroit amy
» de tout ſon pouuoir : mais ſil ſe trouuoit qu'il vſaſt
» de male foy, & attētaſt aucune choſe au preiudice
» de la Grece, qu'il luy pourroit eſcrire toutes les let-
» tres du monde, que iamais il ne luy ſeroit amy. Il
aimoit fort tendrement ſes petits enfans, de ſorte
qu'il iouoit avec eulx parmy la maiſon, ſe mettant
vne canne entre les iambes comme vn cheual : &
comme quelqu'un de ſes amis l'eult veu & trouué
B en ceſt eſtat, il le pria de n'en dire iamais rien à per-
ſonne iuſques à ce que luy meſme euſt des enfans
auſſi. Mais en faiſant continuellement la guerre
aux Thebains, il y fut fort griefuemēt blecé en vne
» bataille. Ce que voiant Antalcidas, luy dit: Cer-
» tainemēt tu reçois bien des Thebains le ſalaire que
» tu merites, pour leur auoir enſeigné malgré eulx à
» combattre, ce qu'ils ne ſçauoient ny ne vouloient
» apprendre à faire. Car à la verité lon dit, que les
Thebains deuindrent alors plus belliqueux que ia-
mais ils n'auoient eſté au parauant, ſ'eſtans addreſ-
C ſez & exercez aux armes par les continuelles in-
uaſions des Lacedémoniens : auſſi eſtoit ce la rai-
ſon pour laquelle l'ancien Lycurgus en ſes loix que
lon appelloit Retres leur defendoit de faire ſouuēt
la guerre cōtre vne meſme natiō, de peur qu'ils ne
la cōtraigniffent en ce faiſant d'appredre à la faire.
Si en eſtoit Ageſilaus haï des alliez meſmes de La-
cedémone, qui ſe plaignoiēt qu'il falloir qu'ils euſ-
ſent ordinairement le hárnois ſur le dos, & que eux

qui estoient en bien plus grand nombre suiuiſſent
les Lacedemoniens qui n'estoient qu'une poignée
de gens au pris d'eux : parquoy Ageſilaus les vou-
lant conuaincre & leur monſtrer quel nombre ils
estoient, il commanda que tous les allies & confe-
derez ſaſſeſſent enſemble peſle meſle, & les Lace-
demoniens d'un autre coſté à part, puis ſeit crier
par un herault, que les potiers de terre ſe leuaſſent
les premiers: quand ceulx là furent leuez il ſeit pro-
clamer les ſerruriers, & puis apres les charpentiers,
& puis les maçons, & ainſi de tous les autres meſ-
tiers les uns apres les autres : parquoy tous leurs al-
lies & cōfederez preſque ſe leuerent, mais des La-
cedemoniens nul ne ſe leua, pource qu'il leur estoit
defendu d'exercer ny d'apprendre aucun meſtier
» mechanic: ainſi Ageſilaus ſe prenāt à rire, Voyez
» vous, dit il, mes amis, cōbien plus de ſoudards nous
» enuoions à la guerre que vous ne faites? Or à la
desfaite de Leuctres, il y eut pluſieurs des Lace-
» demoniens qui fuyrent, lesquelz tous par les loix
» & ordonnances du pais estoient pour toute leur
» vie infames, toutefois les Ephores voians que la
» ville par ce moien ſ'en alloit deſerte & depeuplee
» de citoiens, en temps meſmement qu'elle auoit
» plus grand beſoing de gens de guerre que iamais,
vouloient trouuer moien de les abſoudre de ceſte
infamie, & neantmoins conſeruer l'autorité de
leurs loix. Parquoy pour ce faire, ils eleurent A-
geſilaus pour leur legiſlateur, lequel ſe tirant en
auant deuant tout le peuple, dit, Seigneurs La-
cedemoniens, ie ne voudrois aucunement eſtre
auteur

A auteur ny inuenteur de nouvelles loix, & à celles que vous auez ie ne voudrois ny adiouster, ny oster, ny changer aucune chose: parquoy il me semble raisonnable, que d'icy en auant elles aient leur force, vigueur & autorité accoustumee: au demourant il ne laissa pas avec ce peu de gens de faict, qui estoient demourez en la ville, de repouls. Epaminondas, qui l'alla assaillir avec vn si grand flot & si violente tempeste des Thebains & de leurs confederez, enorgueillis de la victoire qu'ils auoient obtenue en la plaine de Leuctres, & les fait retourner sans rien faire: mais en la bataille de Mantinee, il admonesta & conseilla les Lacedemoniens de ne se point soucier des autres Thebains, ains de combattre tous & adresser tout leur effort contre Epaminondas seul, disant qu'il n'y auoit que les sages & prudens qui fussent vaillans & seuls cause de la victoire, & pourtant que s'ils pouuoient abattre celuy la, que facilement ils viendroient au dessus des autres, pour ce que ce n'estoient que fols estourdis & gens de nulle valeur: comme veritablement il aduint: car estant la victoire ia toute certaine du costé d'Epaminondas, & les Lacedemoniens en rouverte: ainsi comme il se retourna pour rappeler les siens, il y eut vn Lacedemonien qui en fuyant luy donna vn coup mortel, duquel estant tombé par terre, les Lacedemoniens qui estoient avec Agesilaus se rallierent, tournerent visage & remeirent la victoire en balance, par ce que les Thebains diminuerent beaucoup de leur courage, & les Lacedemoniens l'augmenterent. Au

reste la ville de Sparte aiant necessité d'argét pour
 la guerre, & estant cōtraincte d'entretenir des sou-
 dards estrangers à sa souldie : Agesilaus s'en alla en
 Ægypte appointé du Roy des Ægyptiens qui l'a-
 uoit enuoyé querir, mais pource qu'il estoit ainsi
 petitement & simplement vestu, il en vint en mes-
 pris des habitans du païs, car ils s'attendoient de
 voir le Roy de Sparte accoustre de sa personne &
 accompagné magnifiquemēt & superbemēt com-
 me vn Roy de Perse, tāt ils auoient mauuaise opi-
 nion des Roys : mais Agesilaus en peu de tēps leur
 donna bien à cognoistre, que la maiesté & magni-
 ficence des Roys se doit acquerir par bons sens &
 par vaillance. Et voiant que ceux qui deuoient fai-
 re teste & combattre avec luy s'effroyoient pour
 l'eminent peril, à cause du grand nombre des en-
 nemis qui estoient deux cents mille combattans, &
 le peu de gēs qu'ils auoient de leur costé, il delibera
 deuant que de venir au combat de leur remettre le
 cœur par le moien d'vne ruze, dōt il ne voulut rien
 communiquer à personne, c'est que dedās sa main
 gauche il escriuit à l'enuers ce mot, Victoire : &
 prenant le foye de la beste immolee des mains du
 deuin, le meit dedans sa main fenestre, qui estoit
 eseritte par dedans, & le tenant longuement, il fai-
 soit semblāt de penser bien profondement à quel-
 que doute, & monstroit apparence d'estre en per-
 plexité de pensement, iusques à ce que les chara-
 cteres & figures des lettres eurent loisir de se pren-
 dre & imprimer à la superficie du foye : & lors il le
 monstra à ceux qui deuoient combattre quand &
 luy,

A luy, leur disant & donnant à entendre, que par ces lettres les Dieux leur promettoient la victoire : & eulx cuidans auoir en cela vn certain signe & presage de victoire, prirent hardiment le hazard de la bataille. Et cōme les ennemis teinsent son camp assiegé tout à l'enuiron, tant ils estoient en grand nombre, & encore feissent vne trenchee alentour, le Roy Nectanebos, au secours duquel il estoit là venu, le prioit & sollicitoit de faire vne saillie sur eux, & de les combattre auant que la trenchee fust paracheuee : Il respondit qu'il n'empescheroit iamais le desseing des ennemis qui tendoient à leur donner moien d'estre egaulx pour combattre tant contre tant, & attēdit iusques à ce qu'il ne s'en falloit plus gueres que les deux bouts de la trenchee ne vinssent à s'entrerencōtrer, puis dressant sa bataille en cest interualle là, & par ce moien combattant de front pareil, tant contre tant, il meit les ennemis en rouverte, & avec ce peu de gēs qu'il auoit, en feit vn bien grand meurtre, & du butin qu'il y gaigna, enuoya bonne somme d'argent à Sparte. Mais estant pres à s'embarquer pour partir d'Ægypte & s'en retourner au pais, il mourut, & en mourant defendit tres-expressment à ceulx qui estoient autour de luy, que lō ne feist figure ny image quelconque moulee ne peinte de son corps : pource, dit-il, que si i'ay faiēt aucun acte de vertu en ma vie, cela sera le monument qui perpetuera ma memoire : si non, toutes les images & statues du monde ne le sçauroient faire, attendu que ce ne sont qu'ouvrages d'hommes mechaniques de nulle valeur.

Agesipolis fils de Cleombrotus, cōme quelqu'un
 contaſt en ſa preſence, que Philippus Roy de Ma-
 cedoine auoit en peu de iours demoly la ville d'O-
 linthe: Par les Dieux, dit il, en pluſieurs fois autant
 de tēps il n'en baſтира pas vne pareille. Vn autre
 luy diſoit cōme par maniere de reproche, que luy,
 tout Roy qu'il eſtoit, & d'autres de ſes citoiens en
 aage d'hōmes faiçts, auoient eſté baillez pour oſta-
 ges, non pas leurs enfans ny leurs femmes: ainſi fal-
 loit il faire par raiſon, dit il, car il eſt iuſte que nous
 meſmes, & nō autres, portiōs la peine de noz faul-
 tes. Et comme il vouluſt faire venir des chiens de
 ſa maiſon, quelqu'un luy dit, voire-mais on ne les
 laiſſera pas ſortir hors du pais: auſſi ne faiſoit on
 pas les hommes par cy deuant, dit il, & maintenant
 on les laiſſe bien ſortir. Agesipolis fils de Pauſa-
 nias cōme les Atheniens luy diſſent qu'ils eſtoient
 contēs de ſe rapporter au iugemēt de ceulx de Me-
 gare, touchāt quelques differēts qu'ils auoient en-
 ſemble, & quelques plaintes qu'ils faiſoient les vns
 des autres, leur dit, C'eſt vne hōte, Seigneurs Athe-
 niens, que ceulx qui ſont les chefs & ducs de tous
 les autres Grecs entendent moins ce qui eſt iuſte
 que ne ſont les Megariens. Agis le fils d'Archida-
 mus, cōme les Ephores luy diſſent, Pren les ieunes
 hōmes de ceſte ville auec toy, & t'en va au pais de
 ceſtuicy qui te cōduira luy meſme iuſques dedās le
 chaſteau de ſa ville. Et comment eſt il raiſonnable,
 Seigneurs Ephores, de cōmettre le ſalut & la vie de
 tant de vaillāts ieunes hommes, à vn qui trahit ſon
 pais? On luy demanda quelle ſcience on exerçoit
 prin-

A principalemēt en la ville de Sparte:à ſçauoir,dit-il,
„ obeir & cōmander. Auffi diſoit-il, que les Lacedæ-
„ moniens ne demādoient iamais cōbien eſtoient les
„ ennemis,mais où ils eſtoient. On luy defendit de
„ combattre les ennemis à Mantinee, pource qu'ils
„ eſtoiēt en bien plus grand nôbre: Il eſt force, dit-il,
„ que qui veut commander à beaucoup de gens, en
„ cōbatte auffi beaucoup. A vn autre qui demādoit
„ cōbien eſtoient les Lacedæmoniēs:ils ſont,dit il,au-
„ tant qu'il en faut pour chaffer les meſchāts.En paſ-
„ ſant au long des murailles de Corinthe, les voiant
B ainſi hautes,bien baſties,& ſi long eſtādues: Quel-
„ les femmes ſont ce, dit-il, qui habitent la-dedans?

A vn maiſtre de Retorique qui louant ſon meſtier
„ diſoit, Quand tout eſt dit, il n'y a rien ſi puiffant
„ que la parole de l'homme: Quand tu ne parles
„ point, dit-il, tu ne vauls doncques rien. Les Ar-
„ giens aians eſté deſia vne fois battus, retournoient
neantmoins ſe representer encore fort fierement
en bataille, & voiant que la plus part de leurs al-
„ liez ſ'en troubloient de frayeur,il leur dit: Aſſez
„ vous mes amis,car ſi nous qui les auons deſia bat-
c tus auons peur, que penſez vous qu'ils aient eux?

Vn Ambaſſadeur de la ville d'Abdere eſtoit venu
à Sparte,qui auoit fort longuement parlé,& apres
„ qu'il ſe fut teu, à la fin il luy demanda, Sire, quelle
„ reſponſe veuX tu que ie rapporte à noz citoiens?
„ Tu leur diras, dit-il, que ie t'ay laiſſé dire tout ce
„ que tu as voulu, & tant que tu as voulu, & que ie
„ t'ay touſiours eſcouté ſans iamais dire mot. Quel-
ques vns louoient les Eliens de ce qu'ils eſtoient

„ tres-iustes en la solennité des ieux Olympiques: Et D
 „ est ce, dit-il chose si grãde, ny dont il faille faire tant
 „ de cas, si en cinq annees ils gardent vn seul iour la
 „ iustice? Aucuns luy rapportoient, que ceux de l'autre
 „ maison royale luy portoient enuie: Ils en aurõt
 „ doncques double peine, dir-il: car leurs propres
 „ maux d'eux mesmes les fascheront, & outre encore
 „ les biens qui seront & en moy & aux miens. Quel-
 „ qu'vn estoit d'aduis, qu'il falloit dõner passage aux
 „ ennemis qui se mettoiẽt en fuitte: Voire-mais, dit-
 „ il, si nous ne cõbattons contre ceux qui s'enfuient
 „ par lascheté, comment combattons nous contre E
 „ ceux qui demoureront par vaillance? Vn autre
 „ mettoit en auãt le propos d'vn moien pour main-
 „ tenir la liberté de la Grece, qui estoit biẽ genereux
 „ & magnanime, mais qui estoit bien mal-aisé à exe-
 „ cuter: Il luy respondit, Estranger mon amy, tes
 „ paroles auroient besoing de grande puissance &
 „ grand argent. Quelque autre luy disoit, que Phi-
 „ lippus les engarderoit bien de mettre le pied en
 „ tout le demourant de la Grece, Nous nous conten-
 „ terõs, dit-il, amy, de demourer en nostre païs. Vn
 „ autre ambassadeur estoit venu de la ville de Perin- F
 „ the en Lacedemone, qui auoit fait vne longue ha-
 „ rengue, & à la fin demanda à Agis quelle responce
 „ il porteroit aux Perinthiës: Tu leur diras, dit-il, que
 „ tu ne cuydas iamais acheuer de dire, & moy de me
 „ taire. Il alla vne fois tout seul ambassadeur deuers
 „ Philippus, qui luy dit, Commẽt cela? viens tu seul?
 „ Ouy, dit-il, deuers vn seul. Vn des vieux citoiẽs de
 „ la ville de Sparte luy disoit vn iour, à luy qui estoit
 „ desia

A desia vieil aussi : que puis que les anciennes loix & coustumes s'alloient tous les iours abbastardissant, & que lon y en introduisoit d'autres qui estoient pires, que tout s'en alloit sans dessus dessous: Il luy respondit en riant, Les affaires vont doncq' bien, si il est ainsi que tu dis, car il me souuient qu'estant ieune garçon, j'entendois desia dire à mon pere, que tout estoit aussi réuersé: & ce qui estoit dessus estoit venu dessous des son tēps, & disoit encore que son pere luy en auoit autant dit du sien. Et pourtant ne se faut il pas esmerueiller, si les affaires vont

B apres pis que deuant: mais aussi fils vont quelquefois mieux, & quelquefois sont presque tous semblables. / Quelqu'un luy demanda, comment il pourroit demourer franc & libre pour toute sa vie: En mesprisant la mort, dit-il. / Agis le ieune, comme l'orateur Demades luy dist, que les especes Laconiques estoient si courtes, que les triacleurs & Charlatans les aualloient à tous coups: & toutes fois, dit-il, les Lacedemoniens en assenent bien leurs ennemis. Vn autre importun & meschant homme luy rompoit la teste à force de demander souuent, Qui est le plus homme de bien de Sparte? Celuy, dit-il, qui te ressemble le moins.

Agis le dernier Roy de Lacedemone, aiant esté surpris en trahison, & condamné par les Ephores, ainsi qu'on le menoit sans forme de iustice au lieu pour estre estranglé, apperceut vn de ses esclaves qui pleuroit, si luy dit, Cesse de pleurer pour ma mort, car en mourant ainsi iniquement & meschamment, ie vaux mieux & suis plus homme de

23 bien que ceux qui me font mourir. & aiant dit ces D
 33 paroles, il tendit volontairement son col au laq^s de
 la corde. Acrotatus voiant que ses pere & mere
 vouloient qu'il leur teint la main à faire quelque
 chose qui estoit contraire à la raison & à la iustice, il
 leur resista pour vn temps: mais quand il veit qu'ils
 luy en faisoient trop grande instance, à la fin il leur
 33 dit, Pédant que i'ay esté entre vos mains, ie n'ay ia-
 33 mais eu aucune cognoissance ny aucun sentiment
 33 de la iustice: mais depuis que vous m'avez don-
 33 né à la chose publique & à ses loix, & par ce moien
 33 m'avez instrui^t en iustice & preud'homme, com- E
 33 me vous avez peu, ie m'efforceray de suyure ceste
 33 instruction-la, & non pas vous: & pource que ie
 33 sçay bien que vous voulez que ie face toutes cho-
 33 ses bonnes, & que celles la sont tresbonnes & à vn
 33 hōme priué, & encore plus à celuy qui est en au-
 33 thorité de magistrat, lesquelles sont iustes, ie feray
 33 celles que vous voulez, & refuseray celles que vous
 33 me dittes. Alcamenes fils de Telecrus, comme
 quelqu'un demandast, par quel moien on pour-
 33 roit bien conseruer vn Royaume: En ne faisant,
 33 dit-il, point de compte de gaigner. Vn autre luy F
 demādoit, pour quelle cause il n'auoit point vou-
 lu prendre ny receuoir de dons des Messeniens:
 pour ce, dit-il, que si i'en eusse pris, ie n'eusse iamais
 eu paix avec les loix. Quelque autre luy dit qu'il
 fesiuerueilloit, comment il viuoit si estroittement,
 33 veu qu'il auoit si bien de quoy: il luy respōdit, C'est
 33 chose honeste quād on a des biēs beaucoup, viure
 33 neātmoins selō la raison, & non pas selon l'appetit.

A Alexandridas fils de Leon , voiant vn qui se tourmentoit & desefperoit, d'autant qu'il estoit banny
» de son païs : O mon amy , dit-il, ne te tourmente
» pas pour estre contrainct d'esloigner ton païs, mais
» bien pour auoir esloigné la iustice. A vn autre qui
» disoit aux Ephores de bons propos , mais plus
» qu'il n'en falloit : Estranger mon amy, dit-il, tu dis
» ce qu'il faut autrement qu'il ne faut. Quelque
» autre luy demandoit, pourquoy ils donnoient la
» charge de leurs terres à leurs Ilotes , & qu'ils ne les
» prenoiēt à labourer & cultiuer eux-mesmes : Pour
B ce, dit il, que nous les auons acquises , non en les
» cultiuât elles, mais en nous cultiuât nous mesmes.

A vn autre qui soustenoit, qu'il n'y auoit que l'ambition & la vaine gloire qui perdoit les hommes,
& que ceux qui s'en pouuoient deffaire estoient
» heureux : Il faudroit doncques confesser suiuant
» ton dire, que les meschans qui font tort à autrui
» seroient bien-heureux : car comment pourroit on
» soustenir que vn sacrilege ou vn voleur , qui raut
» le bien d'autrui, fust conuoiteux de vaine gloire?

Il respondit aussi à quelque autre qui luy demandoit, pourquoy les Lacedemoniens estoient si hardis & si asseurez aux perils de la guerre : Pour ce,
» dit-il, que nous apprenons à auoir honte , & non
» pas peur de nostre vie, comme les autres. On luy
» demanda aussi quelquefois, pourquoy c'estoit que
» les Senateurs demouroient plusieurs iours à iuger
» les causes criminelles : & qu'encore que l'accusé
» fust par eux absous, il demouroit neantmoins
» tousiours en estat de criminel: Ils demeurent, dit-

„ il, plusieurs iours à decider les causes criminelles, &
 „ où il est question de la vie des hommes, pour ce
 „ que ceux qui ont commis erreur en la mort d'un
 „ homme, ne peuuent plus r'habiller leur sentence:
 „ & celuy qui est eslargy, doit neantmoins tousiours
 „ demeurer subiect à la loy de l'homicide, pour ce
 „ que lon peut tousiours de rechef mieux enquerir
 „ & mieux iuger de son faict. Anaxander le fils
 d'Eurycrates respondit à vn qui luy demandoit,
 pourquoy ils n'amassoient point d'argent en pu-
 blic: de peur, dit-il, que si on nous en bailloit la gar-
 de, cela ne fust matiere & moien de nous corrom-
 pre. Anaxilas aussi dit à vn qui s'esmerueilloit cō-
 ment les Ephores ne se leuoient point au deuant
 des Roys, veu que c'estoient eux qui les mettoiēt:
 „ C'est, dit-il, pour la mesme cause qu'ils ont esté
 „ creez, Ephores, c'est à dire pour cōtreroller & syn-
 „ dicquer les Roys. Androclidas Laconien estant
 affollé d'une cuisse, se fait neantmoins enroller au
 nombre de ceux qui deuoient aller à la guerre: &
 comme quelques vns s'y opposassent, d'autāt qu'il
 „ estoit impotent d'une cuisse: Voire-mais, dit-il, il
 „ ne faut pas des gens qui fuyent, mais qui tiennent
 „ ferme pour combattre les ennemis. Antalcidas
 se faisant receuoir en la confrairie de la religion de
 Samothrace, comme le prestre luy demandaſt,
 „ quel peché il auoit fait le plus grand en sa vie: Si
 „ i'en auray faict aucun en ma vie, les Dieux, dit-il, le
 „ ſçauront bien eux mesmes. Et à vn Athenien, qui
 appelloit les Lacedemoniens grossiers & ignorāts:
 „ Nous sommes voirement seuls en toute la Grece
 qui

A qui n'auons appris de vous rien de mal. Et à vn
" autre Athenien aussi, qui luy disoit, Nous vous
" auons souuent rechaslez de la riuere de Cephisus:
" Mais nous, dit-il, ne vous rechassâmes iamais de
" celle d'Eurotas. A vn autre qui luy demandoit,
" Cominét il faudroit faire pour estre tref-agreable
" aux hommes: Il faudroit, respōdit il, leur dire tous-
" iours chose qui leur pleust, & faire chose qui leur
" profitast. Vn maistre de Retorique luy vouloit
" vn iour reciter vne harengue qu'il auoit composee
" à la louange d'Hercules: Et qui est-ce, dit-il, qui
B le mesprise? Et à Agesilaus qui auoit esté fort grie-
" uement nauré en vne bataille par les Thebains:
" Tu reçois, dit-il, bien l'escholage & le loyer que tu
" merites des Thebains, leur aiant enseigné malgré
" eux ce qu'ils ne sçauoient ny ne vouloient appren-
" dre, c'est à sçauoir à combattre: car par les conti-
" nuelles expéditions qu'Agesilaus faisoit cōtre eux,
" ils estoient deuenus vaillants & belliqueux. Luy
" mesme disoit que les murailles de Sparte estoient
" les ieunes hommes, & ses confins estoient les fers
" de leurs picques. Et à vn autre qui demandoit,
C pourquoy les Lacedemoniens combattoient de si
" courtes espees: à fin, dit-il, que nous ioignons nos
" ennemis de plus pres. Antiochus estant Ephore
" ouit dire que Philippus auoit dōné aux Messeniēs
" leur territoire: Mais leur a il aussi, demāda il, don-
" né quant & quant les forces de le pouuoir defen-
" dre? Arigeus respondit à quelquesvns qui louoient
" hautemēt des Dames qui n'estoiēt point leurs fem-
" mes, ains mariees à d'autres: Par les Dieux, dit-il,

„ on ne doit iamais tenir propos en vain, & que
 „ lon ne sçache bien comment, des femmes de bien
 „ & d'honneur, pour ce qu'elles ne doiuent aucune-
 „ ment estre cogneuës sinon de ceux qui viuent or-
 „ dinairement avec elles. Et en passant vnefois par la
 ville de Selinunte en Sicile, il leur ceste epitaphe
 qui estoit engraué dessus vne sepulture,

Après auoir la tyrannie estainte
 De leur païs par Martiale attainte,
 Ceux cy iadis deuant les hautes tours
 De Selinunte acheuerent leurs iours:

„ Ils meritoient bien, dit-il, de mourir, pour auoir
 „ estaint vne tyrannie, si elle brusloit: car ils la de-
 „ uoient laisser toute brusler. Ariston oyant quel-
 qu'un qui en deuissant louoit vne sentence que
 fouloit dire le Roy Cleomenes, quand on luy de-
 „ mandoit, quel estoit l'office d'un bon Roy: Faire
 „ du bien à ses amis, disoit-il, & du mal à ses ennemis:
 „ & de combien seroit-il meilleur, respondit-il, de
 „ faire du bien à ses amis, & de ses ennemis en faire
 „ de bons amis? mais ceste notable sentence est in-
 dubitablemēt de Socrates, & par tous se refere à
 luy. Comme quelqu'un luy demandaſt com-
 „ bien en nombre estoient les Lacedemoniens: au-
 „ tant, dit-il, qu'il en faut pour chasser leurs ennemis.

Vn Athenien recitoit l'oraison funebre, qu'il auoit
 composee à la louange de leurs citoiens qui auoiet
 „ esté desfaicts par les Lacedemoniens: Si les vo-
 „ ſtres ont esté si vaillans que tu dis, quels penſes tu
 „ doncques, dit-il, que soient les nostres qui les ont
 „ desfaicts? Archidamidas respondit à vn qui
 louoit

A louoit Charilaus de ce, qu'il se monstroit humain
„ également à tous : Et comment, dit-il, merite d'e-
„ stre loué celuy, qui se monstre humain enuers les
„ meschans? Vn autre reprenoit Hecateus, le
maistre de Retorique, de ce qu'ayant esté conuié
à manger avec eux en leurs conuiues qu'ils appel-
lent, il ne dit iamais mot tout le long du disner : il
„ luy respondit, Il semble que tu ignores, que celuy
„ qui sçait bien parler, sçait aussi le temps quand il
„ faut parler. Archidamus fils de Zeuxidamus dit
à vn qui luy demandoit, qui c'estoit qui gouuer-
B noit la ville de Sparte, Ce sont les loix, & puis
„ les magistrats suiuant les loix. Entendant vn
qui louoit grandement vn ioueur de cithre, &
auoit en singuliere admiration l'excellence de son
„ art : O mon amy, quel loyer d'honneur auront
„ enuers toy les preux & vaillans hommes, puis
„ que tu louës si hautement vn ioueur de cithre?
Quelque autre luy recommandoit fort vn Musi-
„ cien en luy disant, Il est bien bon chantre : C'est
„ autant, dit-il, cōme bon potager chez nous. vou-
lant dire qu'il n'y auoit point de difference entre
C donner du plaisir par le son de la voix ou des in-
struments, & par l'apprest des viandes ou des pota-
ges. Quelqu'un luy promettoit de luy dōner du
„ vin qui seroit fort bon & souëf : à que faire, dit-il, ce-
„ la ne seruira qu'à en faire boire d'auantage, & à de-
„ uenir moins homme. Estant au siege deuant la
ville de Corinthe, il veit des liéures se leuer tout
ioignant les murailles de la ville, si dit à ses compa-
„ gnons, Noz ennemis nous seront aisez à prendre,

puis qu'ils sont si paresseux, que de laisser gister
 les lièvres iusques dedans les fossés de leur ville.
 Il auoit esté eleu pour arbitre du consentemēt de
 deux qui auoient procès l'un contre l'autre, les-
 quels il mena tous deux dedās le temple de Diane
 surnommee Chalceœcos, & leur fait promettre &
 iurer sur l'autel de la Deesse, qu'ils obserueroient
 tous deux de poinct en poinct ce qui seroit par luy
 iugé. Ce qu'ils promirent, & iurerent. Le iuge
 dōcques, dit-il, que vous ne partirez ne l'un ne l'au-
 tre de ce tēple, que vous n'aiez premier pacifié voz
 differents. Dionysius le tyran de la Sicile auoit en-
 uoyé à ses filles des robes, il ne les voulut pas re-
 ceuoir disant, l'aurois peur que quand elles les au-
 roiet vestues, elles ne m'en semblassent plus laides.
 Et voiant son fils encore ieune en vne bataille cō-
 battre desespereement alencontre des Atheniens,
 il luy dit, Ou augmente ta force, ou diminue ton
 courage. Archidamus le fils d'Agésilas, comme
 le roy Philippus apres la bataille qu'il gaigna con-
 tre les Grecs aupres de Cheronee luy eust escrit
 vne missiue fort aspre & rigoureuse, il luy rescriuit,
 Si tu mesures ton ombre, tu trouueras qu'elle ne
 fera pas deuenue plus grande depuis que tu as
 vaincu. Estant vn iour enquis, combien de terre
 possēdoient les Lacedemoniens, il respondit, autāt
 cōme ils en peuuent atteinre avec leurs iauelines.
 Periander estoit vn medecin suffisant en son art, &
 bien estimé entre les plus excellents, mais qui es-
 criuoit de mauuais vers : il luy dit vn iour, Le m'es-
 bahis de toy Periander, comment tu aimes mieux
 estre

A estre appellé mauuais poète, que bon medecin.

En la guerre que les Lacedemoniens eurent contre Philippus quelques vns luy conseilloient, qu'il aduifast bien à donner la bataille le plus loing qu'il pourroit de son païs: Ce n'est pas cela, dit-il, à quoy il faut aduifer, mais bien à ce, commēt nous pourrons si bien combattre, que nous demourions victorieux. Il feit aussi responce à ceux qui le louoient de ce qu'il auoit gaigné la bataille contre les Arcadiens: Il vaudroit mieux, dit-il, que nous les eussions vaincus de prudēce que de force.

B Et enuiron le temps qu'il entra en armes dedans le païs d'Arcadie, estant aduertty que les Eliens enuoyoient du secours aux Arcadiens, il leur escriuit en ceste sorte: Archidamus aux Eliens, C'est belle chose que le repos. Et comme les peuples alliez & cōfederez en la guerre Peloponesiaque demandassent, combien d'argent suffiroit à mener ceste guerre, & qu'il taxast cōbien chascun auroit à contribuer: La guerre, dit-il, ne se fait pas à pris certain. Et voiant vn traict d'engin de batterie, qui lors auoit nouuellement esté apporté de la Sicile: ô

C Hercules, dit-il, la prouesse de l'homme est perdue. Et pource que les Grecs ne le voulurent pas croire, ny rōpre les traittez qu'ils auoient faicts avec Antigonus & Craterus Macedoniēs pour viure en leur ancienne liberté, allegans que les Lacedemoniens leur seroient plus insupportables que les Macedoniens: Le mouton, dit-il, iette tousiours dehors vne mēme voix, mais l'homme en change souuent en diuerses sortes, iusques à ce qu'il soit paruenue au

dessus de ses desseings. Astyocratidas respondit à D
 quelqu'un qui disoit, apres que le Roy Agis eut
 „ perdu la bataille contre Antigonus: ô pauvres
 „ Lacedemoniens, que ferez vous maintenant? Se-
 „ rez vous serfs des Macedoniens? Comment An-
 „ tigonus nous pourroit il defendre de mourir en
 „ combattant pour Sparte? Bias aussi se trouuant
 surpris d'une embusche que luy auoit dressée Iphi-
 crates capitaine des Atheniens, comme ses sou-
 „ dards luy demandassent: Et bien Capitaine, qu'est
 „ il de faire? Que scauriez vous faire, dit-il, sinon ad-
 „ uiser à vous sauuer, & moy à mourir en combat- E
 „ tant? Brasidas trouua vne souris entre des figues
 seches qui le mordit, & il la laissa aller, disant à ceux
 „ qui estoient presens: voiez comment il n'y a si petit
 „ animal qui ne puisse sauuer sa vie, prouueu qu'il ait
 „ le cœur de se defendre contre ceux qui l'assaillent.
 En vne bataille il fut blecé d'un coup de iauelot
 qui faulsa son bouclier: & luy l'arrachant de son
 corps en tua l'ennemy qui l'en auoit blecé. Et à
 ceux qui luy demandoient, comment il auoit ainsi
 esté blecé: par ce, dit-il, que mon bouclier m'a trahy.
 Se partât pour aller à la guerre, il escriuit aux Epho- F
 „ res, Ce que vous m'escriuez touchant la guerre, Je
 „ le feray, ou i'y mourray. Et apres qu'il fut mort
 en deliurant de seruitude les Grecs habitās au pais
 de Thrace, les ambassadeurs qui furent enuoyez
 de la part du pais, pour rendre grace aux Lacede-
 moniens allerent visiter sa mere Archileonide: la-
 quelle leur demāda premierement, si son fils Bra-
 sidas estoit mort vaillamment: & comme ces am-
 bassa-

A bassadeurs Thraciens le louassent si hautement, qu'ils disoient qu'il n'auoit point laissé son pareil:
" Vous vous abusez, dit elle, mes amis, car Brasidas
" estoit bien homme de bien, mais il y en a plusieurs
" en Sparte qui sont encore meilleurs que luy.

Damonidas auoit esté colloqué tout au dernier lieu de la danse par celuy qui en estoit le maistre: il ne s'en courroucea point autrement, ains luy dit:
" Tu as bien faict, car tu as trouué moien de rendre
" ceste place honorable, qui par cy deuant estoit infame. Damis feit response aux lettres qui leur
B auoiét esté escriptes de la part d'Alexandre le grãd qu'ils eussent à declarer par leurs suffrages, Alexandre estre Dieu: Nous concedons à Alexandre de se
" faire appeller Dieu s'il veut. / Damindas comme Philippus fust entré à main armee dedans le Peloponese, & que quelqu'un luy dist, les Lacedemoniës sont en danger de souffrir beaucoup de maux,
" fils ne treuuent moien d'appointer avec luy: O Demy-femme mon amy, que nous scauroit il faire
" souffrir de mal, veu que nous ne faisons compte de la mort? / Dercyllidas fut enuoyé Ambassadeur
C deuers le Roy Pyrrus, lors qu'il auoit son armee sur les confins de Sparte. Pyrrus leur feit commandement qu'ils eussent à receuoir leur Roy Cleonymus qu'ils auoient banny, ou qu'il leur feroit cognoistre qu'ils n'estoient point plus vaillans que
" les autres. Dercyllidas luy repliqua, Si tu es vn
" Dieu, nous ne te craignons point, pour ce que nous ne t'auons point offensé: mais si tu es homme, tu n'es
" point meilleur que nous. Demaratus deuisoit vn

iour avec Orontes qui parla fort brusquement à
 luy: quelqu'un qui l'auoit ouy luy dit puis apres,
 Orontes s'est monstré bien audacieux en ton en-
 droit: Il n'a point failly enuers moy, dit-il: car ceux
 qui flattent & qui cōplaisent en tous leurs propos,
 ce sont ceux qui portent dommage, non pas ceux
 qui parlent avec malveuillance. Quelqu'un luy
 demandoit pour quelle cause à Sparte ils notoient
 d'infamie ceux qui en vne desconfiture iettoient
 leurs boucliers, & non pas ceux qui iettoient ou
 leurs corps de cuirasses, ou leurs habillements de
 teste: pour ce, dit-il, que c'est pour eux seuls qu'ils
 portēt ces armeures la, mais les boucliers c'est pour
 toute l'ordonnance de la bataille. Aiant ouy
 chanter vn chantre, Il me semble, dit-il, qu'il ne
 follastre pas mal. Il estoit en vne grande compai-
 gnie, où il demoura bien longuement sans dire vn
 seul mot: à l'occasion dequoy quelqu'un luy dit,
 Est-ce par folie ou par faute de propos que tu gar-
 des vn si grand silence? & comment, dit-il, seroit ce
 par folie, car vn fol ne se peut iamais taire. Quel-
 qu'un luy demandoit pourquoy il estoit banny de
 Sparte, veu qu'il en estoit Roy: c'est, dit-il, pource
 que les loix y sont maistresses. Vn Persien à force
 de dōner luy suborna à la fin vne ieune garce qu'il
 aimoit, & puis s'en mocquāt luy disoit: l'ay si bien
 chassé, qu'à la fin i'ay pris tes amours: non as pas
 par les Dieux, dit-il, mais bien les as tu achetez.
 Quelque gentilhomme s'estoit rebellé contre le
 roy de Perse, mais Demaratus auoit tant faict par
 remonstrances enuers luy, qu'il luy auoit persua-
 dé de

A dé de retourner. Le Roy luy feit incontinent mettre la main sur le collet, & estoit prest à le faire executer : mais Demaratus l'en diuertit en luy remonstrant, Ce te seroit honte, Sire, de n'auoir sceu le punir de sa rebellion quād il estoit ton ennemy, & puis maintenant qu'il est redeuenu ton seruiteur & amy, le faire mourir. Il y auoit vn bouffon qui plaisantoit à la table du Roy, lequel luy dōnoit souuent des attaintes & des traicts picquants de mocquerie, en luy reprochāt son exil: il luy respondit, Estrāger mon amy, ie ne te combattray point, **B** car i'ay perdu le reng* de ma vie. Emerepes estāt Ephore couppa avec vne hachette deux chordes des neuf que le musicien Phrynis auoit en sa lyre, disant, Ne viole point la Musique. Epenetus souloit dire, que les menteurs estoient cause de tous les pechez & de tous les crimes du monde. Euboidas oyant quelques vns qui louoiēt la femme d'vn autre, les en reprit, disant, que les estrangiers qui ne sont pas de la maison, ne doiuent aucunement parler des meurs d'vne Dame. Eudamidas fils d'Archidamus, & frere d'Agis, aiant veu Xenocrates qui estoit desia fort auant sur son aage en l'Academie estudiant en la Philosophie avec ses familiers, demanda qui estoit ce vieillard la: quelqu'vn des assistans luy respondit, que c'estoit vn sage homme, & du nombre de ceux qui cherchoient la vertu: Et quand en vsera il, dit-il, fil la cherche encore? Et aiant ouy vn philosophe disputer & discourir sur ceste proposition, Qu'il n'y a bō capitaine que celuy seul qui est sage: Ce propos

La grace de
la rencontre
ne se peut
trouuer en
frāçois, quā
consiste en
l'equiuoque
de ce mot
τάξις, si-
gnifiant ar-
mee & rég.

„ la, dit-il, est merueilleux, mais celuy qui le dit n'en D
 „ est pas croyable, car il n'a pas les aureilles accou-
 „ stumees au son de la trompette. Il alla vn iour
 à l'auditoire pour ouïr Xenocrates discourant sur
 vne question, mais il y arriua comme il acheuoit:
 & quelqu'un de ceux qui estoient en sa compa-
 „ gnie commancea à dire, Il s'est teu tout aussi tost
 „ que nous sommes arriuez: Il a bien faict, dit-il, s'il
 „ auoit acheué de dire ce qu'il vouloit dire. Et com-
 me l'autre repliquast, Il seroit bon que nous
 „ l'ouissions dire vne autre fois: Et si nous estions,
 „ dit-il, venus visiter vn homme qui eust desia soup- E
 „ pé, le prierons nous qu'il souppast encore vne au-
 „ trefois pour l'amour de nous? Quelqu'un luy
 demanda vn iour, pourquoy il vouloit seul de-
 mourer en paix, veu que tous ses citoiens vnanime-
 mēt estoient d'aduis d'entreprendre la guerre con-
 „ tre les Macedoniens: c'est pour ce, dit-il, que ie ne
 „ les veux pas conuaincre de mensonge. Vn autre
 pour l'animer à ceste guerre, luy alleguoit les prou-
 esses & beaux faicts d'armes qu'ils auoiēt autrefois
 „ faicts contre les Perses: Il me semble, dit-il, que
 „ tu ignores que c'est autant, cōme apres auoir vain- F
 „ cu mille moutons vouloir combattre contre cin-
 „ quante loups. Il fut quelquefois present à ouïr
 chanter vn Musicien, qui feist fort bien: on luy de-
 „ demāda ce qu'il luy en sembloit: il respondit, Il me
 „ semble que c'est vn grād amuseur de gens à peu de
 „ chose. Et cōme vn autre louast hautement la ville
 „ d'Athenes deuant luy: Et qui pourroit, dit-il, assez,
 „ louer ceste ville, que iamais homme n'aima pour
 y estre

A y estre deuenu meilleur ? Et comme Alexandre le grand eust fait proclamer publiquemēt en l'assemblée des ieux Olympiques, que tous bannis peussent retourner en leurs pais exceptez les Thebains:

» Voyla, dit il, vne proclamation calamiteuse pour
» vous, ô Thebains, mais elle vous est honorable, car
» c'est signe qu'Alexandre ne craint que vous seuls
» en la Grece. Vn citoien de la ville d'Argos disoit
vn iour en sa presence, que les Lacedemoniens sortans de leur pais, & de l'obeissance de leurs loix, deuenoient pires en voyageāt par le monde: mais au

B contraire, vous autres Argiens venans en nostre
» ville de Sparte n'en empirez pas, ains en deuenez
» plus gens de bien. On luy demanda pour quelle
occasion deuāt que d'entrer en bataille ils auoient
» accoustumé de sacrifier aux Muses: à fin, dit il, que
» noz gestes soient bien & dignement escripts. Eurycratidas fils d'Anaxandrides à quelqu'un qui luy demandoit pourquoy les Ephores iugeoient par

» chascun iour des cōtracts, respondit, à fin que mesme entre les ennemis nous apprenions à nous garder foy l'un à l'autre. Zeuxidamus respōdit aussi

C à vn qui luy demādoit, pourquoy ils ne redigeoient par escript les statuts & ordonnāces de la prouesse, & qu'ils ne les bailloient escripts à lire à leurs ieunes gens: pour ce, dit il, que nous voulons qu'ils

» s'accoustument aux faiçts, & non pas aux escriptures. Vn Ætolien disoit, que la guerre estoit meilleure que la paix à ceux qui se vouloient monst

» gens de bien: Non pas cela seulement, dit il, par les
» Dieux, mais meilleure est la mort que la vie. He-

rondas se trouua d'adventure à Athenes, quand il
 y eut vn des citoiens qui fut condamné d'oisiueré:
 & en entendant le bruit, il pria qu'on luy mon-
 strast celuy qui auoit esté condamné en cause de
 gentillesse. Thearidas aiguisoit la pointe de son
 espee, quelqu'un luy demanda si elle estoit bien ai-
 guée: Plus aiguée, dit il, que n'est vne calomnie. The-
 misteas estât deuin predict au Roy Leonidas la des-
 confiture qui deuoit aduenir dedás le pas de Ther-
 mopyles, tant de luy que de ceux qui cōbattroient
 avec luy: Leonidas le voulut enuoyer à Lacedemo-
 ne sous couleur de porter les nouuelles de ce qui
 deuoit aduenir, mais à la verité, de peur qu'il n'y
 mourust avec les autres: il ne le voulut pas faire,
 ains dit au Roy Leonidas qui l'y vouloit de pes-
 cher: I'ay esté icy enuoyé pour combattre, & non
 pas pour porter des nouuelles. Theopompus dit
 à vn qui luy demandoit, Comment vn Roy pour-
 roit bien seurement conseruer son royaume: En
 donnant à ses amis liberté de luy dire franchement
 la verité, & engardant d'oppression ses subiects de
 toute sa puissance. A vn estrangier qui luy disoit
 qu'en son pais on le surnommoit Philolacon, c'est
 à dire, aimant les Lacedemoniës: il vaudroit mieulx,
 dit il, que lon te surnommast aimant tes citoiens,
 qu'aimant les Lacedemoniens. Vn autre ambas-
 sadeur venu de la ville d'Elide, disoit que ses citoiës
 l'auoient enuoyé, pour autant qu'il estoit seul en
 leur ville qui suiuiot la façon de viure Laconique.
 Il luy demanda, Et laquelle maniere de viure est la
 meilleure, la tiene ou celle des autres? C'est la mie-
 ne,

A ne, respondit il. Comment doncques est-il possible, dit il adonc, que vne cité se conserue, en laquelle y aiant grand nombre d'habitans, il n'y en a qu'un seul qui soit homme de bien? Quelqu'un disoit deuant luy, que la ville de Sparte se maintenoit en son entier, pour ce que les Roys y sçauoient bien commander: non pas tant, dit il, que pour ce que les citoiens y sçauent bien obeir. Les habitants de la ville de Pyle luy decernerent en leur conseil de tresgrands honneurs: Il leur rescriuit, que le temps auoit accoustumé d'accroistre les honneurs moderez, & d'effacer les immoderez. Therycion retournant de la ville de Delphes trouua le camp de Philippus dedans le destroict du Peloponese, où il auoit gagné le passage, auquel est assise la ville de Corinthé: si dit aux Corinthiens, Le Peloponese a de mauuais portiers en vous. Thectamenes aiant esté condamné à mourir par les Ephores, s'en alloit riant: & quelqu'un luy demanda, si il mesprisait les loix & iugemens de Sparte: non pas, dit il, mais ie me resiouis de ce qu'ils m'ont condamné à payer vne amende que ie puis payer, sans l'emprunter d'un autre. Hippodamus estoit en bataille ioignant le Roy Archidamus, qui le vouloit enuoyer avec Agis à Sparte pour là prouuoir aux affaires, mais il ne voulut pas y aller, ains luy respondit, Ne mourray-ie pas plus honorablement icy en combattant vaillamment pour Sparte? Or auoit il ia vescu plus de quatre vingts ans, & prit ses armes, & se regeant à la main droicte du Roy, il y

mourut en combattant. Le gouuerneur de la Carie escriuit à Hippocratidas qu'il tenoit entre ses mains vn Lacedemonien : lequel aiant sceu vne trahison & cōspiration qui s'estoit machinee alencontre de luy, ne luy en auoit rien reuelé, & luy demandoit quant & quant conseil de ce qu'il en deuoit faire. Il luy rescriuit, Si tu luy as par cy deuant
 „ fait quelque grand bien, fais le mourir: si non, chas-
 „ se le hors de ton pais, attendu qu'il restiue à la ver-
 „ tu. Il rencontra quelquefois en son chemin vn ieune
 „ garson, apres lequel venoit vn qui l'aimoit : le
 „ ieune garson en eut honte: & lors il luy dit, Il te
 „ faut aller en cōpagnie de ceux, avec lesquels quand
 „ on te verra, tu n'en changes point de couleur.
 Callicratidas Capitaine general de l'armee de mer, comme des amis de Lyfander le requissent de leur ottroyer, qu'ils peussent sans punition tuer vn de leurs ennemis, & qu'ils luy donneroient cinquante talents, qui sont trente mille escus, combien qu'il eust grandement affaire d'argent pour nourrir ses mariniers, il ne leur voulut pas neantmoins permettre. Et comme Cleander, qui estoit l'vn de ses
 „ conseillers, luy dist, Je les prendrois quant à moy, si
 „ i'estois en ta place: Et moy aussi, dit il, si i'estois en
 „ la tiene. Estant allé à Sardis deuers Cyrus le ieune, qui estoit allié des Lacedemoniens, pour veoir s'il pourroit tirer de l'argēt de luy, pour entretenir ses gens de marine: la premiere iournee il luy fait dire, qu'il estoit là venu pour parler à luy : on luy fait response, qu'il estoit à table: & bien, dit il, i'attendray qu'il ait acheué: & apres auoir longuement attēdu,
 quand

A quand il veit qu'il estoit impossible de parler pour ce iour là à luy, encore fut il trouué inciuil & importun : le lendemain quand on luy dit qu'il beuuoit encore, & que pour ce iour là il ne sortiroit point dehors : il s'en retourna en Ephese, dont il estoit party, disant, qu'il ne falloit pas tant auoir soing de recouurer deniers, cōme de ne faire chose qui fust indigne de Sparte, en maudissant ceulx qui festoient les premiers si indignement assubiectis à l'insolence des Barbares, & leur auoient enseigné d'abuser ainsi superbement & insolentement de leurs richesses : & iura en presence de ceulx qui estoient en la compagnie, que si tost qu'il seroit de retour à Sparte, il feroit tout ce qui luy seroit possible, pour reconcilier les Grecs les vns avec les autres, à fin qu'ils en fussent plus redoutables aux barbares, quand ils n'auroient plus besoing de leurs forces pour s'entrefaire la guerre les vns aux autres. On luy demanda, quels hommes estoient les Ioniens : ce sont, dit il, bons esclauues, mais mauuais hommes libres. Cyrus à la fin luy aiant enuoyé de l'argent pour la soute des gents de guerre, & d'autre en don pour luy, il prit bien celuy de la soute des soudards, mais l'autre il le renuoya, disant, qu'il n'estoit point de besoing qu'il eust amitié particuliere avec luy, pour ce que la cōmune qu'il auoit avec tous les Lacedemoniens estoit encore avec luy. Vn peu deuant qu'il donnast la bataille des Arginusés, son pilote nommé Hermon luy remonstra, qu'il seroit bon de s'oster de là, & faire voile, pour ce que les galeres des Athe-

„ niens estoient bien en plus grād nombre que eulx: D
 „ Et puis, dit il, Qu'est-ce que cela? le fuir n'est-il pas
 „ infame & dommageable à Sparte? Il vault beau-
 „ coup mieulx, en demourāt, ou vaincre, ou mourir.
 Deuant la bataille aiant fait sacrifice aux Dieux, le
 deuin luy predict que les signes des entrailles pro-
 mettoient bien la victoire à l'exercite, mais la mort
 au Capitaine: il ne s'en effroya point, ains dit, Spar-
 „ te n'est pas à vn homme pres: car quand ie seray
 „ mort, mon pais n'en sera de rien moindre, mais si
 „ ie recule maintenant, il en sera diminué de reputa-
 „ tion. ainsi aiant substitué en son lieu pour Capitai- E
 ne Cleander, si luy aduenoit quelque chose, il alla
 donner la bataille, en laquelle il mourut en com-
 battant. Cleombrotus fils de Pausanias comme
 vn estranger debattist avec son pere de la vertu, il
 „ luy dit: Pour le moins mon pere a cela deuant toy,
 „ qu'il a ia engēdré vn fils, & tu n'en as encore point.
 Cleomenes fils d'Anaxādrides souloit dire qu'Ho-
 mere estoit le poëte des Lacedemoniens, pour ce
 qu'il enseigne comme il faut faire la guerre: & He-
 siode celuy des Ilotes, pour ce qu'il escrit de l'agri-
 culture. Il auoit fait trefues pour sept iours avec F
 les Argiens: la troisieme nuit apres, aiant obserué
 que les Argiens s'estoient tresbien endormis sur la
 fiance de ces trefues, il les alla charger, & en tua les
 vns, & en prit les autres prisonniers: & comme on
 luy reprochast, qu'il auoit faulsé la foy iuree: il re-
 spondit, Qu'il n'auoit pas iuré de garder les tref-
 ues la nuit: au demourant, que quelque mal que
 lon peust faire à ses ennemis, en quelque sorte que

A ce fust, cela estoit par dessus la iustice, & non subiect à icelle, tant enuers les Dieux, qu'enuers les hommes. Mais il aduint que pour son pariuremēt & son crime de foy violee, il fut frustré de son intention, qui estoit de cuider surprendre la ville d'Argos, parce que les femmes allerent prendre les armes, qui pour marque de leurs victoires anciennes estoient attachees & pēdues en leurs temples, avec lesquelles elles le repoulsèrent des murailles: & depuis estant deuenu furieux & hors du sens, il prit vn cousteau, & se fendit luy mesme tout le corps, depuis les talons iusques aux parties nobles, & mourut ainsi en riant. Son deuin mesme le diuertissoit de mener son armee deuant Argos, pour ce qu'il disoit, que le retour luy en seroit infame: & quand il fut arriué deuant, il trouua les portes fermees, & les femmes en armes dessus les murailles: Si luy dit adonc, Ne te semble il pas maintenant que ce departement te soit infame, que les hommes estants tuez, les femmes aient bien eu le cœur de te fermer les portes? Et à ceulx des Argiens qui l'outragerent, en l'appellant faulx de la foy & de pariure: Il est, dit il, biē en vous de mesdire de moy, mais il est en moy de vous mesfaire. Et aux ambassadeurs de Samos qui estoient venus deuers luy, pour luy persuader d'entreprendre la guerre contre le tyran Polycrates, & pour ce faire vsoient de longues persuasions, il respondit, Quant à ce que vous auez dit au commencement, il ne m'en souuient plus, & pour ceste cause ie n'ay point entendu le milieu: & quant à ce que vous auez dit à la fin,

„ ie ne le trouue pas bon . Il y eut de son temps vn
 coursaire qui courut & pillà toute la coste de la La
 conie:il fut pris à la fin:& comme on luy demanda
 „ pourquoy il faisoit ces courses là , le n'auois, dit il,
 „ dequoy nourrir mes gens, & pour ce ie suis venu à
 „ ceux qui en auoient, pour en prendre par force,
 „ d'autant que ie scauois bien qu'ils ne m'en eussent
 „ pas donné de gré. Meschanceté, dit il, abbrege bien
 „ chemin. Il y auoit vn homme de neant, qui ne
 „ faisoit iamais que mesdire de luy: Vas tu, dit il, ainsi
 „ mesdisant de tout le monde, à fin qu'estants em-
 „ peschez à respondre à tes iniures & mesdisances, &
 „ nous n'aions pas téps ne loisir de parler de ta ma-
 „ lice? Et comme l'un de ses citoiens luy dist, Il faut
 „ qu'un Roy en tout & par tout soit bening: non
 „ pas, dit il, iusques à se faire mespriser. / Estant tra-
 uailé d'une longue maladie, & ne sachant que y
 faire, il se meit à la fin entre les mains des deuins,
 charmeurs & sacrificeurs, aux quels il ne souloit
 point adiouster de foy au parauant: dequoy quel-
 „ qu'un de ses familiers s'esmerueillant, il luy dit, De-
 „ quoy t'esmerueilles tu, car ie ne suis plus celuy que
 „ ie soulois estre, & n'estant pas le mesme, aussi ne
 „ trouue-je pas maintenant les choses bonnes que ie
 „ trouuois alors. / Il y auoit vn Retoricié maistre d'e-
 loquēce qui se meit à discourir en sa presence de la
 prouesse & vaillance, de quoy il se prit bien fort à
 „ rire: l'autre luy demanda, Dea Cleomenes pour-
 „ quoy te ris tu quand tu oys parler de la vaillance,
 „ toy mesmement qui es Roy? Pour ce, dit il, estran-
 „ ger mon amy, que si vne arôdelle en parloit com-
 me

A me toy, ie ferois le mesme que ie fais: mais si c'estoit
vne aigle, ie me tairois tout coy. Les Argiens se
vantoient qu'en recombattant de rechef, ils recou-
vreroient la perte qu'ils auoient soufferte à la pre-
miere desfaicte: Je m'esbairois bien, dit il, si pour
addition d'une syllabe vous deueniez plus gens de
bien maintenant, que vous n'estiez parcy deuant.
Quelqu'un luy disoit outrage, l'appellant despen-
sier & voluptueux: encore vaut il mieux, dit il, estre
cela, que iniuste, comme toy qui brusles d'auarice,
& acquiers des biens par toutes voyes indeuës.
B Quelqu'un luy vouloit recommander vn Musi-
cien, & de faict le louoit de plusieurs choses, & en-
tre autres disoit, que c'estoit le meilleur châtre qui
fust en toute la Grece. Cleomenes luy monstra
du doigt vn qui estoit aupres de luy, & dit: Par les
Dieux voyla vn mien cuysinier, qui est des meil-
leurs potagers du monde. Meander le tyran de
Samos, pour la descente des Perses s'en fuyt en la
ville de Sparte: là où il monstra à Cleomenes tout
l'or & l'argent qu'il auoit apporté quand & luy, &
si le pria d'en prendre tant qu'il luy plairoit. Il n'en
C voulut rien prendre: mais craignât qu'il n'en don-
nast à d'autres de la ville, il s'en alla deuers les E-
phores, & leur dit, Il vaudra mieulx pour le bien de
Sparte que lon face sortir du Peloponese mon ho-
ste Samien, de peur qu'il n'induise quelqu'un des
Spartiates à estre meschât. Les Ephores aians ouy
son aduertissement, le bānirent des le mesme iour.
Quelqu'un luy demāda vn iour, pour quelle cause
aiant tāt de fois vaincu les Argiēs, ils ne les auoient

„ de tout point exterminiez:encore ne le feriōs nous, D
 „ dit il, jamais: car nous voulons que noz ieunes gens
 „ aient tousiours à quoy s'exerciter. Et cōme quel-
 „ que autre luy demandaist, pourquoy les Spartiates
 „ ne consacroient iamais aux Dieux les armes dont
 „ ils auoient despoüllé leurs ennemis: pource, dit il,
 „ que ce sont despoüilles de couards: & les armes
 „ que lon a ostees à ceux qui les possedoient par leur
 „ lascheté, il n'est honeste ny de les mōstrer aux ieu-
 „ nes, ny de les consacrer aux Dieux. Cleomenes
 „ fils de Cleombrotus respondit à vn qui luy donoit
 „ des cocqs fort aspres au combat, & luy disoit que E
 „ d'aspreté ils mouroient sur la place en combattant
 „ pour la victoire: donne m'en doncques de ceux là
 „ qui les tuent, car ils doiuent estre meilleurs que ceulx
 „ cy. Labotus à vn qui luy faisoit de longs discours
 „ dit, A quel propos me vas tu vsant de si longs pro-
 „ logues pour peu de chose? car quelle est la chose,
 „ telle doit estre la parole. Leotychidas le premier
 „ respondit à vn qui luy reprochoit, qu'il estoit va-
 „ riable & muable: Si ie change, dit il, c'est pour la
 „ diuersité des temps, non pas cōme vous qui chan-
 „ gez pour vostre propre malice & meschanceté. Il F
 „ respondit aussi à vn autre qui luy demãdoit, com-
 „ ment on pourroit mieulx conseruer les biens que
 „ lon a presens, En ne commettant pas tout à vn
 „ coup à la fortune. On luy demanda quelquefois
 „ que c'estoit que les ieunes enfans de noble maison
 „ deuoient apprendre: ce qui leur doit profiter, dit
 „ il, quand ils seront grands. Et à vn autre qui l'en-
 „ queroit, pour quelle raison les Spartiates buuoient

A si peu : à fin, dit il, que les autres ne deliberent de
» nous, mais nous des autres. Leotychidas fils d'A-
riston respondit à vn qui luy rapportoit, que les
» enfans de Demaratus disoient mal de luy : Par les
» Dieux, dit il, ie ne m'en esbahis pas, car il n'y a pie-
» ce d'eux qui sçeust bien dire. Il se trouua d'aduen-
ture alentour de la clef de la prochaine porte vn
serpēt entortillé: les deuins disoient que cela estoit
» vn grand monstre & grand prodige : Cela ne me
» semble pas monstre ny estrange, dit il, qu'un serpēt
» soit entortillé alentour d'une clef, mais bien seroit
B ce vn mōstre, si vne clef estoit entortillee alentour
» d'un serpent. Il y auoit vn sacrificateur nommé
Philippus qui receuoit les hommes es cerimonies
de la religion d'Orpheus, & estoit si extremement
pauvre, qu'il mendoit sa vie, & neantmoins alloit
disant, que ceux qui estoient reçeus de sa main en
ces cerimonies estoient bien-heureux apres leur
» mort : Et fol que tu es, dit il, que ne te laisses-tu
» doncques vistement mourir, à fin que tu cesses de
» lamenter ta misere & ta pauvreté ? Leon fils d'E-
cratidas estant enquis, En quelle ville on pourroit
C habiter seurement : En celle là, dit il, dont les habi-
» tans ne seroient ne plus riches ny plus pauvres les
» vns que les autres : & là où la iustice ait vigueur,
» l'iniustice n'ait point de force. Voiant les cou-
reurs qui se preparoient pour courir, à qui gaigne-
roit le pris de la course en la feste des ieux Olympi-
ques, & qui espioient tous les moiens comment ils
pourroient en quelque sorte que ce fust, gagner
quelque auantage sur leurs cōpagnons quād on les

„ lascheroit: O combien, dit il, ces coureurs estudiant
 „ plus à la vistesse, qu'ils ne font à la iustice? A vn
 „ autre qui hors de temps & de lieu deuisoit de cho-
 „ ses non inutiles: Estranger mon amy, dit il, tu dis
 „ ce qu'il fault ailleurs qu'il ne fault. Leonidas fils
 „ d'Anaxandridas & frere de Cleomenes respōdit à
 „ vn qui luy disoit, Il n'y a differēce de toy à nous, si-
 „ non d'autāt que tu es Roy. Voire-mais si ie n'eusse
 „ eu quelque chose de plus que toy, ie n'eusse pas
 „ esté Roy. Et comme sa femme nōmee Gorgo luy
 „ demandast, ainsi qu'il parloit pour s'en aller com-
 „ battre au pas des Thermopyles contre les Perfes, E
 „ fil luy vouloit point commander autre chose: non,
 „ dit il, sinō que tu te remaries à vn homme de bien,
 „ & luy portes de bons enfans. Et comme les Epho-
 „ res luy dissent, qu'il menoit bien peu de gens avec
 „ luy à ce pas des Thermopyles: mais beaucoup, dit
 „ il, pour cela que nous y allons faire. Et comme de
 „ rechef ils luy demandassent, si il auoit point en pen-
 „ sement de faire quelque autre entreprise: En ap-
 „arence, dit il, c'est pour empescher le passage des
 „ Barbares, mais en effect pour mourir pour le salut
 „ des Grecs. Quand il fut arriué au destroit des
 „ Thermopyles, il dit à ses souldards: On dit que le
 „ barbare est pres de nous, il ne nous fault plus per-
 „ dre temps: car c'est à ceste heure qu'il fault, ou que
 „ nous desfaisons les barbares, ou que nous y mou-
 „ rions tous. Et comme quelqu'un eust dit, Pour la
 „ multitude grāde des flesches de ces barbares, nous
 „ ne pourrons pas veoir le Soleil: Tant mieulx, dit il,
 „ nous en combattrons doncques à l'ombre. Et à vn
 autre

A autre qui disoit, Les voicy pres de nous : & nous
„ doncques, dit il, pres d'eulx. Et comme vn autre
luy dist, Tu viens en bien petite trouppes, Leoni-
das, pour te hazarder contre vne si grande multi-
„ tude : Si vous le prenez au nombre, dit il, toute la
„ Grece ensemble n'yourniroit pas, car elle ne fe-
„ roit qu'vne partie de leur multitude, mais si vous
„ le prenez à la valeur des hommes, ce nombre cy est
„ suffisant. Et à vn autre qui luy en disoit autant,
„ Mais i'en amène beaucoup, dit il, attendu que c'est
„ pour y mourir. Xerxes luy escriuir : Tu peus, en
B ne t'opiniastrant point à vouloir combattre con-
tre les Dieux, & te regeant de mon costé, te faire
monarque de toute la Grece. Il luy fait responce.
„ Si tu cognoissois en quoy consiste le bien de la vie
„ humaine, tu ne conuoyterois pas ce qui est à au-
„ truy : mais quant à moy, j'aime plus cher mourir
„ pour le salut de la Grece, que de commander à
„ tous ceulx de ma nation. Vne autrefois Xerxes
„ luy manda : Enuoye moy tes armes. Il luy rescri-
„ uit, Vien les querir. Sur le poinct qu'il vouloit al-
ler charger les ennemis, les mareschaux du camp
C luy vindrent protester qu'il falloit attendre que les
„ autres allies & confederez fussent arriuez : Ne pen-
„ sez vous pas, dit il, que tous ceulx qui ont enuie de
„ combattre soient venus ? & qu'il n'y a que ceulx
„ qui reuerent & craignent leurs Roys qui combat-
„ tent contre les ennemis ? cela dit, il denoncea à ses
gens qu'ils dinassent, & qu'ils soupperoient en
l'autre monde. Estant enquis pourquoy les gens
de bien preferoient vne mort honorable à vne vie

„ honteuse : pource, dit il, qu'ils estiment le mourir
 „ commun à la nature, mais le bien mourir propre à
 „ eulx. Il auoit enuie de sauuer les ieunes hommes
 de sa troupe qui n'estoient pas mariez, & sçachât
 bien que s'il y alloit ouuertemēt, ils n'en voudroiet
 rien faire : il leur dōna à chascun d'eulx des breuets
 à porter aux Ephores : & en voulut aussi sauuer
 trois de ceulx qui estoient mariez, mais eulx s'en
 estans apperceus ne voulurēt pas receuoir ces bre-
 „ uets : car l'un dit, le t'ay icy suiuy pour combattre,
 „ non pas pour porter nouuelles. Le second dit,
 „ Demourant icy, ie seray plus homme de bien. Le
 „ troisieme respondit, le ne seray pas le dernier, ains
 „ le premier de ceux cy au combat. Lochagus pere
 de Polyænides & de Siron, quand on luy vint dire,
 „ que l'un de ses enfans estoit mort : Il y a long
 „ temps, respondit il, que ie sçauois bien qu'il deuoit
 „ mourir.

Lyeurgus le legistateur voulant reduire ses ci-
 toiens de leur ancienne maniere de viure en vne
 qui fust plus honeste, & les rendre plus vertueux,
 car au parauant ils estoient dissolus & par trop de-
 licats en leurs meurs : il nourrit deux chiens nez de
 mesme pere & de mesme mere, & en accoustuma
 l'un à toutes friandises, le tenant en la maison, &
 l'autre le menant aux champs l'exercita à la chasse:
 puis les amena tous deux en pleine assemblee de
 ville, où estoit tout le peuple, & meir deuant eulx
 des friandises, & fait aussi lascher vn lièvre : l'un &
 l'autre se rua incontinent sur ce à quoy il auoit esté
 nourry : car l'un alla à la soupe, & l'autre prit le
 lièvre:

A lièvre: & lors il leur dit, Vous voiez citoiens mes a-
" mis, comme ces deux chiens estants nez de mesme
" pere & mere sont deuenus fort differents l'un de
" l'autre pour leur diuerse education: & combien
" peult plus, à rendre les hommes vertueux, la nour-
" riture que non pas la nature. Les autres disent
plus, que les deux chiens n'estoient pas nez de mes-
me pere & mesme mere, ains que l'un estoit né de
ceux dont on se sert à garder la maison, & l'autre
de ceux dont on vse à la chasse: & qu'il exercita
celuy qui estoit de la pire race à chasser, & celuy
B qui estoit de la meilleure à gourmander seulement:
& puis que l'un & l'autre eust couru à ce à quoy il
auoit esté accoustumé de ieunesse, apres leur auoir
faict veoir à l'œil, de combien sert la nourriture à
prendre de bonnes ou de mauuaises conditions, il
" leur dit adóc: Par là cognoissez vous, mes amis, que
" rien ne sert la noblesse qui est tant estimee du vul-
" gaire, ny l'estre descendu de la race d'Hercules, si
" nous ne faisons les œuvres par lesquelles il s'est en
" son viuant rendu le plus illustre & le plus glorieux
" homme du monde, apprenans & exerceans toute
C nostre vie, choses honestes & vertueuses. Et aiant
faict le departement de tout le territoire, & en aiant
donné à chascun citoyen egale portion, lon dit que
quelque temps-apres retournant d'un voiage, &
voiant les bleds de nagueres moissonnez, & les
mouls & tas des gerbes situez de rég tous egaulx
& sēblables les vns aux autres, il en fut fort ioyeux
en son cœur, & dit en riāt à ceux qui estoient autour
de luy, que tout le pais de la Laconie luy sembloit

vn heritage de plusieurs freres qui de nagueres euf-
 sent faißt leurs partages ensemble . Aiant aussi in-
 troduit abolition de toutes debtes , il fut en volôté
 de faire encore le repartement de tous les vtenfiles
 & meubles qui estoient és maisons pour les distri-
 buer egallement, à celle fin qu'il ostant toute impa-
 rité & toute inegalité d'entre ses citoiens : mais
 voiant que mal-aïseemēt ils supporteroient qu'on
 les leur ostant ouuertement, il descria premieremēt
 toute sorte de monnoye d'or & d'argent, comman-
 dant que lon n'vlast que de celle de fer, & taxa iuf-
 ques à quelle somme on pouuoit auoir tout son F
 vaillant à l'estimation de ceste monnoye là . Cela
 faißt, il chassa tout crime & toute iniustice hors de
 Lacedemone : car on ne pouuoit plus ny derobier,
 ny raurir par force, ny prendre par corruptions , ny
 defrauder en contractant vne chose que lon ne
 pouuoit cacher, qui n'estoit point desirable à pos-
 seder, dont on ne pouuoit vser sans peril, ny ame-
 ner ens ou emmener hors à seureté : & quant &
 quant , par ce mesme moien il bannit de Lacede-
 mone toute superfluité, pource qu'il n'y auoit plus
 ny marchand , ny plaideur, ny deuin ou diseur de F
 bonne aduventure, ny questeur, ny ingenieur & de-
 uiseur de nouueaux bastiments qui hantast à Spar-
 te, à cause qu'il n'y laissa sorte quelcōque de mon-
 noye qui peust seruir ailleurs, & y donna cours
 seulement à celle de fer , qui quant au pois pesoit
 vne liure Æginetique, & de pris ne valoit qu'en-
 uiron six deniers . Et deliberant de courir sus en-
 core plus aux delices, & du tout retrencher la con-
 uoitise

Auoitise des richesses , il introduisit ce qu'ils ap-
pelloient les cōuiues:& à quelques vns qui luy de-
mandoient, pour quelle cause il les auoit instituez,
& pourquoy il auoit ainsi diuisé ses citoiens en pe-
tites tablees avec leurs armes:à fin, dit-il, qu'ils
soient plus prompts à receuoir les commandemēs
de leurs superieurs, & que si d'aduēture il se mēne
quelque prattique de nouuelleté parmy eux, la
faute en soit entre petit nombre: & outre ce, à fin
qu'il y ait egalité entre eux en leur manger & en
leur boire:& que ny en leur viāde, ny en leur boif-
son, ny mesme en leur coucher ou vestir, ny en
leurs vtēsiles domestiques, ny en autre chose quel-
le qu'elle fust, le riche n'eust aucun auantage sur le
pauure. Et par ce moien aiant rendu la richesse
non desirable, attendu qu'il n'y auoit ordre de s'en
pouuoir valoir ny seulement la monstrier, il disoit
à ses familiers, O mes amis, la belle chose que
c'est de faire cognoistre par effect que Pluton, c'est
à dire la richesse, est à la verité aueugle, cōme il est!
Car il faisoit mesme prendre garde, qu'ils ne peus-
sent premierement disner en leurs maisons, &
puis s'en aller tous saouls és salles de leurs cōuiues
remplis d'autres viandes & d'autres bruuages: car
les autres disoient iniure à celuy qui ne buuoit &
ne mangeoit pas de bon appetit avec eux, comme
estant homme gourmand ou friand, & qui par de-
licateffe dedaignoit la cōmune maniere de viure:
mais si d'aduenture il se trouuoit que quelqu'un
l'eust faict, il en estoit trespben cōdamné à l'amen-
de. Delà vint que long temps apres le Roy Agis

à son retour du voyage de la guerre, auquel il auoit ^D
subiugué les Atheniens, voulant soupper en son
priué avec sa femme, enuoya à la cuisine de son
conuiue demander sa portion: les mareschaux du
camp, superintendans de la guerre, ne la luy vou-
lurent pas enuoyer: & le lendemain la chose estât
venue à la cognoissance des Ephores, il en fut par
eux condamné à l'amende. Parquoy les riches
de la ville indignez de ces nouuelles ordonnances,
se leuerent alencontre de luy, & luy disans outrages
luy ietterent des pierres, le voulans assommer:
mais se voiant ainsi furieusement poursuiuy, il se ^E
sauua de vistesse à trauers la place, & se ietta en
franchise dedans le temple de Minerue Chalceæ-
cos, auant que les autres le peussent atteindre, ex-
cepté Alcander, lequel ainsi qu'il se cuida retour-
ner pour veoir qui le poursuiuoit, d'un coup de
baston luy ietta l'œil hors de la teste. Mais celuy
la depuis, par cōmune sentence de toute la ville, luy
fut mis entre ses mains pour en faire punition exē-
plaire, telle comme bon luy sembleroit: toutefois
il ne luy feit mal ne desplaisir quelconque: & qui
plus est, ne se plaignit iamais à luy du tort qu'il luy ^F
auoit fait: ains l'ayant domestiquement viuant
avec luy, le rēdit tel, qu'il ne faisoit autre chose que
prescher par tout ses louanges, & la façon de viure
qu'il auoit apprise avec luy, se monstrāt grand ze-
lateur de la discipline qu'il auoit mise sus: mais au
reste pour memoire de l'accident qui luy estoit
aduenu, il feit bastir dedans le temple de Minerue
vne chappelle, qu'il nomma de Minerue Optile-
tide,

A ride, pource que les Doriens de celle marche appellent les yeux Optiles. On luy demanda quelquefois, pourquoy il n'auoit point estably de loix
» escriptes : Pour ce, dit-il, que ceux qui sont bien
» nourris & instituez en telle discipline qu'il appartient, sçauent bien iuger ce que le temps requiert.
Et à ceux qui l'interroguoient pourquoy il auoit ordonné, que lon feist les couuertures des maisons avec la coignee, & les portes avec la scie seulemēt, sans y employer autre vtil ny instrument quelcon-
» que: il respondit, A fin que nos citoiens soiēt moderez & non superflus en toutes choses que lon
B apporte en la maison, & qu'ils n'aient rien chez eux de ce qui est tant estimé & tant requis ailleurs.

De ceste accoustumance proceda, comme lon dit, que le roy Leotychides premier de ce nom, soup-
pant en la maison d'un sien hoste, & considerant le planché de la salle, qui estoit sumptueusement enrichi & lambricé magnifiquemēt, demāda à son hoste si les arbres en leurs païs naissoient quārez.
Estāt aussi enquis pourquoy il auoit defendu que lon ne feist souuent la guerre contre de mesmes
c ennemis: de peur, dit-il, qu'estās souuent cōtraincts
» par ce moien de se mettre en defense, ils n'en deuiennent à la fin bien experimentez à la guerre. Et
» pourtant depuis blasma lon grandement Agefilaus d'auoir esté cause par ses continuelles expeditions & inuasions en la Bœoce, de rendre les Thebains egaux en armes aux Lacedemoniēs. Quelque
autre luy demāda aussi pourquoy il faisoit exerciter les corps des filles à marier, à courir, à luieter & iet-

20 ter la barre, & à lancer le dard, A fin dit-il, que l'en- D
 20 racinement des enfans qui viendroient à estre en-
 20 gendrez d'elles, venant à prendre son pied en des
 20 corps robustes & dispos, en germaist mieux, &
 20 qu'elles en estant plus fortes & plus robustes en
 20 supportassent mieux leurs enfentemens, & en re-
 20 sistassent plus vigoureusement & plus facilement
 20 aux douleurs de leurs travaux, & oultre, que si be-
 20 soing estoit elles peussent aussi combattre pour la
 20 defense d'elles, de leurs enfans, & de leurs pais.

Quelques vns reprenoient la coustume qu'il auoit
 introduitte, que les filles à certains iours de festes E
 allassent ballans par la ville toutes nues, & luy en
 20 demandoient la cause: à fin, respondit-il, que fai-
 20 sans les mesmes exercices que font les hommes,
 20 elles n'eussent rien moins qu'eux, ny quāt à la force
 20 & santé du corps, ny quant à la vertu & generosité
 20 de l'ame, & qu'elles s'accoustumassent à mespriser
 20 l'opinion du vulgaire. D'où vint que la femme de
 Leonidas nommee Gorgo, ainsi que lon trouue
 par escript, respondit à quelques Dames estrāge-
 20 res qui luy disoiēt: Il n'y a que vous autres femmes
 20 Laconienes qui commādiez à voz marits: aussi n'y F
 20 a il que nous qui portions des hommes. Il priua
 aussi & bannit ceux qui n'estoient point mariez de
 la veuë des danfes où les ieunes filles dansoient à
 nud, & qui plus est leur imposa encore note d'in-
 famie, en les priuant notamment de l'honneur &
 du seruicē que les ieunes estoient tenus de porter
 & de faire aux vieux: en quoy faisant, il eut grande
 preuoyance à inciter ses citoiens à se marier pour
 engen-

A engendrer des enfans : à l'occasion dequoy il n'y eut oncques personne qui trouuaſt mauuais, ne qui blaſmaſt ce qui fut dit à Dercillidas, combien qu'il fuſt au demourant bon & vaillant capitaine: car luy entrant en quelque lieu, il y eut vn des ieunes hōmes qui ne ſe daigna leuer de ſon ſiege par
» honneur au deuant de luy: pource, luy dit-il, que tu
» n'as point engendré qui ſe leuaſt au deuant de moy.

Vn autre l'enqueroit pourquoy il auoit inſtitué
» que les filles fuſſent mariees ſans dot: à fin, dit-il,
» que ny à faute de dot, il n'y en euſt qui demouraf-
B ſent à marier, ne qui pour les biens fuſſent requi-
» ſes, ains qu'en regardant aux meurs & conditions
» de la fille, chaſcun feiſt election de la vertu en celle
» qu'il vouldroit eſpouſer: & c'eſt auſſi la cauſe, pour
laquelle il chaſſa toute ſorte de fard & d'embellif-
ſement artificiel hors la ville de Sparte. Aiant
auſſi prefix vn certain temps, dedans lequel tant
les filles que les ieunes hommes ſe pourroient ma-
rier, quelqu'vn luy demāda pourquoy il leur auoit
» ainſi prefix le temps: il reſpōdit, à fin que ce qu'ils
» engendreront ſoit fort & puiſſant, comme eſtant
c engendré de perſonnes entieres & toutes faittes.
Et à ceux qui ſ'eſbaïſſoient, pourquoy il n'auoit
pas voulu que le nouueau marié couchaſt avec
ſon eſpouſee, ains auoit expreſſément ordonné
qu'il fuſt la plus part du iour avec ſes compagnons,
& les nuits toutes entieres, & qu'il allaſt veoir ſa
femme à la deſrobee, aiant crainte & honte d'e-
ſtre ſurpris avec elle: c'eſt à fin, dit-il, qu'ils en ſoiēt
» touſiours plus forts & diſpos de leurs corps, &

„ qu'en ne iouissant pas du plaisir à cœur saoul, leur D
 „ amour en demeure tousiours frais, & que leurs
 „ enfans en viennent plus robustes. Il bannit aussi
 toutes huiles de senteurs precieuses, disant que ce
 n'estoit que toute corruption & peste du naturel
 de l'huile, & l'art de la tainture, comme estant tou-
 te flatterie des sens. Brief il rendit la ville de Spar-
 te inaccessible à tous ouuriers de ioyaux, d'affi-
 quets, & de tous ornemens dont on vse pour pa-
 rer le corps, disant que la corruptelle de tels arts
 auoit esté cause de gaster & abbastardir les bons
 mestiers: & estoit en ce temps la l'honnesteté & la E
 pudicité des Dames si grande & si esloignee de la
 facilité que lon dict auoir esté depuis parmy elles,
 que lon tenoit l'adultere pour vne chose impossi-
 ble & incroyable. Auquel propos on recite d'un
 fort ancien Spartiate nommé Geradatas, à qui vn
 estranger demāda quelle punition on faisoit souf-
 frir aux adulteres en la ville de Sparte, pour ce
 qu'il voioit que Lycurgus n'en auoit faict aucune
 „ ordonnance: Et qu'il luy respondit, Il n'y a point
 „ d'adultere parmy nous: l'autre luy repliqua, Voy-
 re-mais, s'il y en auoit: il respōdit tousiours de mes- F
 „ me: Car comment, dit-il, y auroit il des d'adulteres
 „ à Sparte, veu que toutes richesses, toutes delices,
 „ tous fards, & tous embellissemens extérieurs y
 „ sont desprizez & deshonoréz? & veu que honte de
 „ mal faire, honesteté & reuerence & obeïssance
 „ enuers ses superieurs y ont toute authorité. Quel-
 qu'un s'aduancea vn iour de luy dire, qu'il establist
 le gouuernement de l'estat populaire à Sparte: Il
 luy

A luy respondit, Commance toy mesme le premier à
„ le mettre en ta maison. A vn autre qui luy de-
„ mandoit, pourquoy il auoit ordonné des sacrifices
„ si simples & de si peu de valeur en Lacedemone: à
„ fin que nous ne cessiōs iamais de reuerer & hono-
„ rer les Dieux. Et aiant permis à ses citoiēs de iouër
„ & exercer seulement les exercices du corps, es-
„ quels on n'estend point la main, on luy en deman-
„ da la raison: à fin, dit-il, que nul des nostres ne s'ac-
„ coustume à se laisser ny à se rendre iamais. Enquis
„ aussi, pourquoy il auoit institué que lon changeast
„ souuent de camp, & que lon ne cāpast point long
„ temps en vn mesme lieu: à fin, dit-il, que lon face
„ plus de dommage aux ennemis. Et à vn autre qui
„ demandoit, pourquoy il auoit defendu d'assaillir
„ des murailles: de peur, respondit-il, que vn homme
„ de bien ne fust tué par vne femme, ou par vn en-
„ fant, ou personne semblable. Quelques Thebains
„ luy demandoiēt son aduis, touchant le sacrifice &
„ le dueil qu'ils font à l'hōneur de Leucothoé: il leur
„ respondit, Si vous pēsez que ce soit vne Deesse, ne
„ la plorez point comme vne femme: & si vous pen-
„ sez que ce soit vne femme, ne luy sacrifiez point
„ cōme à vne Deesse. A ses citoiens qui luy deman-
„ doient comment ils pourroient repoulser les inua-
„ sions de leurs ennemis, Si vous demourez pauvres,
„ & que l'vn ne cōuoite point d'auoir plus que l'au-
„ tre. Et de rechef cōme ils luy demandassent, pour-
„ quoy il ne vouloit point que leur ville fust muree:
„ il leur respondit, que la ville n'estoit pas sans mu-
„ raille, qui estoit enuironnee de vaillans hommes,

& non pas de brique. Les Spartiates aussi estoient curieux de bien accoustre leurs cheueux, rememorans vn certain propos de Lycurgus touchant cela, „ qui souloit dire, que les cheueux rendoient ceux „ qui sont beaux encore plus beaux, & ceux qui sont „ laids hydeux & espouuentables. Il leur cōmanda aussi qu'en leurs guerres, quand ils auroient vaincu & rompu leurs ennemis, qu'ils les chassassent iusques à asseurer leur victoire toute certaine, & puis qu'ils se retirassent tout court, disant que cela n'estoit acte ny de gentil cœur ny de nation genereuse comme la Grecque, de tuer ceux qui leur quittoient la place: & cela encore leur estoit vtile, pource que ceux qui sçauoient leur coustume, qui estoit de mettre à mort ceux qui s'opiniastroient à leur faire teste, & laissoient aller ceux qui fuyoiēt deuant eux, trouuoient le fuir plus vtile que l'attendre. Quelqu'un luy demandoit pour quelle cause il leur auoit defendu de despouiller les corps „ de leur ennemis morts: de peur, dit-il, que s'amu- „ sans la teste basse à recueillir ces despouilles, ils ne „ se souciaissent point de combattre ce pendant, ains „ qu'ils entendissent seulement à garder leur pau- „ ureté & leur reng. Le tyran de Sicile Dionysius auoit enuoyé deux robes de femme à Lyfander, à fin qu'il en choisist laquelle il aimerait mieux pour porter à sa fille: il dit, qu'elle mesme sçauroit mieux choisir celle qui luy seroit plus à propos, & les emporta toutes deux. Cestuy Lyfander fut homme fort ruzé & grand trompeur, qui conduisoit la plus part de ses affaires par finesse & par ruzes,

A estimant qu'il n'y eust point d'autre iustice que l'utilité, ny autre honesteté que le profit : confessant bien que la verité estoit meilleure que la faulseté ; mais que la dignité & le pris de l'une & de l'autre se deuoit mesurer & terminer à la commodité. Et à ceux qui le reprenoient & blasmoient de ce qu'il conduisoit ainsi la plus part de ses entreprises par tromperies & par fallace, & non pas par viue force, qui estoit chose indigne de la magnanimité
„ d'Hercules, il respondoit en riant, que là où il ne
„ pouuoit aduenir avec la peau de lion, il y falloit
B coudre vn peu de celle du regnard. Et comme d'autres l'accusassent grandement de ce qu'il auoit faulsé & violé ses sermens qu'il auoit faicts en la
„ ville de Milet : Il faut, dit-il, tromper les enfans
„ avec des osselets, & les hommes avec des iuremets. Aiant desfaict les Atheniens par surprise en bataille nauale, à l'endroit qui se nommoit le fleuve de la chéure, & depuis les aiant presseés de famine si estroittement qu'il les contraignit de rendre
„ leur ville à sa mercy, il escriuit aux Ephores, Athenes est prise. Les Lacedemoniens eurent de son
C temps quelque different avec les Argiens touchant leurs confins, & sembloit que ceux d'Argos alleguassent de meilleures raisons pour eux : Il desgaina son espee & leur dit, Ceux qui seront les plus
„ forts avec ceste cy, seront ceux qui plaideront le
„ mieux pour leurs confins. Et voiant que les Bœotiens balanceoient n'estans pas bien resolués ne certains de quel costé ils se deuoient renger, en passant à trauers leurs pais, il leur enuoya demander lequel

ils aimoient mieux, qu'il passast parmy leurs ter-
res à picques dressées, ou à picques baissées. En
vne assemblee des estats de la Grece, il y eut vn
Megarien qui parla brauement & audacieusemēt
à luy: il luy dit, Tes propos mon amy, auroient be-
soin d'vne cité. voulāt dire, qu'il estoit d'vne trop
petite & foible ville pour parler si hardiment. Les
Corinthiens s'estoient rebellez contre eux, & luy
auoit amené son armee tout contre leurs murail-
les, que les Lacedemoniens assailloient assez froi-
dement: mais à l'instant il se leua vn lièvre de de-
dans, qui trauersa le fossé, & adonc il leur dit, N'a-
uez vous point de honte Spartiates de doubter de
tels ennemis, qui sont si paresseux que les lièvres
dorment dedans l'enceinte de leurs murailles?

Estant allé à l'oracle de Samothrace pour en auoir
response, le presbtre luy dit qu'il luy confessast ce
qu'il auoit fait de plus meschant cas en toute sa
vie: Il luy demanda, si c'estoit luy ou les Dieux qui
luy cōmandassent de ce faire: le presbtre luy respō-
dit, que c'estoient les Dieux qui luy cōmandoient:
Retire toy doncques vn peu arriere, & ie le diray
aux Dieux, s'ils le me demandent. Vn Persien luy
demandoit, quelle sorte de gouuernement il pri-
soit le plus: celle, dit-il, qui ordonne aux lasches &
aux vaillans tel loyer comme il leur appartient.

Vn autre luy disoit, que par tout il le louoit & le
fendoit en toutes compagnies: l'ay, dit-il, deux
bœufs en ma mestairie qui ne parlēt point ny l'vn
ny l'autre, mais ie ne laissē pas de sçauoir pourtant
lequel besongne biē, & lequel ne fait riē qui vaille.

A vn autre qui luy disoit plusieurs paroles iniu-
rieuses, Vomy hardiment estranger mon amy,
Vomy hardiment & souuent, ne t'y espargne pas,
pour veoir si tu pourrois vuidier ton ame des maux
& meschancetez dont elle est pleine. Depuis
estant venu à mourir, il sourdit quelque different
entre les alliez de Lacedemone touchant quelques
affaires, & pour en sçauoir la verité, Agesilaus
alla en la maison de Lyfander visiter les papiers
qui en faisoient mention, là où entre autres il trou-
ua vne harengue, par laquelle il suadoit à ceux de
B Sparte, d'oster la royauté aux familles des Eury-
protides & des Agides, & la remettre librement à
l'election des citoiens pour elire de toute la ville
ceux qui seroiēt trouuez les plus gens de biē, à fin
que lon ne fust plus obligé d'elire quelqu'un de la
race d'Hercules, ains que ce fust vn loyer que lon
peust deferer à celuy qui en vertu ressembleroit
plus à Hercules, attendu mesmement que c'estoit
par le moien d'icelle, que lon luy auoit attribué
honneurs tels qu'aux Dieux. Agesilaus fut entre
deux de publier ceste oraison là, pour faire cognoi-
estre à ceux de Sparte que Lyfander auoit esté autre
que lon ne l'estimoit: & quant & quant aussi pour
mettre en souspeçon ceux qui estoient demourez
de ses amis: mais lon dit que Cratidas, qui estoit
lors le premier des Ephores, craignant que si ceste
harēgue venoit à estre leuē & publiee, elle ne per-
suadast ce qu'elle pretēdoit, reteint Agesilaus, & le
garda de ce faire, luy disant, qu'il ne falloit point
deterrer Lyfander, mais plus tost enterrer quād &

luy son oraison , tant elle estoit ingenieusement & artificiellement composée pour persuader . Il y auoit des gentils-hommes de la ville qui durant sa vie auoient poursuiuy ses filles en mariage , & puis apres sa mort quād on trouua qu'il estoit demouré pauvre, s'en estoient desdits : les Ephores les condamnerent en grosses amendes , pour ce qu'ils luy auoiēt faict la court pendant qu'ils l'auoiēt estimé riche, & puis quād ils l'auoient trouué iuste & hōme de bien par sa pauureté , ils n'en auoient plus tenu cōpte. Namertes estant enuoyé ambassadeur quelque part, il y eut vn de ceux où il estoit enuoyé qui luy dit, qu'il le tenoit & reputoit pour homme bien-heureux , d'autant qu'il auoit beaucoup d'amis: il luy demanda, si l'on sçauoit bien la preuue, à laquelle on cognoissoit si l'on auoit beaucoup d'amis: l'autre luy dit que non , mais qu'il le prioit de la luy enseigner: C'est, dit-il, aduersité. Nicander respondit à quelqu'un qui luy rapportoit , que les Argiēs mesdisoient de luy: aussi en font ils chastiez & punis de mesdire des gens de bien . Et à celuy qui l'interroguoit , pourquoy les Lacedemoniens portoiet longs cheueux , & laissoient croistre leurs barbes: pource dit-il, que c'est le plus beau paremēt que sçauoit porter l'hōme, & qui couste le moins, & si luy est propre. Vn Athenien luy dit quelque fois en deuissant ensemble, Vous autres Lacedemoniens, Nicander, aimez trop l'oysiueté: Tu dis la verité , respondit-il , mais nous ne trauaillons pas à choses de neant cōme vous. Panthoidas estāt enuoyé ambassadeur en Asie, ceux du païs luy monstroient

A stroyét par singularité vne ville fermee de fortes &
„ hautes murailles: Par les Dieux, dit-il, mes amis, c'est
„ vn beau ferrail à tenir des femmes. En l'eschole de
l'Academie des philosophes deuisoient & discou-
roient de plusieurs beaux & bons propos, & apres
auoir acheué luy demanderent, Et bien Seigneur
Panthoidas, que vous semble il de ces discours là?
„ Que m'en sçauroit il sembler, dit-il, autre chose, si-
„ non qu'ils sont beaux & bons, mais au demourant
„ inutiles, pource que vous n'en faictes rien. Pausa-
nias le fils de Cleombrotus respondit aux habitans
B de l'Isle de Delos, qui querelloient & plaidoient de
la propriété de l'Isle, alencontre des Atheniens, al-
leguans, que par vne ancienne loy, de tout temps
obseruee en leur pais, ny les femmes n'enfantent
„ dedans l'Isle, ny les morts n'y sont enseuelis, Com-
„ ment doncques est elle vostre pais, si piece de vous
„ n'y nasquit oncques, ne n'y fut iamais enseuely?
Les bannis d'Athenes le sollicitoiét de mener son
armee cōtre les Atheniens, & pour plus l'irriter à ce
faire, luy disoient qu'il n'y auoit eu que les Athe-
niés seuls qui l'eussent sifflé, lors qu'il fut déclaré
C vainqueur en la feste des ieux olympiques. Or que
„ pensez vous dit-il, qu'ils feront, quand nous leur
„ aurons faict mal, puis qu'il nous ont sifflez quand
„ nous leur auōs faict du bien? Vn autre luy demāda
pourquoy ils auoiét faict le poëte Tyrteus leur ci-
„ toien: à fin, dit-il, qu'il ne fust point trouué qu'un
„ estrāger eust iamais esté nostre capitaine. Il y auoit
vn fort debile & flouët de corps qui neantmoins
mettoit en auāt qu'il falloir faire la guerre aux en-

„ nemis, & les cōbattre par mer & par terre: Veux tu D
 „ point, dit-il, te despouiller, à fin que l'assistāce voye,
 „ quel estant, tu nous conseilles de cōbattre? Quel-
 „ ques vns s'esmerueilloiēt en voiant les despouilles
 „ des corps barbares, apres qu'ils auoiēt esté tuez, de
 „ la sumptuosité & grande valeur d'iceux. Il eust
 „ esté meilleur, dit-il, que eux eussent beaucoup va-
 „ lu, que non pas leurs habillements. Apres la vi-
 „ ctoire que les Grēcs gaignerent contre les Perles
 „ deuant la ville de Platees, il commanda que lon
 „ le seruist du soupper que les Perles auoiēt faict ap-
 „ prester pour eux, lequel estant plantureux & sum- E
 „ ptueux à merueilles: Par les Dieux, dit-il, il faut
 „ bien dire que les Perles sont bien gourmands, veu
 „ qu'ayant tant de viures, ils venoient encore pour
 „ nous manger nostre gros pain. Pausanias fils de
 „ Plistonax à vn qui l'interroguoit, pourquoy il n'e-
 „ stoit pas loysible en leur pais de remuer aucune
 „ des loix ancienes: c'est, dit-il, pource qu'il faut que
 „ les loix soient maistresses des hommes, & non pas
 „ les hommes maistres des loix. Et comme estāt en
 „ la ville de Tegee fugitif de Sparte, il louast les La-
 „ cedemoniens: quelqu'un des assistās luy dit, Pour- F
 „ quoy doncques n'es tu demouré à Sparte, puis
 „ qu'ils sont si gens de bien? & pourquoy t'en es tu
 „ fuy? pource, dit-il, que les medecins n'ont pas ac-
 „ coustumé de se tenir là où les hommes sont sains,
 „ mais là où ils sont malades. Quelqu'un luy de-
 „ manda, Comment pourrons nous venir à bout de
 „ desfaire ces Thraciens? Si nous choisissons le plus
 „ vaillant hōme pour nostre capitaine. Vn medecin
 le

A le regardoit & consideroit, & apres l'auoir bien re-
gardé luy dit, Tu n'as point de mal : c'est, dit-il,
pource que ie n'vse point de toy. Ses amis le re-
prenoient de ce qu'il disoit mal d'un medecin, du-
quel il n'auoit iamais faict preuue aucune, & n'en
auoit iamais receu desplaisir. Si i'en auois fait preu-
ue, dit-il, ie ne ferois pas ores viuât. Et côme le me-
decin luy dist, Tu es deuenue vieil. Ouy, dit-il, pour
ce que ie ne me suis passeruy de toy pour medecin.
Il souloit aussi dire, Que le meilleur medecin estoit
celuy, qui ne laissoit point pourrir ses patients, ains
les mettoit bien tost en terre. Pédaretus respōdit à
l'un de ses cōpagnons qui luy disoit, Nos ennemis
sont en grand nōbre: Nous en acquerrons tāt plus
d'hōneur, car nous en tuerons d'auātage. Voiant
un qui de sa nature estoit lasche & couard, mais
qui au demourāt estoit loué de ses citoiens d'autāt
qu'il estoit hōme modeste: Il ne faut, dit-il, louer ny
les hommes pour estre semblables aux femmes, ny
les femmes pour ressembler aux hōmes, si d'aduē-
ture la femme par quelque occasion n'y est con-
traincte. Aiāt failly à estre receu au cōseil des trois
cents, qui estoit le degré le plus honorable de toute
la chose publique, il se partit de l'assemblée tout
riant & tout gay. Les Ephores le renuoyerēt que-
rir, & luy demanderent pourquoy il rioit: pource,
dit-il, que ie m'esiois avec nostre ville, de ce qu'el-
le a trois cents hōmes plus gens de bien que moy.
Plistarchus fils de Leonidas respōdit à un qui l'en-
queroit pourquoy ils n'auoient pris la denomina-
tiō de leur famille du nom de leurs premiers Rois,

„ ains des derniers: Pource, dit-il, que ces premiers la D
 „ ont mieux aimé estre chefs que roys, mais leurs suc
 „ cesseurs non. Il y auoit vn aduocat qui en plaidât,
 ne cessoit iamais de dire quelques gaudisseries, &
 „ quelques traicts de risée. Mon amy, luy dit-il, Tu
 „ ne te dōneras garde, qu'en voulant ainsi faire rire
 „ les autres à tout propos, tu te trouueras ridicule &
 „ mocqué toy mesme, ne plus ne moins que ceux
 „ qui luictēt souuēt deuiennēt à la fin bons luicteurs.

On luy rapporta vn iour que vn certain mesdisant
 qui detractoit de tout le monde, disoit bien de luy: E
 „ Je m'en esbahy, dit-il, si ce n'est que quelqu'un luy
 „ ait rapporté que ie sois mort: car quant à luy, il ne
 „ sceut oncques dire bien de personne viuāte. Pli-
 stonax fils de Pausanias, cōme vn certain orateur
 Athenien appellaist les Lacedemoniens ignorans:
 „ Tu dis vray, luy respōdit-il, car nous sommes seuls
 „ entre tous les Grecs, qui n'auons rien appris de mal
 „ de vous. Polydorus fils d'Alcamenes dit à vn qui
 ordinairement ne faisoit que menasser les ennemis,
 „ Ne t'apperçois tu pas que tu cōsumes la plus part
 „ de ta vengeance en ces menasses? Il menoit vne fois
 l'armee de Lacedemone cōtre la ville de Messene, F
 „ quelqu'un luy demanda s'il auroit bien le cœur de
 „ faire la guerre à leurs freres: non, dit-il, mais ie vais
 „ en la terre qui n'a pas encore esté partagee aux
 „ lots. Les Argiens apres la descōfiture de leurs trois
 cens hōmes, qui combattirēt contre autres tant de
 Lacedemoniēs, furent encore tous desfaits en bat-
 taille rengee: au moien dequoy les allies & cōfede-
 rez sollicitoient Polydorus de ne laisser pas eschap-
 per

A per vne si belle occasion, ains d'aller tout de ce pas
dōner l'assaut à la muraille de leur ville & la pren-
dre, ce qui luy seroit lors tresfacile, attendu que les
hommes auoient esté tuez, & n'y estoit demouré
» que les femmes dedans : il leur respondit, Il m'est
» tourné à grande gloire d'auoir vaincu & desfait en
» bataille mes ennemis, en combattāt de pair à pair :
» mais estant venu combattre seulement pour noz
» confins, & puis conuoiter de prédre encore & gai-
» gner leur ville, ie ne trouue pas que ce soit chose
» iuste : car ie suis venu pour recouurer ce qu'ils oc-
B cupoient de nostre terre, non pas pour leur oster
» & saisir leur ville. Estant enquis pourquoy les La-
cedemoniens s'exposioient ainsi hardiment aux pe-
» rils de la guerre : pour ce, dit il, qu'ils ont appris à a-
» uoir honte & non pas crainte de leurs superieurs.

Polycratidas aiant esté enuoyé avec d'autres en
ambassade deuers les lieutenans du Roy de Perse,
comme eulx leur demandassent s'ils venoient de
leur propre mouuement, ou s'ils estoient enuoyez
» du public : Si nous obtenons ce que nous deman-
» dons, dit il, c'est de la part du public que nous ve-
c nons : si non, c'est de nostre propre mouuement.
» Phœbidas vn peu deuant la bataille Leuctrique,
comme quelques vns dissent, ce iour icy mōstrera
» qui sera homme de bien : C'est doncques, dit il, vn
» iour qui vaut beaucoup, si a la puissance de mon-
» strer qui est homme de bien, ou non. Soüs, à ce
que lon dit, estāt vn iour assiegé fort à destroit par
les Clitoriens, en vn lieu aspre où il n'y auoit point
d'eau, leur feit offre de leur rendre toutes les terres

qu'il auoit conquises sur eulx, moiennāt qu'il beust D
 luy & toute sa cōpagnie en vne fontaine qui estoit
 assez pres de là. Les Clitoriens le luy accorderent,
 & fut l'appointement ainsi iuré entre eulx. Si feit
 donc assembler ses gents, & leur declara s'il y auoit
 aucun d'eulx qui se voulust abstenir de boire, qu'il
 luy cederait & donnerait sa royauté : il n'y eut pas
 vn en toute la troupe qui s'en peust garder, tant
 ils estoient pressez de la soif, ains beurēt tous à bon
 esciant, excepté luy, qui descendant tout le der-
 nier, ne feit autre chose que seulement se refreschir
 & arroser vn petit par dehors en presēce des en- E
 nemis mesmes, sans boire vne seule goutte : au
 moien dequoy il ne voulut point rendre les terres
 depuis, comme il auoit promis, alleguant qu'ils
 n'auoient pas tous beu. Telecrus respondit à
 „ quelqu'un qui se plaignoit à luy de ce que son pere
 „ mesdisoit tousiours de luy, S'il n'en falloĩt mesdire,
 „ il ne le feroit pas. Son frere aussi se mescontentoit
 de ce que les citoiens ne se deportoient pas en son
 endroit comme ils faisoient enuers luy, combien
 qu'ils fussent nez de mesme pere & de mesme me-
 „ re, ains le traictioient plus iniquement : C'est, dit il, F
 „ pour ce que tu ne sçais pas cōporter vn tort com-
 „ me ie fais. Estant enquis pourquoy la coustume
 „ estoit en leur païs, que les ieunes se leuassent de
 „ leurs sieges au deuant des vieux : C'est, dit il, à fin
 „ qu'en faisant cest honneur à ceulx qui ne leur ap-
 „ partienent point, ils apprennent à en honorer d'a-
 „ uantage leurs peres & meres. A vn autre qui luy
 demandoit combien il auoit de biens : le n'en ay,
 dit

A dir il, pas plus qu'il m'en fault. Charillus enquis
pourquoy Lycurgus leur auoit fait si peu de loix:
» pour ce, dit il, qu'il ne fault pas beaucoup de loix à
» ceux qui ne parlent gueres. Vn autre luy deman-
doit, pourquoy ils faisoient sortir les filles en public
» à visage descouuert, & les femmes voilees: pour ce,
» dit il, qu'il fault que les filles trouuent mary, & que
» les femmes gardent celuy qu'elles ont. Vn des

Ilotes se portant quelquefois par trop audacieuse-
» ment enuers luy, il luy dit, Si ie n'estois courroucé
» ie te tuerois toute à ceste heure. On luy demanda
B quelle sorte de gouuernement il estimoit la meil-
» leure: celle, dit il, où plusieurs s'entremettans des
» affaires de la chose publique, sans querelle ne sedi-
» tion, font à l'enuy à qui sera plus vertueux. A vn
autre qui l'interroguoit pourquoy lon faisoit à
» Sparte les images de tous les Dieux armées: à fin,
» dit il, que ce que lon reproche aux hommes couards
» ne leur puisse conuenir, & que les ieunes hommes
» ne facēt iamais prieres aux Dieux sans leurs armes.

Les Samiens auoient enuoyé des ambassadeurs à
Sparte, lesquels furēt vn peu longs en leurs haren-
c gues: apres qu'ils eurent acheué de dire, les seigneurs
» Spartiates leur respondirent, Nous auons oublié le
» commencement, & n'auons pas entendu la fin,
» pour ce que nous auons oublié le commencement.

Ceux de Thebes leur contredisoient brauement
» en quelque dispute: ils leur respondirent, Il fault
» que vous aiez ou moins de cœur, ou plus de puis-
» sance. On demanda quelquefois à vn Laconien,
pourquoy il laissoit croistre sa barbe si fort longue:

„ à fin, dit il, que voiant mon poil blanc, ie ne face D
 „ rien indigne de ceste blancheur chenuë. Vn au-
 „ tre entendoit que lon louoit des hommes com-
 „ me des tres-vaillans combattans: deuant Troie la
 „ grande, dit il. Vn autre oiant dire qu'en quelques
 „ villes on contraignoit les hommes de boire apres
 „ qu'ils auoient souppé: les cōtrainct on point aussi,
 „ dit il, de manger? Le poëte Pindare en l'un de ses
 „ Cantiques appelle la ville d'Athenes le soustene-
 „ ment de la Grece: Elle tombera doncques bien
 „ tost, dit vn Laconien, si elle est soustenue d'un tel
 „ pillier. Vn autre regardoit vn tableau paint, où il E
 „ y auoit des Atheniens qui tuoient des Lacedemo-
 „ niens: & comme quelqu'un des assistans eust dit, Ils
 „ sont vaillants hommes ces Atheniens icy: Ouy, dit
 „ il, en peinture. Quelqu'un sembloit prédre plai-
 „ sir & adiouster foy à des iniures que lon disoit ca-
 „ lomnieusement & faulxement cōtre vn Laconien:
 „ Il luy dit, Cesse de prester tes oreilles contre moy.
 „ Vn autre que lon punissoit alloit criāt, Helas si i'ay
 „ failly, ce a esté malgré moy: vn Laconië luy respon-
 „ dit, aussi est ce malgré toy que lon te punit. Vn
 „ autre voiant des hommes qui s'en alloient aux F
 „ champs assis dedans des coches: l'à Dieu ne plaise,
 „ dit il, que ie me seie iamais en siege, dont ie ne me
 „ puisse leuer au deuant d'un plus aagé que moy.
 „ Quelques passants de la ville de Chios estās venus
 „ veoir la ville de Sparte s'en yurerent tresbien: &
 „ apres soupper estans allez veoir l'auditoire des
 „ Ephores, rendirent leurs gorges dedās, & qui plus
 „ est, feirent leurs affaires sur les chaires mesmes où se
 „

A se feoient les Ephores : le lendemain les Spartiates feirent du commencement vne extreme diligence d'enquerir qui l'auoit fait , pour sçauoir si c'estoiēt point quelques vns de la ville : mais quand ils entendirent que c'estoient ces passants de Chios , ils
» feirent alors proclamer à son de trompe, qu'ils per-
» mettoient à ceux de Chios d'estre villains. Vn au-
tre Laconien voiant que lon vëdoir au double les
amendes seiches: comment, dit il, y a il icy faulte de
pierres? Vn autre aiant plumé vn rossignol , &
» l'aiant trouué fort menu de corps : certainement,
B dit il, tu es vne voix, & non autre chose. Vn autre
Laconien regardant Diogenes le philosophe Cy-
nique au cœur d'hyuer qu'il geloit à pierres fen-
dant, ambrassant tout nud vne statue de bronze,
luy demanda sil auoit pas grand froid, l'autre luy
» dit que non : quelle grande merueille fais tu donc?
Vn Laconien reprochoit quelquefois à vn natif de
la ville de Metaponte, qu'ils estoient lasches &
» couards comme femmes: Si est ce, dit le Metapon-
» tois, que nous tenons beaucoup de terres d'autrui:
» comment, luy repliqua le Laconien, vous n'estes
c dōcques pas couards seulement, mais iniustes aussi.
Vn passant estant venu à Sparte pour voir la ville,
se tenoit debout sur vn pied bien longuement , &
» disoit à vn Laconien , Tu ne te sçauois ainsi tenir
» debout sur vn pied aussi longuemēt que moy: non
» pas moy, dit il, mais il n'y a oyson qui n'en feist au-
» tant. Quelqu'un se glorifioit d'estre bon Retori-
» cien , pour faire à croire ce qu'il vouloit : Par les
» Dieux iumeaux, dit il, Il ne fut iamais art ny ne sera

aussi, qui ne soit coniointe avec verité. Vn Ar-
 gien se vantoit qu'il y auoit en leur ville beaucoup
 de sepultures des Lacedemoniens. Au contraire,
 „ respōdit le Laconien, Nous n'en auons chez nous
 „ pas vne des Argiens. voulant dire que les Lacede-
 moniens estoient par plusieurs fois entrez à main
 armee dedās le païs d'Argos, & les Argiens iamaïs
 en celuy de Sparte. Vn Laconien aiant esté pris
 prisonnier de guerre, ainsi qu'on le vendoit à l'en-
 „ can, le crieur dit à haulte voix, A vendre vn Laco-
 „ nien : il luy meist la main au deuant de la bouche,
 „ luy disant: Crie, vn prisonnier. Quelqu'un des sou-
 dards qui estoit à la soude de Lyfimachus, comme
 „ Lyfimachus luy demādaſt, Es tu point vn des Illo-
 „ tes de Lacedemone? Et pēses tu, respondit il, qu'un
 „ Laconien daignast venir à la soude de quatre obo-
 „ les par iour? Apres que les Thebains eurent def-
 fait les Lacedemoniēs en la iournee de Leuctres,
 ils entrerent dedans le païs de Lacedemone ius-
 ques à la riuiera meſme d'Eurotas: & quelqu'un
 „ d'entre eux se glorifiāt cōmancea à dire, Où sont ils
 „ maintenāt ces braues Laconiens, où sont ils? vn La-
 „ conien luy respondit, Ils n'y sont pas, car s'ils y fus-
 „ sent, vous ne seriez pas venus iusques icy. Lors que
 les Atheniens rendirēt leur ville propre à la discre-
 tion des Lacedemoniens, ils requirent qu'aumoins
 on leur laisſast l'Isle de Samos: & les Laconiēs leur
 „ respōdirent, Lors que vous n'estes pas à vous meſ-
 „ mes, vous demādez à auoir les autres. dont est venu
 le prouerbe commun, duquel on vse par la Grece,
 Celuy qui n'est à soy demande,

Que

A Que de Samos l'Isle on luy rende.

Les Lacedemoniens prirent quelquefois vne ville d'assault à viue force, quoy entendu les Ephores, „ dirent: Voyla l'exercice de noz ieunes gens perdu, „ ils n'auront plus d'aduersaires desormais, contre „ lesquels ils s'exercent. Vn de leurs Roys leur enuoya promettre qu'il ruinerait de fond en comble, s'ils vouloient, vne autre certaine ville, qui par plusieurs fois auoit donné beaucoup d'affaires à ceux de Lacedemone: Ils ne le voulurent pas per- „ mettre, ains luy manderent: N'oste pas la cueuë „ qui aguise les cœurs de nos ieunes gens. Ils ne voulurēt iamais qu'il y eust des maistres qui enseignassent aux ieunes gens à lucter: à fin, disoient ils, que ce soit vne ialousie, non d'artifice, mais de force & de vertu parmy eux. Et pourtant quand on demanda à Lyfander, comment Charon l'auoit terrassé & vaincu à la lucte: à force de ruz & d'artifice, dit il. Philippus Roy de Macedoine, auant que d'entrer en leur pais leur escriuit, lequel ils aimoient le mieulx, qu'il y entraist comme amy, ou „ comme ennemy: ils luy respondirent, Ne l'vn, ne „ l'autre. Aians enuoyé vn ambassadeur deuers Demetrius le fils d'Antigonus, & estans aduertis qu'il l'auoit appellé Roy en parlāt à luy, ils le condamnerent en l'amende à son retour, encore qu'il leur apportast en don de luy, en tēps d'extreme famine, vne mine de bled pour chasque teste de leur ville. Il aduint à vn meschāt homme de mettre en auāt vn tresbon cōseil: ils approuuerēt bien son aduis, mais ils ne le voulurēt pas receuoir cōme venāt

de sa bouche, ains le feirent proposer par vn autre homme de bonne vie. Deux freres auoient querelle & debattoient ensemble: les Ephores condamnerent leur pere à l'amende, de ce qu'il enduroit que ses enfans eussent querelle ensemble. Vn musicien estranger passant par là fut aussi par eulx condamné en vne amende, pour ce qu'il touchoit les chordes de sa cithre auec les doigts. Deux garçons se battoient l'vn cōtre l'autre, l'vn d'eux donna à son compagnon vn coup mortel d'vne faucille, & comme il estoit bien pres de rēdre l'esprit, ses autres compagnons luy promettoient qu'ils vengeroient sa mort, & qu'ils feroient mourir celuy qui l'auoit ainsi blecé: Nō faites, leur dit il, ie vous en prie au nom des Dieux, pour ce qu'il n'est pas iuste: car ie luy en eusse autant fait si i'eusse frappé le premier, & que i'eusse esté gentil compagnon. Vn autre ieune enfant, estant la saison, en laquelle il estoit permis aux ieunes garçons libres de dérober tout ce qu'ils pouuoient, mais estoit réputé à chose biē infame & laide d'estre surpris sur le fait: ses compagnōs aians derobbé vn petit regnardeau viu, le luy baillerēt à garder: ceulx qui l'auoient perdu vindrent pour le chercher, & luy l'auoit caché deffous sa robe: la beste s'irrita, & luy rongea le costé iusques aux intestins: ce qu'il endura patiemment sans se bouger, de peur qu'il ne fust descouuert: mais apres que les autres s'en furent allez, & que ses compagnons veirent l'outrage que le regnardeau luy auoit fait, ils l'en renferēt, disant, qu'il valoit beaucoup mieulx produire & monstrier le

regnar-

A regnardeau , que de le cacher ainsi iusques à la
» mort : Non faisoit, dit il, car il valoit mieux mourir
» en toutes les douleurs du monde , que d'estre def-
» couuert par lascheté de cœur, pour sauuer honteu-
» sement sa vie. Quelques vns rencontrèrent sur le
chemin par les champs des Laconiens, ausquels ils
dirent , Vous estes bien-heureux d'estre arriuez à
ceste heure , car les voleurs ne font que de partir
» d'icy : Par le Dieu Mars , respondirent ils , nous ne
» sommes point plus heureux pour cela : mais bien
» eulx, de n'estre point tombez en noz mains . On
B demanda quelquefois à vn Laconien , ce qu'il sça-
» uoit faire:il respôdit, estre libre . Vn ieune enfant
Spartiate aiant esté pris prisonnier par le Roy An-
tigonus, & vëdu parmy les autres, obeissoit à celuy
qui l'auoit acheté en toutes choses qu'il estimoit
estre conuenables à vn homme libre:mais quand il
luy commanda de luy apporter le pot à pisser, il ne
» le peut endurer, ains dist, Je ne te seruiray point de
» cela:& comme son maistre l'en pressast, il s'en alla
» mōter sur la couuerture du logis, en disant, Tu sen-
» tiras ce que tu auois acheté : & se iettant du hault
c en bas, il se tua. Vn autre que lon vendoit , com-
» me celuy qui l'achettoit luy dist , Seras tu homme
» de bien si ie t'achette ? ouy, dit il, encore que tu ne
» m'achettes point . Vn autre que lon vëdoit, com-
me le crieur proclamast , à vendre l'esclaue : Mal-
heureux que tu es, dit il, diras tu, le prisonnier ? Vn
Laconien auoit sur sa rondelle pour son enseigne
vne mousche peinte, non point plus grande que le
naturel, & quelques vns s'en mocquans de luy, di-

soient qu'il auoit pris ceste enseigne là, à fin de n'e- D
 „ estre point cogneu: mais au cōtraire, dit il, c'est à fin
 „ d'estre mieulx remarqué: car ie m'approche si pres
 „ des ennemis, qu'ils peuuent bien veoir combien
 „ ma marque est grande. Vn autre, comme on luy
 eust présenté à la fin d'un bāquet vne lyre pour en
 „ sonner, selon la coustume de toute la Grece: les La-
 „ coniens, dit il, n'ont point appris de follastrer. On
 demanda quelquefois à vn Spartiate, si le chemin
 „ pour aller à Sparte estoit bien seur: Il respondit, Se-
 „ lon que lon y va: car ceulx qui y viennent com-
 „ me lions y sont mal traitez: mais les liéures, nous E
 „ les gardons à l'ombre de la fueillee. En vne prise
 de luitte vn Laconien estant saisy au collet faisoit
 en vain tout ce qu'il pouuoit pour s'en despestrer,
 car l'autre le tiroit en terre: le Laconien se sentant
 plus foible de reins, & tout prest à donner du nez
 en terre, mordit bien estroict le bras de celuy qui
 „ le pressoit: l'autre se prit à crier, hó Laconien tu
 „ mords comme les femmes: nō fais, dit il, mais com-
 „ me les lions. Vn Laconien boitteux alloit à la
 guerre, dont quelques vns se mocquoient, mais il
 „ leur dit, Il ne fault point de gens qui fuyent à la F
 „ guerre, mais qui tiennent bon, & gardēt bien leur
 „ reng. Vn autre estant blecé d'un coup de fiesche
 à trauers le corps, sur le poinct qu'il rendoit son
 „ ame, Il ne me fasche point de mourir, dit il, mais
 „ bien de ce que ie meurs par la main d'un archer ef-
 „ feminé, auant que d'auoir rien faict de ma main.
 Vn autre arriuant en vne hostellerie pour loger,
 bailla à l'hostellier vne piece de chair pour accou-
 strer

A strer à soupper: l'hostellier luy demanda encore du
 » formage & de l'huyle: A quel propos, dit il: si i'a-
 » uois du formage, ie n'aurois que faire d'autre vian-
 » de. Vn autre entendant louer & reputer grande-
 ment heureux le marchand nommé Lampis natif
 de la ville d'Ægine, pource qu'il estoit fort riche, &
 » auoit plusieurs grâds vaisseaux sur la mer: le ne fais
 » point compte, dit il, d'une telle felicité, qui est atta-
 » chee à des cordes. Vn autre respondit à quelqu'un
 » qui luy disoit, Tu mens Laconien, Nous sommes
 » libres aussi, dit il: les autres, s'ils faillent à dire verité,
 B sont bien chastiez. Vn autre se travailloit à faire
 tenir vn corps mort debout sur ses pieds: mais il n'y
 auoit ordre: & voiant qu'il n'en pouuoit venir à
 bout, Par Iupiter, dit il, il fault qu'il y ait quelque
 chose dedans. Tynnichus Laconien, son fils luy
 aiant esté tué à la guerre, supporta sa mort vertueu-
 sement, & en fut faict vn tel Epigramme:

On rapporta, Thrasybulus, ton corps
 Dans ton pauios estant l'ame dehors,
 Que ceulx d'Argos en auoient dechassée
 Avec sept coups de mortelle faulxée,
 C Tous par deuant: Et ton pere constant
 Vieillard nommé Tynnichus, le mettant
 Dedans le feu, plein de sang, le visage
 Tout sec, vsa de ce masse langage:
 C'est des couards qu'il faut plorer la mort,
 Non pas de toy, mon enfant, qui és mort
 Comme mon fils, en vray homme de bien,
 Et comme vray Lacedemonien.

Le maistre des estuues où Alcibiades festuuoit &

lauoit, luy versoit dessus beaucoup d'eau plus que
 „ aux autres:& comme il demandaſt, Que veult dire
 „ cela?vn Laconien qui là eſtoit, luy dit, Il voit bien
 „ que tu n'es pas net, mais bien ord & ſale, voyla
 „ pourquoy il te dōne plus d'eau. Quand Philippus
 de Macedoine entra à main armee dedans la La-
 conie,on penſoit que tous les Lacedemoniens fuſ-
 ſent perdus, & y eut quelque Grec qui dit à l'vn
 des Spartiates: O pauvres Laconiens, que ferez
 „ vous maintenant? Que ferions nous, dit le Laco-
 „ nien, autre choſe, que mourir vaillammēt?car nous
 „ ſommes ſeuls entre les Grecs qui auons appris de
 „ demourer libres, & ne ſeruir iamais à perſonne.

Après la deſſaictē du Roy Agis, Antipater leur de-
 mandoit pour oſtages cinquante enfans. Eteocles
 qui lors eſtoit l'vn des Ephores luy reſpondit, qu'il
 ne luy bailleroit point d'enſans, de peur qu'ils ne
 deuinſſent mal condiționez, pour n'auoir pas eſté
 nourris en la diſcipline de leur païs, ſans laquelle
 ils ne ſeroient pas meſme citoiens, mais qu'il luy
 bailleroit des femmes ou des vieillards ſil vouloit
 deux fois autant: & comme il les menaſſaſt qu'il
 leur feroit du pis qu'il pourroit, ils reſpondirent
 „ tous vnanimement, Si tu nous cōmandes choſes
 „ plus griefues que la mort, nous en mourrons tant
 „ plus facilement. Vn vieillard deſirāt veoir l'eſbat-
 tement des ieux Olympiques ne pouuoit trouuer
 place à ſaſſeoir, & paſſant par deuant beaucoup
 de lieux,on ſe gaudiſſoit & ſe moquoit de luy, ſans
 que perſonne le vouluſt receuoir,iuſques à ce qu'il
 arriua à l'endroit où eſtoient les Lacedemoniens
 aſſis,

A assis, là où tous les enfans & beaucoup des hōmes se leuerent au deuant de luy, & luy cederent leur place. Toute l'assemblée des Grecs remarqua bien ceste honeste façon de faire, & avec battemēts de mains declarerent qu'ils la louoient grandement : adonc le pauvre vieillard

Croulant sa teste & sa barbe chenue,

„ en plorant: Hé Dieux, dit il, que de maux! On voit
 „ bien que tous les Grecs entendent bien ce qui est
 „ honeste, mais il n'y a que les Lacedæmoniens seuls
 „ qui le facent. Aucuns escriuent que le mesme ad-
 B uint à Athenes à la feste & solēnité que lon appelle
 le Panathenées, là où ceulx d'Attique feirent honte à vn pauvre vieillard qu'ils auoient eulx mesmes appellé, cōme pour luy donner place, & puis quād il fut venu, ils ne luy en baillerēt point, ains se moquerent de luy : mais apres que aiant passé par deuant presque tous les autres, il fut arriué à l'endroit où estoient assis les ambassadeurs de Lacedæmone, ils se leuerent tous de leurs sieges au deuant de luy, & luy donnerent place entre eulx. Le peuple aiant pris grand plaisir à leur veoir faire cest acte,
 C leur applaudit des mains bien claiemēt avec grande demōstration de l'auoir fort approuué : & adōc

„ quelqu'un des Spartiates qui là estoient, Par les
 „ Dieux iumeaux, les Atheniens, dit il, entendēt bien
 „ ce qui est bon & honeste, mais ils ne le font pas.

Vn belistre demanda quelquefois l'aumosne à vn
 „ Laconien, qui luy dit, Voire mais si ie la te donne,
 „ tu mendieras encore plus : & le premier qui la te
 „ donna a esté cause de ceste villaine vie que tu me-

„ nes maintenant, t'ayant rendu paresseux & truand. D

Vn autre voiant vn questeur qui alloit questant
 „ pour les Dieux, comme il disoit : Je n'ay, dit il, que
 „ faire de Dieux qui soient plus pauvres que moy.

Vn Laconien ayant surpris vn adultere avec vne
 „ laide femme: Malheureux, dit il, qui te cōtraignoit?

Vn autre ayant ouy vn orateur qui tiroit de lon-
 „ gues trainnees de paroles : Par les Dieux iumeaux,
 „ dit il, voyla vn vaillant homme, il tourne-vire bien
 „ sa langue sans aucun propos. Vn qui passoit par

Lacedemone y remarqua entre autres choses le
 grand honneur que y portoient les ieunes aux E
 „ vieux, & dit, Il n'y a que Sparte où il soit expedient
 „ de vieillir. On demanda quelquefois à vn Spar-
 „ tiate, quel poëte estoit Tyrteus : bon, dit il, pour
 „ aguiser les courages des ieunes gens. Vn autre
 ayant grand mal aux yeux s'en alla à la guerre : &
 comme les autres luy dissent, où veux tu aller en
 „ l'estat que tu es? que penses tu faire? quand ie ne
 „ feray autre chose, dit il, pour le moins ie rebouche-
 „ ray d'autant l'espee de l'ennemy. Buris & Sper-

tis deux Lacedemoniens se partirent volontai-
 rement du pais, & s'en allerent deuers Xerxes F
 le Roy de Perse, s'offrir à endurer la peine que les
 Lacedemoniens auoient meritee par sentence de
 l'oracle des dieux, pour auoir occis les heraults que
 le Roy leur auoit enuoyez, & estans arriuez deuers
 „ luy, luy dirent, qu'il les feist mourir de telle sorte
 „ de supplice que bon luy sembleroit en acquit des
 „ Lacedemoniens. Le Roy esmerueillé de leur ver-
 tu, non seulement leur pardonna la faulte, mais en-

core

A core les pria de demourer avec luy, leur promet-
» tant de leur faire bon traictement. Et comment, di-
» rent ils, pourrions nous viure icy, en abandonnant
» nostre païs, noz loix, & de tels hommes, que pour
» mourir pour eulx nous auons volontairement en-
» trepris vn filoingtain voyage? Et comme l'vn des
Capitaines du Roy, nommé Indarnes, les en priaſt
d'auantage, en leur diſant qu'ils ſeroient en meſme
degré de credit & d'honneur qu'eſtoient les plus
fauoriſez & les plus auancez au pres du Roy: ils luy
» dirent, Il nous ſemble que tu ne ſçais pas, que c'eſt
B de liberté: car qui ſçait bien que c'eſt, ſ'il a bon iu-
» gement, ne l'eſchangeroit pas avec le royaume de
» Perſe. Vn Laconien allant par païs arriua en vn
lieu où il auoit vn hoſte ancien, qui le premier iour
ſe deſtourna de luy, pour ne le loger point, d'autāt
qu'il n'auoit point de lits en ſa maiſon, mais le
lendemain en aiant loué ou emprunté, il le reçut
magnifiquement: le Laconien monta doſſus ces
» lits, & les foula aux pieds en diſant, Ces meſchāts
» lits furent cauſe hier que ie n'ay pas eu ſeulement
» de la natte à coucher & dormir la nuit pāſſee. Vn
C autre eſtant arriué en la ville d'Athenes, & là aiant
veu que les vns des citoiens alloient par la ville
crians des poiſſons ſallez à vendre, les autres de la
chair, les autres tenoient les gabelles, les autres fai-
ſoient meſtier de tenir des bordeaux, & d'exercer
pluſieurs autres choſes villaines & deſhoneſtes, &
de n'eſtimer rien ſale ny laid, quād il fut de retour
en ſon païs, & que ſes citoiēs luy demāderēt, com-
» mēt ſe portoit tout à Athenes: Le mieux du mōde,

„ dit il, en se mocquant, tout y est honeste. voulant D
 leur dōner à entendre, que tous moiens de gagner
 estoient tenus pour honestes à Athenes, & rien vil-
 lain ny deshoneste. Vn autre estant interrogué
 „ de quelque chose, respondit, non: & comme celuy
 „ qui l'auoit interrogué luy dist, Tu mens: le Laco-
 „ nien luy repliqua, Vois tu donc, comme tu es vn
 „ fol, de me demander ce que tu sçais bien? Quel-
 ques Laconiens furent vne fois enuoyez ambassa-
 deurs deuers le tyran Lygdamis, lequel remettoit
 de iour à autre, & reculoit à leur donner audience:
 & à la fin on leur dit qu'il se trouuoit vn peu mal E
 disposé: les ambassadeurs dirent à celuy qui leur
 „ faisoit ce rapport, Dittes luy, de par les Dieux, que
 „ nous ne sommes pas venus pour luiſter, mais pour
 „ parler seulemēt avec luy. Quelque sacrificeur
 receuoit vn Laconien és cerimonies de quelque
 religion: & auant que de l'y receuoir luy deman-
 „ doit, Quel peché il auoit sur sa conscience le plus
 „ grief qu'il eust iamais commis: les Dieux le sçauēt
 „ bien, respondit le Laconien: & cōme le sacrifice-
 „ teur le pressast de plus en plus, en luy protestant
 „ qu'il estoit force qu'il le dist: Le Laconien luy F
 „ demanda, A qui fault il que ie le die; à toy, ou à
 „ Dieu? A dieu, dit l'autre. Retire toy doncques ar-
 „ riere de moy, dit le Laconien. Vn autre passant
 de nuit à trauers vn cimetiere, pensa veoir quel-
 que fantasme d'esprit deuant luy, il court droit là,
 comme pour l'enfermer avec sa iaueline, & en poul-
 „ sant dit, où me fuis tu ame que ie feray mourir
 „ deux fois? Vn autre auoit voué qu'il se iette-
 roit

A terroit du hault de la roche de Leucade en la mer,
il y monta, & s'en retourna apres qu'il eut veu la
„ grande hauteur: & comme on le luy reprochast, Ie
„ ne sçauois, dit-il, pas que ce veu la auoit besoing
„ d'un autre plus grand veu. Vn autre en la bat-
taille aiant desia haulsé l'espee pour dōner le coup
de la mort à son ennemy qu'il tenoit sous luy:
quand il ouit la trompette qui sonnoit la retraite
ne ramena point son coup: & comme quelque
autre luy demandast, pourquoy il n'auoit tué l'en-
„ nemy qu'il auoit entre ses mains: pource qu'il vaut
B mieux obeir à son capitaine que de tuer son enne-
my. Vn Laconien aiant esté vaincu à la luidte en
la feste des ieux olympiques, quelqu'un luy crya,
„ O Laconien ton aduersaire estoit meilleur que
„ toy: meilleur non, dit-il: mais mieux terrassant, ouy.
Quand ils entroient és salles de leurs conuiues, la
coustume estoit que le plus vieil de la chambree
monstroient la porte à chascun des autres, & leur di-
„ soit, Il ne sort pas vne seule parole par ceste porte.
La plus exquisite viande qu'ils eussent, estoit vn po-
tage lié qu'ils appelloient le brouët noir, tellement
c que quand il y en auoit, les vieillards ne man-
geoient point de chair, ains la laissoient toute aux
ieunes gens. Et dit on que Dionysius le tyran de la
Sicile pour ceste cause achetta vn cuysinier de La-
cedemone, & luy commanda de luy apprestre de
ce brouët sans y rien espargner: mais quand il en
eut vn peu tasté, il le trouua si mauuais, qu'il reiet-
ta tout ce qu'il en auoit pris: & le cuysinier luy dit,
„ O Sire, pour trouuer bon ce brouët il se faut pre-

» miereiment estre exercité à la Laconique tout nud, D
 » & bien baigné dedans la riuere d'Eurotas. Apres
 auoir sobrement beu & mangé en ces conuiues,
 ils se retiroient en leurs maisons sans torche ny lu-
 miere, car il ne leur estoit pas permis d'aller ny là
 ny ailleurs la nuit avec de la lumiere, à fin qu'ils
 s'accoustumassent à cheminer asseurement, sans
 rien craindre, par tout, la nuit & en tenebres, sans
 aucune clarté. Des lettres ils en apprenoient pour
 la necessité seulement, & au demourant bannif-
 soient de leur país toutes autres sciences aussi bien
 que tous homes estrangers : & au reste toute leur E
 estude estoit d'apprédre à bien obeir à leurs supe-
 rieurs, endurer patiemment tous trauaux, & vain-
 cre en cōbattant, ou mourir sur la place. Ils de-
 mouroient tout le long de l'annee avec vne sim-
 ple robbe seulement sans sayes par dessoubs, sales
 & crasseux ordinairement, comme ceux qui ne
 festuuoient ny ne s'oignoient presque iamais, si-
 non bien peu souuét. Les ieunes garçons & ieu-
 nes homes dormoient ensemble par bandes & par
 troupes sur des paillasses qu'ils amassoient eux
 mesmes, rompsans avec les mains sans aucun forre- F
 ment, les cymes des cannes & rouseaux qui crois-
 soient au long des riues de la riuere d'Eurotas, &
 l'hyuer ils mesloient parmy de la bourre d'vne es-
 pece de chardons qu'ils appelloient Lycophanes,
 pour ce que lon estime que ceste matiere la ait en
 soy ie ne sçay quoy qui eschauffe. Il leur estoit per-
 mis d'aimer les enfans de bonne & gentille nature,
 mais abuser de leurs personnes estoit tenu pour
 chose

A chose tres-infame, cōme de gents qui en aimoient le corps & non pas l'ame: de sorte que qui en estoit accusé, en demouroit noté d'infamie pour toute sa vie. La coustume estoit que les vieux demandoiēt aux ieunes quand ils les rencontroient, où ils alloient, & quoy faire, & les tensoient s'ils failloient à respondre, ou s'ils alloient bastissant des excuses: & qui ne tensoit celuy qui commettoit quelque faute en sa presence, estoit subiect à la mesme reprehension que celuy qui auoit failly, mesme celuy qui se courrouceoit ou monstroit de prendre à mal quand on le reprenoit, en estoit reproché & desestimé. Si d'adventure quelqu'un estoit surpris en commettant vne faute, il falloit qu'il environnast vn certain autel de la ville tout alentour, chantant vne chançon faite en son blasme & vitupere, qui n'estoit autre chose que se téser & arguer soy mesme. Et falloit que les ieunes hommes reuerassent non seulement leurs propres peres, & se rendissent subiects à eux, mais aussi qu'ils portassent reuerence à tous autres vieilles gens, en leur cedant le dessus, & se destournant d'eux par les chemins, en se leuant de leurs sieges au deuant d'eux, & s'arrestant quand ils passoiēt: & pourtant vn chascun commandoit non seulement comme aux autres villes à ses propres enfans, à ses propres seruiteurs, & dispoit de ses propres biens, ains aussi à ceux de son voyfin, ne plus ne moins qu'aux siens propres, & s'en seruoient cōme de choses cōmunes entre eux, à fin qu'ils en eussent soing chascun cōme de leurs propres. Et pourtant si vn enfant

aiant esté chastié par vn autre l'alloit rapporter à **D**
 son pere, c'estoit honte au pere si il ne luy donnoit
 encore d'autres coups : car par la commune disci-
 pline de leurs pais ils s'asseuroient, que vn autre
 n'auoit rien commandé qui ne fust honeste à leurs
 enfans. Les ieunes enfans derobboient tout ce
 qu'ils pouuoient de bon à manger, apprenans de
 ieunesse à dresser embusche dextrement pour sur-
 prendre ceux qui dormoient, ou qui ne se tenoiét
 pas bien sur leurs gardes: mais la punition de celuy
 qui estoit surpris en derobbant, c'estoit, qu'il estoit
 bien fouëtté, & le faisoit on ieuner : car on leur **E**
 donnoit expressément bien fort peu à manger, à
 fin que d'eux mesmes combattans la necessité, ils
 fussent contraincts de s'exposer hardiment à tous
 dangers, & d'inuenter tousiours quelque ruze &
 finesse pour en derobber. Mais generalement
 l'effect pour lequel leur viure de tous estoit fort
 estroict, c'estoit à fin que de longue main ils s'ac-
 coustumassent à n'estre iamais pleins, & à pouuoir
 endurer la faim, pource qu'ils auoient opinion
 qu'ils en feroient plus vtils à la guerre, siils appre-
 noient à pouuoir porter la peine & trauailler sans **F**
 manger, & qu'ils en feroient plus continents, plus
 sobres, & plus simples, siils apprenoiet à durer long
 temps à peu de despense. Brief ils auoient opi-
 nion que s'abstenir de manger chair ou poisson
 appresté en cuisine, & se passer ou de pain ou de
 la viande la premiere venue, rendoit les corps des
 hommes plus sains & plus grands, pour ce que les
 esprits naturels n'estans point pressez par trop
 grande

A grande quantité de viures, ny rebatus contrebas, ny estendus en large, eleuoient les corps contremont, & si les faisoient plus beaux, d'autant que les habitudes & complexions greilles & vuides obeïssent mieux à la vertu de nature qui forme les membres: là où celles qui sont grasses, pleines & subiectes à beaucoup manger, pour leur pesanteur y resistent. Ils estudioient aussi à composer de belles chansons, & non pas moins à les chanter, & y auoit tousiours en leurs compositions ne sçay quel aiguillon qui excitoit le courage, & inspiroit aux
B cœurs des escoutans vn propos deliberé & vne ardente volonté de faire quelque belle chose. Le langage estoit simple, sans fard ny affecterie quelconque, qui ne cōtenoit autre chose que les louanges de ceux qui auoient vescu vertueusemēt, & qui estoient morts en la guerre pour la deffense de Sparte, comme estant bien-heureux, & le blasme de ceux qui par lascheté de cœur auoient restiué à mourir, comme viuans vne vie miserable & malheureuse: ou bien c'estoiēt promesses d'estre à l'aduenir, ou bien vanteries d'estre presentemēt gents
C de bien, selon la diuersité des aages de ceux qui les chantoient: car y aiant és festes solennelles & publiques tousiours trois danſes, celle des vieillards commanceant disoit,

„ Nous auons esté iadis

„ Jeunes, vaillants, & hardis.

Celle des hommes suyuoit apres, qui disoit,

„ Nous le sommes maintenant

„ A l'esprouue à tout venant.

La troisiéme des enfans venoit apres, qui disoit, D

Et nous vn iour le serons,

Qui bien vous surpasserons.

Les chants mesmes, à la cadence desquels ils balloient, & marchoiét en bataille au son des flustes quand ils alloient chocquer l'ennemy, estoient appropriez à inciter les cœurs à vaillance, à assurance, & mespris de la mort : car Lycurgus s'estudia à conioindre l'exercice de la discipline militaire avec le plaisir de la musique : à fin que ceste vehemence belliqueuse meslée avec la douceur de la musique, en fust temperée de bon accord & armonie : & E
pourtant és batailles, auant le choc de la charge, le Roy auoit accoustumé de sacrifier aux Muses, là fin que les combattās eussent la grace de faire choses glorieuses & dignes de memoire. Mais si quelqu'un vouloit outrepasser vn seul poinct de la musique ancienne, ils ne le supportoient pas : tellement que les Ephores condamnerent à l'amende Terpander assez grossier à l'antique, mais le meilleur iouëur de cithre de son temps : & qui plus prenoit de plaisir à louer les faicts heroïques : & qui plus est, pendirent sa cithre à vn pau, pource qu'il y F
auoit adiousté vne seule chorde pour passer & varier la voix vn peu d'auantage : car ils n'approuuoient les chants & chansons, que les plus simples. Et comme Timotheus à la feste Carniene chantaist sur sa cithre pour gagner le pris, l'un des Ephores prenant vn cousteau en sa main, luy demanda de quel costé, du haut, ou du bas, il aimoit mieùx qu'il coupast les chordes qui estoient

A estoient de plus que les sept ordinaires. Au demourant Lycurgus leur osta toute superstition & vaine crainte des sepultures, leur permettant d'inhumer les morts dedans la ville, & d'auoir les monuments & sepultures alentour des temples des Dieux: & leur osta & retrencha toutes pollutions de mortuaires: & ne leur permit d'enterrer aucune chose avec les corps, si non de les enuelopper dedās vn drap rouge avec des feuilles d'oliue, & non point plus à l'vn qu'à l'autre: aussi leur osta il tous epitaphes & inscriptions de sepultures, si non de ceux qui seroient morts en bataille, & defendit tout deuil & toutes lamentations. Aussi leur interdit-il de voyager en pais estrāger, de peur qu'ils n'y apprinssent des meurs estranges & facons de viure incorrectes: & par mesme raison bānit il tous estrangers de sa ville, de peur que fils venoiēt à sy couler & habiter, ils ne monstassent & enseignassent quelque vice à ses citoiens: & si l'y auoit aucun qui ne voulust souffrir la discipline & institution des enfans, ne iouissoit point des droits & priuileges de bourgeoisie. Et disent aucuns que Lycurgus auoit institué, qu'vn estranger mesme qui se vouloit soubmettre à l'observation de sa discipline, eust vne des portions qu'ils auoient des le cōmancement ordonnées, mais il ne la pouuoit vendre. Leur coustume estoit de se seruir & vser des seruiteurs de leurs voisins, ne plus ne moins que des leurs propres, quand ils en auoient affaire, & autant de leurs cheuaux ou de leurs chiens, si les proprietaires n'en auoient eux mesmes affaire.

Aux champs pareillement fils se trouuoient auoir D
 besoing d'aucune chose qui fust au logis de leurs
 voisins, ils alloient librement ouurir les coffres &
 les lieux ou elle estoit, & la prenoient, puis refer-
 moient les lieux où ils l'auoient prise. A la guerre
 ils portoient robes rouges, pour ce qu'il leur sem-
 bloit que ceste couleur estoit mieux seante à vn
 homme, & puis pour ce qu'elle ressemble au sang
 elle faisoit plus de frayeur à ceux qui ne l'auoient
 pas accoustumee: ioint qu'elle estoit encore vtile
 par ce que s'il aduenoit qu'ils fussent blecez l'en-
 nemy ne le pouuoit pas facilement apperceuoir, E
 pour la semblance de la tainture au sang. Quand
 ils auoient vaincu leurs ennemis par quelque ruse
 & habilité de leur capitaine, ils sacrifioient à Mars
 vn bœuf: mais quand c'estoit par viue force à la
 descouuerte, ils immoloient alors vn coq, accou-
 stumans par cela leurs capitaines à estre non seule-
 ment belliqueux, mais aussi rusez. En leurs prie-
 res qu'ils faisoient aux Dieux, ils y adioustoient,
 qu'ils peussent supporter vne iniure: & la somme
 de leurs prieres estoit, que les Dieux leur donnas-
 sent honneur pour bien faire, & rien plus. Ils ho- F
 noroient Venus armee, & faisoient toutes les ima-
 ges des Dieux tant masles que femelles avec des
 lances & iauelines en leurs mains, comme aians
 tous la vertu militaire & guerriere: aussi disoient
 „ ils en commun proverbe, Qu'il faut inuoyer
 „ la fortune en estendant la main. voulant dire qu'il
 faut inuoyer les Dieux en entreprenant quelque
 chose, & mettant la main à l'œuvre, non pas autre-
 ment.

A ment. Ils monstroient à leurs enfans les Ilotes yures, à fin de les destourner de boire beaucoup de vin. Ils ne frapportoient iamais à la porte des maisons, ains appelloient de dehors. Les estrilles dont ils vsoient estoient non de fer mais de roseau. Ils n'oyoient iamais iouer ny comedies ny tragedies, à fin qu'ils n'entendissent iamais ny par ieu ny à bon esciant contredire aux loix. Le poëte Archilochus estant venu à Sparte, ils l'en chasserēt à la mesme heure, pour autant qu'ils sçeurent qu'il auoit faict des vers, esquels il disoit qu'il valoit

B mieux quitter & ietter ses armes, que de mourir,

Fol est qui tant pour vn bouclier f'esmaye,

I'ay bien ietté le mien dans vne haye,

Quoy qu'il fust bon : mais pour me le garder

Ie n'ay voulu ma vie hazarder:

Perdu qu'il soit, i'en pourray bien eslire

Vn autre apres qui ne sera ia pire.

Toutes leurs sacrees cerimonies estoient communes autant aux filles comme aux fils. Les Ephores condamnerent Sciraphidas à l'amende, pour autāt que plusieurs luy faisoient tort. Ils feirent mourir **C** vn qui faisoit le penitent public, portant vne haire comme vn sac sur sa chair, d'autant qu'il y auoit de la pourfileure de pourpre en sa haire. Ils tensesrent vn ieune garçon qui alloit encore aux exercices de la ieunesse d'autant qu'il sçauoit le chemin de Pyles, où se tenoit l'assemblee des estats de la Grece. Ils chasserent de leur ville vn Retoricien nommé Cephisophon, d'autant qu'il se van toit de pouuoir parler tout vn iour entier sur quelque

subiect que ce fust, disant qu'un bon parleur doit **D**
 auoir la parole egale à ce dont il parle. Les enfans
 enduroient d'estre deschirez à coups de fouët tout
 au long d'un iour, iusques à la mort bien souuent,
 sur l'autel de Diane surnommée Orthie, c'est à dire
 droite & roide, tous gays & ioyeux, faisans à l'en-
 uuy les vns des autres à qui plus & plus long temps
 endureroit d'estre battu: & celuy qui en demouroit
 vainqueur, en estoit entre les plus estimez & mieux
 prizez: & ceste emulation de combat s'appelle la
 fouëttade, & se recommence tous les ans. Mais
 l'une des plus belles & des plus heureuses choses **E**
 dont Lycurgus ait faict prouision à ses citoiens,
 c'est abondance de loisir: car il ne leur est aucune-
 ment permis de se mesler d'aucun art mecanique:
 & de traffiquer laborieusement & peniblement
 pour amasser des biens, il n'en estoit point de nou-
 uelle, par ce qu'il auoit tant faict, qu'il leur auoit
 rendu la richesse ny honorable ny desirable: & les
 Ilotes leur labouroient leurs terres, leur en rendant
 ce qui estoit d'ancienneté estably & ordonné: &
 leur estoit defendu d'en exiger plus de louage, à
 fin que les Ilotes pour le gain qu'ils y faisoient en **F**
 seruissent plus volontiers, & qu'eux ne conuoitas-
 sent point à en auoir d'auantage. Il leur estoit
 aussi defendu d'estre mariniers, d'aller sur mer, ny
 d'y combattre: mais depuis pourtant ils combatti-
 rent par mer, & se rendirent Seigneurs de la mari-
 ne: toutefois ils s'en deporterent bien tost, d'autant
 qu'ils voyoient que les meurs de leurs citoiens s'en
 gastoient & corrompoient: mais depuis encore se
 chan-

A changerent ils en cela comme en toutes autres choses. Car les premiers qui amasserent de l'argët aux Lacedemoniens, furent condamnez à mort, d'autant qu'un ancien oracle auoit esté respondu aux roys Alcamenes & Theopompus,

Auarice sera la ruine de Sparte.

Et neantmoins apres que Lyfander eust pris la ville d'Athenes, il en emmena à Sparte grande quantité d'or & d'argent qu'ils receurent, & en honorerent le personnage qui la leur auoit apportee.

Mais tant que la cité de Sparte a gardé les loix de **L**ycurgus, & obserué le serment qu'elle auoit iuré, elle a esté tousiours la premiere de toute la Grece en gloire & en bonté de gouuernement, l'espace de plus de cinq cents ans : & venants à les transgresser, l'auarice & la cōuoitise d'auoir se coula petit à petit parmy eux, & aussi en diminua leur authorité & leur puisſance: car leurs alliez & cōfederez cōmancerent à leur en mal vouloir. Mais toutefois encore qu'ils fussent en tel estat, apres que Philippus eut gaigné la bataille contre les Grecs, apres de Cheronee, & que toutes les autres villes **d**e la Grece l'eussent de commun consentement eleu pour capitaine general de toute la Grece, tant par mer cōme par terre, & depuis Alexandre son fils apres la destruction de la ville de Thebes, les Lacedemoniens seuls, encore qu'ils eussent leur ville toute ouuerte, sans aucunes murailles, & qu'ils fussent en bien petit nombre pour les continuelles guerres qu'ils auoiēt eües, & qu'ils fussent beaucoup plus foibles & par consequent plus aisez à

prendre & à desfaire, qu'ils n'auoient appris d'estre, neantmoins pour auoir retenu encore quelques petites reliques du gouuernement estably par Lycurgus, ils ne voulurent iamais se soubmettre à aller à la guerre sous ces deux grâds Rois là, ny aux autres Rois de Macedoine qui vindrent apres, ny ne se voulurent trouuer és communes assemblees avec eux, ny ne contribuerent aucun argent, iusques à ce qu'aiants de tout poinct mis à nonchaloir les loix de Lycurgus, ils furent reduits en tyrannie par leurs propres citoiens, quand ils ne reteindrent du tout plus rien de leur ancienne institution & discipline, & qu'estans deuenus tous semblables aux autres peuples, ils perdirent entierement toute leur ancienne reputation & gloire, & leur franchise de parler: & furent finablement redigez en seruitude, cōme ils sont encore de present subiects aux Romains, aussi bien comme tous les autres peuples & villes de la Grece.

LES DICTS ET RESPONSES

NOTABLES DES DA-

mes Lacedemonienes.

F

ARGILEONIDE la mere de Brasidas, son fils aiant esté tué, quelques ambassadeurs de la ville d'Amphipolis vindrent à Sparte qui la visiterent, ausquels elle demanda si son fils estoit mort en hoinme de bien & digne de Sparte: & comme ils le louassent extremement, & luy dissent que c'estoit en faict d'armes le plus grand homme qui eust

A eust oncques esté en Lacedemone, elle leur res-
 „ pondit : Estrangers mes amis, mon fils estoit bien
 „ voirement homme de bien & d'honneur, mais
 „ Lacedemone en a plusieurs autres qui sont encore
 „ plus vaillans que luy.

G O R G O la fille du Roy Cleomenes, comme
 Aristagoras Milesien fust venu à Sparte pour solli-
 citer Cleomenes d'entreprendre la guerre contre
 le Roy de Perse, pour affranchir les Ioniés, & pour
 ce faire luy promeist grosse somme d'argent : &
 d'autant que plus il y contredisoit, d'autant plus il
 B luy augmentast la quantité de deniers qu'il luy
 „ promettoit: Mon pere, dit-elle, cest estranger icy te
 „ corrompra, si tu ne le iettes promptement dehors
 „ de nostre maison. Et comme son pere luy eust vn
 iour commandé de bailler du bled à quelqu'un
 pour son salaire, y adioustant, c'est luy qui m'a en-
 „ seigné à faire de bon vin: Comment, mon pere, on
 „ en beura du vin d'auantage, & ceux qui en beurôt
 „ en deuiendront plus delicats & moins vertueux.

Et voiant comme vn des seruiteurs d'Aristagoras
 „ luy chaussoit ses souliers: Pere, dit elle, cest estran-
 „ ger icy n'a point de mains. Et comme vn autre
 „ estranger marchant mollement & delicatement
 se fust approché d'elle, elle le repoulsa rudement,
 „ en luy disant: Te retireras tu arriere d'icy homme
 „ lasché, qui ne vaux pas vne femme?

G I R T I A S comme son nepueu Acrotatus eust
 esté rapporté à la maison, d'une querelle qu'il
 auoit eüe contre d'autres ieunes garçons ses com-
 pagnons, fort blecé en plusieurs lieux, de maniere

que lon pensoit qu'il fust mort, & ses domestiques
 & familiers en pleurassent & menassent grand
 » deuil: Ne vous tarez vous pas, dit-elle, car il a
 » montré de quel sang il estoit. Il ne faut pas à
 haults cris plorer les vaillants hommes, mais les
 medeciner & penser, pour essayer de les sauuer.

Et quand la nouuelle fut venue certaine de Can-
 die, où il estoit allé à la guerre, qu'il y auoit esté
 » tué: Ne falloit il pas, dit elle, puis qu'il alloit con-
 » tre les ennemis, qu'il y mourust, ou qu'il les feist
 » mourir eux? I'ay plus cher d'ouïr dire qu'il soit
 » mort digne de moy, de son país, & de ses prede-
 » cesseurs, que s'il eust vescu autant que l'homme
 » scauroit, estant lasche de cœur.

DEMETRIA entendant que son fils couard &
 indigne d'elle estoit retourné de la guerre, elle
 mesme le tua, dont on en fait cest Epigramme,

Demetria tua Demetrien

Son propre fils Lacedemonien,

Quand elle sceut que son ame surprise

Auoit esté de lasche couardise.

Vne autre aiant entendu que son fils auoit aban-
 donné son reng, le tua, comme estant indigne de
 » son país, en disant, Ce n'est point ma geniture: sur
 laquelle on composa cest Epigramme,

Va meschant germe aux enfers tenebreux,

Va, qu'en despit de ton forfait paoureux

Eurotas mesme aux cerfs couards ne laisse

Boire son eau. Meurs canaille traistresse,

Entierement inutile à tout bien,

De Sparte indigne, oncques tu ne fus mien.

Vne

A Vne autre aiant entendu que son fils s'estoit sauué
» & enfuy des mains des ennemis, luy escriuit: Il
» court vn mauuais bruit de toy, efface le, ou ne sois
» point. Vne autre de qui les enfans s'en estoient
fuis de la bataille, arriuez qu'ils furent vers elle,
» leur dit: où allez vous meschants fuyards esclaves,
» voulez vous rentrer icy dont vous estes sortis? en
» reboursant sa robbe par deuant, & leur môstrant
» son ventre. Vne autre voiant son fils reuenâr du
camp, luy demanda, Hé bien, comment se porte
la chose publique? Il luy respondit, Tous noz gens
B sont morts. Et elle prenant vn pot de terre luy ietta
» sur la teste, en luy disant: T'ont ils doncques en-
» uoyé pour nous en porter des nouuelles? Vn fre-
re racontoit à sa mere la genereuse mort d'vn sien
» autre frere: sa mere luy respondit, Et n'as tu point
» de honte de ne l'auoir accompagné à vn si beau
» voyage? Vne autre mere auoit enuoyé ses enfans,
qui estoient cinq, au camp, & attendoit aux faulx-
bourgs de la ville quelle issue prèdroit la bataille:
Au premier qui en retourna, elle demâda des nou-
uelles, & il luy respondit, que ses enfans y auoient
C esté tuez tous cinq. Ce n'est pas cela que ie te
demande, meschant esclau que tu es, dit-elle: mais
cōment se portēt les affaires de la chose publique?
» La victoire est nostre, respondit-il: Ie suis donc-
» ques, dit-elle, maintenant contente de la perte de
» mes enfans. Vne autre, ainsi comme elle ensepu-
lisoit son fils, suruint vne pauvre vieillotte qui se
» prit à luy dire: O femme, quelle fortune! Bōne par
» les Dieux iumeaux, respōdit-elle: car le but, auquel

„ iel'auois enfanté m'est aduenü, à fin qu'il mourust **D**
 „ pour Sparte. Vne Dame du pais d'Ionie se
 glorifioit d'un sien ouurage de tapisserie qu'elle
 auoit faict au mestier fort sumptueux : mais vne
 Laconiene luy monstrant quatre siens enfans fort
 „ honestes & bien moriginez, Tels dit-elle, doiuent
 „ estre les ouurages d'une Dame de bien & d'hon-
 „ neur, & voyla dequoy elle se doit vanter & glo-
 „ rifier. Vne autre mere aiant eu nouuelles que son
 fils se gouuernoit mal en pais estranger où il estoit,
 „ luy escriuit, Il court un mauuais bruit de toy
 „ pardeça, efface le, ou te meurs. Estans quelques **E**
 ambassadeurs de Chio venus à Sparte, qui accu-
 soient & donnoient de grandes charges à Pédare-
 tus, sa mere Teleutia en aiant senty le vent les en-
 uoya querir: & aiant entédu d'eux les charges dont
 ils l'accusoient, apres qu'elle eut iugé en elle mesme
 „ qu'il auoit tort, elle luy rescriuit, Teleutia mere à
 „ Pédaretus son fils : Ou fais mieux, ou demeure là,
 „ n'esperant pas te sauuer par deça. Vne autre sem-
 blablement escriuit à son fils que lon accusoit de
 „ quelque crime : Mon fils, deliure toy ou de ceste
 „ charge, ou de la vie. Vne autre accompagnant son **F**
 fils boitteux qui s'en alloit à la bataille, luy disoit:
 „ Mon fils à chasque pas souuiene toy de bien faire.
 Vne autre de qui le fils estoit retourné de la bat-
 taille blecé au pied, & se plaignoit fort de la gran-
 „ de douleur qu'il sentoit : Mon fils, dit-elle, si tu
 „ te veux souuenir de la vertu, tu t'appaiseras, & ne
 „ sentiras plus de douleur. Un Lacedemonien auoit
 tellement esté blecé en vne bataille, qu'il ne
 se

A se pouuoit pas bien soustenir sur ses iambes, & fal-
loit qu'il cheminaſt à quatre pieds : & cōme il eust
honte de veoir les gens qui se rioient, ſa mere luy
„ dit: Et combien eſt il plus raiſonnable, mon fils, de
„ te reſiouir pour le teſmoignage de ta prouëſſe, que
„ d'auoir honte pour vn rire inſenſé? Vne autre
baillant à ſon fils ſon bouclier, en l'admonestant
„ de faire ſon deuoir : Mon fils, dit elle, ou rapporte
„ ce bouclier, ou qu'on te rapporte dedās. Vne au-
tre baillāt auſſi le bouclier à ſon fils, partant pour
„ ſ'en aller à la guerre, luy dit: Ton pere t'a touſiours
B conſerué ce bouclier, aduiſe de le conſeruer auſſi,
„ ou de mourir. Vne autre reſpondit à ſon fils qui
„ ſe plaignoit d'auoir courte eſpee, Approche toy
„ d'vn pas. Vne autre entendant que ſon fils eſtoit
„ mort tres-vaillamment en la bataille: Auſſi eſtoit
„ il mon fils, dit elle. Au contraire, vne autre en-
„ tendant que ſon fils ſ'eſtoit ſauué de viſteſſe: Auſſi
„ n'eſt il pas à moy, dit elle. Vne autre entendant
que ſon fils eſtoit mort en bataille, au meſme lieu
„ où lon l'auoit mis : Oſtez le donc, dit elle, de là, &
„ mettez ſon frere en ſa place. Vne autre eſtant en
C proceſſion ſolennelle & publique avec vn chap-
peau de fleurs ſur ſa teſte, entendit que ſon fils
auoit gagné la bataille, mais qu'il eſtoit ſi griefue-
ment blecé, qu'il eſtoit preſt à rendre l'ame : ſans
oſter ſon chappeau de fleurs de deſſus ſa teſte, ains
„ comme ſe glorifiant de ceſte nouuelle: ô combien,
„ dit elle, mes amies, il eſt plus honorable mourir
„ victorieux en bataille, que non pas ſuruiure apres
„ auoir emporté le pris en la feſte des ieux olym-

piques! Vn frere racontoit à sa sœur, comme son
 fils estoit mort vaillamment à la guerre: & elle luy
 „ respōdit, Autant comme i'ay de plaisir de luy, tout
 „ autāt i'ay de desplaisir de toy, mon frere, que tu ne
 „ l'as accompagné en vn si vertueux voyage. Quel-
 qu'vn enuoyoit solliciter vne Lacedemonienne, si
 elle voudroit s'entendre avec luy: elle feit responce,
 „ Quād i'estois fille, i'apprenois à obeir à mon pere,
 „ & l'ay tousiours fait: & depuis que i'ay esté fem-
 „ me, à mon mary: si dōc ce que celuy là me deman-
 „ de est honeste & iuste, qu'il le declare premieremēt
 „ à mon mary. Vne fille pauvre estāt enquisse quel
 douaire elle apporteroit à celuy qui l'espouseroit:
 „ la pudicité, respondit elle, de mon país. Vne au-
 „ tre estant interroguee, si elle estoit allee au mary:
 „ non, dit elle, mais le mary, à moy. Vne autre aiant
 esté occultement depucellee, & fait auorter son
 fruct, porta si patiemēt les douleurs de son auor-
 tement, sans ietter vn seul cry, que iamais son pere
 ny ceulx qui estoient autour d'elle ne s'apperceu-
 rent aucunemēt qu'elle eust auorté: car le deshon-
 neur combattāt avec l'hōnesteté vainquit la vehé-
 mēce des douleurs. Vne Lacedemonienne que lon
 vėdoit, interroguee, qu'elle sçauoit faire, respondit,
 „ Estre fidele. Vne autre aiāt esté prise prisonniere,
 & semblablemēt estant interroguee, qu'elle sçauoit
 „ faire, respondit, Bien garder la maison. Vne autre
 estāt enquisse par quelqu'vn, si elle seroit bonne s'il
 „ l'achettoit: ouy, respōdit elle, encore que tu ne m'a-
 „ chettes pas. Vne autre que lon vendoit à l'encan,
 respōdit au crieur qui luy demādoit ce qu'elle sçau-
 uoit

A uoir faire, Estre libre:& comme celuy qui l'auoit achetree luy cōmandast quelque seruice indigne de
 „ personne libre:tu te repétiras,dit elle,de t'auoir en-
 „ uié vn si noble acquest:& se feit elle mesme mourir.

LES VERTVEUX FAICTS

DES FEMMES.



B E N'AY pas mesme opi-
 nion que Thucydides, Da-
 me Clea, touchant la vertu
 des femmes:pource que luy
 estime, que celle là soit la
 plus vertueuse, & la meil-
 leure, de qui on parle le
 moins, autāt en bien qu'en
 mal: pensant que le nom de la femme d'honneur
 doioe estre tenu renfermé comme le corps, & ne
 sortir iamais dehors. Et me semble que Gorgias
 estoit plus raisonnable; qui vouloit que la renom-
 mee,nō pas le visage, de la femme fust cogneuē de
 plusieurs:& m'est aduis, que la loy ou coustume des
 c Romains estoit tresbōne, qui portoit, que les fem-
 mes, aussi bien que les hommes, apres leur mort
 fussent publiquement honorees à leurs funerailles
 des louanges qu'elles auroient meritees. Et pour-
 rant incontinent apres le trespas de la tres-ver-
 tueuse Dame Leontide, ie discours des lors assez
 longuement sur ceste matiere avec toy, lequel
 discours ne fut point à mon aduis sans quel-
 que consolation fondee en raison philosophique:

& maintenant suyuant ce que tu me requis alors, D
 ie t'enuoye le reste du propos, pour monstrier que
 c'est vne mesme vertu celle de l'homme, & celle
 de la femme, par la preuue de plusieurs exemples
 tirez des ancienes histoires, qui n'ont pas esté par
 moy recueillies en intention de donner plaisir à
 l'ouye : mais si la nature de l'exemple est telle, que
 tousiours à la force de persuader est conioincte
 aussi la vertu de delecter, mon propos ne reiettera
 point la grace du plaisir qui seconde & fauorise
 l'efficace de la preuue, ny n'aura point de honte de
 cōioindre les Graces avec les Muses, qui est la plus E
 belle assemblée du monde, comme dit Euripides,
 induisant l'ame à croire facilement les belles rai-
 sons par la delectation qu'elle y prend : car si pour
 prouuer que c'est vn mesme art de peindre les fem-
 mes que les hommes, ie produisois de telles pein-
 tures de femmes, comme Apelles, ou Zeuxis, ou
 Nicomachus en ont laissées, y auroit il homme qui
 m'en sceust avec raison reprendre, en me mettant
 sus que i'aurois plus tost visé à resiouir & delecter
 les yeux, que non pas à prouuer mon intention? Le
 croy à mon aduis, que non. Et quoy, si d'ailleurs F
 pour monstrier que la science poëtique de repre-
 senter en vers toutes choses, n'est point différente
 és femmes d'avec celle qui est aux hommes, ains
 tout vne mesme, ie venois à conferer les vers de
 Sappho avec ceux d'Anacreon, ou les oracles des
 Sibylles avec les responses de Bacchis, y auroit il
 homme qui peust iustement blasmer celle demon-
 stration, pource qu'elle attireroit l'auditeur à la
croire

croire avec plaisir & delectation? Iamais homme ne le diroit. Et neantmoins il n'y a moien de cognoistre mieux d'ailleurs la similitude ou difference de la vertu de la femme & de l'homme, qu'en conferant les vies aux vies, & les faicts aux faicts, comme en mettant l'un deuant l'autre les ouurages de quelque grande science, & considerant si la magnificence de la royne Semiramis a vn mesme air & mesme forme, que celle du roy Sesostris: & la prudence de Tanaquil, que celle du Roy Scruuius: ou la magnanimité de Porcia que celle de Brutus, ou celle de Timoclea que celle de Pelopidas, en ce qui est principalement commun entre eux, & en quoy gist leur principale valeur: pource que les vertus prennent quelques autres differences, comme couleurs propres & particulieres, selon la diuersité des natures, & se conforment aucunement aux meurs & conditions des subiects en qui elles sont, & aux temperatures des corps, aux aliments mesmes, & aux façons de viure: car Achilles estoit vaillant d'une sorte, & Ajax d'une autre: & la prudence d'Ulysses n'estoit pas semblable à celle de Nestor, ny n'estoit pas Caton iuste de mesme qu'Agésilas, ny Irene n'aimoit pas son mary de la mesme façon que faisoit Alceste, ny Cornelia n'estoit magnanime comme l'estoit Olympiade, mais pour cela nous ne dirons pas qu'il y ait plusieurs diuerses vertus de vaillance, ne plusieurs prudences, ne plusieurs iustices, pour les dissimilitudes de la façon de faire particuliere qui est à vn chascun, lesquelles ne forcent point d'auouer que la vertu soit

diuerſe. Or quant aux exemples qui ſont plus vulgaires & plus communs, & dont ie preſume que tu aies toute intelligēce & cognoiſſance, pour les auoir leus és liures des anciens, ie les paſſeray pour le preſent, ſi ce ne ſont d'aduenture quelques faiçts bié dignes de memoire qu'aient ignoré ceux qui par auant nous ont eſcrit les communes chroniques & vulgaires hiſtoires. Mais pource que les femmes par le paſſé, tant en commun qu'en particulier ont fait pluſieurs actes dignes d'eſtre rememorez & couchez par eſcript, il ne ſera pas mauuais d'en mettre deuant les autres quelques vns de ceux qu'elles ont faiçts en communauté.

DES DAMES TROIENNES.

LA plus part de ceux qui eſchapperent de la priſe & deſtruction de Troie la grande, coururent fortune, & furent iettez par la tourmente, avec ce qu'ils n'entendoient pas l'art de nauiguer, ny ne cognoiſſoient pas la mer, en la coſte de l'Italie : & ſeſtans garrez és abris, bayes & ports au dedans de la terre, à l'endroit où la riuierẽ du Tybre ſe deſgorge en la mer, les hommes deſcendirēt en terre, & allerent errans çà & là par le païs pour trouuer langue, & ce pendant leurs femmes aduiſerent entre elles, que quand bien ils ſeroient les mieux fortunez & plus heureuſes gents du monde, encore ſeroit il meilleur de ſ'arreſter en quelque lieu, que d'aller touſiours ainſi vagans & errans par la mer, & faire là leur païs, puis qu'ils ne pouuoient recouurer

urer celuy qu'ils auoient perdu. A quoy f'estans toutes accordees, elles bruslerent leurs vaisseaux, aiant commencé l'une d'entre elles qui s'appelloit Rome: l'aiâts executé, elles s'en allerent au deuant de leurs maris, qui accouroiēt vers la mer pour cuidoier secourir leurs vaisseaux, & craignâs la fureur de leur courroux, les ambrasserent & baisèrent affectueusement, les vnes leurs maris, les autres leurs parents, & par ceste carresse les appaiserent. De là cōmancea la coustume qui dure encore parmy les Romains, que les femmes saluēt ainsi leurs parêts, en les baisant en la bouche. Car les Troiens recognoissans la necessité qu'ils estoient cōtraincts d'ainsi le faire, & quant & quant trouuant les habitâs du païs qui les receuoient humainemēt & amiablemēt, approuuerent ce que leurs femmes auoient faict, & s'habituerent en cest endroict là de l'Italie parmy les Latins.

DES DAMES DE LA PHOCIDE.

LE faict des Dames de la Phocide, duquel nous voulōs faire mention, n'a point eu d'historien illustre qui l'ait redigé par escript: mais toutefois si ne cede il en vertu à nul acte qui ait oncques esté fait par femmes, & si est tesmoigné par grâds sacrifices que ceux de la Phocide celebrēt encore iusques au iour d'huy aupres de la ville de Hyāpolis, & par des anciēs decrets du païs. Or en est l'histoire entiere descrite de poinct en poinct en la vie de Daiphantus: mais quant à ce qui en appartient aux femmes, le faict est tel. Il y auoit vne guerre irreconciliable

& mortelle entre ceulx de la Theſſalie & ceulx de la Phocide, pour ce que ceulx de la Phocide à vn iour nommé tuerēt tous les magiſtrats & officiers des Theſſaliens qui exercoient tyrannie en leurs villes, & ceux de la Theſſalie briſerēt avec des meulles deux cents cinquante oſtagers de la Phocide qu'ils auoient entre leurs mains: & puis avec toute leur puissance entrerent en armes dedans leur pais par celuy des Locriens, aians premierement conclu & arreſté en leur conſeil, qu'ils ne pardonneroient à homme quelconque qui fuſt en aage de porter armes, & qu'ils feroient les femmes & les enfans eſclaues. Parquoy Daiphantus le fils de Bathyllius l'vn des trois qui auoient l'autorité ſouueraine au gouuernement de la Phocide, leur perſuada, que tous ceulx qui feroient en aage de porter armes, allaſſent au deuant des Theſſaliens pour les combattre: & au demourant quant à leurs femmes & à leurs enfans, qu'ils les aſſemblaſſent tous en vn certain lieu de la Phocide, & enuironnaſſent le pourpris du lieu de grande quantité de bois, & y meiſſent des gardes pour les garder, auxquels ils donnaſſent en mandement que ſils entendoient dire qu'ils euſſent eſté deſfaictz, ils meiſſent le feu dedās le bois, & feiſſent bruſler tous ces corps la: ce que tous les autres aians approuué, il y en eut vn qui ſe leuant dit, qu'il eſtoit iuſte & raiſonnable d'auoir auſſi le conſentemēt des femmes la-deſſus, & que ſi elles ne trouuoient ce conſeil bon, qu'il le faudroit laiſſer, & ne les y point forcer. Ce propos eſtant parueniuiſques aux Dames, elles

A elles teindrent assemblee de conseil à par elles la-dessus, où elles resolurent de suiure l'aduis de Daiphantus, avec si grande allegresse, qu'elles en couronnerent Daiphantus d'un chapeau de fleurs, comme aiant donné vn tresbon conseil à la Phocide: & dit on que les enfans mesmes en aians tenu conseil entre eulx à part, conclurent de mesmes. Ainsi ceulx de la Phocide aians donné la bataille aux Thessaliens pres du village de Cleones, es marches de Hyampolis, les desfeirent. Ceste resolution de ceulx de la Phocide fut depuis appelée par **B** les Grecs, le Desespoir: en memoire de laquelle victoire tous les peuples de la Phocide iusques au iourd'huy celebrent en ce lieu là, la plus grande & plus solennelle feste qu'ils aient, en l'honneur de Diane, & l'appellent Elaphebolia.

DES DAMES DE CHIO.

C E V L X de Chio fonderent iadis la ville de Leuconie par vne telle occasion: Vn ieune gentilhomme des meilleures maisons de Chio s'estoit marié, & comme on luy menoit sa femme en sa maison sur vn chariot, le roy Hippoclus qui estoit amy & familier du marié, & auoit assisté aux espoussailles cōme les autres, où lon auoit bien beu, bien ry, & fait bonne chere, faulta sur le chariot, ou estoit la mariee, nō pour y faire aucune violēce ne villanie, mais seulement pour se iouër, comme la coustume estoit en telle feste: toutefois les amis du marié ne le prenans pas ainsi, le tuerent sur la

place : à raison duquel homicide, s'estans monstrez **D**
à ceulx de Chio plusieurs signes manifestes de l'ire
& courroux des Dieux, & aiant l'oracle d'Apollo
respondu, que pour l'appaiser il falloit qu'ils tua-
sent ceulx qui auoient occis Hippoclus : Ils respon-
dirent que c'estoient tous ceulx de la ville qui l'a-
uoient tué. Dieu leur commanda qu'ils eussent
doncques tous à sortir de la ville de Chio, si tous
estoit participans de ce meurtre : ainsi meirent
ils hors de leur ville ceulx qui estoient auteurs ou
aucunement participās de ce crime, qui n'estoient
pas en petit nombre, ny gents de petite qualité, & **E**
les enuoyerēt habiter en la ville de Leuconie, qu'ils
auoient parauant ostee & conquise sur les Coro-
niens, à l'aide des Erythreïens : mais depuis, guerre
f'estant esmeuë entre eulx & les Erythreïens qui
estoit pour lors le plus puissant peuple de tout
le pais d'Ionie, & les estans les Erythreïens venuz
assaillir avec armee, ne pouuans resister, ils feirent
composition, par laquelle il leur estoit permis de
sortir avec vne robbe & vn saye tant seulement, &
non autre chose. Les femmes entendu cest ap-
pointement leur dirent iniure, s'ils auoient le cœur **F**
si lasche que de quitter leurs armes, & de s'en aller
passer tous nuds attrauers leurs ennemis : & comme
leurs maris alleguassent qu'ils auoient iuré, elles
leur conseillèrent, comment que ce fust, n'aban-
donner point leurs armes, & de leur dire que la ia-
ueline estoit la robbe, & le bouclier le saye à tout
hōme de cœur. Ceux de Chio les creurent, & par-
lerent audacieusement aux Erythreïens, en leur
mon-

A monſtrant leurs armes, ſi bien qu'ils les effroyerent de leur audace, & n'y eut perſonne d'eulx qui ſ'en approchaſt pour cuider les empescher, ains furent tous contents qu'ils ſ'en allaſſent, en leur quittant la place. Voyla comment ceux la aians appris de leurs femmes la hardieſſe de ſ'aſſeurer, ſauuerent leur honneur & leur vie. Bien long temps depuis les femmes de la meſme ville de Chio feirent vn autre acte qui ne cede de rien en vertu à celuy là, lors que Philippus le fils de Demetrius tenant leur ville aſſiegee feit proclamer vn
B mandement par ſes heraults, & vn cry merueilleuſement ſuperbe & barbare, Que les eſclaues de la ville ſe rebellafſent contre leurs maiſtres, & ſe veinſſent rendre à luy, & qu'il leur donneroit liberté, & ſi leur feroit eſpouſer à chaſcun leurs maiſtreſſes, femmes de leurs maiſtres. Les femmes en conceurent vn ſi grand courroux, & ſi grande indignation en leurs cœurs (avec les eſclaues, qui eulx meſmes en furent irritez comme elles, & leur aſſiſterent) qu'elles prirent la hardieſſe de monter ſur les murailles de la ville, & d'y porter des pierres
C & des traicts, en priant leurs hommes qui combattoient d'auoir bon courage, & les admoneſtans de ne ſe laſſer point de faire bien leur deuoir: ſi bien qu'en faiſant de faiet & de parole ce qu'elles pouuoient pour repoulſer l'ennemy, à la fin elles contraignirent Philippus de ſe leuer de deuant la ville ſans rien faire, & n'y eut pas vn eſclaue tout ſeul qui ſe rendiſt oncques à luy.

LE combat des Dames Argiennes alencontre du roy de Lacedemoné Cleomenes, pour la defense de leur ville d'Argos, qu'elles entreprirent sous la conduite & par l'enhortemēt de Telefilla poëtisse, n'est pas moins glorieux que autre exploit quelcōque que iamais les femmes aient fait en commun. Ceste Dame Telefilla, à ce que lon treuve par escript, estoit bien de maison noble & illustre, mais au demourant fort maladiuē de sa personne : à l'occasion dequoy elle enuoya deuers ^E l'oracle pour sçauoir comment elle pourroit recouurer sa santé:& luy aiant esté respondu, qu'elle seruist & honorast les Muses : elle obeissant à la reuelation des Dieux, & se mettant à apprendre la Poësie & l'harmonie du chant, fut en peu de temps deliuree de sa maladie,& deuint tres renommee & estimee entre les femmes,pour ceste partie de poësie. Depuis estāt aduenu que le roy des Spartiates Cleomenes aiant tué en vne bataille grand nombre des Argiens, mais non pas toutefois comme quelques vns fabuleusement ont escrit precisémēt, ^F sept mille, sept cents, septante & sept, s'en alla droit à la ville d'Argos, esperant la surprēdre vuide d'habitants, il prit vne soudaine emotion de courage & de hardiessē inspiree diuinement aux femmes qui estoient en aage, de faire tout leur effort pour engarder les ennemis d'entrer dedans la ville : & de faict sous la conduitte de Telefilla, elles prirent les armes,& se mettans aux creneaux des murailles

A railles, les ceignirent & environnerent tout à l'entour, dont les ennemis demourerent fort esbahis. Si repoulsèrent le roy Cleomenes avec perte & meurtre de bon nombre de ses gents, & chasserent l'autre Roy de Lacedemone Demaratus hors de leur ville, qui estoit desia entré bien auant dedans, & en auoit occupé le quartier qui s'appelle Pamphyliaque. Ainsi la ville aiant esté sauuee par leur prouesse, il fut ordonné que celles qui estoient mortes au combat seroient honorablement inhumées sur le grand chemin que lon nomme la voye Argienne: & à celles qui estoient demourees, pour vn perpetuel monumēt de leur vaillance, on permet qu'elles consacraissent & dediaissent vne statue à Mars. Ce combat fut, ainsi comme les vns escriuent, le septieme iour: ou, comme les autres, le premier du mois que lon nommoit anciennement Tetartus en Argos, & maintenant s'y appelle Hermæus, auquel les Argiens solennisent encore au iour d'huy vne feste solēnelle qu'ils appellent Hybristica, cōme qui diroit l'infamie, où la coustume est, que les femmes vestent des sayes & manteaux à vsage d'homme, & les hommes des cottes & des voiles à vsage de femmes: & pour réplir le defaut d'hōmes en leur ville, au lieu de ceulx qui estoient morts és guerres, ils ne feirent pas ce que dit Herodote, qu'ils marierent leurs esclaués avec leurs vefues, mais ils aduiserent de donner droict de bourgeoisie de leur ville, aux plus gents de bien de leurs voisins, & leur feirent espouser les vefues: & toutefois encore semble il qu'elles les eurent en quel-

que mespris, car elles feirent vne loy, que les nouvelles mariees auroient des barbes feintes au menton, quand elles coucheroient avec leurs marits,

DES PERSIENNES.

CYRVS aiant fait rebeller les Perles contre les Medes & leur roy Aftyages, il aduint qu'il fut rompu en vne bataille avec les Perles, lesquels fuyants à val de route vers leur ville, & estans les ennemis bien pres d'y entrer pesle mesle quand & eulx, les femmes sortirent dehors au deuant d'eulx, & reboursants leurs robbes du bas en hault par le deuant leur crierent, Où fuyez vous les plus lasches hommes qui soient au monde? car pour fuir vous ne pouuez pas rentrer icy d'où vous estes sortis. Les Perles aians honte de veoir ceste façon de faire de leurs meres, & d'ouir leurs voix aussi, en se tensant & blasmant eulx mesmes, tournerent visage, & retournans de rechef au combat, meirent en fuitte leurs ennemis. Depuis ce temps la fut establie la loy, que toutes & quantesfois que le Roy, retournant d'aucun voyage loingtain, entre-
roit dedans la ville, chasque femme auroit de luy vn escu, de l'ordonnance du roy Cyrus. Mais on dit que l'un de ses successeurs Roy, nommé Ochus, qui ne valoit rien au demourant, ains estoit plus auaricieux que ne fut oncques Roy, tournoit tousiours au long de la ville, & ne passoit iamais par dedans, ains frustrait tousiours les Dames du present qu'elles deuoient auoir là ou au contraire, Ale-
xandre

A xandrey entra par deux fois, & si donna le double aux femmes grosses.

DES GAVLOISES.

A V A N T que les Gaulois passassent les montagnes des Alpes, & qu'ils eussent occupé celle partie de l'Italie où ils habitent maintenant, vne grande & violente sedition s'esmeut entre eulx, qui passa iusques à vne guerre ciuile: mais leurs femmes ainsi que les deux armées furent prestes à s'entrechocquer, se ietterent au milieu des armes, & prenans leurs differents en main, les accorderent, & iugerēt avec si grande equité, & si au contentemēt de toutes les deux parties, qu'il s'en engendra vne amitié & bienueillance tresgrāde reciproquement entre eulx tous, non seulement de ville à ville, mais aussi de maison à maison: tellement que depuis ce temps là ils ont tousiours continué de consulter des affaires tant de la guerre que de la paix avec leurs femmes, & de pacifier les querelles & differents, qu'ils auoiēt avec leurs voisins & leurs alliez, par le moié d'elles. Et pourtāt en la composition qu'ils feirent avec Hannibal, quand il passa par les Gaules, entre autres articles, ils y meirent, que s'il aduenoit que les Gaulois pretēdissent que les Carthaginois leur teinssent quelque tort, les Capitaines & gouuerneurs Carthaginois qui estoient en Espagne en feroient les iuges: & si au contraire les Carthaginois vouloient dire que les Gaulois leur eussent faict quelque tort, les femmes des Gaulois en iugeroiēt.

LES Meliës se deliberants d'aller chercher vne terre à habiter plus fructueuse & plus fertile que la leur, eleurent pour conducteur & Capitaine de la troupe qu'ils enuoyent dehors, vn ieune homme de beauté excellente, lequel auoit nom Nymphæus, & aians premierement enuoyé à l'oracle, Dieu leur respondit qu'ils la cherchassent par mer, & que ils s'arrestassent & s'habituaissent au lieu où ils auroient perdu leurs porteurs. Or aduint il que eulx estans abordez en la coste de la Carie & descendus en terre, leurs vaisseaux y perirent par la tourmente: & lors les habitans de la ville de Cryassa en la Carie, soit qu'ils eussent pitié de leur nécessité, ou qu'ils redoubtassent leur hardiesse, les conuièrent à demourer avec eulx, & leur departirent vne quantité de terres: mais depuis voians qu'en peu de temps ils auoient pris vn grand accroissement, ils leur dresserent embusches pour les tuer, en vn grand festin & soupper, qu'ils leur preparerent. Or y auoit il vne ieune fille Cariene nommee Caphéne, qui estoit secrettement amoureuse de Nymphæus, & ne pouuant supporter que lon feist ainsi proditoiremēt mourir son amy, elle luy descouurit la deliberatiō, & l'entreprise de ceulx du pais. Quand doncques les Cryassiens les vindrent querir pour aller au festin, Nymphæus feit response, que la coustume des Grecs n'estoit point d'aller soupper en festin, qu'ils n'y menassent leurs femmes quand & eulx: quoy entendu, les

A les Cariens leur dirent , qu'ils amenassent d'ocques leurs femmes en bonne heure: ainsi aiant donné à entendre à ses gents , ce que les Cariens leur vouloient faire, il leur dit qu'ils vinssent quant à eulx sans armes en leurs robes simples, mais que chascune de leurs femmes apportast dedans les plis de sa robe vne espee, & qu'elle l'asseist aupres de son mary. Quand ce fut au milieu du soupper que lon donna le signal aux Cariens pour mettre la main à la besongne, les Grecs incontinent cogneurēt bien que c'estoit le point de l'occasion, qu'il falloit mener les mains : les femmes toutes à vn coup ouurerent leurs giron, & leurs marits se saisissans de leurs espees, coururent sus aux barbares, & les massacrerent tous en la place, sans en excepter vn: ainsi aians conquis le païs & rasé leur ville, ils en bastirent vne autre qu'ils appellerent la nouvelle Cryasse. Et Caphéne estant mariee avec Nymphéus , receut l'honneur & la grace qu'elle meritoit, pour le grand bien qu'elle leur auoit faict. Si me semble que ce qui est plus à louer & estimer en ce faict, c'est le silence & l'assurance de ces

C Dames , & que iamais , en tant qu'elles estoient, il n'y en eut vne seule à qui le cœur faillist en cest entreprise, ne qui contre sa volonté y feist aucun mauuais office.

DES THOSCANS.

IL y eut iadis quelques Thyrreniens & Thoscans qui occuperent les Isles de Lemnos & d'Im-

bros, & rauirent quelques femmes des Atheniens ^D
 du bourg de Lauria, desquelles ils eurent des en-
 fants: mais les Atheniens depuis les chasserent des-
 dittes isles, comme estans mestifs & demy-barba-
 res: & eux estans par fortune arriuez au promon-
 roire de Tenarus, feirent seruice bien à poinct aux
 Spartiates en la guerre qu'ils auoient contre leurs
 Ilotes: & pour ceste cause aiants obtenu droict de
 bourgeoisie à Sparte, & des femmes en mariage,
 sans toutefois estre admis aux offices ny magistras,
 & sans pouuoir estre du conseil, ils vindrent à estre
 soupçonnez de vouloir remuer quelque nou- ^E
 uelleté, & de s'assembler & conspirer ensemble,
 pour changer le gouuernement. Parquoy ceux
 de Sparte les aiants saisis au corps, les meirent en
 prison, & les teindrét en bien estroitte garde, pour
 voir s'ils les pourroient conuaincre par preuues
 certaines & indubitables: ce pendant les femmes
 de ces prisonniers vindrent en la prison, & feirent
 tant par prieres & obsecrations enuers les gardes,
 qu'ils les laisserent entrer seulement pour veoir &
 saluër leurs marits: Quãd elles furent entrees, elles
 leur conseillerent qu'ils despouillassent vistemēt ^F
 leurs habillemēts, & vestissent ceux d'elles, & qu'ils
 sen allassent ainsi se bouchants & affublans le vi-
 sage: ce qui fut faict, & demourerēt elles enfermées
 en la prison, se preparans à soustenir tous les maux
 que lon leur pourroit faire: & les gardes laisserent
 sortir leurs marits pensans que ce fussent les fem-
 mes. Eux estans ainsi sortis, allerent incontinent
 occuper le mont de Taugeta, & susciter les Ilotes
 à pren-

A à prendre les armes & se rebeller: ce que craignans ceux de Sparte, leur enuoyerent vn herault, par lequel ils appointerent avec eux que lon leur rendroit leurs femmes, argent & tous leurs biens, & leur fourniroit on de nauires, esquelles ils s'en iroient par mer chercher leur aduéture, & quād ils auroiēt trouué pais & ville à se loger, ils seroient nōmez & reputez parents des Lacedemoniens & colonie extraitte & descendue d'eux: l'accord ainsi passé, ils prirent pour leurs capitaines Pollis, Adelphus & Crataïdas Lacedemoniens, & y en eut vne partie d'eux qui s'arrestèrent en l'Isle de Melo: mais la plus grande trouppes, sous la conduite de Pollis s'en alla en Candie, attendant si les signes qui leur auoient esté predicts par les oracles leur aduiendroient point: car il leur auoit esté respondu, que quand ils auroient perdu leur ancre & leur Déesse, que là ils meissent fin à leur voyage, & qu'ils bastissent vne ville. Estans doncques venus surgir en la peninsule de la Cherronesse, là où il se meit la nuit parmy eux vne frayeur sans occasion quelconque apparēte, que lon appelle terreur Panique: dequoy estās effroyez & troublez, ils se ietterēt en tumulte sans ordre dedans leurs vaisseaux, delaisans à terre l'image de Diane qu'ils auoient eue de pere en fils, aiant esté apportee par leurs predecesseurs de Braurō en l'Isle de Lemnos, & de là par tout avec eux: apres que le tumulte de l'effroy fut passé, ainsi comme ils cingloient desia en pleine mer ils s'apperceurent qu'ils auoient oublié leur image, & quāt & quāt Pollis se prit garde que

la prinſe de leur ancre eſtoit perdue, pource que D
 quand on vint à la tirer à force, comme il aduient,
 des lieux où elle eſtoit fichee parmy des rochers,
 elle ſe rompit & y demoura: ſi dit que les oracles
 qui leur auoient eſté predicts, eſtoient accomplis,
 donna le ſignal à la flotte de retourner arriere, oc-
 cupa le païs, & aiant en pluſieurs rencontres rom-
 pu ceux qui ſe trouuerent en armes deuant luy, il
 ſe logea en la ville de Lyctus, & en prit pluſieurs
 autres. Voyla d'où vient qu'encore aujour-d'huy
 ils ſe diſent parêts des Atheniens du coſté de leurs
 meres, & du coſté de leurs peres eſtre colonie de- E
 rinee des Lacedemoniens.

DES LYCIENS.

CE que lon recite cōme eſtant aduenue en la Ly-
 cie, eſt bien vn conte faiet à plaſiſr, mais ſi eſt il
 neantmoins teſmoigné par vne conſtante renom-
 mee. Car Amisodarus que les Lyciens appellent
 Iſaras, ainſi que lon raconte, vint des marches de
 la ville de Zelee, qui eſt colonie des Lyciens avec
 vne groſſe flotte de courſaires, dont eſtoit chef & F
 capitaine vn pirate qui ſe nommoit Chimarrus,
 homme belliqueux, mais cruel & inhumain, qui
 auoit pour enſeigne du vaiſſeau, ſur lequel il eſtoit,
 à la prouë vn lion, & ſur la poupe vn dragon, il
 faiſoit de grands maux en toute la coſte de la Ly-
 cie, tellemēt qu'il n'eſtoit pas poſſible de nauiguer
 la mer, ny habiter és villes maritimes, & voiſines
 du riuage. Ce courſaire doncques aiant eſté mis
 à mort

A à mort par Bellerophon qui le pourfuyuit fuyant avec son Pegafus *, tant qu'il l'attrapa, & oultre cela aiant encore chassé les Amazones de la Lycie, pour tout cela non seulement il n'eut aucune recompense digne de ses seruices du Roy de Lycie Iobates, mais qui pis est encore luy faisoit il beau-
B coup de torts : à l'occasion de quoy Bellerophon estant fort indigné, entra dedans la mer, là où il fit prieres à Neptune cōtre luy, qu'il luy rendist sa terre infructueuse & sterile, & sa priere faitte se retira, là où il aduint vn estrange & horrible spectacle, c'est que la mer s'enfla, qui vint inonder tout le pais, le fuyuant suspendue pas à pas par tout où il alloit, & couurant apres luy toute la campagne. Et pource que les hommes, qui feirent tout ce qui leur fut possible de le prier qu'il voulust arrester ceste inondation de la mer, ne le peurent oncques obtenir de luy, les femmes leuans leurs cottes par deuant luy allerent alencontre, ce qui de honte le fit retourner en arriere, & la mer se retira aussi quand & luy en son giste. Or quelques vns interpretans vn peu plus gracieusemēt la fabulosité de
C ce conte, disent que ce ne fut pas par imprecations qu'il attira la marine, mais que la partie du pais de la Lycie qui estoit la plus fertile, estāt basse & plaine, il y auoit vne leuee tout le long de la coste qui le defendoit: Bellerophon la rompit, & ainsi la mer venant à entrer par grande impetuosité, & à noyer tout le plat pais, les hommes feirent tout ce qu'ils peurent par prieres enuers luy pour le cuyder appaiser, & n'y gagnerent rien : mais les femmes

*Les Poetes
 feignent que
 c'estoit vn
 cheual alé,
 mais il est
 vray sem-
 blable, que
 c'estoit vn
 vaisseau
 fort leger.*

l'environnans à grandes troupes de tous costez **D** le presserent tant, qu'il eut honte de les refuser, & en leur faueur oublia son mal-talent: les autres disent que Chimera estoit vne haute môtagne droitement opposee au soleil du midy, qui faisoit de grandes refractions & reuerberations des rayôs du Soleil, & par consequence des inflammations ardentes, comme feu en la montagne, lesquelles venans à s'estendre & resprendre parmy la campagne mesme, faisoient secher & fener tous les fruiçts de la terre. Dequoy Bellerophon, homme de grand entendement, aiant compris la cause, feit fendre & **E** couper en plusieurs endroiçts la face du rocher qui estoit la plus vnïe & polie, & consequemment qui rebattoit plus les rayons du Soleil, & en enuoyoit de plus grandes ardeurs en la campagne: & pour autant qu'il n'en fut pas recogneu par les habitans, cōme il meritoit, par despit il se meit à vouloir prendre vengeance des Lyciens, mais les femmes feirent de sorte qu'elles appaiserent sa fureur. Mais au demourant, la cause qu'allegue Nymphis en son quatriême liure d'Heraclee n'est pas faicte à plaisir: Car il dit, que ce Bellerophontes, aiant tué **F** vn sanglier qui gastoit tous les fruiçts de la terre, & les autres animaux dedans le pais des Xanthiens, il n'en eut aucune recōpense: à l'occasion dequoy aiant faict de griefues imprecations contre ces ingrats Xanthiens à Neptune, il vint vne certaine saumeure par dessus leur terre, qui la gasta toute, & la feit deuenir amere, iusques à ce qu'ayant esté gaigné par les prieres & supplicatiōs des femmes,

A il pria Neptune de vouloir remettre son courroux. Voyla pourquoy la coustume en est demouree au pais des Xanthiens, que les hommes en tous affaires se renomment du costé des meres, & non pas du costé des peres.

DES SALMATIDES.

Hannibal fils de Barca, deuât qu'il passast en Italie pour y faire la guerre aux Romains, combattir vne grosse ville d'Espagne qui se nommoit Salmatique: les assiegez du commencement eurent peur, & promirent qu'ils feroient ce que Hannibal leur commanderoit, & luy payeroient trois cents talents en argent, & trois cents ostagers pour seureté de la capitulation: mais si tost que Hannibal eut leué son siege, ils se repentirent de l'appointement qu'ils auoient fait avec luy, & ne firent rien de tout ce qu'ils auoient promis: parquoy retournant de rechef mettre le siege deuant la ville, pour donner plus grand courage à ses gens de l'assaillir, il leur dit qu'il leur abandonnoit le pillage: dequoy ceux de la ville se trouuans effroyez, se rendirent à discretion, & les barbares leur permirent de sortir de la ville avec chascun vne robbe, ceux qui estoient de condition libre, en abandonnant leurs armes, leurs biens, leur argent, leurs esclaves, & leur ville. Leurs femmes se doubans bien que les ennemis au sortir de la porte fouilleroient leurs marits, & qu'à elles ils ne toucheroient point, elles prirent des espees, & les cachèrent deffous leurs

robbes, & sortirent à tout quand & leurs marits. **D**
 Quand ils furent tous sortis. Hannibal leur baillât
 vne garnison de Massiliens pour les garder, les ar-
 resta au faux-bourg: & ce pendant tout le reste de
 son armee se ietta à la foule dedans la ville, qui fut
 toute pillée, sans ordre quelconque: quoy voyants
 ces Massiliens perdoient patience, & ne se pou-
 uoient contenir, ny entendre à bien garder leurs
 prisonniers, ains se courrouceoient, & finalement
 s'en alloient pour auoir aussi bien que les autres
 leur part du butin. Mais sur ces entrefaites les
 femmes se prirent à crier, & donnerent à leurs hō- **E**
 mes les espees qu'elles auoient apportees, & aucu-
 nes se ruerent elles mesmes dessus leurs gardes, tel-
 lement qu'il y en eut vne qui osta à Banon le tru-
 chement, la picque qu'il tenoit, & luy en donna en
 l'estomach, mais il estoit armé d'un corps de cui-
 rasse: & les marits en abbatans les vns & tournans
 les autres en fuitte, se sauuerent par ce moien avec
 leurs femmes en trouppes: quoy entendant Hanni-
 bal alla soudainemēt apres, surprit ceux qui estoiet
 demourez derriere, & ce pendant les autres se sau-
 uerent aux prochaines montagnes sur l'heure, mais **F**
 depuis enuoyans demander pardon, Hannibal le
 leur donna gracieusement, & leur permet de re-
 uenir demourer en leur ville.

DES MILESIENNES.

IL fut vn temps que les filles des Milesiens en-
 trerent en vne estrāge resuerie & terrible humeur,
 sans

A sans que lon en vist aucune cause apparente, si non que lon coniecturoit, qu'il falloit que ce fust quelque empoisonnement d'air qui leur cauſoit ce deuoyement & alienation d'entendement : car il leur prenoit à toutes vne soudaine enuie de mourir & vn furieux appetit de s'aller pendre, & y en eut plusieurs qui se pendirent & estranglerent secrettement, & n'y auoit ny remonstrances, ny larmes de pere & de mere, ny consolations d'amis, qui y serussent de rien, car pour ce faire mourir elles trouuoient tousiours moien d'affiner & tromper toutes les ruses & inuentions de ceux qui faisoient le guet sur elles : de maniere que lon estoimoit que ce fust quelque punition diuine, à laquelle nulle prouision humaine ne sceut trouuer remede, iusques à ce que par l'aduis de l'un des ci-toiens homme sage, il se fait au conseil vn edict, que s'il aduenoit qu'il s'en pendist plus aucune, elle seroit portee toute nue à la veüe de tout le monde à trauers la grande place. C'est edict fait & ratifié par le conseil, ne reprima pas seulement pour vn peu, mais arresta du tout la fureur de ces filles qui auoient enuie de mourir. Or est ce vn grand signe de bonne & vertueuse nature que la crainte d'infamie & de deshonneur, & veu qu'elles ne redoutoient ny la mort, ny la douleur, qui sont les deux plus horribles accidents que les hommes puissent souffrir, qu'elles ne peurent supporter vne imagination de villanie, ny de honte & de deshonneur, qui ne leur deuoit encores aduenir sinon apres leur mort.

LA coustume estoit des filles de Cio, qu'elles alloient ensemble és temples publiques, là où elles demouroient tout le long du iour, & leurs amoureux qui les poursuiuoient en mariage, les regardoient iouer & baller ensemble, & le soir elles alloient és maisons les vnes des autres par ordre, là où elles seruoient aux peres & meres, & aux freres, les vnes des autres, iusques à leur lauer les pieds. Or aduenoit il que bien souuent plusieurs des ieunes hommes aimoient vne mesme fille, mais leur E amour estoit si bon, si honeste, & si modeste, que si tost qu'elle estoit fiancee à l'un, les autres se deportoient de luy faire l'amour: mais en somme l'honesteté de ces femmes se peut cognoistre à cela, que en l'espace de sept cents ans, il n'est point de memoire, que iamais il y ait eu femme mariee qui ait commis adultere, ne fille qui hors mariage ait esté depucelée.

DES PHOCIENES.

Les tyrās de la Phocide aians occupé la ville de Delphes, & pour occasion d'icelle occupation les Thebains leur faisans la guerre, il aduint que les femmes dediees à Bacchus, que lon appelle les Thyades, qui vaut autāt à dire cōme les forsenées, furēt esprises de leur fureur, & courans vagabōdes cà & là de nuit, ne se dōnerent de garde qu'elles se trouuerent en la ville d'Amphisse, là où estans las-

sees,

A fees, & non encore retournées en leur bon sens, elles se coucherēt de leur long au milieu de la place, & s'endormirent: dequoy estans aduerties les femmes des Amphisseiens, & craignans qu'elles ne fussent violees par les souldards des tyrans, dont il y auoit garnison en la ville, d'autāt que la ville estoit alliee & confederee des Phociens, elles accoururēt toutes en la place, & se mettās alentour d'elles sans mot dire, les laisserent dormir sans les esueillee: puis quand elles se furēt d'elles mesmes esueillees, elle se meirent à les traitter chascune la siene, & à leur dōner à manger: puis finablement aians demandé congé de ce faire à leurs marits, les cōuoyèrent à sauueté iusques aux montaignes.

VALERIA ET CLOELIA.

L'outrage faict à vne Dame Romaine nommee Lucretia, ensemble la vertu d'icelle, furent cause de faire chasser de son estat Tarquinius Superbus septième Roy des Romains apres Romulus. Ceste dame estant mariee à vn grand personnage, & qui de parenté appartenoit à ceux du sang royal, fut violee & forcee par l'vn des enfans de ce Roy Tarquin qui estoit logé chez elle: à l'occasion dequoy elle feit assembler tous ses parents & amis, & apres leur auoir declaré & faict entendre l'outrage que on luy auoit faict, elle se tua sur l'heure en leur presence. Et Tarquin pour ceste cause aiāt esté chassé de son royaume, suscita plusieurs autres guerres aux Romains, pour penser recouurer son estat, & fina-

blement feit tant enuers Porsena Roy de la Thoscane, qu'il luy persuada d'aller mettre le siege deuant la ville de Rome avec grosse puissance : & leur estant oultre la guerre suruenue encore la famine, dont ils se trouuoient fort pressez, entendans que Porsena estoit non seulement prince vaillant aux armes, mais aussi debonaire & iuste, ils le voulurent faire iuge des differents qu'ils auoient alencôtre de Tarquin. Mais Tarquin s'opiniastra au contraire disant, que sil ne demouroit ferme & constant allié, aussi peu seroit il puis apres iuste iuge. Porsena le laissant & se departant de son alliance, entendit à faire en sorte qu'il s'en retournast en bonne paix & amitié avec les Romains, en recouurant d'eux toutes les terres qu'ils auoiēt occupees en la Thoscane, & les prisonniers qu'ils auoiēt pris en ceste guerre. Pour l'assurance duquel appoinctement on luy bailla des ostages dix fils, & dix filles, entre lesquelles estoit Valeria fille du consul Publicola: & cela fait il rōpit incontinent son cāp, & tout appareil de guerre, quoy que tous les articles de la capitulation ne fussent pas encore accomplis. Ces filles estant en son camp, descendirēt vers la riuiera, comme pour s'y baigner & lauer, vn peu arriere du camp, & à la fuscitation de l'vne d'entre elles qui auoit nom Clœlia, apres auoir entortillé leurs habillemens alentour de leurs testes, elles se jetterent à trauers la riuiera qui estoit impetueuse, & passerent à nage, s'entre-aidans les vnes aux autres avec grand trauail & grande peine. Il y en a qui disent que ceste fille Clœlia aiāt trouué moien
de

A de recouurer vn cheual , monta dessus , & trauersâ la riuiera tout doucement, mōstrant le chemin aux autres, & leur donnant courage & support à nager alentour d'elle: mais pour quelle raison ils le cōiecturent ainsi, nous le dirons cy apres. Quand les Romains les veirent passées à sauueté , ils eurent bien leur vertu & leur hardiessē en admiration, mais ils ne furent pas contents de leur retour , ny ne voulurent pas souffrir qu'on leur peust reprocher , d'auoir tous ensemble moins de foy qu'un hōme seul. Et pourtant commanderent aux filles

B de s'en retourner de là où elles estoient venues , & enuoyerent quant-&-quant escorte pour les conduire: mais quād elles eurent repassé la riuiera du Tybre, il s'en fallut bien peu qu'elles ne fussent prises par vne embusche que Tarquin leur auoit dressée sur le chemin: mais le fille du Consul, Valeria, s'en fuit la premiere avec trois seruiteurs dedans le camp de Porſena , & son fils Aruns courant soudainement au secours des autres, quand il en ouit la nouuelle, les recourut des mains des ennemis . Quand elles furent toutes amenees deuant le Roy, il leur demanda laquelle c'estoit qui auoit donné courage à ses cōpagnes de passer la riuiera, & qui leur auoit la premiere donné ce conseil. Les autres craignans que le Roy n'en voulust faire souffrir quelque peine à Clœlia , n'en voulurent mot dire, mais elle mesme cōfessa que c'estoit elle. Et Porſena estimant beaucoup sa vertu , feir amener vn des plus beaux cheuaux de son escuyrie magnifiquement enharnaché, qu'il luy donna : &

qui plus est, pour l'amour d'elle renuoya courtoisement & humainement toutes les autres. C'est la coniecture par laquelle aucuns iugent, que Clœlia trauersa la riuiera dessus vn cheual: les autres disent que non, mais que le Roy s'estant esmerueillé de sa force & de sa hardiesse, comme estant plus grande que d'une femme, l'estima digne du present que lon a accoustumé de faire à vn bon homme de guerre: tant y a qu'en memoire de ce faict on en voit encore au iour d'huy vne statue de pucelle estant à cheual, en la rue que lon appelle la Rue sacree, laquelle statue aucuns disent estre de Clœlia, les autres de Valeria.

MICCA ET MEGISTO.

ARISTOTIMVS aiant vsuré la tyrannie & violente domination sur les Eliens, moiennat l'espaule & la faueur que luy faisoit le Roy Antigonus, abusoit inhumainement & excessiuement de son pouuoir: car oultre ce que de sa nature il estoit homme violent, encore estoit il contrainct par crainte d'obeïr & complaire à des barbares, gens ramassez de toutes pieces, qu'il auoit assemblez pour garder sa personne & son estat, & de leur laisser faire plusieurs insolences, & plusieurs cruantez alencontre de ses subiects, cōme fut entre autres l'inconueniēt qui arriua à Philodemus, lequel auoit vne belle fille nōmee Micca, de laquelle vn des capitaines du tyran, qui s'appelloit Lucius, vouloit faire son plaisir, non tant pour amour qu'il

A qu'il luy portast, que pour vn appetit desordonné de la violer & deshonorer: si luy māda qu'elle vint parler à luy: & le pere & la mere voians que vou-lussent ou non ils feroient contrains de ce faire, luy dirent qu'elle y allast: mais la pucelle estant ge-nereuse & magnanime, en les ambrassant, & se iet-tant à leurs pieds, les supplia de la laisser plustost tuer, que de souffrir que sa virginité luy fust mes-chamment & villainement ostee. Mais pour ce qu'elle demouroit trop à venir au gré de Lucius qui brusloit de concupiscence, & auoit bien beu, il se leua de la table en cholere, & s'y en alla luy mes-me: & trouuant Micca qui auoit la teste entre les genoux de son pere, il luy commanda qu'elle le suyuiſt: ce qu'elle refusa de faire: & lors luy deschi-rant ses vestemens, il la fouëtta toute nue sans que elle dist vn seul mot, endurent quant à elle en pa-tience & en silence toutes ces douleurs: mais son pere & sa mere voians que pour le prier & pour plorer, ils ne gaignoient rien, se prirent à implorer l'aide des Dieux & des hommes, cryants à haute voix que lon leur faisoit vne iniure indigne & vn c oultrage insupportable. A raison dequoy le Bar-bare, entrant totalement en fureur d'yurongnerie & de cholere, tua la pauvre fille au mesme estat qu'elle estoit, aiant le visage dedās le giron de son pere. Mais pour tout cela le tyran ne s'en amollit de rien, ains en tua plusieurs des citoiēs, & en ban-nit encore d'auantage, tellement que lon dit qu'il y en eut huiët cēts qui s'enfuirēt en Ætolie, lesquels l'enuoyerent requerir, de leur permettre qu'ils

peussent retirer leurs femmes & leurs petits enfans : mais vn peu apres comme de luy mesme il
 fait crier à son de trompe , que les femmes qui s'en
 voudroient aller deuers leurs marits, s'en allaissent,
 & qu'il leur permettoit de pouuoir emporter quāt
 & elles tant cōme elles voudroient de leurs biens:
 & quand il sceut qu'elles estoient toutes fort aises
 de ce cry, & l'auoiet recueilly avec vn grand cōten-
 tement: car elles estoient en nombre de plus de six
 cents, il leur commanda qu'elles partissent tou-
 tes ensemble à certain iour qu'il leur ordōna, pro-
 mettant de leur donner escorte pour les conduire
 à seureté. Quand le iour qui leur auoit esté prefix
 fut escheut, elles s'assemblerent aux portes de la
 ville aians faict leurs pacquets des hardes qu'elles
 vouloient emporter, tenans entre leurs bras partie
 de leurs enfans, & faisans emmener les autres sur
 des chariots, s'entre-attendans les vnes les autres:
 mais soudainement plusieurs de ces soudards &
 satellites du tyran leur coururent sus, en leur criant
 de tout loing, demeure demeure. Puis quand ils
 furent tout pres d'elles, ils commāderent aux fem-
 mes de s'en retourner arriere, & faisans rebourser
 les chariots & cheuaux vers elles, les chasserent à
 toute bride à trauers de la troupe, ne leur permet-
 tans ny d'y aller, ny d'arrester, ny de secourir leurs
 petits enfans qu'elles voyoient mourir deuāt leurs
 yeux, car les vns perissoient en tombant de des-
 sus les chariots à terre, les autres sous les pieds
 des cheuaux : & ce pendant ces satellites à grands
 coups de fouët & grands crys, comme si c'eussent
 esté

esté des moutōs, les pressoient de telle sorte, qu'elles tomboient les vnes sur les autres, iusques à ce qu'ils les eurent toutes iettees dedans les prisons, leurs biens & leurs hardes furent rapportees à Aristotimus. Dequoy ceux d'Elide estans fort desplaisans, les religieuses sacrees à Bacchus, que lon appelle les Seize, tenants en leurs mains des rameaux de suppliants, & à l'entour de leurs testes des chapeaux de branches de vigne, s'en allerent trouuer Aristotimus sur la place: les satellites qu'il auoit autour de luy pour la seureté de sa personne, se fendirent par reuerence pour les laisser approcher: & elles du commencement teindrent silence sans autre chose faire que tendre humblement & religieusement leurs rameaux de suppliants: mais quād le tyran apperceut que c'estoit pour les femmes Elienes qu'elles le venoiēt supplier, à fin qu'il eust pitié d'elles, se courrouceant à ses souldards, & criant apres eulx, pour ce qu'ils les auoient laissé ainsi approcher, il les feit chasser hors de la place, en poulsant les vnes & frappāt les autres: & oultre cela, encore cōdamna il chascune desdites religieuses en deux talents d'amende. Ces choses ainsi faittes, il y eut dedās la ville l'vn des citoiens nommé Hellanicus, homme ia bien auant sur son aage, qui suscita vne coniuration alencontre de luy, sans qu'il s'en desfiast, ne pensant pas qu'il deust iamais rien entreprendre contre luy, tant pour ce qu'il estoit desia fort vieil, que pour ce qu'il luy estoit mort de nagueres deux de ses enfans: & au mesme temps du costé de l'Ætolie les bānits estants passez

se faisirent d'une forte place dedans le territoire d'Elide qui s'appelloit Amymon, situé en lieu bien commode pour faire la guerre, & y receurent encore plusieurs autres des habitans de la ville qui s'y en coururent incontinent qu'ils en sceurent les nouvelles: ce que craignant le tyran Aristotimus s'en alla deuers leurs femmes en la prison, & cuidât venir mieux à bout de ses desseings par crainte que par amour, il leur commanda d'enuoyer deuers leurs marits, & leur escrire qu'ils sortissent hors du païs, en les menassant s'ils ne le faisoient de les faire toutes mourir, apres auoir deschiré à coups de fouët & tué deuant eux leurs enfans. Or toutes les autres ne luy respondirent rien, combien qu'il demourast longuement à les presser de luy dire si elles le feroient ou non, ains s'entreregardoient les vnes les autres sans mot dire, comme s'entredonnans à cognoistre qu'elles n'auoient point de peur, & ne festônoient point de ses menasses. Mais vne nommee Megisto femme de Timoleon, que les autres tenoient cōme pour leur Capitainesse, tant pour l'hōneur de son mary, que pour la vertu d'elle mesme, ne daigna pas se leuer, ny ne souffrit pas que les autres se leuassent nō plus, ains luy respondit toute assise: Si tu estois homme sage, tu ne par-

» Ierois pas à des femmes pour cuider contraindre
 » leurs marits, ains enuoyrois deuers eux, comme
 » deuers ceux qui ont toute puissance sur elles, pour
 » leur porter de meilleurs propos que ceux par les-
 » quels tu nous as trompees: mais si n'esperant pas
 » de leur pouuoir rien persuader, tu pèses les circon-

uenir

A uenir & tromper par le moien de nous, il ne fault
» pas que tu t'attendes de nous pouuoir iamais plus
» abuser, ny qu'eux aussi soient si maladuisez, ne de si
» peu de cœur, que pour des femmes & des petits
» enfans, ils soient pour quitter & abandonner la li-
» berté de leur païs: car ce ne leur est pas tant de per-
» te de nous perdre, veu mesmement qu'ils ne nous
» ont pas maintenant, comme ce leur est de bien de
» deliurer leur païs & leurs citoiens de ton outra-
» geuse cruauté. Ainsi que Megisto luy tenoit ces
» propos, Aristotimus n'en pouuant plus endurer,
B commāda que lon luy apportast son petit fils pour
le tuer deuant ses yeux: & comme ses satellites le
cherchassent parmy les autres petits garçons qui
iouroient & luidtoient ensemble, sa mere l'appella
» elle mesme par son nom, disant, Viença mon fils,
» à fin que tu sois deliuré de la cruelle tyrannie de
» cestuy, auant que tu aies sentiment ny iugement
» de la cognoistre: car il me seroit trop plus grief de
» te veoir indignemēt seruir, que non pas de mourir.
Aristotimus adonc par impatience de cholere des-
guainnant son espee, courut vers elle pour la frap-
C per elle mesme, n'eust esté que l'un de ses familiers
appellé Cylon, qui faisoit semblant de luy estre
fidele, & neantmoins le haïssoit en son cœur, &
estoit des complices de la coniuration de Hella-
nicus, se meit au deuant, & l'en destourna par prie-
res, luy remonstrant que cela n'estoit point faict
en homme genereux, ains tenoit de la femme, &
non du prince, ny de personnage sçachant manier
de grands affaires: tellement qu'à grande peine

peut il tant faire, que retourné en son sens rassis, il n'en voulust aller de là. Or luy aduint il vn grand presage & signe de ce qui estoit prest à luy arriuer, car sur le hault du iour, ainsi comme il estoit en sa chambre à se reposer avec sa femme, & que lon apprestoit son soupper, ceulx de la maison apperceurent vn aigle rouant en l'air, au dessus de son hostel, qui lascha vne assez grosse pierre droit sur l'endroit de la couuerture de la chambre où il se repositoit, comme si de propos deliberé il eust visé à ce faire: ainsi aiant ouy le bruit de la pierre tombee de dessus, & le cry de ses domestiques qui auoient eueu ce pronostique tout ensemble de dedans la maison, il s'en effroya, & demanda que c'estoit: l'ayant entendu, il enuoya querir sur la place le deuin duquel il se souloit seruir, & luy demanda tout troublé, que vouloit dire ce presage. Le deuin le reconforta, disant que c'estoit Iupiter qui l'esueilloit, & qui monstroit de le vouloir secourir: mais aux citoiens dont il se fioit il assoura, que c'estoit la vengeance diuine qui deuoit bien tost tomber sur la teste du tyran: & pourtant Hellanicus & ses adherents furent d'opinion qu'il ne falloit plus differer, ains luy courir sus des le lendemain. Et la nuit mesme il fut auis à Hellanicus, en dormãt, que l'vn de ses enfans morts se presenta à luy qui luy dit:

» Pere, comment t'amuses tu encore à dormir, veu
 » que demain tu dois estre eleu Capitaine general
 » de ceste ville? Hellanicus encouragé de ceste visio, alla solliciter ses compaignons: & Aristotimus estãt aduertý comme Craterus venant pour le secourir
 avec

A avec vne puisſante armee eſtoit campé aupres d'O-
lympe, en prit vne telle aſſurance, qu'il ſ'en alla
avec Cylon ſur la place ſans aucuns gardes : & lors
Hellanicus voiant le poinct de l'occafion venu, ne
donna pas le ſigne qui eſtoit conuenu entre eulx,
à ceulx qui deuoient les premiers mettre la main à
l'exécution de leur entrepriſe, mais à haulte voix
» eſtendant ſes deux mains, il ſ'eſcria, Qu'attendez
» vous gens de bien ? Sçauriez vous deſirer vn plus
» beau theatre à combattre pour la deſenſe de la li-
» berté, que le milieu de voſtre pais ? Adonc Cylon
B mettant la main à l'eſpee frappa l'vn de ceulx qui
ſuyuoient le tyran, & de l'autre coſté Traſybulus
& Lampis ſe ruerent deſſus Ariſtotimus, qui les
preuint ſ'enfuyant dedans le temple de Iupiter, là
où ils le meirent à mort, puis en iettant le corps au
milieu de la place, conuièrent les habitants de la
ville à reprendre leur liberté : mais les femmes en-
core furent les premières, car elles accoururent in-
continent toutes à grâde lieſſe, en plorât & cryant
de ioye, & enuironans tout à l'entour les hommes
qui auoient fait ceſte exécution, les couronnerent,
C & leur meirent des chappeaux de fleurs ſur les te-
ſtes : & lors la commune ſe iettant ſur la maiſon du
tyran, ſa femme aiant fermé ſa chambre ſur elle, ſe
pendit : mais aiant deux filles toutes deux fort bel-
les de viſage, pucelles & preſtes à marier, ils les pri-
rent & tirerēt à force hors de la maiſon, aians bien
intention de les tuer apres qu'ils les auroient vio-
lees, & puis deſchirées à coups de verges première-
ment, n'eust eſté que Megiſto avec les autres ho-

nestes Dames de la ville leur allerent au deuant, & qui leur crierent, qu'ils faisoient choses indignes d'eux, attendu qu'estans en train de recouurer leur liberté, pour viure desormais en forme de gouuernement populaire, ils prenoient l'audace de commettre des outrages & violences telles que sçauroient faire les plus cruels tyrās. Le peuple adonc aiant hôte pour l'honneur & l'autorité de ces honestes Dames, qui parloient ainsi vertueusement à eulx les larmes aux yeux, fut d'aduis que lon ne leur feroit point de villainie à leurs personnes, & qu'on mettroit à leur chois de mourir de telle mort qu'elles voudroient: ainsi les aians remenees toutes deux à la maison, & leur aians denoncé qu'il falloit qu'elles mourussent à l'heure mesme, l'aîsnee qui s'appelloit Myro, desceignant sa ceinture en feit vn las-courant qu'elle se met au col, & en baisant & ambrassant sa sœur, la pria de la regarder faire, pour puis apres faire cōme elle, à fin
 „ dit elle, que nous ne mourions point bassement, &
 „ indignement du lieu dont nous sommes issues.
 Mais la ieune au contraire la pria de luy permettre qu'elle mourust la premiere, & quant & quant se faisit de la ceinture: & adonc l'aîsnee luy respondit,
 „ Je ne vous refusay iamais chose, que vous me de-
 „ mandissiez, ma sœur, & pource, dit elle, ie suis contente de vous faire encore ceste grace, de supporter
 „ & souffrir ce qui me fera plus grief que la mort
 „ mesme, de vous veoir, ma tres-chere sœur, mourir
 „ deuāt moy. cela dit, elle mesme luy enseigna à mettre le las à l'entour de son col: puis quand elle veit qu'elle

A qu'elle eut rendu l'esprit, elle l'osta, & couvrit son corps : puis adressant sa parole à Megisto mesme, la requit de ne souffrir pas que son corps, quand elle seroit aussi morte, demourast gisant villainemēt & honteusement : tellement qu'il n'y eut entre les assistans personne de si dur cœur, ne qui de nature haïst tant les tyrans, qui ne deplorast, & n'eust en soy-mesme compassion de la generosité & magnanimité de ces deux ieunes filles. Or comme ainsi soit qu'il y ait infinies belles choses que les femmes ont anciennement faictes plusieurs ensemble, il me
B semble que ce peu d'exemples que nous en auons alleguez deura suffire : au demourāt nous descrirōs cy apres des particuliers actes de vertu de quelques vnes, pelse mesle selon qu'elles nous viendront en memoire, estimans que l'ordre des tēps n'est point trop necessaire à rediger par escrit vne telle histoire.

P I E R I A.

Quelques vns des Ioniens, qui s'estoient venus
habituier en la ville de Milet, entrerent en querelle
C alencontre des enfans de Neleus : à l'occasion de laquelle finablement ils furent contraincts de se retirer en la ville de Myunte, là où ils eleurent leur demourāce, & y furent fort molestez & trauaillez par les Milesiens qui leur faisoient la guerre, pour ce qu'ils s'estoient soubstraicts & separez d'auec eux, toutefois ce n'estoit point vne si sanglante, ne si mortelle guerre, qu'ils n'enuoyassent bien les vns deuers les autres, & ne communiquassent

quelque-fois ensemble , car mesmes à quelques iours de festes solennelles , les femmes de Myunte alloient bien en la ville de Milet. Or y auoit il entre ces Myuntins , l'un des plus nobles qui s'appelloit Pythes , & sa femme Iapygia , dont il auoit vne belle fille nommee Pieria : estant doncques escheuë la grande feste de Diane, en laquelle il se faisoit vn solennel sacrifice, que lon nommoit la Neleïde : ce Pythes y enuoya sa femme & sa fille, qui l'en requirent, à fin qu'elles fussent participantes de la feste. Si aduint que l'un des enfans de Neleus, celuy qui auoit plus de credit & d'autorité en la ville, nommé Phrygius, s'enamoura de Pieria, & luy demanda ce qu'il pourroit faire qui luy fust le plus agreable : elle luy respondit, Si tu fais qu'il me soit loysible de souuent & auec plusieurs venir icy. Phrygius comprenant aussi tost, ce qu'elle vouloit dire, qu'il y eust paix & amitié en ces deux villes, feit en sorte qu'il en osta toute guerre : au moien dequoy Pieria fut depuis grandement honoree & estimee en toutes les deux villes, tellement que iusques au iourd'huy les dames Milesienes souhaitent encore, & prient aux Dieux, qu'elles soient autant aimees comme Phrygius aima Pieria.

POLYCRITE.

Guerre s'esmeut iadis entre les Naxiens & les Milesiës, à cause de Neæra femme de Hypsicreon, par vne telle occasion: Elle s'enamoura de Promedon Naxien, & montant sur mer s'en alla quand & luy,

A luy, car il estoit hôte de Hypsicreon logeant ordinairement chez luy, quand il venoit en la ville de Milet, & iouïssoit secrettement de ceste Neæra amoureuse de luy: mais au long aller, craignãt que son mary ne s'en apperceust, il l'enleua, & l'emmena en la ville de Naxe, là où il la feit rendre suppliante à son autel & foyer domestique. Hypsicreon l'enuoya bien redemander, mais les Naxiens en faueur de Promedon refuserent de la rendre, alleguans pour excuse de leur refus, qu'elle requeroit la franchise des supplians: à raison dequoy la guerre cōmancea entre eux, en laquelle les Erythréiens fauoriserent fort affectueusement la part de ceulx de Milet: de maniere que la guerre prenoit vn long traict, & apportoit de grandes miseres & calamitez aux vns & aux autres, iusques à ce que finalement elle s'acheua par la vertu d'vne femme, comme elle auoit commacé par le vice & la meschanceté d'vne autre. Car vn Diognetus Capitaine des Erythréiens, à qui lon auoit commis la garde d'vne place forte, assise en lieu opportun pour traualier & endommager les Naxiens, feit quelque course dedans leur pais, là où parmy grande quantité de tout autre butin, il prit & emmena plusieurs filles & femmes de bonne maison, entre lesquelles il s'en trouua vne nommee Polycrite, de laquelle il deuint amoureux, & la teint & traitta non comme prisonniere de guerre, mais comme si elle eust esté sa femme espousee. Or aduint il que le iour escheut de la grande feste solennelle des Milesiens, ainsi qu'ils estoient au camp, au moien de-

quoy ils se meirent tous à boire, & à faire grande
 chere les vns avec les autres : adonc Polycrite de-
 manda à ce Capitaine Diognetus, s'il seroit point
 mal content qu'elle enuoyast à ses freres quelques
 tourteaux de ceux que lon auoit apprestez pour la
 feste : ce que non seulement il luy permet volon-
 tiers, mais luy commanda de ce faire : & elle se ser-
 uant de ceste occasion, meit dedans l'un de ces
 tourteaux vne petite lame de plomb escripte, &
 enioignit expressement à celuy à qui elle les bailla
 à porter, de dire à ses freres, qu'il n'y eust qu'eulx
 tous seuls qui mangeassent de ces gasteaux : com-
 me ils feirent, & trouuans l'escripture de leur sœur
 dedās, par laquelle elle les aduertissoit que la nuit
 ils ne faillissent de venir assaillir leurs ennemis,
 pource qu'ils les trouueroient tous en desordre,
 sans guet ne garde quelconque, d'autant qu'ils se-
 roient encore yures de la chere qu'ils auroiēt faite
 à cause de la feste, ils en allerent incontinent aduer-
 tir les Capitaines generaux de l'armee, les priants
 de vouloir faire ceste entreprise avec eux : ainsi fut
 la place prise, & y eut grand nombre de ceulx de
 dedans tuez : mais Polycrite requit à ses citoiens
 qu'on luy donnast Diognetus, & par ce moien luy
 sauua la vie : mais elle quād elle approcha des por-
 tes de la ville de Naxe, voyant tous les habitans ve-
 nir au deuant d'elle avec extreme resiouissance, luy
 mettās des chappeaux de fleurs sur sa teste, & chan-
 tans ses louāges, son cœur n'eut pas la force de sou-
 stenir vne si grāde ioye, car elle mourut sur la place
 tout ioignant la porte de la ville, là où elle fut de-
 puis

A puis ensepulturee, & appelle lon encore sa sepulture, le sepulchre de l'enuie, comme aiant esté quelque enuieuse fortune qui enuia à Polycrite la fruition de tant de gloire & d'honneur. Ainsi le descriuent les historiens de Naxe: toutefois Aristote dit, que Polycrite ne fut iamais prise prisonniere, mais que Diognetus l'aian par quelque autre moien veü, en deuint amoureux, tellement qu'il estoit prest de luy dōner & faire pour l'amour d'elle tout ce qu'elle voudroit: & elle luy promet qu'elle s'en iroit à luy, prouueu qu'il luy accordast vne seule
 B chose, dequoy, à ce que dit le Philosophe, elle exigea obligation de serment, & apres qu'il eut iuré sa foy, elle luy requit, qu'il luy rendist le chasteau de Delion, car ainsi s'appelloit la place qui luy auoit esté baillee en garde, autremēt elle dit qu'elle ne coucheroit iamais avec luy: & que luy tant pour le grand desir qu'il auoit d'en iouir, comme pour le serment, par lequel il s'estoit obligé, ceda la place & la rendit à Polycrite, laquelle la remeit entre les mains de ses citoiens, & par ce moien estans de rechef retournez à estre pareils aux Milesiens, ils fei-
 C rent depuis appointment avec eux, à telles conditions qu'ils voulurent.

L A M P S A C E.

EN la ville de Phocce il y eut vn temps deux freres iumeaux de la maison des Codrides, l'vn appellé Phobus, & l'autre Blepsus, dont Phobus fut le premier qui se ietta du hault des rochers Leuca-

diens en la mer, ainsi cōme Charon chroniqueur D
 Lampfacenien l'escriit:& aiant puissance & autho-
 rité royale en son païs, il aduint qu'il eut affaire
 pour son particulier en l'Isle de Paros,& sy en alla,
 là où il contracta amitié & alliance d'hospitalité
 avec Mandron qui estoit Roy des Bebryciens sur-
 nommez Pityoeïsiens:& de faict les secourut,&
 feit la guerre avec eux contre des peuples barbares
 leurs voisins, qui leur faisoient beaucoup de dom-
 mage & d'ennuy: puis quand il fut sur son parte-
 ment pour s'en retourner, Mandron luy feit plu-
 sieurs caresses & demonstrations d'amitié,& entre E
 autres luy offrit la moitié de sa terre & de sa ville,
 sil vouloit venir s'habiter en la ville de Pityoeïsa
 avec partie des Phocaiens pour peupler le païs.
 Parquoy Phobus estant de retour à Phocée, pro-
 posa ce party à ses citoiens, & leur aiant fait trou-
 uer bon, y enuoya pour Capitaine son frere qui
 conduisit les nouueaux habitans: si eurent à leur
 arriuee le traitement tel qu'ils eussent sçeu desirer
 de Mandron, mais à traict de temps, apres qu'ils
 eurent eu de grands auantages sur les barbares cir-
 conuoyfins,& eurent gaigné sur eux grande quan- F
 tité de tout butin,& de despouilles,ils commence-
 rent premierement à estre enuiez, & puis apres
 craints & redoutez des Bebryciés: à raison dequoy
 desirans s'en pouuoir deffaire, ils ne s'ozèrent pas
 adresser à Mandron qu'ils cognoissoient homme
 de bien & iuste, pour luy persuader de commettre
 aucune desloyauté enuers des hommes de nation
 Grecque, mais aians espié vn iour qu'il estoit ab-
 sent

A sent, ils se preparerent pour desfaire par surprise tous ces Phocaiëns: toute fois la fille de ce Mādrōn nommee Lampface, encore à marier, aiant descouuert l'aguet & embusche, tascha premierement de diuertir ses amis & familiers d'une si malheureuse entreprise, en leur remonstrant, que ce seroit vn acte damnable deuant les Dieux & deuant les hommes, de courir sus en trahison à leurs propres alliez, & qui les auoient secourus à leur besoing contre leurs ennemis, & outre qui estoient maintenant leurs concitoiens. Mais quand elle veit, qu'elle ne pouuoit venir à bout de leur persuader, elle feit sous main entendre aux Grecs la trahison qu'on leur brassoit, & les aduertit de se tenir sur leurs gardes. Si feirent vn solennel sacrifice, & vn festin public, auquel ils conuierent les Pityoesseniens au faulx-bourg de la ville, & se diuiserent en deux troupes, dont l'une se faist des murailles de la ville, pendant que les habitans estoient à ce festin, & l'autre meit à mort les conuiez: & par ce moien se feirent seigneurs de toute la ville, & enuoyerent appeller Mandron, lequel ils voulurent estre participant de leurs conseils, & inhumerent magnifiquement sa fille Lampface, qui par fortune mourut de maladie, & pour memoire du bien qu'elle leur auoit faict, surnommerēt la ville de son nom Lampface: toute fois Mandron, pour n'estre soupçonné d'auoir esté traistre aux siens, ne leur voulut point consentir de demourer avec eulx, ains leur demanda les femmes & les enfans des morts, lesquels ils luy enuoyerent diligemment, sans leur

faire aucun desplaisir : & aians par auant decerné d honneurs heroïques à Lampface, depuis ils ordonnerent qu'on luy sacrifieroit cōme à vne Deesse, & continuent encore iusques au iour d'huy à faire ces sacrifices.

ARETAPHILE.

ARETAPHILE de la ville de Cyrene n'est pas des fort anciennes, ains seulement enuiron le temps du regne de Mithridates, mais elle monstra vne vertu, & feit vne acte comparable à tous les plus magnanimes conseils des antiques demydeesses. Elle estoit fille de Æglator, & femme d'un nommé Phædimus, tous deux nobles hommes, & grands personnages : & estant belle de visage, & femme de fort gentil entendement, mesmement en matiere d'estat & affaires de gouuernement, les publiques calamitez de son pais ont esté cause d'illustrer son nom, & le faire venir à la cognoissance des hommes: car Nicocrates aiant vsuré la tyrannie de Cyrene, feit mourir plusieurs des principaux citoiens de la ville, & entre autres, vn Melanippus grand presbtre d'Apollon, qu'il tua de sa propre main pour auoir sa presbtrise : aussi feit il mourir Phædimus le mary d'Aretaphile, & qui plus est, l'espousa par force & malgré elle. Ce tyran, outre infinies autres cruautez qu'il commettoit iournellement, auoit mis des gardes aux portes de la ville, lesquels quād on emportoit des corps morts, pour les inhumer hors la ville, les outrageoient en leur

A leur picquât la plante des pieds avec des poignards & des dagues, ou leur appliquant des fers-chaulds, de peur que lon ne transportast aucun des habitâs viuant hors la ville, soubz couleur de le porter en terre, comme s'il fust mort. Si estoient à Aretaphile ses maulx particuliers bien griefts à supporter, combien que le tyran se laschast enuers elle pour l'amour qu'il luy portoit, iusques à luy laisser iouir d'une grande partie de sa puissance, car il estoit espris de son amour, & n'y auoit qu'elle seule à qui il se laissast manier, estant au demourant inflexible,

B aspre & sauuage à tout le demourant: mais encore plus la greuoit de veoir son pais en public ainsi miserablement & indignement traicté par ce tyran, car tous les iours il faisoit mourir les citoiens les vns apres les autres, & si ne voyoit on point qu'il y eust esperance de vengeance, ny de deliurâce d'aucun costé, pource que les bannis estans foibles de tout poinct & estōnez, s'estoient escartez les vns çà, les autres là. Parquoy Aretaphile se subrogeant elle mesme seule esperance de ressource à la chose publique, & se proposant à imiter les haults faictz

C & magnanimes de Thebe, femme du tyrā de Pheres, mais n'ayant pas des hommes fideles & proches parents pour la seconder en ses entreprises, comme les affaires en dōnerent à l'autre, elle essaya de faire mourir le tyrā par poisons: mais ainsi cōme elle en faisoit prouision, & esprouuoit les forces d'un chacun, son affaire ne peut estre secret, ains fut descouuert. Et estant le faict bien prouué & auéré, Calbia mere de Nicocrates, femme de nature sanguinaire

& implacable, fut d'aduis qu'il la falloit incontînēt D
 faire mourir, apres luy auoir deuant fait endurer
 plusieurs tourments: mais l'affectiō que Nicocrates
 luy portoit, affoiblissoit vn peu & retardoit sa cho-
 lere, ioinct qu'Aretaphile qui se presentoit cōstam-
 ment à respondre aux accusatiōs qu'on luy pro-
 posoit, donnoit quelque couleur à la passion du
 tyran: mais à la fin voiant qu'elle se trouuoit con-
 uaincue par preuues, à quoy elle n'eust sceu respō-
 dre, & qu'elle ne pouuoit aucunement nier qu'elle
 n'eust preparé quelque sorte de drogues, elle con-
 fessa qu'elle auoit bien voirement fait prouision E
 de quelques drogueries, non pas toutefois dange-
 „ reuses ne mortelles: Mais ie suis, dit elle, Monsei-
 „ gneur, en peine de plusieurs choses de grande con-
 „ séquence, c'est de me conseruer la bonne opinion
 „ que tu as de moy, & l'affection que de ta grace
 „ tu me portes, pour laquelle i'ay cest honneur de
 „ iouir d'vne bonne partie de ton autorité & puis-
 „ sance: ce qui me rend enuiee des mauuaises fem-
 „ mes, desquelles craignant les enforcellements,
 „ charmes & autres menees, par lesquelles elles vou-
 „ droient tascher à te distraire de l'amour que tu me F
 „ portes, ie me suis laissée aller à tascher d'y vouloir
 „ obuier par contraire artifice, qui sont choses à l'ad-
 „ uenture folles, & vrayes inuentions de femmes,
 „ mais non pas dignes de mort, si ce n'est qu'il te
 „ semble iuste de faire mourir ta femme, pour t'auoir
 „ voulu bailler quelques breuuages d'amour, &
 „ quelques charmes, pour tascher à estre encore ai-
 „ mee de toy d'auantage qu'il ne te plaiët de l'aimer.

Nico-

A Nicocrates aiant ouy ces excuses de Aretaphile fut d'opinion de luy faire donner la torture, à quoy fut presente sa mere Calbia sans fleschir iamais de pitié ny s'amollir: & estant interroguee sur la gehenne iamais ne se laissa vaincre aux douleurs des tourments, ains se mainteint tousiours inuincible à la question, tant que Calbia mesme, à la fin se lasa malgré elle de la tourmenter & gehenner: & Nicocrates la lascha, adioustant foy aux excuses qu'elle alleguoit, & se repentit de luy auoir donné ce tourment: & ne passa gueres de temps, pour la

B passion qu'il auoit imprimee en son cœur, qu'il ne retournast à elle, & ne taschast à regagner sa bonne grace par tous honneurs, & toutes caresses qu'il luy pouuoit faire, tant il estoit espris de son amour: mais elle n'auoit garde de se laisser vaincre de ces flatteries, veu qu'elle auoit bien eu la vertu de resister aux douleurs de la question. Ainsi estant ioinct au desir qu'elle auoit au parauant de faire chose vertueuse, l'animosité encore de se venger, elle essaya vn autre moien: car elle auoit vne fille preste à marier, qui estoit assez belle, elle l'attitra

C pour vn appast à prendre le frere du tyran, qui estoit vn ieune homme fort aisé à prendre par les plaisirs de la ieunesse: & y en a plusieurs qui tiennent que oultre la fille, encore vsa elle de quelques charmes, & quelques breuuages, dont elle enchantata le sens & l'entendement de ce ieune hōme, qui s'appelloit Leander. Quand il fut pris de l'amour de ceste fille, il feit tant par prieres enuers son frere, qu'il luy permit de la prendre en mariage, & marié

rié qu'il fut, sa femme instruite de sa mere, com-
 mancea à le prattiquer, & à luy persuader qu'il
 entreprist de remettre la ville en sa liberté, luy re-
 monstrant que luy mesme n'estoit pas libre, tant
 comme il viuoit soubs vne tyrānie, & qu'il n'estoit
 pas en sa puissance, s'il ne plaisoit au tyran d'espou-
 ser telle femme qu'il voudroit, ny de la garder
 quād il l'auroit espousee: d'autre costé ses familiers
 & amis, pour faire plaisir à Aretaphile luy alloient
 tousiours forgeant quelques nouuelles occasions
 de querelles & de suspitions alencontre de son fre-
 re: & quand il s'apperçeut qu'Aretaphile estoit de
 mesme aduis, & qu'elle tenoit la main à ceste me-
 nee, adonc il resolut d'executer l'entreprise, & su-
 scita vn sien seruiteur nommé Daphnis, par lequel
 il feit tuer Nicocrates, mais au demourant tué
 qu'il l'eut, il ne voulut pas suiure le conseil d'Are-
 taphile, ains monstra incontinent par ses deportte-
 ments qu'il auoit tué son frere, & non pas le ty-
 ran, car il se porta follement & furieusement en sa
 domination: toutefois si portoit il tousiours quel-
 que honneur & quelque reuerence à Aretaphile,
 & luy donnoit quelque autorité au maniemēt
 des affaires, pour ce qu'elle ne luy monstroit pas
 son mal-contentement, ny ne luy faisoit pas la
 guerre ouuertement, ains secretement luy trou-
 bloit & embrouilloit ses affaires. Car premiere-
 ment elle luy suscita la guerre de la Lybie par le
 moien d'un prince nommé Anabus, avec lequel
 elle eut secrette intelligence, & luy persuada de ve-
 nir courir son païs, & approcher son armee de la
 ville

A ville de Cyrene , & puis elle meit Leander en
deffiance & fouspeçon de fes amis , & de fes capi-
taines , luy donnant à entendre qu'ils n'auoient
point le cœur à ceste guerre , & qu'ils aimoient
mieux la paix & le repos , avec ce que fes affaires
mesmes la requeroient & l'establissement de sa
domination , s'il vouloit bien à faict donter & te-
nir sous le pied ses citoiens : & que de sa part elle
trouueroit bien moien de traicter appointment,
voire de faire qu'ils s'entreuerroient & parleroient
ensemble s'il vouloit, Anabus & luy , deuant que
B la guerre tirast plus auant , & apportast quelque
inconuenient, auquel il ne seroit possible de don-
ner ordre , ny mettre remede puis apres . Si fut
l'affaire conduit de telle sorte qu'elle la premiere
alla parler à ce prince Lybien, auquel elle requit,
que si tost qu'ils se trouueroient ensemble pour
parlementer, il l'arresta prisonnier , & pour ce faire
luy promet de grands presents, & vne bõne som-
me d'argent . Le Lybien s'y accorda facilement.
Leander faisoit quelque doubte de se trouuer à ce
parlemēt, mais toute fois pour le respect qu'il por-
C toit à Aretaphile , qui auoit promis pour luy qu'il
s'y trouueroit, il s'y trouua tout nud, sans armes &
sans gardes : & quand il approcha du lieu où se de-
uoit faire ceste entreueüe , & qu'il apperceut Ana-
bus , il feit de rechef du fascheux & restif, disant
qu'il vouloit attendre ses gardes, mais Aretaphile
qui estoit la presente, luy donnant courage, luydit,
qu'il se feroit reputer homme de lasche cœur , &
qui ne tenoit point sa parole , s'il faillait à s'y trou-

uer : & finablement voiant qu'il s'arrestoit , le tira **D**
par la main assez audacieusement & asseurement,
tant qu'elle le mena, & le liura entre les mains de
ce prince barbare. Si fut incontinent rauy & fai-
sy au corps par les Lybiens, qui le teindrent en
estroitte garde lié & garotté cōme vn prisonnier,
iusques à ce que les amis d'Aretaphile arriuerent
auec les autres citoiens de Cyrene, qui luy appor-
terent l'argent qu'elle auoit promis : car si tost que
lon sceut en la ville ceste prise, la plus part du peu-
ple y accourut à sa requeste & mandement : là où
quand ils apperceurent Aretaphile, peu s'en fallut **E**
qu'ils n'oubliaissent tout le courroux & mal-talent
qu'ils auoient encontre le tyran, & estimerent que
la vengeance & punition exemplaire qu'ils de-
uoiēt faire du tyran, n'estoit qu'un accessoire: mais
que leur principale besongne, & la fruition de
leur liberté cōsistoit à la saluër, caresser & embras-
ser, auec si grande resiouissance, que les larmes leur
en venoient aux yeux, se iertans à ses pieds, comme
si c'eust esté l'image de quelque Deesse : ainsi y af-
fluans les vns sur les autres iusques au soir, à peine
faduiferent ils à la fin de se saisir de la personne de **F**
Leander, auec lequel ils s'en retournerēt en la vil-
le, & apres qu'ils se furent bien saoulez de donner
routes sortes de louanges & de faire tous hōneurs
à Aretaphile, finablement ils se meirent à penser
ce qu'ils deuoient faire des tyrans: si bruslerent
Calbia toute viue, & cousurent Leander dedans
vn sac de cuir qu'ils ietterēt dedans la mer: & vou-
lurent que Aretaphile eust la charge & admini-
stration

A stration de la chose publique, avec les autres principaux personnages de la ville. Mais elle, comme aiant ioué vn ieu fort inegal & variable, & qui auoit eu plusieurs parties, iusques à en auoir rapporté la couronne de victoire, quand elle veit que son pais estoit entieremēt franc & libre, s'alla renfermer en sa maison, & ne se voulant plus hazarder à s'entremettre d'affaire quelconque publique, vsa le reste de ses iours en paix & en repos avec ses parents & amis, sans se mesler plus d'autre chose que de besongner à des ouurages.

B

C A M M A.

I L y eut iadis au pais de Galatie deux des plus puissants Seigneurs, & qui aucunement estoient parents l'un de l'autre, Sinorix & Sinatus, desquels Sinatus auoit espousé vne ieune Dame qu'il auoit prise fille, appelée Camma, fort estimée & prisee de quiconque la cognoissoit, tant pour la beauté de son corps, comme pour la fleur de son aage, mais encore plus pour son honnesteté & sa vertu: car non seulement elle aimoit son honneur & son mary, mais aussi estoit prudēte, magnanime, & singulierement aimée & desirée des subiects pour sa bonté & sa douceur: &, qui la faisoit encore plus regarder & renommer, elle estoit presbtesse religieuse de Diane, à laquelle les Galates anciennement auoient singuliere deuotion, ce qui estoit cause qu'on la voioit souuent és sacrifices publiques, & solennelles processions, parée & accoustree

magnifiquement. Si en deuint Sinorix amoureux, le quel voyant que tant que son mary viuroit il ne pourroit iamais venir à bout d'en iouir, ny par amour, ny par force, il commeit vn malheureux acte, car d'aguet propensé il tua Sinatus, & peu d'espace de temps apres il alla demāder Camma en mariage: elle faisoit sa demourance dedans le tēple, & ne supportoit pas la malheureuse forfaiture qu'auoit commise Sinorix, d'vn cœur abbatu & failly qui ne feist qu'emouuoir les gents à pitié, ains avec vn courroux couuert en elle mesme, n'attendoit autre chose que l'occasion de s'en E pouuoir venger: de l'autre costé Sinorix estoit assidu à la solliciter & prier, luy alleguant des raisons qui sembloient auoir quelque honeste couleur, qu'il s'estoit tousiours monstre plus hōme de bien en toutes sortes que Sinatus, & que ce qui l'auoit induit à le tuer, c'estoit la vehemence de l'amour qu'il luy portoit à elle, non pour aucune meschanceté. La ieune Dame du commencement luy fait des refus qui ne furēt point trop rudes, & sembloit que tous les iours peu à peu elle s'allast amollissant d'autant mesmemēt que ses parens & amis estoiet F ordinairement apres à la persuader & forcer de consentir à ce mariage, pour faire plaisir à Sinorix, le quel auoit grand credit & grande authorité au pais: tant que finablement elle s'y cōsentit, & l'enuoya lon querir qu'il yint vers elle, à fin qu'en la presence de la Deesse mesme le contract du mariage fust passé, & les espousailles solennisees. Quand il fut arriué, elle le receut gracieusement, & l'ame-
na

A na deuât l'autel de Diane, là où elle respendir à la
 Deesse vn peu d'vn breuuage qu'elle auoit préparé
 dedâs vne couppe, puis en beut vne partie, & bail-
 la l'autre à boire à Sinorix: le bruuage estoit de l'hy-
 dromel empoisonné: & quand elle veit qu'il l'eut
 tout beu, alors iettât vn gemissēmēt hault & clair,
 » & faisant la reuerēce à sa Deesse: le t'appelle à tes-
 » moin, dit-elle, treshonoree Deesse, que ie n'ay sur-
 » uescu Sinatus pour autre intention que pour veoir
 » ceste iournee, n'ayant eu ne bien ne plaisir de la vie
 » en tout le tēps que i'ay vescu depuis, que l'esperan-
 B ce de pouuoir vn iour faire la vengeance de sa mort,
 » laquelle aiant maintenant faite, ie m'en vais gaye-
 » ment & ioyeusement deuers mon mary: mais toy
 » le plus meschant homme du monde, donne ordre
 » maintenant que tes amis & parents au lieu de liēt
 » nuptial te preparent vne sepulture. Le Galatien
 aiant ouy ces propos, & commanceant desia à sen-
 tir que le poison faisoit son operation, & luy trou-
 bloit tout le dedans du corps, mōta dessus vn cha-
 riot, esperant que l'esbranlement & l'agitation du
 chariot luy pourroit seruir à faire vomir le poison,
 C mais il en sortit tout incontinent, & se feit mettre
 dedans vne littiere, & ne sceut si bien faire que le
 soir mesme il ne rendist l'ame: & Camma aiant
 passé toute la nuit, & entendu comment il estoit
 desia trespasé, s'en alla volontairement & guaye-
 ment hors de ce monde.

STRATONICE.

Ceste mesme prouince de Galatie a porté encore

deux autres Dames bien dignes d'éternelle mémoire, Stratonice femme du Roy Deiotarus, & Chiomara femme de Ortiagonte : car Stratonice ſçachant que le Roy ſon mary deſiroit ſingulièrement auoir des enfans legitimes pour les laiſſer ſucceſſeurs de ſa couronne, & n'en pouuant auoir d'elle, elle luy pria & perſuada, qu'il en feiſt à vne autre femme, & luy permeiſt qu'elle ſe les ſuppoſaſt. Deiotarus ſ'eſmerueilla fort de ceſte ſienne reſolution, & luy permeit d'en faire à ſa guiſe, ainſi comme elle voudroit : parquoy elle choiſit entre les captiues priſes à la guerre vne belle ieune fille qui auoit nom Electra, qu'elle enferma avec Deiotarus dedans vne chambre : & nourrit & eleua les enfans qui en vindrent, avec autant d'affection, & en auſſi grande magnificence comme ſils euſſent eſté ſiens.

CHIOMARA.

Lors que les Romains ſoubs la conduite de Cneus Scipion deſfeirent les Galates habitans en l'Asie, il aduint que Chiomara femme d'Ortiagonte fut priſe priſonniere de guerre avec les autres femmes des Galates. Le capitaine qui la prit vſa de ſon aduventure en ſoudard, & la viola. Or ſil eſtoit homme ſubiect à ſon plaiſir, autant ou plus l'eſtoit il à ſon profit, & lors fut attrapé par ſon auarice : car luy eſtant promiſe vne groſſe ſomme d'argent pour deliurer ceſte femme, il la conduiſit au lieu qui luy fut deſigné pour la rendre & mettre

A en liberté: c'estoit sur le bord d'une riuere, que les Galates passerent, luy compterent son argent, & reprirent Chiomara: mais elle feit signe de l'œil à l'un de ses gens qu'il tuast ce capitaine Romain, ainsi comme il prenoit congé d'elle & la caressoit: ce que l'autre feit, & d'un coup d'espee luy aual-la la teste: elle la releua, & l'enueloppant au deuant de sa robe, tira son chemin & s'en alla. Arriuee qu'elle fut au logis de son mary, elle luy ietta ceste teste à ses pieds: dequoy il s'estonna, & luy dit,
» Ma femme il faut garder la foy: ce fait-mon, res-
B pondit elle, mais aussi faut il qu'il n'y ait qu'un seul
» homme viuant qui ait eu ma compagnie. Poly-
bius escrit que luy mesme parla depuis à elle en la ville de Sardis, & qu'il la trouua femme de grand cœur & de bon entendement. Mais puis qu'il est venu à propos de faire mention des Galates, i'en reciteray encore vne telle histoire. Le roy Mithridates enuoya querir à fiance comme ses amis soixante des principaux Seigneurs des Galates, en la ville de Pergame: lesquels estans venus deuers luy à sa requeste, il leur parla superbement
C & imperieusement dont ils furent tous fort courroucez, tellement qu'il y en eut vn nommé Tore-dorix homme robuste de corps, & courageux à merueilles, seigneur d'une contree qui s'appelle des Tossiopiens, qui entreprit de le saisir au corps, lors qu'il donneroit audience dedans le parc des exercices, & de se precipiter avec luy dedans vne profonde baricaue qui là estoit: mais de fortune le roy ce iour la n'alla point, cōme de coustume, en ce

parc des exercices, ains manda que tous ces seigneurs Galates vinssent parler à luy en son logis.

Toredorix les admonesta de ne s'estonner point, mais quand ils seroiēt arriuez au pres de luy, qu'ils se ruaissent ensemble de tous costez sur luy, & le deschirassent en pieces. Cela ne fut pas tenu secret, ains aiant esté descouuert à Mithridates, il les feit prendre tous, & leur enuoya coupper les testes l'un apres l'autre: mais sur ces entrefaittes il se va souuenir d'un ieune homme en fleur d'aage, le plus beau & le mieux formé qui fust de son temps, & en eut pitié, se repentant de l'auoir condamné quant & les autres, & monstra euidemment qu'il en estoit marry, pensant qu'il eust esté desfaict des premiers, ce neantmoins à toute aduenture il enuoya faire commandement, s'il estoit encore viuant, qu'on le lascia aller: ce ieune homme auoit nom Bepolitan, & luy aduint vne fortune merueilleuse, car il fut pris avec vne belle robbe & riche, laquelle le bourreau se voulant reseruer nette, sans qu'elle fust souillée de sang, en la luy despouillant tout à l'aise il apperceut les gens du roy qui accouroient vers luy, en criant à haute voix le nom de ce ieune homme. Voyla comment l'auarice, qui a esté cause de faire mourir infinis hommes, sauua contre toute esperance la vie à celuy la. Mais quant à Toredorix, aiant esté cruellement massacré de plusieurs coups, il fut ietté aux chiens sans sepulture, & sans que personne de ses amis en osast approcher pour l'inhumer, fors vne ieune femme Pergamenienne qu'il auoit autrefois cogneuë pour
sa

A sa beauté, laquelle se hazarda d'ensepuelir & inhumer son corps. Ce que les gardes aians aperceu, la saisirent & la menerent au Roy, où l'on dit que Mithridates à la veoir seulement en eut compassion, pour ce qu'elle luy sembla fort ieunette & simple iouuencelle, mais encore plus eut il le cœur attendry, quand il sceut que l'amour auoit esté cause de luy faire entreprendre, si luy permet d'enleuer le corps & de l'ensepulturer, en luy fournissant du sien les draps & autres parements necessaires pour les funerailles.

B

T I M O C L I A.

Theagenes natif de Thebes eut pareille volonté & intention quant à la defense de son pais & de la chose publique, que iadis eurent Epaminondas, Pelopidas, & tous les plus gents de bien du mōde, mais il tomba en la commune ruine de la Grece, lors que les Grecs perdirent la bataille de Chéronnee, estant desia quant à luy vainqueur, & poursuuant ceux qu'il auoit rompus en bataille deuant
 c luy: car ce fut luy qui respondit à vn fuyant qui luy
 „ crya, iusques où nous veux tu chasser? Iusques en
 „ Macedoine, dit-il: mais vne sienne sœur le suruesquit qui tesmoigna que tant pour la vertu de ses
 „ ancestres, que pour la siene propre, il auoit esté grand hōme, & digne d'estre renommé entre les
 „ plus vaillants: elle receut vn peu de fruct de sa vertu, qui luy aida à supporter plus patiemment ce
 „ qui luy toucha des communes miseres de son pais.

Car apres qu'Alexandre eut pris la ville de Thebes, & que les soudards couroient çà & là pillants ce qu'ils pouuoient, il se rencontra qu'un capitaine d'une cōpagnie de cheuaux legers Thraciés se saisit de la maison de Timoclia, hōme qui ne sçauoit que c'estoit d'honesteté & de courtoisie, mais violent & sans aucun discours de raison : car apres qu'il se fut bien emply de vin & de viande au souper, sans porter aucun respect à la race, ny à l'estat & honesteté de ceste Dame, il luy manda qu'elle vint coucher avec luy : & encore ne fut ce pas tout, car il luy cōmāda de luy dire où elle auoit **E** caché son or & son argent, tantost la menassant de la tuer, & tantost la caressant, & luy promettant qu'il la tiendroient pour sa femme. Mais elle prenant l'occasion que luy-mesme luy presentoit,

» Pleust à Dieu, dit-elle, que ie fusse morte deuant
 » ceste nuit, plustost que d'estre demouree viue, car
 » aiant tout perdu, au moins fust mon corps impol-
 » lu & net de toute violence : mais la fortune estant
 » ainsi aduenüe, qu'il faut que desormais ie te repare
 » pour mon seigneur, mon maistre & mon mary,
 » puis qu'il plaist aux Dieux qui t'ont donné ceste **F**
 » puissance sur moy, ie ne te veux point frustrer ne
 » priuer de ce qui est à toy : car quant à moy ie voy
 » bien qu'il faudra que ie sois dorenaūt telle que tu
 » voudras. Je soulois auoir des bagues & ioyaux à
 » parer ma personne, & de la vaisselle d'argent, & si
 » auois encore quelque somme d'or & d'argēt mon-
 » noyé, mais quād i'ay veu que la ville s'en alloit pri-
 » se, i'ay le tout fait prédre à mes femmes, & ietter, ou
 pour

A pour mieux dire, destourner & mettre en reserue
» dedans vn puis, où il n'y a point d'eau, & qui est
» sçeu de peu de gēs, pource qu'il ya vne grosse pier-
» re dessus qui en bousche l'entree, & force arbres
» alentour qui le couurēt. Cela te sera vn thresor qui
» te rendra riche à iamais quand tu l'auras en ta pos-
» session, & à moy seruira de tesmoignage & de
» preuue pour te monstrier combien nostre maison
» estoit noble & opulēte par cy deuant. Le Macedo-
nien ces propos ouys, n'attendit pas qu'il fust iour,
ains sur l'heure mesme se fait conduire par Timo-
B clia au lieu, luy commandant qu'elle fermast seure-
mēt le verger apres elle, à fin que personne n'en
apperçeust rien, & descēdit tout en chemise dedās
ce puis : mais la hydeuse Clotho le conduisoit, qui
vouloit venger son forfait par la main de Timo-
clia qui estoit au dessus : car quand elle sentit à sa
voix qu'il estoit au fond, elle mesme luy ietta des-
sus grande quantité de pierres, & ses femmes aussi
y en ruerent plusieurs autres grandes & grosses,
tant qu'elles l'assommerent, & comblèrent le puis :
ce que les Macedoniens aians entendu, feirēt tant
C qu'ils retirerent le corps, & aiant desia esté procla-
mé à son de trompe par la ville, que lon ne tuaist
plus personne des Thebains, ils saisirent Timoclia
& la menerent deuant le roy Alexandre, auquel
ils feirent entēdre de poinct en poinct l'audacieux
acte qu'elle auoit ozé commettre. Alexandre iu-
geant bien à l'assurance de son visage & à la gra-
uité de son marcher, qu'elle deuoit estre de quel-
que grande & noble maison, l'interroqua premie-

rement qui elle estoit : & elle luy respondit d'une D
 grãde assurance, sans se môstrer estonnee de rien,
 „ l'ay eu vn frere nômé Theagenes, qui estant capi-
 „ taine general des Thebains en la bataille de Che-
 „ ronee cõtre vous, mourut en cõbattant pour la de-
 „ fense de la liberté des Grecs, à fin que nous ne tõ-
 „ bissions point en la misere, en laquelle nous som-
 „ mes presentement tõbez : mais puis qu'il est ainsi,
 „ que lon nous fait des oultrages indignes du lieu,
 „ dont nous sommes yssues, quant à moy, ie ne fuis
 „ point à mourir, car il m'est à l'aduétude trop meil-
 „ leur que de viure, pour essayer encore vne autre E
 „ telle nuiet que la passée, si toymesme n'y mets em-
 „ peschemet. A ces paroles, tous les gents d'hõneur
 qui furent là presents se prirent à plorer. Mais
 quant à Alexandre il luy sembla que le courage de
 ceste dame estoit plus grand, que de deuoir faire
 pitié, & louant grandement sa vertu & sa parole
 qui l'auoit bien atteint au vis, il cõmanda à ses ca-
 pitaines, qu'ils eussent soigneusement l'œil, & don-
 nassent bien ordre à ce que lon ne commeist plus
 de semblables excès en vne maison illustre, & quāt
 & quant ordonna que Timoclia fust remise en sa F
 pleine liberté, elle & tous ceux qui seroient trou-
 uez luy appartenir aucunement de parenté.

E R Y X O.

B A T T V S qui fut surnommé Eudemon, c'est
 à dire, heureux, eut vn fils qui eut nom Arcesilaus,
 ne ressemblant de meurs en rien à son pere, car du
 vivant

A viuant mesme de son pere, aiant faict faire des creneaux à l'entour de sa maison, il en fut condamné en vn talent d'amende par son pere mesme, & apres sa mort estant de nature fascheux, comme depuis il en eut le surnom, & aussi pource qu'il se gouuernoit par le conseil d'un sien amy Laarchus, qui ne valoit rien, il deuint tyran, au lieu de Roy, & ce Laarchus aspirant à la tyrannie, chassoit & bannissoit de la ville, ou bien faisoit mourir les principaux, & les meilleurs citoyens de Cyrene, & en reiettoit les causes sur Arcesilaus, & finablement
B il luy feit boire du poison d'un lieure marin, dont il tomba en vne maladie lente, & vne langueur fascheuse de laquelle il mourut, & ce pendant se saisit de la seigneurie, sous couleur de la vouloir conseruer, comme tuteur, à Battus fils d'Arcesilaus, lequel estoit contrefaict & boiteux, de maniere que tant pour son bas aage que pour l'imperfectiõ de sa personne, il estoit mesprisé du peuple, mais plusieurs s'adressoient à sa mere, luy obeïssioient volontiers, & l'honoroiẽt, d'autant qu'elle estoit femme sage, douce & humaine, &
C auoit beaucoup des plus puissans hommes du païs, qui estoient ses parents & amis, au moien dequoy ce Laarchus luy faisant la court, poursuiuit de l'auoir en mariage, luy offrant si elle le vouloit espouser d'adopter Battus pour son fils, & de le faire participant de sa seigneurie: dequoy Eryxo, car ainsi s'appelloit ceste Dame, s'estant conseillée avec ses freres, luy feit responce qu'il en communiquast avec eux, pource que fils trouuoient bon ce

mariage, si faisoit elle. Laarchus ne faillit pas de leur en parler, & eux de complot expressément fait entre eux, tiroient la chose en longueur, & le remettoient de iour à autre, mais Eryxo luy enuoya secrettement l'une de ses femmes, luy dire de sa part, que ses freres lors contredisoient à son intention, mais quand le mariage seroit consommé, ils n'en contesteroient plus, & seroient contraincts de le trouuer bon : & pourtant qu'il falloit, si bon luy sembloit, qu'il s'en vint la nuict deuers elle, & que tout le reste de l'affaire se porteroit bien, quand il seroit bien commencé. Ces propos furent merueilleusement plaisans à Laarchus, & estât du tout transporté d'aïse hors de soy, pour la demonstration d'amitié que luy faisoit ceste femme, il promeit qu'il se rendroit vers elle, à telle heure qu'elle luy commanderoit. Or faisoit Eryxo ce complot de l'aduis & conseil de son frere aîné Polyarchus, & aiant prefix le iour & l'heure qu'ils se deuoient trouuer ensemble, elle fait venir secrettement en sa chambre son frere, qui amena quant & luy deux ieunes hommes avec leurs espees, qui ne desiroient rien plus que venger la mort de leur pere, lequel Laarchus auoit de nouueau faict mourir, puis elle enuoya querir ce Laarchus, luy mādant qu'il vint seul sans ses gardes: si ne fut pas plus tost entré, que ces deux ieunes hommes le chargerent à coups d'espee, tant qu'ils le feirent mourir en la place, puis en ietterent le corps par dessus les murailles de la maison, & amenans Battus en public, le declarerent Roy à la mode & coustume du pais: & Polyarchus rendit

Aux Cyreniens leur ancienne & première sorte de gouvernement. Or y auoit il lors à Cyrene plusieurs souldards du roy d'Ægypte Amasis, ausquels Laarchus se fioit, & par le moien desquels il se rendoit formidable & espouuentable aux Cyreniens. Ces gens de guerre enuoyerent incontinent en diligence deuers le roy Amasis, pour charger & accuser Eryxo & Polyarchus de ce meurtre: dequoy le Roy fut courroucé, & sur le champ proposa de faire la guerre aux Cyreniens, mais sur ces entre-faittes il aduint, que sa mere alla de vie à trespas: &

B ce pendant qu'il fut occupé à en faire les funerailles, les nouuelles vindrent à Cyrene du mal-contentement de ce Roy, & de sa resolution de faire la guerre: si fut d'aduis Polyarchus d'aller luy mesme deuers luy pour rendre raison de son faict, & sa sœur Eryxo ne voulut pas demourer derriere, ains le suyure, & s'exposer au mesme peril que luy, & ne fut pas la mere mesme d'eux, nommee Critola, qui n'y voulust aussi aller, combien qu'elle fust fort vieille, mais elle estoit Dame de grande dignité & autorité, d'autant qu'elle estoit sœur germaine du

C premier Battus surnommé l'heureux. Quand ils furent arriuez en Ægypte, tous les autres seigneurs de la court approuuerent grandement ce qu'ils auoient faict en cest endroit, & Amasis mesme loüa infiniment la pudicité & magnanimité de Eryxo, & apres les auoir honorez de riches presents, & les auoir traittez royalement, les renuoyas rous, Polyarchus & les Dames, avec sa bonne grace à Cyrene.

XENOCRITE de la ville de Cumes, ne fait pas moins à louer & estimer pour ce qu'elle fait alencontre du tyran Aristodemus, que quelques vns pensent auoir esté surnommé Malace, qui vault autant à dire, comme mol, pour la dissolution de ses meurs : mais ils s'abusent pour ne sçauoir pas la vraye origine de ce surnom, car il fut surnommé par les barbares Malace, qui signifie garçon, pour ce qu'estant encore fort ieune entre ses compagnons d'aage, portans encore les cheveux longs, que lon appelloit anciennemēt coronistes, ce semble pour ceste occasion, és guerres contre les barbares il se faisoit bien veoir, & y acqueroit vn grād renom, non seulement pour sa hardiesse à coups de main, mais aussi encore plus pour son bon sens, sa diligece & prouoyance, en quoy il se monstroit singulier : de maniere que estant en fort bonne estime de ses citoiens, il fut incontinent auancé & promu aux plus grandes charges & dignitez de la chose publique, tellement que quand les Thoscans faisoient la guerre aux Romains pour remettre Tarquin le Superbe en sa royauté, dōt il auoit esté dechassé, les Cumains le firent Capitaine du secours qu'ils enuoyoient aux Romains, en laquelle expedition qui dura longuemēt, laissant faire à ses citoiens qui estoient sous sa charge au camp tout ce qu'ils vouloient, & les amadouant, comme flatteur plus tost que leur commandant comme Capitaine, il leur persuada de courir sus à leur Senat, quand

A quand ils seroiēt de retour, & luy aider à en chasser les plus puiffans & les plus gens de bien, tellement que peu à peu, par ces moiens il se feit tyran absolu. Et fil fut meschant & violent en autres extorsions, encore le fut il d'auantage enuers les ieunes femmes & les ieunes enfans de bonne maison, car on trouue par escript entre autres choses, qu'il contraignoit les ieunes garçons à porter cheueux longs comme filles, & des crespines & autres affiquets d'or par dessus: & au contraire les filles, il les contraignoit de se tondre en rond, & porter des manteaux, à la façon des ieunes hommes, & des sayes sans manches: toutesfois s'estant extremement enamouré de Xenocrite fille d'un des principaux citoyens qu'il auoit banny, il la teint, non pas apres l'auoir espousee, ou apres l'auoir gaignee par belles persuasions, pësant qu'elle se deuoit bien cōtenter d'estre avec luy en quelque sorte que ce fust, attendu qu'elle en estoit reputee bien heureuse & bien fortunee de tous ceux de la ville: mais toutes ces faueurs là ne luy esblouissoient point le iugemēt à elle, car outre ce qu'elle estoit marrie de ce qu'il couchoit avec elle sans qu'elle luy eust esté donnee ny fiācee par ses amis & parêts, elle desiroit le recouremēt de la liberte de son pais, autant cōme ceulx qui apertemēt estoient hais & mal voulus du tyrā. Or faisoit Aristodemus en ce tēps là enuirōner son territoire d'un fossé tout à l'enuirō, ouurage qui n'estoit ny necessaire ny vtile, mais seulemēt entrepris pour vser, fascher & cōsommer de trauaux ses pauures citoiēs, car il estoit cōmādē à chascū de porter

certaine quantité de terre par iour. Comme donc-
ques il allast veoir comment on y besongnoit, elle
destourna & couurit son visage avec vn bout de sa
robe: & passé qu'il fut les ieunes hōmes se iouans
& se mocquans d'elle, luy demandoient pourquoy
elle fuyoit ainsi de voir Aristodemus & auoit hon-
te de luy seul, & n'auoit point honte d'estre veüe
des autres: & elle leur respondit, mais bien à certes,
& parlant à bon esciant: C'est, dit elle, pource qu'il
n'y a entre les Cumains que Aristodemus seul qui
soit homme. Ceste parole touchoit à tous, mais
elle aiguillonna de honte ceux qui auoient le cœur
assis en bon lieu à entreprendre de recouurer leur
liberté. Et dit on, que Xenocrite l'ayant entendu,
dit, qu'elle aimeroit mieulx porter elle mesme sur
ses espaules la terre, cōme les autres, pour son pere,
prouueu qu'il peust estre present, que de participer
à toutes les delices, & à toute la puissance d'Aristo-
demus. Cela doncques cōfirma encore d'auanta-
ge ceux qui coniurerent alencontre du tyran, des-
quels le chef principal fut Thymoteles, ausquels
Xenocrite aiant baillé libre & seure entree, trou-
uans Aristodemus seul, sans armes & sans gardes,
en se ruant plusieurs sur luy, le tuerent facilement.
Voyla comment la ville de Cumes fut deliuree de
tyrānie par deux vertus d'une femme, l'une qui leur
dōna le pensēmēt premier & l'affection de l'entre-
prendre, & l'autre qui leur aida & leur dōna moien
de l'executer: quoy fait ceux de la ville offrirent à
Xenocrite plusieurs hōneurs, prerogatiues & pre-
sents, mais elle les refusant tous, leur demanda seu-
lement


Allement la grace de pouuoir inhumer le corps d'Aristodemus: ce qu'ils luy permirent, & outre l'eleurent prestresse & religieuse de Ceres, estimants que cest honneur qu'ils faisoient à Xenocrite, ne seroit pas moins agreable à la Deesse, que conuenable à elle.

LA FEMME DE PYTHES.

Aussi dit on que la femme du riche Pythes, du temps que le roy Xerxes veint faire la guerre aux Grecs, fut vne bonne & sage Dame: car ce Pythes aiant trouué des mines d'or, & aimant non par mesure, mais excessiuemēt, le profit grand qui luy en venoit, luy-mesme y employoit toute son estude, & contraignoit tous ses citoiens egalement à fouiller, porter, ou purger & nettoyer l'or, sans leur permettre de faire ny exercer autre œuvre du monde: de quoy plusieurs mouroient, & tous se fachoïēt, tellemēt que les femmes à la fin s'en vindrēt avec rameaux de suppliātes à la porte de ceste femme pour l'esmouuoir à pitié, & la prier de les vouloir secourir à ce besoing: elle les renuoya en leurs maisons avec bonnes paroles, les admonestant de bien esperer, & de ne se desconforter point: & ce pendant elle enuoya secrettement querir des orfeures à qui elle se fioit, & les renfermāt en certain lieu, les pria de luy faire des pains d'or, des tartes & gasteaux, de toutes sortes de fruiçts, & de toutes les chairs & viandes principalement qu'elle sçauoit que son mary Pythes aimoit le mieulx: puis quand

il fut de retour en sa maison, car il estoit lors allé en D
quelque voiage, comme il demanda à soupper, sa
femme luy presenta vne table chargee de toutes
sortes de viandes contrefaittes d'or, sans autre cho-
se qui fust bonne à boire ny à manger, mais tout or
seulement. Il y prit plaisir du commācement, mais
apres qu'il eut assez rassasié ses yeux à veoir tous
ces ouurages d'or, il demāda à manger à bon esciāt:
& elle luy demandant ce qu'il vouldroit bien man-
ger, le luy presentoit d'or, tāt qu'à la fin il s'en cour-
roucea, & cria qu'il mouroit de faim. Voire-mais
dit elle, vous en estes cause, car vous nous avez fait E
auoir foison de cest or, & faute de toute autre cho-
se: car tout artifice, tout mestier, & toute autre va-
cation cesse entre nous, & n'y a personne qui la-
boure la terre, ains laissant en arriere tout ce que
lon seme & que lon plante en la terre pour nour-
rir les personnes, nous ne faisons que fouiller &
chercher des choses qui sont à nous nourrir inuti-
les, nous consommons nous mesmes de labeur, &
nos citoiens apres. Ces remonstrances emeurent
Pythes, qui pour cela ne cessa pas entierement tou-
te son entremise des mines, mais y faisant trauailler
la cinquieme partie seulement de ses citoiens, les
vns apres les autres, il permet au reste d'aller vac-
quer à leur labourage & à leurs mestiers. Mais
quand Xerxes descendit avec vne si grande ar-
mee pour faire la guerre aux Grecs, s'estant mon-
stré fort magnifique au recueil, & traitement, &
grands presents qu'il feit au roy & à toute sa court,
il requit vne grace au roy, c'est que de plusieurs en-
fans

A fans qu'il auoit, il en dispensast l'un seul d'aller à la guerre, à fin qu'il demourast avec luy en la maison, pour auoir soing de le traitter & gouuerner en sa vieillesse: de quoy Xerxes fut si courroucé, qu'il feist mourir ce fils la seul, & l'aiât fait couper en deux pieces, feist passer son armee par entre deux, & emmena les autres qui tous moururent és batailles: à l'occasion de quoy, Pythes se desconfortant feist ce que font ordinairement ceulx qui ont faute de cœur & d'entendement, car il craignoit la mort, & haïssoit la vie: il eust bien voulu ne viure point, & si ne se pouuoit deffaire de la vie. Or y auoit il dedās la ville vne grande motte de terre, au long de laquelle passoit la riuiera qui se nommoit Pythopolites, il feist bastir sa sepulture dedans ceste motte, & des tournāt le cours de la riuiera, la feist passer à trauers ceste motte, de maniere qu'en passant elle venoit à razer sa sepulture. Ces choses preparees il descendit viuant dedans, & resigna à sa femme sa ville & toute sa seigneurie, luy enioignant qu'elle n'approchast point de ce monument, mais bien que seulement elle meist tous les iours son boire & son manger dedans vne petite nacelle, iusques à ce qu'elle veist que la nacelle passeroit outre la motte, aiant les viures tous entiers sans que lō y eust touché, & ors qu'elle cessast de plus luy en enuoyer, pour ce que ce seroit signe certain qu'il seroit decedé. Voila comment il acheua le reste de ses iours: & sa femme gouuerna depuis son estat sagement, & apporta heureuse mutation & changement de travaux aux subiects.



Baraboo donner de joie
pour donner. 410
pour pour 414
the 2 and last 416
donner de la 417
donner de la 418
the 419

